

# گنجی یاداں باردیاں

ڈاکٹر ہرکیرت سنگھ

اُتھا

پروفیسر عاشق رحیل

# یادوں گنجی باردیاں

مصنف

ڈاکٹر ہرکیرت سنگھ

الٹھا

پروفیسر عاشق رحیل

پاکستان پنجابی ادبی بورڈ

17/15 آؤٹ فال روڈ، لاہور

## ویروا

### صفحہ

### سرنانوان

11

● یاداں گنجی بار دیاں

16

● پنجاب دیاں باراں

24

● گنجی بار، تام جان پچھان

30

● ساڈا ٹبر گنجی بار پوجا

38

● گنجی بار وچ پہلا دن

44

● بار وچ پہلے کجھ دن

50

● گنجی بار دا تحفہ

61

● اوکڑاں تے مسئلے

67

● بار و ساؤنی کوئی کھینڈ نہیں سی

73

● نواں بھائی چارا۔ نویں بوبلی

80

● چک 79 وں پیا

86

● بار دا جیون رڑہن لگ پیا

92

● گنجی بار وچ بھٹھیاں چڑھیاں

97

● سبھ توں اوکھے دن

- 102 گنجی باردا اپنا سمھیا چار نکھر رہیاسی ●
- 108 ساڈے علاقے واسد دھارن جیون ●
- 115 گنجی باروچ ساڈا علاقہ ●
- 122 کار، ویہار، فصل واڑی ●
- 129 دودھ، گھیو، لسی دی سمھیا تا ●
- 135 پانی دی تہائی گنجی بار ●
- 140 لباس، رسم و رواج تے منورجن دے سادھن ●
- 147 ساڈے پنڈاں دا پچھو کڑ ●
- 154 ساڈے پنڈاں دا پچھو کڑ۔ مورچہ کوتل مارا ●
- 160 گنجی باردا پچھلا علاقہ ●
- 173 گنجی بار دے جانگلی ●
- 179 گنجی بار دی ویونت بندی ●
- 187 گنجی بار کیویں اجڑی ●
- 201 تے قافلہ تڑ پیا ●

## ادارے ولوں

وستیاں دا وسنا فیر نویں توں نواں روپ وٹانا، ہمیش  
توں ہوندا آیا اے تے ہوندا رہوے گا۔ ایہہ کوئی اچرج گل نہیں  
پر جدوں کسے وستی دے ون دی کتھا سنان آ لے نے اوہدے  
اٹاں وٹیاں نوں آپنے ساہمنے گھراں دا روپ دھار دیاں ویکھیا  
ہووے تاں گل کجھ ہوردی ہور ہو جاندی اے۔

پاکستان پنجابی ادبی بورڈ نے ”یاداں گنجی بار دیاں“  
چھاپن دا پر بندھ ایسے لئی کیتا ہے جے اوس وستی نوں وساؤن  
والے تے فیر ہمیش لئی اوہدے توں وچھڑ جان والے جی دے من  
دیاں گلاں ایہدے وچ بیان کیتیاں گئیاں جیہڑیاں ساڈے  
پڑھن آلیاں نوں یقینی طور تے پسند آن گیاں۔

ادارہ.....

ڈاکٹر ہرکیرت سنگھ ہوراں دی ایس کتاب ”یاداں گنجی بار دیاں“ نوں  
 شاہ مکھی روپ دین وچ مینوں بہت سواد آیا۔ کیوں جو اوہناں ایس کتاب وچ  
 کوئی سُنیاں سنایاں گلاں نہیں لکھیاں سگوں ایہہ اوہناں دی ہڈ ورتی دا بیان  
 اے۔ گنجی بار وساؤن وچ اوہناں تے اوہناں دے بزرگاں نے پہل کیتی سی۔  
 اوہناں دا خاندان پہلا خاندان سی جیہنے ضلع گورداسپور دے اک وسدے رسدے  
 پنڈ وچوں آ کے گنجی بار دے اوس علاقے وچ ڈیرے لائے جتھے نیڑے تیرے نہ  
 تے کوئی انسان سی تے نہ زندگی دیاں ہور لوڑ دیاں شیواں۔ اوہناں دا گھر پہلا گھر  
 سی جیہدیاں نہیاں گنجی بار دی دھرتی وچ رکھیاں گئیاں۔ اتھے آباد ہون وچ  
 اوہناں نوں کنیاں اوکڑاں دا مقابلہ کرنا پیا۔ کئے تہیہ سہنے پئے ایہناں دا ذکر میں  
 نہیں کراں گا ایہہ ایس کتاب وچ ڈاکٹر ہرکیرت سنگھ ہوراں دی زبانی ای بہت  
 موثر معلوم ہوندا اے۔ اوہناں دے بیان دا ڈھنگ بہت من کچھواں اتے سادگی  
 بھریا اے۔ آباد ہون توں لے کے اُجرن تک دے واقعییاں دی اوہناں تصویر کھچ  
 کے رکھ دتی اے۔ اوہناں ہر گل بڑے کھلے دل نال بغیر کسے تعصب توں پڑھن  
 والیاں تائیں اپڑائی اے۔ ایس لئی پڑھن والیاں نے ”یاداں گنجی بار دیاں“ نوں  
 دلاں دیاں ڈوہنگھیاں توں جی آیاں نوں آکھیا۔ اوہ خود لکھدے نیں کہ جدوں  
 ایس کتاب دیاں قسطاں پنجابی اخبار ”پنجابی ٹریبیون“ وچ چھپ رہیاں سن تاں  
 کوئی 130 توں ودھ پڑھن والیاں دے اوہناں نوں تعریفی خط ملے تے بہت

سارے لوگ خود اوہناں کول آ کے ایس کتاب دی تعریف کردے سن تے  
 ودھائیاں دیندے سن۔ ڈاکٹر ہوراں نوں ہرکھ اے کہ باراں بارے لکھن دا کسے  
 عالم، کسے لیڈر تے کسے لکھاری نے اُپرالا نہیں کیتا جدوں کہ ایہناں باراں وچوں  
 کئی اگھے عالم، پروفیسر، لکھاری، سیاسی لیڈر تے اُچے عہدیاں تے رہ چکے افسر  
 باراں بارے اوہناں نالوں زیادہ جانکاری دین والیاں کتاباں لکھ سکدے سن پر  
 کسے نے ایڈھر دھیان دین دی لوڑ محسوس نہ کیتی۔

ایس من کچھویں کتاب تے جناب شفقت تنویر مرزا ہوراں دی نگاہ  
 انتخاب پئی تاں اوہناں لہنوں شاہ مکھی روپ وچ چھاپن لئی پسند فرما لیا تے  
 لہنوں اتھا کرن دا فرض میرے ذمے لایا۔ محترمہ پروین ملک ہوراں تے ماں  
 بولی دے مہان سیوک ریاض راجی ہوراں نے جیہڑے پنجابی ادب تال ایٹا پیار  
 کردے نیں کہ جے ادب وچ کوئی وادھا ہووے تاں اوہناں نوں اپنے سریر  
 دے خون وچ وادھا ہوندا محسوس ہوندا اے کم چھیتی نیہرے چڑھاؤن لئی ہلا شیری  
 دتی۔ ایہہ ایہناں دی ہلا شیری تے ایس کم وچ میری مدد دی برکت اے کہ میں  
 ایہہ کم چھیتی مکاؤن وچ کامیاب ہويا۔ آس اے کہ ”یاداں گنجی بار دیاں“ پڑھن  
 والے لہنوں اپنیاں یاداں وچ دیر تائیں رسائی رکھن گے۔

عاشق رحیل

## دوشبہ

”یاداں گنجی بار دیاں“ وچ کچھی پنجاب دیاں  
 باراں دے سماجی ، سیاسی اتے ویسی اتہاس دا بڑا روچک  
 چترن ہے۔ گنجی بار دے وسن توں لے کے دیش دی ونڈ تک  
 دیاں گھٹناواں دا ورنن کردیاں (واقعیان دا ذکر کردیاں) ان  
 ونڈے پنجاب دے سمہیا چار (کلچر) نوں بڑی سرل اتے  
 سادہ بھاشا وچ درسایا گیا ہے۔

آس ہے ایس پُتک دا پنجابی ساہت جگت۔ ویش  
 کر کے کچھی پنجاب دیاں باراں توں اُجڑ کے آئے پنجابیاں  
 دلوں نگھا سواگت ہووے گا۔

جوگندر سنگھ پوار

وائس چانسلر

پنجابی یونیورسٹی، پٹیالہ



## یاداں گنجی بار دیاں

زندگی دی شام ہے۔ ایہہ سریر اٹھتر (78) سال ہنڈا چکا ہے۔ دیہہ  
 وے سارے پرزے ڈھلے ہو چکے ہن۔ اکھاں جواب دے رہیاں ہن۔ کناں  
 توں اچا سندا ہے۔ ہتھ کبدا ہے۔ لکھن وچ کافی دقت ہوندی ہے۔ دھیاں پتر  
 بڑے دور دور بیٹھے ہن تے بڑیاں چنگیاں پوزیشناں تے ہن۔ بھیناں بھراوی آپو  
 اپنے تھاں بڑے سوکھے ہن۔ میں تے میری پتی زرنجن کورا کیلے بیٹھے ہاں۔ ار بن  
 اسٹیٹ پیٹالہ دے ایہناں پکے کوٹھیاں وچ جیہناں نوں لوک کوٹھی آکھدے ہن،  
 پکھے چل رہے ہن۔ کولروچوں ٹھنڈی ہوادے پھراٹے آرہے ہن۔ ڈلہوزی دی  
 برقاں چم کے آئی ٹھنڈی پون وگے تے اسیں یاد کر رہے ہاں۔ گنجی بار (ضلع  
 ملتان) دے اوہناں کچیاں کوٹھیاں نوں جیہناں وچ جیٹھ ہاڑ دیاں لوواں توں  
 ڈردے لوک اندریں وڑ کے رہندے سن تے پکھے جھل جھل کے دوپہر بیتاؤندے  
 سن۔ یاد آوندے ہن اوہ سنگی ساتھی جو ابے جیوندے ہن پر گنجی بار دے وچھڑے  
 پھیر کدی نہیں ملے اتے نہ ہی اوہناں دے ملن دی آس ہے۔ یاد آوندے ہن  
 گنجی بار دے کپر، بٹے، جھنکیاں، جنڈ، کریر، فروانہہ تے ون۔ ون داناں لہاں  
 گنجی بار دے جیون دا اک رومانٹک پکھ اکھاں دے ساہویں گھسن لگ پیندا  
 ہے۔ ون گنجی بار دی جند جان سی۔ بوہڑ وانگ ون دی عمر وی بہت لمی ہوندی  
 ہے۔ کھیاں وناں دی ٹہنیاں جھک کے بھوں نال لگ جان دیاں ہن اتے پٹھاں  
 اک پورا کوٹھا بن جاندا ہے۔ بار دے جانگی سیال ایہناں وناں پٹھاں ہی

بیتاؤندے سن۔ اوہناں دیاں بکریاں، بھيڈاں دے اجڑ وی اوہناں وناں تھلے  
 ہی پٹھدے سن۔ وناں دے پتیاں اُتے ہی ڈکھیاں (اوٹھاں والیاں) دے  
 اوٹھ پلدے سن۔ کھجورنوں چھڈ کے ون ہی ایس علاقے دا پھلدار رُکھ سی جس  
 دیاں پیلوں سدھیاں ٹاہناں نالوں توڑ کے کھائیداں سن۔ ساڈے لوک وی  
 جدوں پہلاں پہل گئے، اوہناں وچوں کسے نے سال کسے نے چھ مہینے اوہناں  
 وناں تھلے ہی گزارے۔ فیر اوہناں وناں دے توڑیاں (تھتیراں) تے کڑیاں  
 ہال ہی کچیاں کوٹھیاں دیاں چھتاں پائیاں اخیر تک گرمیاں وچ مال ڈنگر وناں  
 پٹھ ہی بندھدے رہے۔ وناں پٹھ ای ساڈے کوانے سن۔ وناں بیٹھ ہی کھریاں  
 تے وناں پٹھ ہی دوپہر نوں محفلاں لگدیاں سن پر اسیں دوویں جی سوچدے ہاں  
 کہ اپنے سکھ آرام وچ پٹھیاں سانوں مُڑ مُڑ گنجی بار کیوں یاد آوندی ہے۔ کیوں  
 یاد آوندی ہے۔ چک نمبر 79/15 ایل چک 82 (میرے سوہریاں دا پنڈ ضلع  
 ملتان) جتھے کپڑے دھون لئی ڈنگیاں جاں کھالاں تے جانا پیندا سی۔ پین والے  
 پانی لئی پنڈ دا اکو سا نجھا کھوہ سی۔ جتھے بیمار ہون تے کوئی دوائی نہیں سی لہدی۔  
 جتھوں ریلوے اسٹیشن گھٹوگھٹ 14 میل دوری تے اکواک شہر خانوال 18 میل  
 - گنجی بار وچ اسیں ٹائم دا اندازہ کندھاں تے رکھاں دے پر چھانویاں توں  
 لاؤندے ساں۔ اتھے میرے سامنے وکھ وکھ کمریاں دیاں چار گھڑیاں ہن۔ گنجی  
 بار وچ رہندیاں میں سائیکل وی نہ خرید سکيا۔ اج گورو دی کرپانال کار ہے۔ سکوتر  
 ہے اتے چھٹیاں کٹن آئے پوتیاں دوہتیاں دے دل پرچاؤے لئی موپڈ وی ہے۔  
 فیر وی گنجی بار کیوں یاد آوندی ہے۔ بھلاؤن دا جتن کیتیاں وی کیوں نہیں  
 بھلدی۔ عقل ایس گل دا جواب نہیں دے سکدی پر دل کہندا ہے: ”گنجی بار  
 سورگ سی، جتھے اسیں ہن رہندے ہاں اتھے عیش آرام ہن پر ایہہ سورگ نہیں۔“

گنجی بار دیاں گھوڑیاں دے سامنے ایدھردیاں کاراں دی سواری بے اہمیت ہے۔  
گنجی بار دیاں لالیناں تے سرہوں دے تیل دے دیویاں دے مقابلے وچ  
ساڈیاں کوٹھیاں دیاں ٹیوب لائکاں پچھن۔ عام قاری تاں میرے ایہناں لفظاں  
نوں جذباتی جنون یاں مالخو لیا ہی سمجھن گے پر گنجی بار وچوں آیا ہو یا کوئی بزرگ  
قاری جے ایہناں لائکاں نوں پڑھے تاں اپنی آتما نوں پچھ کے دے کہ میرے  
اپروکت وچار نرا جذباتی جنون ہن؟ کیہ سچ سچ اسیں سورگ چھڈ کے نہیں آئے۔  
ایدھر عیش آرام ہے۔ گنجی بار وچ من دی شانتی سی۔ ایدھر اثر و رسوخ  
ہے۔ سرکاری تے غیر سرکاری وقتی وفاداریاں تے نقلی سرپرستیاں ہن۔ اودھر  
برادریاں سانجھ بھیا لیاں؟ سچیاں دوستیاں یاریاں تے سچیاں رشتے داریاں سن۔  
کالج پڑھدایاں فوجی نوکری کردا جدوں کہتے میں چھٹی آونداساں ادھا پنڈا ملن  
آوندا۔ اتھے اربن سٹیٹ دی 330 نمبر کوٹھی وچ جے کہتے رات نوں سٹا میں  
مرجاواں تاں آنڈھیاں گواہنڈیاں نوں شاید تیجے چوتھے دن پتہ لگے۔ اج جدوں  
میں سویرے 8 روپے کلودا اوہ دودھ تیلے وچ پواندا ہاں جس وچ تیجا حصہ پانی پاؤنا  
اخلاقی (تے سگوں قانونی) طور تے وی جائز ہے تاں مینوں گنجی بار دے اوہ دن  
یاد آوندے ہن۔ جدوں نکالاں نوی ساڈی ماں چائی وچ دودھ ودھ جاندا تاں  
احاطے دی پرلی نکرے رہندی نامو حسین نوں واج مار دی سی: ”نامو دودھ لے  
جا“۔ اتے نامو اپنے سلور (ایلو مونیئم) دے تیلے وچ کوئی دوڈھائی سیر دودھ لے  
جاندی سی۔ (اسیں اودھر ”حاطہ“ ”حائی“ ”حسین“ ہی بولدے ساں۔ بھاویں  
مول اچارن کجھ فرق والا ہے) اودھر خوشیاں سن، عیش سی۔ محفلاں لگدیاں  
سن۔ مجلساں بھر دیاں سن۔ ایدھر رونے ہن۔ جھورے ہن۔ چٹایاں کالا دھن  
کماؤن وچ دنیا انج غلطان ہے کہ ساڈے نوجواناں نوں مرے پئے پیو دے

سکار (کفن دفن) لئی سماں کڈھنا وی اوکھا ہے۔ گنجی بار والیاں جوانیاں، گنجی بار والیاں رنگینیاں، گنجی بار والے ہاے۔ ایدھر کتے دیکھے سنے ہی نہیں۔ سچ دسیو گنجی بار دے وسنیکو کیہ اسیں سورگ چھڈ کے نہیں آئے۔

ہن اوہناں بد نصیب بار والیاں وچوں میں اک ہاں۔ جیہناں نے گنجی بار اپنی اکھیں آباد ہوندى دیکھی۔ اپنی اکھیں وسدی دیکھی اتے اوہناں بد بخت اکھاں نال اُجڑدی وی دیکھی۔ ایس لئی کافی سمیں توں سوچ رہیا ساں کہ گنجی بار بارے اک کتاب لکھی جاوے۔ اجہی کتاب لکھنا اک ہور پکھوں وی ضروری سی۔ بھاویں سیکولر سماج دے دعوے دار میرے ایس بیان نوں پاپ یاں کفر ہی کہن پر میں سچا کفر توں دا وی حوصلہ کردا ہاں۔ اوہ سچا کفر ہے، پنجاب دیاں باراں، گنجی بار، ساندل بار، کڑیانہ بار، نیلی بار، سکھ کاشتکار ہی آباد کر سکدے سن۔ ایسے کتاب وچ اگے میرے ایس بیان دے ثبوت وی مل جان گے۔ تازہ مثال ہے، اتر پردیش وچ پچھلیاں دوہاں صدیاں توں کھیتی والی زمین دی تنگی ہے پر ترائی دے جنگل آباد کرن دی کسے نے جرات نہیں کیتی۔ ترائی وی سکھ زمیندار نے ہی وسائی ہے۔

خیر گنجی بار سبھی کتاب لکھن لئی میں بڑا چر سوچدا رہیا۔ پہلاں یونیورسٹی وچ اپنیاں ذمے داریاں کارن میں ایس کارج لئی سماں نہ کڈھ سکیا۔ پچھوں اودھروں ویہلا ہو کے جدوں کتاب لکھن دامن بنایا تاں پتہ لگا کہ پنجابی دی کتاب چھاپن لئی کوئی ناشر تیار نہیں ہوندا تے جے اپنے خرچ تے چھوادیئے تاں کتاب نوں خریدن والا کوئی نہیں لبھدا۔ میرا حوصلہ پست ہو گیا۔ دل نوں دھکا لگا پر سوچیا کہ جس کتاب نوں کسے نے پڑھنا ہی نہیں اوس نوں لکھن لئی سرکھپائی کیوں کیتی جائے۔ اوہ وی ایس بڈھاپے وچ اتے تھکے ہارے سریر نال۔ فیر گنجی

بارنال ہیج رکھن والے بہت ساتھی ہن تک سچے سورگاں وچ پہنچ چکے ہون گے۔  
میری کتاب کس نے پڑھنی ہے؟

اوہنیں دینیں ہی اپنے نوجوان متر ”پنجابی ٹریبیون“ دے ایڈیٹر سردار  
ہر بھن سنگھ ہلواروی نال اچانک ملاقات ہو گئی، اوہناں نال ایس پراجیکٹ بارے  
گل کیتی تاں اوہناں نے بڑی حوصلہ افزائی کیتی۔ کہن گے: توں کتاب لکھ، باقی  
سبھ کجھ میرے تے چھڈ دے۔ میں پہلاں ایس نوں پنجابی ٹریبیون وچ قسط وار  
چھاپ دیاں گا پھیر کتاب دے روپ وچ چھاپن داوی پر بندھ کراں گا۔ میرا  
حوصلہ پھیر چمک اٹھیا۔ لکھنا شروع کیتا۔ سریدی کمزوری تے بڈھپے دیاں ہور  
کمزوریاں نال ہی ہن پر میں پر ماتما تے گورو وچ یقین رکھن والا ہاں۔ یقین ہے  
کہ گورو میری مدد کرے گا۔

میری خواہش اتھے کوئی مستند دستاویز پیش کرنا نہیں، نہ ہی میں اتھے  
تصویراں پیش کرنیاں ہن۔ نہ ہی گنجی باردی تاریخ لکھنی ہے۔ میں صرف ایہہ دسنا  
ہے کہ ایہہ بار آباد کردیاں ساڈیاں بزرگاں کیہ کیہ جفر جالے۔ گنجی بار دے کلچر نال  
جان پچھان کراؤن دا جتن کیتا جائے گا تے انت وچ ایہہ دسنا دا جیرا کراں گا کہ  
ایہہ بار کنج اُجڑی۔ میری پہنچ کجھ جذباتی ہووے گی۔ ایہہ میری مجبوری ہے۔ میں  
اپنے سر بتی کتھاسنا رہیا ہاں پر اتھے کوئی گل ودھا چڑھا کے دسنا دا جتن نہیں کیتا  
گیا۔ جیہڑے قاری گنجی بار چھڈ کے آئے ہن، اوہ میری شاہدی بھرن گے۔

انت وچ میں باراں توں آئے بزرگاں نوں اپیل کردا ہاں کہ آون  
والیاں پیڑیاں نوں دس جاؤ۔ یاد کروا جاؤ کہ باراں تہاڈے وڈیاں نے وسائیاں  
سن۔ ساتھوں باراں ہی نہیں کھسیاں۔ ساڈی انکھ کھسی ہے۔ (جو ایدھر آ کے کہتے  
وی دوبارہ نہیں اُسری) تے ساڈے سرگ کھسے ہن۔

## پنجاب دیاں باراں

باراں بارے لکھن توں پہلاں لفظ ”بار“ دے معنے دس دی لوڑ جا پدی ہے۔ کیوں جے عام پنجابیاں نوں ایس لفظ دے اصلی معنیاں بارے کجھ بھلیکھا ہے۔

”بار“ دے ڈھلے معنے بن ”غیر آباد جنگلی علاقہ“ ملتانى بولی وچ اج وی لفظ بار ایہناں ہی معنیاں وچ ورتیا جاندا ہے۔ گورونانک دیو جی نے بار ہمارا تکھاری وچ اچاریا ہے۔

چیت بسنت بھلا بھور مہاوڑے  
بن پھولے منجھ بار میں اپر گھر بہاوڑے

(صفحہ نمبر 1108)

اتجھے وی لفظ بار جنگل دے معنیاں وچ ہی ورتیا گیا ہے۔ جدوں انگریزاں نے نہراں کڈھ کے ایہناں جنگلاں نوں آباد کیتاں تہاں سبھ توں ودھ زمین الاٹ کیتی، ماچھے، مالوے، دوآبے دے سکھ کاشتکاراں نوں۔ ضلع گوجرانوالہ، سیالکوٹ تے پرانے ضلع انبالے دے وی کافی سکھاں نوں باراں وچ زمین ملی۔ کجھ پنڈ ضلع گجرات دے زمیندار سکھاں دے وی سن۔ ساندل بار دے وسنیک پروفیسر شیر سنگھ شیر دا خیال ہے۔ ایس بار وچ نویں آباد ہوئی زمین 70 توں 75 فیصد حصہ سکھ کاشتکاراں نوں الاٹ ہويا۔ گنجی بار تے نیلی بار وچ وی تقریباً ستر فیصدی زمین سکھاں نوں ملی۔ ایہناں وچوں کسے وی علاقے وچ سکھاں دی

آبادی اُنی (19) فیصدی توں ودھ نہیں سی۔ ایہہ باراں آباد ہو گئیاں، جنگل وڈھ کے صاف کر دتے گئے پر ایہناں علاقیاں داناں ”بار“ ای رہیا۔ انجے لفظ بار دے معنیاں وچ وسعت ہوئی: ”نویں وی نہری کالونی“۔

پنجاب دیاں مشہور باراں چار ہن۔ ساندل بار، کڑیاں بار، گنجی بار تے نیلی بار۔ سبھ توں مشہور ساندل بار جس وچ ضلع لائل پور (ہن فیصل آباد) آوندا سی۔ کافی علاقہ شہوپورہ تے کجھ حصہ جھنگ دا وی آوندا سی۔ ایہہ بار دریا راوی تے کجھناں دے وچالے پیندا ہے۔ ایہہ علاقہ ”رچنا دو آب“ دا دکھنی حصہ ہے۔ لائل پور سکھاں دا گڑھ سی۔

دیش دی وٹڈتوں پہلاں پنجاب وچ صرف تن خالصہ کالج سن۔ خالصہ کالج امرتسر، خالصہ کالج گوجرانوالہ تے خالصہ کالج لائل پور۔ ایس بار دے سکھ بڑے اثر رسوخ تے رُعب والے۔ قربانی دے جذبے والے تے پڑھے لکھے سن۔ نذکانہ صاحب دے شہیدی جتھے دا جتھے دار شہید بھائی چھمن سنگھ، شہید سردار بھگت سنگھ تے اوہناں دے چاچا جی سردار اجیت سنگھ سب ساندل بار دے وسنیک سن۔ ایہہ بار چھلی صدی دے اخیر دہاکے وچ آباد ہوئی۔ ایس نوں ”نہر لور چناب“ دا پانی پیندا سی۔ جدوں ایہہ کتاب ”پنجابی ٹریبیون“ وچ لڑی وار چھپی، جدوں میں ساندل بار دے نام بارے کوئی تسلی بخش جانکاری نہیں ساں دے سکيا۔ ایس سلسلے وچ ڈاکٹر سرب جیت سنگھ گھمن دا پتر وی پنجابی ٹریبیون (02-03-93) وچ چھپیا سی۔ جس وچ ڈاکٹر صاحب نے احمد سلیم دی کتاب ”لوک واراں“ دے حوالے نال دسیا ہے کہ ساندل دُ لے بھٹی دے باپ داناں سی جس توں ایس بار داناں ”ساندل بار“ پیا۔ ایہہ بھامن جوگ نہیں۔ ”ساندل بار“ دُ لے بھٹی دے سمیں توں کافی پہلاں داناں نام ہے۔ ہن تک مینوں ایس بارے

کافی جانکاری وی مل چکی ہے۔ جس لئی میں سردار بھگونت سنگھ آزاد دادھبادی ہاں  
جیہناں نے ساندل بار اُتے کتاب لکھی ہے۔ جو ہن تک چھپ چکی ہے۔ بار دے  
نام بارے اوہناں کافی مواد اکٹھا کیتا ہے۔ میں اوس وچوں صرف دو بچھا اتھے  
پیش کردا ہاں:

1- ایہہ نام ایس جنگل وچ رہن والے پرانے سمیں دے رشی دے نام توں  
پیا۔ سنسکرت ادب وچ ایس رشی دا نام ”شاؤ لیر“ ملدا اے جو پنجابی  
وچ (سگوں اپ بھرنشاں تے پراکرت وچ ہی) ساندل بن گیا۔  
(ایہہ ترقی بھاشا وگیان دے نیا مطابق بالکل ٹھیک ہے) ایہہ رائے  
بھائی کاہن سنگھ نامھ نے مہان کوش (لغت) وچ دتی ہے۔ ساندل بار  
دے اندراج تحت (بھائی کاہن سنگھ کچی پٹی جانکاری دے تحت لکھن  
والے عالم نہیں سن۔ ایس دا اوہناں کول ضرور ہی کوئی من دے قابل  
ثبوت ہووے گا۔

2- سردار بھگوت سنگھ آزاد نے دو ہور ذریعاں توں ایس بار دا پرانا نام  
”سادھڑ بار“ لبھا ہے۔ بابا مہربان والی جنم ساکھی وچ ایس بار دا نام  
”سادھڑ بار“ آیا ہے۔ سادھڑ پرانے سمیں دا اک مشہور دھاڑوی سی۔  
اج کل دے علاقہ سانگل وچ رہندا سی۔ ایسے دے نام تے بار دا نام  
”سادھڑ بار“ پیا ہے۔ جو ترقی دیاں کنیاں حالتاں وچوں لنگھ کے  
ساندل بار ہو گیا۔

اپروکت دوہاں بھاداں وچوں کوئی وی ٹھیک ہو سکدا ہے۔ کوانہ بار  
وچ ضلع سرگودھا دا علاقہ آونداسی جس دا پرانا نام شاہ پوری تے شاید ہن وی  
شاہ پور بنا دتا گیا ہے۔ ایہہ بار دریا جھناں تے جہلم دے وچالے پیندی سی



اتے ”وچ دو آب“ دا اک حصہ سی۔ کڑانہ اک پہاڑی دا نام سی جس توں ایس بار دا نام ”کڑیانہ بار“ پیا۔ ایس بار وچ ودھیرے گھوڑی پال مربعے دتے گئے سن۔ فوج دے رسالیاں واسطے چنگی نسل دے گھوڑیاں دی لوڑ سی۔ اک زمیندار نوں دو مربعے دتے جاندے سن تے نال اُس نوں اک گھوڑی رکھنی پیندی سی جو گھوڑی پال مٹھے دے افسر خرید کے دیندے سن۔ قیمت زمیندار نوں دینی پیندی سی۔ ایہناں گھوڑیاں دی سنبھال تے پرورش لئی اچھے جتن کرنے پیندے سن۔ اوہناں نوں سرکاری اصطبلوں وچ رکھے گھوڑیاں توں ملایا جانداسی۔ جدوں بچہ سواری جوگ ہو جاوے، ایس نوں سرکار خرید لیندی سی۔ قیمت مناسب دتی جاندی سی۔ ایہناں گھوڑیاں دا سمیں سمیں معائنہ ہوندا رہندا سی۔ جس جاگیر دار دی گھوڑی دی دو یا تن وار نکائی ہو جاوے، اُس دے مربعے ضبط ہو جاندے سن۔ مربعے دا کیونکہ گھوڑی نال سبھدھ سی تے گھوڑی صرف اک آدمی دی ملکیت ہوسکدی سی۔ ایس لئی پو دی موت پچھوں گھوڑی تے مربعے صرف وڈے پتر نوں ملدے سن۔ اوہ سلسلہ دوسری عالمی جنگ تائیں قائم رہیا۔ دو جی وڈی جنگ وچ رسالے ختم کر کے اوہناں نوں ٹینک رجمنٹ وچ بدل دتا گیا۔ سوہن گھوڑیاں دی لوڑ نہ رہ گئی پر مربعے مالک نوں پکے کر دتے گئے۔ ایہہ بار ایس صدی دے پہلے دھا کے وچ لائل پور والی بارتوں کجھ پچھوں آباد ہوئی۔ ایہہ نہر لوئر جہلم نال سیراب ہوندی سی۔

گنجی بارتے نیلی بار دوویں باری دو آب یعنی بیاس تے راوی دے وچالے دکھنی حصے وچ آوندیاں سن۔ ضلع منٹگمری (ہن ساہیوال) تے ملتان وچ گنجی بار ایس علاقے دے پچھمی حصے دا ناں سی۔ ایہہ حصہ نہر لوئر باری

دو آب نال آباد ہو یا سی۔ ایہہ نہر اوس سمیں مطابق انگریز حکمراناں دی اک کرامت سی۔ راوی دا پانی مادھو پورتوں کڈھی نہر اپر باری دو آب نے کھچ لیا سی اتے دریا وچ اپنا پانی نہیں سی جس نال اک نہر نوں سارا سال پانی مل سکدا۔ ایس لئی دریا جہلم وچوں نہر کڈھ کے اوس دا پانی جھناں وچ سُٹیا گیا۔ جھناں وچوں نہر کڈھ کے راوی وچ سُٹی گئی تے راوی وچوں بلوکی (ضلع لاہور) دے مقام توں لوہر باری دو آب نہر کڈھی گئی۔ جس نال گنجی بار آباد ہوئی۔ ایہہ سارا پروجیکٹ 1902-03 وچ اُلکیا گیا پر گنجی بار 1914 توں 1922-23 تک دے سمیں وچ آباد ہوئی۔ انج گنجی بار اصل وچ تیناں دریاواں دے پانی تے پل دی سی۔

”نیلی بار“ ضلع منٹگمری، ملتان دے پوربی حصے دا نام ہے۔ جس علاقے دی ڈھلان دریا ستلج، بیاس ول نوں ہے۔ ایہہ بار فاضلکا لاگیوں سلیمانکی دے مقام توں ستلج، بیاس دے سانجھے وہن وچوں کڈھی نہر نال آباد ہوئی۔ ایہہ سب توں پچھوں آباد ہون والی بار ہے جو ایس صدی دے تیجے دہاکے وچ ویسی۔ ایس دا نام وی نواں ہے۔ ”ساندل بار“، گنجی بار، کڑانہ بار دے نام پرانے فارسی ادب وچ ملدے ہن پر نیلی بار دا ذکر نہیں۔ ایس بار دا نیلی بار ہون دا کارن ایہہ دسیا جاندا ہے کہ دریا ستلج دا پانی صاف ہے۔ ایس وچ گار (ریت مٹی وغیرہ) دی ملاوٹ بہت گھٹ ہوندی ہے۔ ایس لئی دریا دا اتے ایس وچوں نکلی نہر دا پانی نیلی بھے ماردا ہے۔ جس توں ایس دا نام ”نیلی بار“ ہو گیا۔ جے ایس دا کوئی ہور کارن ہے، ایس دا مینوں پورا گیان نہیں۔

ایہناں توں علاوہ اک ہور چھوٹی جیہی باری جو ضلع ملتان دیاں چونہہ تحصیلاں تک محدود سی۔ ایس بار دا کوئی خاص نام نہیں سی۔ پر ایہہ سدھنے نام دی

نہرنال سیراب ہوندى سی۔ جس وچ مربعے نہیں ”قطعے“ الاٹ کیتے جاندے سن۔ اک ”قطعے“ وچ تقریباً 195 ایکڑ زمین ہوندى سی۔ سدھن کیوں جے چھماہی نہر سی ایس لئی ہر قطعے وچ اک کھوہ وی لاونا پئیدا سی۔ ایہہ بار پچھلی صدی دے آخری دھا کے وچ وى۔ ایس علاقے وچ ضلع لاہور دے دکھنی حصے دے سکھ زمیندار آباد کیتے گئے۔ بھاویں ایہناں دے پنڈ بہت تھوڑے جیسے سن۔ صرف چوداں پنڈراں پر ایہہ بڑے دبدبے والے سکھ سن۔ چار پھیرے او سے علاقے دے پرانے وسنیک مسلمان وسے ہوئے سن پر ایہناں سکھاں نے اپنا بڑا رعب داب بنایا ہو یا سی۔ خالصہ ہائی سکول خانیوال وچوں میں میٹرک پاس کیتا۔ پہلاں ایسے علاقے دے پنڈ جو ند سنگھ والا (بج کسی) وچ کھلا سی۔ پچھوں گنجی بار آباد ہون تے نواں شہر خانیوال وی وسیا تے ایہہ سکول وی اوتھے بدل دتا گیا کیوں جے خانیوال مرکزی تھاں سی۔ اک چنگا قصبہ بن گیا سی۔ ریلوے اسٹیشن سی۔

سردار نرائن سنگھ جو کافی سمیں تک گورو دوارہ نکانہ صاحب دے مینجر رہے۔ ایسے علاقے دے وسنیک سن تے کجھ سمیں لئی اوہ خالصہ ہائی سکول خانیوال دے ہیڈ ماسٹر وی رہے۔ اتے ایس سکول وچ کجھ سمیں لئی فارسی دا استاد رہیا سی امرکوی پروفیسر موہن سنگھ۔ اج کل ایہہ سکول شاہ آباد ماکنڈا (ہریانہ) وچ ہے۔

نہر سدھن دا ذکر آیا تاں ایس بارے وی کجھ الفاظ کہن دی لوڑی جا پدی ہے۔ سدھنے اصل وچ دریا راوی دے کوئی باراں تیراں میل لمے حصے دا نام ہے۔ جتھے دریا بالکل سدھا وگدا ہے۔ کنارے وی نہر دے کناریاں وانگ سدھے نہیں۔ ہڑا وے تاں دریا کنڈھیاں اُتوں وی اُچھا جاند ا ہے پر کنڈھے

ٹنڈے نہیں۔ جتھے سدھنے شروع ہوندى ہے اوتھے جیتا کنڈ نام دا تیرتھ استھان بنیا ہویا ہے۔ ایہہ ستھان قصبہ تلنبہ توں کوئی پنج چھ میل پچھم ولے ہے اتے میں ایہہ تھاں ویکھیا ہویا ہے۔ کیوں جے میں ستویں اٹھویں جماعت مڈل سکول تلنبہ وچوں کیتیاں سن۔ جتھے سدھنے ختم ہوندى ہے اوتھے سجے کنارے ضلع جھنگ وچ ”رام چونترا“ تے کجے کنڈھے (ضلع ملتان) ”پچھم چونترا“ نام دے دو تیرتھ استھان ہن۔ اتھے وساکی دامیلہ لگدا ہے۔ ایہہ تھاں وی میں ویکھے ہوئے سن۔ سیتا گنڈ تے رام چونترے دے وچالے دریا دے کنڈھے اک مسلماناں دا چھوٹا جیہا پنڈ ہے جس دا نام بغداد شریف ہے۔ اتھے وی اک مسلمان فقیر دی یاد وچ میلہ لگدا ہے۔ ایہہ تھاں وی میرا ویکھیا ہویا ہے اتے دریا اتھے وی ٹھیک نہر وانگ سدھا ہے اتے کنارے کھڑے ہن۔

ایس قدرت دے عجوبے دا بیان کرن والی متھہاسک کتھا انج دی جاندى ہے۔ بن باس دے دناں وچ جدوں سری رام چندر پچھم تے ماتا سیتا جی اتھے پجے تاں بڑا رمیک جا پیا۔ دریا دا پانی صاف ستھرا تے موسم وی سہانا سی۔ دوویں بھرا سیتا جی نوں اتھے بٹھا کے آپ دریا وچ ترن لگ پئے تے پانی دے وهاول تر دے گئے۔ تر دے وی جان دے سن تے پچھا نہہ ول جھاتی مار کے سیتا جی نوں ویکھدے جان دے سن۔ اوہناں دی نگاہ دی کرامت نال دریا سدھا ہوندا گیا اتے اج تک سدھا ہے۔

جغرافیہ دان اس عجوبے دا کارن کوئی وی دن پر ایہہ میرا اکھیں ڈٹھا نظارا ہے کہ سیتا گنڈ توں چڑھدے پاسے دے دریا دے کنڈھے ٹٹے بھجے تے سجے کجے کھلے ہوئے ہن۔ اتے پچھم چونترا توں اگے وی فیر دریا اوویں دریاواں دے وہن وانگ ہی کھلریا پکریا ہے تے وچالے بالکل سدھا کھڑے

کناریاں والا ہے۔ کچھن چونتر اتوں کڈھی گئی ہے: ”سدھنے نہر“ جس بارے  
اسیں لکھ رہے ہاں۔

انگریزاں دوارا بوٹے شاہ توں پنجاب بارے لکھوائی کتاب وچ ساندل  
دی بار، ڈ۔ لے بھٹی دی بار اتے گنجی بار دی تھاں ”گنجی دی بار“ لکھیا ہے پر بوٹے  
شاہ دی اس کتاب وچ کتے کتے غلط معلومات دتیاں گئیاں ہن۔ انکل پچو بیان  
بازی ہوئی ہے۔ ”سدھنے“ دا ذکر بوٹے شاہ نے وی کیتا ہے۔ راوی دے اُس  
حصے دا جس نوں ”سدھنے“ کہندے ہن۔



## گنجی بار، نام جان پچھان

پچھے دسیا جا چکا ہے کہ گنجی بار ضلع منگلوری دے پچھی حصے وچ آوندی سی۔  
ایہہ بار صدی دے دوجے دہاکے وچ آباد ہوئی۔ ایس نوں دریا راوی وچوں  
کڈھی نہر ”باری دو آب“ دا پانی پیندا سی۔

میں بڑا سوچدار ہیا کہ ایس نوں ”گنجی بار“ کیوں آکھیا جاندا ہے۔  
اٹھارویں اُنہویں صدی وچ لکھیاں کجھ فارسی کتاباں ویکھیاں۔ اوہناں وچ  
گنجی بار دا نام آیا پر ایہہ کتے نہیں دسیا گیا کہ ایس بار نوں ”گنجی“ دی اپادھی  
کیوں ملی۔ اک کتاب وچ تاں ایہناں باراں دے نام ”ساندل بار“ تے  
”گنجی دی بار“ لکھ کے مسئلہ ہور وی الجھا دتا۔ گل صاف ظاہر سی اتے گنجی دا  
گنج ساڈیاں اکھیاں ساہویں سی پر ساڈی سوجھ بوجھ ہی اپنی چندھیائی ہوئی سی  
کہ ایس ایس بھید نوں سمجھ ہی نہ سکے۔ میں دھنوادہاں اپنے پرانے دوست  
میجر گر مکھ سنگھ دا جیہناں نے گنجی بار دے معنے دس کے مینوں ایس توں واقف  
کرایا۔ میجر گر مکھ سنگھ فوجی نوکری دوران دو تن تھائیں میرے نال رہے اتے  
ریٹائر ہون پچھوں پنجابی یونیورسٹی دے ”سکھ دھرم و شوکوش“ (انسائیکلو پیڈیا آف  
سکھ ازم) شعبے وچ ایس پھیرا کٹھے ہو گئے۔ میجر صاحب خود وی گنجی بار دے ہی  
پرانے وسنیک ہن۔ اوہناں دا پنڈی چک نمبر 77/5 آر۔ ساڈا پنڈی چک نمبر  
79/15 ایل۔ چکاں دے نمبر اں دا ویروا گے جا کے کراں گے۔ پہلاں گنجی بار  
دے نام دی بھال کر لیے۔

گنجی بار دے شروع توں اخیر تائیں لے رُخ وچ، وچالے رکڑ زمین دی اک پٹی وچھی ہوئی سی۔ جس وچ کسے ویلے ساخھے جنڈ کریر دے بوٹے یاں کسے چھوٹی موٹی جھاڑی توں بنا ہور کجھ نہیں دسد۔ ایہہ زمین پکی سٹرک وانگ کرڑی سی تے دھپ وچ پانی دیاں لہراں وانگ ٹھاٹھاں مار دی سی۔ چھوٹیاں ہوندیاں ایس وچوں وی لنگھدیاں ایس کئی وار شرطاں لائیاں کہ دور دسدی موج جھاڑی دے پختیرے پانی کھڑا ہے۔ نیڑے جان تے پانی پچھا نہہ ہٹ جاندا تے جھاڑی رڑے میدان وچ دسدی۔ ساڈے علاقے وچ ایس رکڑ زمین نوں ”کیر“ کہندے سن۔ میجر گر مکھ سنگھ دسدے ہن کہ اوہناں دے پنڈاں وچ ایس نوں ”باڑا“ آکھدے سن۔ ایس ”کیر“ دی چوڑائی دکھ دکھ تھاواں تے چار توں ست اٹھ میل تک سی۔ ساڈے پنڈ توں خانیوال نوں جانڈیاں ایہہ ”کیر“ کوئی ست اٹھ میل چوڑا سی۔ ریلوے اسٹیشن ”کچھوہ“ کوئی پنج چھ میل سی۔ ہور راہ تے پنڈ ونجاری (105/15 ایل) یاں رسالے والا (109/15 ایل) دے راہ وچ کوئی چار میل دی چوڑائی سی۔ ایہہ ”کیر“ اوکاڑے، ہڑپے کولوں لے کے جتھوں گنجی بار شروع ہوندی سی۔ ساڈے پنڈاں توں اگے گنجی بار دے اخیر سرے تک پسر یا ہو یا سی اتے ایہوسی ”گنجی بار“ دا گنج جس کر کے ایس نوں گنجی بار کہیا جان لگ پیا۔ اصل وچ سانوں پتہ ہی نہیں سی کہ ایہہ ”کیر“ بار دی پوری لمبائی وچ وچھیا ہو یا ہے۔ میجر گر مکھ سنگھ دے دن تے ہی پتہ لگا کہ گنجی بار دے ایس گنج دی لمبائی تقریباً سو سو میل ہووے گی۔ ایس بار دی اپنی لمبائی جنی۔

گنجی بار کنیاں پڑاواں وچ آباد ہوئی۔ اوکاڑے تے ہڑپے دے نیڑے لگدے میجر گر مکھ سنگھ ہوراں دے پنڈ 15-1914 وچ آباد ہوئے۔ ساڈا علاقہ 21-1920 وچ ویا۔ علاقہ جہانیاں لاگلے سکھاں دے پنڈ ساٹھوں وی

کچھ مگروں آباد ہوئے۔

ایس باروچ پنڈاں نوں ”چک“ کہیا جاندا سی۔ چک پنجابی دا پرانا لفظ ہے جس دے مڈھلے معنے سن ”بھوں“ دا خاص کر کھیتی والی بھوں دا اکٹھا ٹکڑا یاں رقبہ۔ چک عام طور تے کسے اک شخص، اک پروار یاں ایک شریکے دی ملکیت ہوندا سی۔ کہیاں پرانیاں پنڈاں دے نام نال لفظ ”چک“ آوندا ہے جویں بلاتی چک، نانک چک، امر وچک وغیرہ۔ جدوں انگریزاں نے باراں وسائیاں تاں اوہناں نے پنڈاں نوں چک کہیا جو بڑا ڈھکواں نام سی۔ ایہناں چکاں دے کوئی نام رکھن دی بجائے ایہناں نوں نمبر دتے۔ مکھ نہروچوں نکلن والے ہروڈے رجواہے یاں وڈی براچ دے چکاں دے نمبر اں دی وکھری لڑی سی۔ لوئر باری دو آب نہرتوں سجے پاسے نوں نکلن والے رجواہیاں دے نمبر سن۔ 1۔ ایل، 2۔ ایل، 3۔ ایل وغیرہ۔ ایس توں مطلب سی کہے (left) والے پاسے دا۔ میجر گر مکھ سنگھ ہوراں دا پنڈ 5۔ آرتے آوندا سی، جس دا مطلب ہے کہ اتھے تک (ریلوے اسٹیشن یوسف والا تک) سجے پاسے چار رجواہے ایس توں پہلاں نکل چکے سن۔ اوکاڑہ ول پیندے پنجاب دے مکھ منتری سردار بے انت سنگھ دا پنڈ 2۔ ایل تے آوندا سی۔ ایس 15۔ ایل اُتے آوندے ساں اتے 15۔ ایل کہے پاسے دا آخری رجواہا سی۔ ایس 15۔ ایل دی وی ٹیل (آخری حصے) اُتے آوندے ساں۔ ایس لئی ساڈے پنڈاں نوں پانی دی تنگی ہی رہندی سی۔

گنجی باروچ زمین دی الاٹمنٹ وکھ وکھ ذریعیاں تے ہوئی سی۔ چوکھے مربعے تاں فوجی سروس بدلے دتے گئے سن۔ خاص کر کے پہلی عالمی جنگ وچ لڑن والے فوجیاں نوں۔ اک ہور ورگ سی جیہناں نوں آباد کار کہیا جاندا سی جیہناں لوکاں نے غیر آباد بھوں جنگل وڈھ کے آباد کیتی سی۔ کھال کڈھے، کھیتاں



دیا ونڈاں پائیاں۔ کچھ بے وغیرہ گرائے۔ مقررہ سمیں پچھوں آباد کیتی زمین وچوں ادھی (یاں کچھ گھٹ ودھ) ایہناں آباد کاراں نوں دے دتی گئی۔ باقی ادھی گورنمنٹ دی رہی۔ کچھ مربعے گھوڑی پال وی سن۔ جیہناں دا ویروا کرڈانہ بار دے بیان وچ دتا گیا ہے۔ ساڈے علاقے دے ہر پنڈ وچ دو گھوڑی پال مربعے سن تے اک گھوڑی پچھے اک مربع ملدا سی۔ کڑانہ بار وچ اک سرکاری سٹرک دے دوہیں پاسیں رکھ لائے جاندے سن۔ اک میل (یاں شاید دو میل) دی لمبائی وچ رکھ لاؤن لئی ادھا مربع دتا جانداسی۔ مربع پکا اودوں ہوندا سی جدوں رکھ پوری طرح پل جان تے پورے قد دے ہو جان۔ محکمہ جنگلات ولوں لائے گئے درختاں نوں پرورش کرن توں بعد ہی مربع پکا ہوندا سی۔

مربعیاں نوں نہری پانی واری نال ملدا سی۔ پہلاں ساڈے پنڈاں وچ ہر مربعے دی چار پہر (12 گھنٹے) دی واری سی۔ پچھوں پکیاں واریاں بنا دتیاں کھیاں۔ جیہناں وچ ہر مربعے نوں ہفتے وچ اک واری پانی ملن دا بندوبست کیتا گیا۔ پکیاں واریاں دا گھانا ایہہ ہویا کہ کچھ لوکاں دی واری ہمیشاں لئی دن دی ہو گئی تے کچھ ہور ناں دے حصے سدالئی رات آ گئی۔ ساڈے پنڈ وچ ہر ہفتے وچ اک مربعے نوں 8 گھنٹے پانی ملدا سی تے اک گھنٹے وچ تقریباً 6 کنال زمین سخی جاندی سی۔

گنجی بار دے مربعے صحیح معنیاں وچ مربعے نہیں سن۔ مربعے لائل پور دی بار (ساندل بار) وچ سن، جیہناں دی لمبائی چوڑائی برابر سی۔ گنجی بار دے مربعے صرف عام بول چال وچ ہی مربعے سن۔ سرکاری کاغذاں وچ ایہناں نوں مستطیل ہی لکھیا ہویا سی۔ میجر گر مکھ سنگھ ہوراں دی دتی جانکاری مطابق ایکڑ  $40 \times 40$  کرماں داسی تے مربعے  $200 \times 200$  کرماں داسی۔ گنجی بار دا ایکٹر

40x36 کرماں داسی۔ مربع بھاویں لائل پور دے ایکڑ نالوں چھوٹا سی۔ اک  
 کرم 5 1/2 فٹ دی منی جاندی سی۔ انج گنجی بار دا ایکڑ 40x40 مربع گز دا  
 ہوندا سی۔ گنجی بار دی بھوں وی ساندل بار (لائل پور) جنی زرخیز نہیں سی۔ فیروی  
 مالوے دی زمین نالوں زیادہ پیداوار دیندی سی۔

گنجی بار دے گھاہ بوٹ، کیڑیاں، کاڈھیاں بارے کجھ جان کاری  
 کراؤنی وی بے لوڑی نہیں ہووے گی۔ ایس بار دے رُکھاں، درختاں بارے  
 کسے ہورتھاں لکھیا گیا ہے۔ گھاہ بوٹ وچوں سبھ توں ودھ جانیا پچھانیا سی  
 ”بھکھڑا“۔ جس کارن گنجی بار وچ ننگے پیریں ٹرنا لگ بھگ ناممکن سی۔ بھکھڑے  
 دی کنڈیاں والی ڈنڈی بڑی موٹی ہوندی سی۔ ایہہ بھکھڑے دابی سی۔ ایس دی  
 کنیاں دوائیاں وچ وی ورتوں کیتی جاندی سی۔ ٹما گنجی بار وچ بہت ہوندا سی اتے  
 ٹما تاں بہت ساریاں دوائیاں وچ ورتیا جان والا پھل ہے۔ لہا (یاں اُلہا) گنجی  
 بار دی اک ہور سوغات سی۔ ایس دابی جھونے دیاں منجراں وانگ دے اُتلے  
 پاسے لگدا ہے اتے نرے بار یک کنڈیاں دی ڈنڈی دے روپ وچ ہوندا ہے۔  
 تسیں کناچ بچا کے لنگھو، لہے دے کنڈے کسے نہ کسے پاسیوں تہاڈے لیڑیاں  
 نوں چمڑ ہی جاندے ہن۔ خانیوال آوندیاں ہویاں اک وار رات ہنیرے  
 ہوئے مینوں اک نرے دے کھیت وچوں لنگھنا پیا۔ میرے تیز ریب پا جامہ سی۔  
 اوہ سارا لہے نال بھر گیا۔ ٹرنا اوکھا ہو گیا پر لہے نال بھریا ریب پا جامہ لاؤ ہناں وی  
 اک مصیبت ہے۔ میل کافی اوکھا گھر پچا۔ اتھے سب توں پہلاں لائین جگا کے  
 سارے ٹبر نے میرے پا جامے وچوں لہا کڈھیا فیر پا جامہ تیزوں لاہیا۔ چمڑ  
 گنجی بار وچ بہت ہوندے سن تے سیانیاں دے منع کرن دے باوجود وی منڈے  
 کڑیاں چمڑ کھاندے ہی رہندے سن۔ اک دے بوٹے کافی وڈے تے اُچے

ہوندے سن۔ ایہناں دے پتے بکریاں کھانڈیاں سن۔ جنڈی تے کریر دیاں  
جھاڑیاں ساری باروچ بے انت سن۔

رُکھاں وچ ون تے جنڈ دا ذکر میں کئی تھائیں کیتا ہے۔ کریر وی اک  
کار آمد رُکھ سی۔ ایس دے ڈیلیاں دا اچار مالوے وچ وی لوک عام پاؤندے ہن  
پر ایڈھر ڈیلے مل وکدے ہن۔ باروچ کدے کسے نے ڈیلے مل نہیں سن لیے۔  
فردانہہ اک ہور ضروری رُکھ سی جس دی لکڑ کافی ورتوں وچ آوندی سی۔ ساڈے  
اپنے احاطے وچ اک کافی وڈا فردانہہ سی۔ ایسے دے پھٹے چیر کے اساں گھر دا  
گیٹ بنایا سی۔ پھوگ اک ہور جانیا پچھانیا جھاڑی سی۔ ایس دی لکڑ سوائے بالن  
دے ہور کسے کم نہیں سی آوندی۔

کیڑیاں، کاڈھیاں وچ کنڈیا لے دا ذکر ضرور کرنا پیندا ہے۔ کنڈیا لہ گنجی  
باروچ بہت ملدا سی۔ سیہہ، گوہ، کوڑھ کرلی عام ملدے سن۔ رنگ وٹاؤن والا  
کرلا بہت سی تے مسلمان ایس کرلے نوں مارنا ثواب سمجھدے سن۔ اوہناں دا  
وشواش ہے کہ کربلا دے میدان وچ ایہہ کرلے پانی دیاں مشکاں تک گئے سن۔  
ایس کارن حضرت محمد صلی اللہ علیہ وسلم دے دوہترے حسین ایسے میدانے جنگ وچ تہائے  
شہید ہو گئے سن۔ سدھارن مکھیر رُکھاں تے عام لگدا سی پر ڈومنا گنجی باروچ  
اساں کتے نہیں سی دیکھا۔



## ساڈا ٹبر گنجی بار چُجا

ساڈے پروار نوں گنجی بار وچ سن 1920 وچ زمین ملی۔ ایہہ مربع ساڈے تائے حولد ار کھر سنگھ نوں پہلی عالمی جنگ وچ کیتی فوجی نوکری بدلے ملیا سی۔ حولد ار کھر سنگھ ساڈا سکا تیا نہیں سی۔ ساڈے پتا جی دے تائے دا پت سی۔ حولد ار دا پتا بابو یوژ سنگھ ساڈے دادے بابا رُوژ سنگھ داوڈا بھرا سی۔ ساڈا ٹبر گھروں باہروں اکٹھا سی۔ ایس لئی جدوں مربع ملیا تاں سارا ٹبر ہی بار نوں روانہ ہو گیا۔ اودوں تک تیا کھر سنگھ حالے فوج وچ ہی سی۔ مربع دا دخل لین لئی اوہناں داوڈا بھرا سردار شیر سنگھ آیا سی۔ اتے ایہہ دیکھ گیا سی کہ اتھے سانوں کیسے حالات وچ رہنا پینا ہے۔ سو جدوں ساڈا ٹبر پچھوں چلیا تاں اگلے ٹکانے دیاں لوڑاں مطابق چیز وست گھروں لے کے نکلیا۔ گدے تے کچھ بسترے، اک بوری آٹا، دال، گڑ، شکر، چکی، رسوئی دے بھانڈے، مدھانی، کھییاں، ہل، رنبے، داتر، کہاڑیاں، تے دو منجیاں وغیرہ لوڑ دیاں سبھ چیزاں رکھ لیاں۔ زنانی اگلی ساڈی دادی مائی عیدوسی۔ مال ڈنگرسی، دو جوگاں، چار مچھاں، دو گائیاں، اک گھوڑی تے اک کتا۔ ایہہ قافلہ اپنے جدی پنڈوں ”گھینے دے بانگر“ تحصیل بٹالہ وچوں نکلیا۔ ایس لانے وچ دادی جی توں علاوہ شامل سن، دو ویں بابے، تیا شیر سنگھ، چاچا دلپ سنگھ تے اک نوکر سنتا۔ میرے پتا جی وی انہیں دنیں اچے فوج وچ سن اتے میں اوہناں دے نال جبلپور ساں۔ میں ایہہ حالات پچھوں بزرگاں کولوں سنے۔ ایس سارے لانے وچوں اکلا میرا چاچا دلپ سنگھ ہی

1947 وچ واپس ایدھر آیا۔ باقی ساریاں دیاں مڑھیاں اسیں بار وچ ہی چھڈ کے آئے ہاں۔

چاچے دلپ سنگھ دی وفات توں کجھ چہ پہلاں میں اوہناں نوں پچھیا سی کہ ساڈا ٹبر کیہڑے سال بار نوں گیا سی تے اوہناں 1921 دیا سی۔ پر میرا خیال ہے کہ چاچا جی نوں بھلیکھا لگ رہیا سی۔ سن 1921 تک پتا جی تیا کھر سنگھ دوں فوج وچوں آچکے سن پر اسیں قافلے نال نہیں ساں۔ جدوں اسیں گئے ساڈا چک ادھا پچدھا وس چکا سی۔ کوئی تجا حصہ احاطے ولے ہوئے سن تے ستاراں اٹھاراں ٹبر پنڈ وچ رہ رہے سن۔ ایویں میرے اندازے مطابق پروار 1920 وچ اسوں دے مہینے بار وچ گیا۔ چھیتی بجن دی کالھ سی کیوں جے اگے پہنچ کے کنک دی بیائی کرنی سی۔

ٹرن لکیاں کس جیرے نال گھراں نوں تالے مارے اتے کس حوصلے نال اوہناں کھیتاں وچوں بل پنجالیاں چکیاں جیہناں نوں ساڈے بزرگ پچھلیاں باراں پیڑھیاں توں واہندے آرہے سن۔ ایس دا اندازہ اوہو لوک لاسکدے ہن جیہناں نے 1947 وچ پاکستان توں ٹرن لکیاں اپنیاں گہ اں ول اخیر جہات ماری سی۔ (ساڈے جدی پنڈ نوں وساؤن والا بابا گھینا میتھوں 14 پیڑھیاں اُتے سی۔ ساڈے بابے توں 12 پیڑھیاں اُپر)

خیر ساڈے پروار لئی پنڈ توں ایہہ دو جی ہجرت سی۔ پہلی وار مثلاًں دے سمیں ساڈے وڈیریاں نوں گھینے کے چھڈ کے بھلائی پورے جا کے رہنا پیا سی پر چھیتی ہی پچھوں مہاراجہ رنجیت سنگھ دے راج وچ پھیر اپنے پنڈ آوسے۔ ایس کارن گھینے کیاں وچ ساڈی پتی دا نام اج وی ”بھلائی پوریاں“ دی پتی ہے۔ ایہہ دو جی ہجرت ہمیش لئی ثابت ہوئی۔ پاکستان بنن توں آ کے اسیں اپنے پنڈ

نہیں جاسکے۔ کیوں ہے اوتھے مسلماناں دی زمین ہی نہیں سی۔ ساڈا جدی مکان جس وچ رسوئی توں علاوہ اک وڈا کمرہ تے اک چھوٹی کوٹھڑی سی۔ کوئی ویہہ سال پہلاں دا ڈھے چکيا سی اتے میں پچھلے ویہہ سالوں وچ اوس گھر دے کھولے دیکھن وی نہیں جاسکيا جس وچ میرا جنم ہويا سی۔

گھینے کیاں توں ساڈا بار والا ٹکانہ سوا دو سو میل توں کجھ اُتے سی۔ روزانہ بہت سفر نہیں سی کیتا جاسکدا۔ مجھاں گائیاں دے کچھے ہونو وی سن۔ اتے لگاتار چلدے رہن نال ڈنگراں دے کھر وی ڈکھن لگ پیندے سن۔ پورا پینڈا مکاؤندیاں 25 دنوں توں اُتے لگے۔ راہ وچ دو نہہ تئیں تھائیں پشواں دی تھکاوٹ دور کرن لئی دیہاڑی بھر زکنا پیا۔ ایہہ پینڈا کوئی سوکھا نہیں سی۔ راہ وچ مینہ، جھکھڑاں، ہنیریاں دا ٹا کراوی کرنا پیا۔ جدوں کتے مینہ آوندا، گڈا کسے رکھ تھلے کھڑا کر کے دوں منجیاں، آئے، گڑ وغیرہ اُتے کر کے اُتوں دی بھورے پا دیندے۔ ہنیری سمیں لیڑے کپڑے نوں اڈنوں بچاوانا اتے مال ڈنگرا کٹھا رکھنا وی اک لوڑی سی۔ سبھ توں وڈی کٹھنائی سی پٹھیاں دی۔ لاہور دا ضلع لنگھ کے جدوں نویں وی بار دے علاقے وچ داخل ہوئے تاں پٹھے ملنے کافی اوکھے ہو گئے۔ بھاویں بار دا ایہہ علاقہ آباد ہوياں چار پنج سال ہو گئے سن پر ساڈے وانگ اگانہہ نوں جان والے ہور وی بہت لوک سن۔

ایس لئی سڑک دے دوہیں پاسیں و سے لوکاں کول اپنے ڈنگراں جوگے پٹھے وی نہیں سن بچے۔ ہن سکیم ایہہ بنائی کہ تایا شیر سنگھ گھوڑی تے چڑھ کے گڈے والیاں توں اگے نکل جاندا تے اٹھ دس میل جا کے پٹھیاں دی بھال شروع کردا۔ جتھوں پٹھے مل جاندا، گڈے والیاں نوں اوتھے ہی روک لیندا۔ ایویں کئی وار ہنیرا ہون تک سفر کرنا پیندا۔ اتے کدے کدے چنگے دن کھڑے ہی

ڈیرا لاؤنا پے جاندا۔ گھوڑی لے کے تن جنے پٹھے لین ٹر پیندے تے کچھے رہے دو جنے رُکھاں درختاں نال ڈنگر بندھے۔ ڈنگراں نوں پانی ڈاہندے۔ جے پانی کھلا مل جاوے تاں مجھاں نہاؤندے، پٹھے آوندے تاں ثبوتے ہی ڈنگراں اگے سٹ دیندے۔ بابا بوہڑ سنگھ ہرپسو کول جا کے اوس دی پٹھے اُتے، دھون اُتے ہتھ پھیردا۔ تھاپی دیندا تے کہندا: ”کھالو بھئی جو کجھ رُکھاں کا ملدا اے۔ سانوں تاں راہ وچ وی گھر والیاں پکیاں پکائیاں ملدیاں نیں۔ تہانوں اسیں پٹھے وی ان کترے پاؤندے ہاں“۔ اتے پسو بابے دی گل سمجھدے سن۔ جدوں بابا ڈنگراں نوں تھاپی دین لئی نکلدا، ہرپسو اپنی واری دی اڈیک وچ بوتھی چک کے بابے ول نوں جھا کدا رہندا۔ جس دن رکتوں توڑی وی مل جاندی، دوں بابے جھٹ پٹھے کترن لگ پیندے۔ اوہنیں دینیں اچے ہتھ والے ٹوکے ای ورتوں وچ سن۔ گیٹن والا ٹوکا اچے نہیں سی بنیا۔ بابے نے پٹھے کترن والیاں دو اچاویاں منڈھیاں وی پنڈوں ہی گڈے تے رکھ لئیاں سن۔ کوئی منے یاں نہ منے پر ایہہ میری اکھیں ڈٹھی گل ہے کہ وڈا بابا تقریباً 80 ورہیاں دی عمر تک اکلا ہی دونہہ بندیاں جنے پٹھے کتر دیندا سی۔ کترے ہوئے پٹھے ڈنگراں نوں پا کے بابا انج محسوس کردا جو یں کوئی وڈی ذمے داری نبھائی ہووے۔ سارے راہ وچ تن دن لچھے وی آئے جدوں رکتوں پٹھے نہ ملے۔ ایسے سمیں چنگا دن کھڑے ہی کسے اچھے تھان گڈا روک لیندے جتھے پانی ملدا اتے لاگے چاگے چنگا گھاہ ہوندا۔ ڈنگراں نوں چرن چھڈ دیندے اتے آپ سارے جنے داتریاں ربنے پھڑکے گھاؤ ڈھن یاں کھوتن لگ پیندے۔ بابے دا حکم سی کہ ڈنگراں نوں پٹھے پاؤن توں پہلاں آپ روٹی نہیں کھانی تے ایویں ہی ہوندا رہیا۔ جہاں شہریں رہن والے لوکاں نے کدھے لویریاں نہیں رکھیاں۔ اوہناں نوں تاں شاید ایہہ اک نگوئی جہی گل جا پے

پر پینڈ و ایس نوں حیران کن معجزہ سمجھن گے کہ اینا لما پینڈا کر کے اتے کئی واری کوئی اک ناغہ وی نہ کیتا۔ تھکیویں کر کے اتے پوری خوراک نہ ملن کر کے دودھ تاں گھٹ ہوندا گیا پر تنے مجھاں تے اک گاں دوویں ویلے ملدیاں رہیاں۔ میں اودوں بہت چھوٹا ساں جدوں تائے شیر سنگھ نے ساڈے پتا جی نوں تے اک دونہہ ساتھیاں نوں ایہہ کہانی سنائی تے نال کہیا: ”ایہہ ساڈے بھائیے دیاں تھاپیاں دی کرامت سی۔“ (تائے شیر سنگھ تے کہر سنگھ اپنے پتا نوں ”بھائیا“ کہندے سن)۔

ساڈی دادی نے ایس لے پینڈے وچ جس طرح ٹبردی سنبھال کیتی اوہ اج کل دیاں مٹیاراں لئی اک مثال ہے۔ جتھے تکالاں نوں گزار کداماں جی جھٹ اٹاں روڑے پھڑ کے چلہا بنا لیندی۔ بالن دی راہ وچ کوئی تھوڑ نہیں سی۔ چلہا بال کے ماں جی دال رجھنی رکھ دیندی تے آپ آٹا گھن لگ پیندی۔ دال عام طور تے موگی دی دھرنی کیوں بے چھیتی رجھدی ہے یاں کدے کدائیں آلو بنا لیندی۔ آٹا گنھ کے نال ہی دو بے چلہے تے روٹیاں پکاؤن لگ پیندی۔ نال ہی اپنے گل والے لیڑے پانی وچ گھجول لیندے۔ ویلا ہووے تاں لیڑیاں تے تھوڑا بہت صابون وی گھس لیندے۔ (صابن دانان اوہناں دناں وچ صابون ہی سی) اوہناں دے آون تک روٹی تیار ہوندی۔ روٹی کھا کے دھاراں کڈھدے۔ ایس سمیں ماں جی روٹی کھا لیندے۔ ددھ چوکھا ہوندا سی۔ ساریاں نوں اک اک چھنا کچے ددھ دا پین لئی دے کے فیروی چار پنچ سیر پنچ جاندا۔ اوہ ماں جی کڑھنا رکھ دیندے۔ ددھ کاڑھ کے جاگ لا کے تے نہا دھو کے کتے ادھی رات نوں ماں جی نوں سون دا ویلا ملدا۔ سویرے لکڑوی بانگ نال اٹھ کے رڑکا پا دیندے۔ انج بٹالے امرتسرتوں لے کے ضلع ملتان دے ”متھابنگلہ“ تک



سویرے امرت ویلے ساڈی دادی دی مدھانی دی گھوکار پیندی گئی۔ ہور وی کہیاں  
 مائیاں، پبیاں نے ایسے راہے جانڈیاں شاید پائیاں ہون پر ودھیرے لوک ددھ  
 ہی پی چھڈ دے سن۔ مائی اندو ورگیاں ددھ کاڑھن، جماؤن تے رڑکن والیاں  
 ہمتی تے سرڑی سوانیاں بہت تھوڑیاں سن۔

ایس سفر دیاں کہانیاں تاں تایا جی کئی سناؤندے ہوندے سن پر ستر سال  
 پرانیاں گلاں نہ ہن مینوں پوری طرح یاد ہی ہن تے نہ ہی سارے ویروے دین  
 دی لوڑ ہے۔ ہاں اک قصہ سناؤن والا ہے کیوں کے اوس نال اُتے بیان کیتی  
 مدھانی دی گھوکار دا تعلق ہے۔

ایہہ قصہ میں تایا شیر سنگھ جی توں سن 1921ء یاں 1922ء وچ سنیا۔ اج ستر  
 ورہیاں پچھوں یاداں دے ورتے پھول دیاں ایس کہانی دا دھندا جیہا پر چھاواں  
 ساہویں آ گیا۔ پورے ویروے ہن یاد نہیں۔ منگمری توں اک دو منزلاں اگے لنگھ  
 کے اک دن ساڈے پروار نے رات اک اچھے تھاں ڈیرا لایا جتھے زمین آباد ہو  
 چکی سی پر پنڈ نیڑے کوئی نہیں سی۔ سڑک توں کجھ ہٹویں مسلماناں دی اک بھینی  
 سی۔ سویرے اچے سورج نہیں سی چڑھیا کہ اک بزرگ مسلمان آیا۔ اوس علاقے دا  
 مسلمان جیہناں نوں اسیں جانگی کہندے ساں۔ اوہ آوندیاں ہی بولیا: ”سردار  
 جی! واگوروجی دی فتح“ ساڈے بزرگ حیران ہو گئے کہ اک مسلمان تے اوہ وی  
 ملتان دے علاقے دا مسلمان فتح بلاونی کتھوں سکھیا۔ تایا جی دے کجھ کہن توں  
 پہلاں ہی اوہ فیر بولیا: ”اوسردارو تساں کہی مٹی دے بنے ہوئے ہو۔ ساڈیاں  
 سوانیاں گھر پیٹھیاں ہی آکھ دیندیاں ہن، کھیر پی چھوڑو، جماؤن تے رڑکنا پاون  
 دا بکھیڑا کون کرے اتے ساڈی اپنی ایس سفر وچ دھی نال کھڑکن لگ پئی گدی۔  
 میں جاتا رڑکنا پاون لئی سوانی کوئی جوان جہان ہوسی پر ایس بی بی دی عمر تاں پنجاہ

پچونجا دے ڈھگ ہوسی۔ اصل وچ ماں جی (ساڈی دادی) دی عمر اوس سمیں سٹھ توں کوئی دو چار سال اُتے سی۔ اوہ فیر کہن لگا: ”اوسنگھو اینی بہادر، غیرت مند تے ہمتی قوم ہوندیاں تساں راج کنج گوالیا“۔ اصل وچ اوس بزرگ دی عمر اوس ویلے سو سال توں اُتے سی۔ اوس نے سکھ راج دا سماں دیکھیا ہو یا سی تے لاہور دربار دی شان و شوکت وی دیکھی ہوئی سی۔ اوہ اٹھاں تے مال لد کے لاہور جاندے ہوندے سن۔ کجھ چرہور گل بات ہوئی۔ مسلمان بزرگ نے بڑے نگھے پیار نال ساڈے پروار نوں ودعیا کیتا۔

ماں جی دا سارا پروگرام ابے دسنا باقی ہے۔ ددھ رڑک کے ماں جی سارے ٹبر لئی پروٹھے پکاؤندے۔ سارے جنے دہی تے مکھن نال راج کے پروٹھے کھاندے۔ اک اک پروٹھا تے سویرے چویا ددھ، دوپہر دے کھان لئی رکھ لیا جاندے۔ تیا شیر سنگھ پچھوں دسدا ہوندا سی: ”چاچی سانوں سارے راہ وچ انج روٹی تک دیندی رہی جویں گھر بیٹھی ہووے“۔

ایس طرح منزل ماردا، پنیڈے جھاگدا ساڈا لانا کوئی پنجنی دناں پچھوں (پکا سماں یا نہیں) اپنے ٹکانے پجا۔ راہ وچ اوکڑاں وی آئیاں۔ تاپ سراپ وی ہوندا رہیا پر ایہہ معمولی گلاں سن۔ اک رات بگھیاڑ وچھے نوں پاڑن ہی والا سی کہ کتا بھبک مار کے اوس دے گل جا پیا۔ سارے جاگ پئے۔ پچھوں ساری رات واری واری اک جتا پہرا دیندا رہیا۔ اک رات چور جوگاں کھولن آگئے۔ اودوں وی کتا بھونک پیا۔ چور چار سن۔ ایدھروں ابے باے روڑ سنگھ نے ہی لکارا ماریا سی کہ چوراں نوں بھج دیاں راہ نہ لبھا۔ چاچا دلپ سنگھ اودوں پھٹ گھبروسی۔ اوہ گنڈا سی والی ڈانگ پھڑی چھال مار کے اٹھیا۔ اوس نے اک دوہاں نوں ڈھالینا سی پر ننگے پیریں دوڑیا سی۔ پیر وچ لکر دی لمی سول چبھ گئی تے اوس دی دوڑ مٹھی

پے گئی اک چور دی پگ ٹاہلی نال اڑ کے ڈگ پئی۔ ایہہ اوتھے ہی چھڈ کے بھج گیا۔ دو بجے دا پیر چکڑ وچ کھب کیا۔ اوہ جتی دا اک چھتر کھبیا ہی چھڈ گیا۔ سویرے اٹھ کے ساڈے نوکرنے چھتر ٹو کے نال وڈھ کے ٹوٹے کر دتا۔ پھیر پگ دے دو دو ٹوٹے کر کے چھتر دے دوویں ٹوٹے اوہناں نال بنھ کے ٹاہلی دی ٹہنی نال لکاد تے۔

سفر وچ واپرے اجھے واقعات تے اوکڑاں دیاں کہانیاں کئی سال چھوں تک اسیں اپنے بزرگاں توں سن دے رہے۔ ہر ٹبر دیاں آپو اپنیاں کہانیاں سن پر کدے کسے نے کھج کے یاں جھور کے نہیں کیہا کہ اسیں راہ وچ اپنے اوکھے ہوئے۔ سبھ کجھ ہاسے محول وچ ہی بیان کیتا جاندا رہیا۔ جے اوہ لوک اپنے ہمتی یاں اپنے جیرے والے نہ ہوندے تاں باراں آباد نہ کر سکدے۔ وڈیر یو! سانوں تہاڈے کارنامیاں تے سدا مان رہے گا۔ آفرین صد آفرین۔ پر افسوس تساں سانوں کوئی اجیہی گڑہتی نہ دتی جس نال اسیں وی کجھ تہاڈے ورگا کر دکھاندے۔



## گنجی باروچ پہلا دن

سفر دے اخیر لے دن لمی منزل مار کے اپنے پنڈ جا بچے۔ جیہڑا پنڈا بے  
 بجھا نہیں سی۔ جس پنڈ دی ا بے موہڑی ہی نہیں سی گڈی گئی۔ جتھے نہ کوئی پنڈ سی  
 تے نہ پنڈ دا کوئی وسنیک۔ ساڈا ٹبر ایس پنڈ وچ بجن والا پہلا پرواری اتے انجے  
 ساڈے بزرگاں نے ہی چک نمبر 79/15 ایل دی موڑھی گڈی۔

ایس دن کیہ واری تے کیہڑی تاریخ سی، ایس بارے مینوں کوئی جانکاری  
 نہیں (سگوں ایس پنڈ دا نام بچے دے نام رکھن وانگ گورو گرنٹھ صاحب توں  
 واک لے کے بسنت پورہ رکھیا گیا)

تایا شیر سنگھ پہلاں ہی اپنے مربعے دی نشاندہی لے گیا سی۔ مربع پنڈ  
 دے نال لگدا سی۔ مربعے دے اُتے پنڈ دی وسوں والی تھاں دے وچالے  
 چراگا سی۔ ”چراگا“ پنڈ دے چوفیرے وسیہلی چھڈی جان والی سانجھی زمین نوں  
 کہیا جاندا سی۔ ایہہ فارسی لفظ ”چراگا“ دا پنجابی وچ اپنایا گیا روپ سی جو پونگ  
 وجوں ورتیا جاندا سی۔ ایس چراگے وچ اپنے مربعے دے نیڑے جیہے رکھاں دی  
 اک جھنگی جیہی وچ آڈیرا لایا۔ اتھے دوون تے تن چار جنڈ سن۔ قدرتی ایس  
 سال ملتان وچ مینہ چنگے پئے سن۔ چراگا وچ گھاہ سوہنا کھڑا سی۔ ڈنگر چرن لئی  
 کھلے چھڈ دتے۔ ماں جی نے بنا کے رسم ورواج دے پنڈ دے پہلے چلے وچ  
 اگ بالی اتے دال رجھنی دھرتی۔ کجھ ہٹویں کھڑی اک ٹہی تے چڑھ کے دوہاں  
 بابیاں نے چوفیرے نگاہ ماری۔ نہ کوئی اتھے بندہ سی نہ بندے دی ذات۔ مربعے

دیاں دو پیلیاں وچ نرے دیاں چھٹیاں وی کھڑیاں سن پر سانوں مربعیاں دے  
دخل ملدیاں ہی پہلے آبادکار ایتھوں جا چکے سن۔

بابے نے دور تک نگاہ مار کے ویکھیا، کتے پانی نظر نہ آیا۔ تائے نوں  
آواز مار کے آکھیا: ”چھیر سہیاں! ایتھے کتے پانی وی ہے کہ ڈنگر تہائے ہی رہن  
گے؟“ تائے نے کہیا: ”بھائی! پانی ہووے گا۔ آخر پانی نال ہی تاں بھوں آباد  
ہوئی ہے۔“ ایہہ کہہ کے تائے نے گھوڑی پھڑی۔ پلاکی مار کے اوس دے اُتے  
بہہ گیا۔ تے اوس پاسے گیا جدھروں وی پانی دا کھال لنگھدا سی۔ ایہہ ساڈے ٹبر  
دی بڑی خوش قسمتی سی کہ اوہ کھال اوس دن وگدا سی۔ کھال دے ایس حصے تک  
پانی ہفتے وچ صرف اک دن وگدا سی۔ مال ڈنگر کھال ول نوں ہک لیا۔ ڈنگراں  
نے رنج کے پانی پیتا۔ پچھوں سارے ٹبر نے ایسے کھال وچ اشان کیتا۔ پنچھی  
دناں تک بے گانیاں جوہاں وچ نہاؤن پچھوں تے اوپریاں کھالاں، راجواہیاں  
دا پانی پین پچھوں کناں پیارا۔ کناں دلکش لگا ہووے گا اپنے پنڈ دے کھال دا  
پانی۔ ایس بارے ساڈے بزرگاں نے کدے کوئی گل نہیں سی کیتی۔ بس اینا کہہ  
چھڈ دے سن۔ ”شکر کیتا کہ ٹبر دے سارے جی اتے مال ڈنگر سکھیں ساندریں  
ٹکانے تے سچ گئے۔“

اگلے دن ساڈے پروار نوں اپنے نویں پنڈ وچ پہلا سورج چڑھیا تے  
چڑھیا وی اپنے مربعے ولوں دی۔ تائے نے چو جی صاحب دا پاٹھ کیتا تے  
دوہاں بابیاں نوں اپنی زمین دکھائی۔ بھوں کوئی تیجا حصہ ہی سواہری کیتی پئی سی۔  
ساڈا مربع دو مربعیاں دا ادھ ملا کے بنیا سی۔ ایس لئی لمائی دو مربعیاں دی سی  
تے چوڑائی ادھے مربعے جتی۔ وچ کھال وی اچے پورا نہیں سی کڈھیا ہويا۔ خیر  
تن کلتے بھوں پیرتے ہی بیجن جوگی سی۔ واپس ڈیرے تے بچے تاں ماں جی

نے پروٹھے تیار کیجے ہوئے سن۔ روٹی کھان لگے تاں وڈا بابا بولیا: ”اوائے آپ تاں پروٹھے کھان لگ پئے جے ایہناں بے زباناں داوی کوئی فکر ہے کہ نہیں؟“ تائے نے دلاسا دوایا: ”بھائی! میں ہنے جاناں پٹھے لہمن“۔ تایا حالے گھوڑی تے کاٹھی پاہی رہی سی کہ دوروں اک مسلمان آوند اسیا۔ ایسے پاسے رات بزرگاں نے چلبے یاں دھوئیں وچ اگ بلدی دیکھی سی تے بابے روڑ سنگھ نے کہیا سی: ”جے ایہہ کوئی بھوت پریت نہیں تاں پھیر ایس بیابان وچ آدم ذات و سدی اے“۔ اوہ مسلمان بڑے تپاک نال ملیا۔ جی آیاں آکھیا تاں ایس علاقے بارے چوکی جانکاری دتی۔ بابے نے اوس نوں وی پٹھیاں بارے پچھیا۔ اوس نے دسیا کہ پٹھیاں دی تاں ضرورتگی رہوے گی۔ تسیں اپنے پٹھے چھیتی بیج لوؤ۔“ نال ہی اوس نے ڈھائی تین میل دور پٹھیاں دی دس پائی۔

ایس مسلمان توں پتہ لگا کہ ساڈے پنڈ دی زمین وچ جانگلیاں دیاں دو بھیدیاں ہن۔ بھینی اوس علاقے وچ کسے اک ٹبریاں دو تان ٹبراں دیاں دکھریاں پائیاں جھگیاں نوں کہندے ہن۔ اوہناں وچوں اک بھینی ایس جانگلی دی سی۔ جے میری یاداشت ٹھیک ہے تاں ایس داناں سی مراد۔ ایہہ ساڈے بار چھڈن تک ساڈے پنڈ دی زمین ہی حصے ٹھیکے تے لے کے واہندا رہیا۔ ایسے نے دسیا کہ لاگدے پنڈ وچ دو ٹبر سکھ آباد کاراں دے وی رہندے ہن۔ ایس جانگلی نوں مل کے سارے ٹبر نوں کافی حوصلہ ہویا۔ تایا پٹھیاں دی بھال وچ پھیر ترن ہی والا سی کہ اوہناں سکھ پرواراں دے دو بندے وی اٹھ تے چڑھ کے آ گئے۔ اوہناں نوں راتو رات ہی کسے طرح خبر مل گئی سی کہ اک نواں سکھ ٹبر آ گیا ہے۔ ایڈی وڈی خبر سن کے اوہ گھر کوں بہہ سکدے سن۔ تایا جی دسدے ہوندے سی کہ ایسں اک دو جے نوں انج چھیاں پا کے ملے جوں میلے وچ گواچا

بچہ لمبھن پچھوں ماں دے گل ہمبڑ دا ہے۔

کنے کرماں والے ساں اسیں کہ ایس ویران جنگل وچ وی سانوں بندے مل گئے تے بندے وی اپنی ذات دے۔ پہلی وار وڈے بابے دے چہرے تے وی کجھ رونق آئی۔ اوہناں سکھاں نے کہیا: ”دو دو دناں دے پٹھے تاں تسیں ساڈے ٹبریں توں لے آوتے اودوں تک کوئی بندوبست کر دواں گے۔“ اوہناں نے بندوبست کر وی دتا۔ پٹھے بھاویں ڈھائی تن میل توں ہی لیاؤ نے پیندے کہے پر ماڑے چنگے مل گئے۔ توڑی دا کپ وی جانگلیاں کولوں مل گیا۔ اودھر دے جانگلی موصل بنھنا نہیں سن جان دے۔ توڑی دے کپ ہی بنھدے سن۔

اوہناں سکھاں نے ہی دسیا کہ اتھے نہ کوئی ہٹی ہے نہ دوکان نہ ترکھان، نہ تیلی نہ موچی، کمہیار، چھار، نہ ہی کوئی ڈاکٹر حکیم کوئی نیم حکیم وی نہیں۔ بس اک گورودی اوٹ ہے۔ جان لکیاں اوہناں کہیا: ”ایہہ دو نکلیاں نکلیاں چیزیں نیں۔ تہانوں ایہناں دی لوڑ ہووے گی۔“ ایہہ آکھ کے اوہناں نے دو بوتلاں کڈھیاں، بھر گھری کڈھی شراب دیاں۔ تیا شراب نہیں سی پیندا۔ ایہہ کجھ نہ نکر کرن لگا پر باقی سارے پین والے سن تے وڈا بابا تکرپاک سی۔ اوس نے اگانہہ ہو کے بوتلاں آپ پھڑ لیاں تے تائے ول نوں ہتھ کر کے آکھن لگا: ”ایہہ تاں جٹ دے گھر ایویں جم پیا۔ ایہنوں کے باہمن دے گھر جمنا چاہیدا سی۔“ دو جی سوغات اوہناں نے دتی پھٹکوی۔ پچھوں چھیتی ہی سانوں پتہ لگ گیا کہ پھٹکوی اتھے کنی ضروری چیز سی۔ پانی کھالاں دا پینا پیندا سی تے گنجی باری نہر دا پانی بڑا گنگلیا ہویا سی۔ نری گار، گھرے وچ پانی پاکے وچ پھٹکوی گھول دتی جاندی۔ دو گھریاں پچھوں گار پٹھاں بیٹھ جاندی تے نتریا ہویا پانی اُتے رہ جاند۔ کوئی چار پنج سال سارے بار والے ایہہ پھٹکوی والا پانی پیندے رہے۔

پچھوں پنڈاں وچ کھوہ لگ گئے۔ گھراں وچ ورتن لئی کھوہاں دا پانی جھیور، دے جاندے پر باہر جانڈیاں پھیر وی کھالاں، راجواہیاں دا پانی ہی پینا پیندا سی۔ دس بک پانی نال کنے تو لے گار اندر جانڈی سی۔ ایس دا اندازہ لاؤن دی کسے نے لوڑ نہیں سمجھی، پر کدے کسے نوں پچش نہیں سی لگی۔ کسے نوں ہیضہ نہیں سی ہو یا۔ کوئی ہو روگ نہیں سی لگا۔ گنجی بار دے وسنیکاں دیاں دو پیڑھیاں ایہو گار والا پانی پی کے پلایاں۔ کسے بڈھے نوں وی کوئی اجیہا روگ نہیں سی لگا جیہڑے اج اُبالیا ہو یا پانی پی کے پلے نو جواناں نوں لگدے ہن۔

خیر ساڈے بزرگاں نے پہلے دن وچ ہی گھر دا بڑا کچھ بنا لیا۔ ماں جی نے دو چلہے بنا لئے۔ چونکا لمب پوچ لیا۔ ددھ کاڑھن لئی بھڑولی وی تیار کر لئی۔ وڈے بابے نے نوکرنوں نال لے کے کھرلی بنا لئی۔ کلے دی ٹھوک لئے تے مڈھیاں گڈ کے لمب پوچ کے کواناں وی تیار کر لیا۔ منجیاں دو ہی سن تے سون والے چھ جنے۔ بھنجنے سونا خطرناک سی۔ پہلی رات ہی اک وڈا سپ شاید ایہہ دس آ گیا سی کہ تسی میری جاگیر اندر کیوں ڈیرا لالیا ہے۔ بابے روڑ سنگھ نے ارادہ کر لیا سی کہ اگلی رات کسے نوں بھنجنے نہیں سون دینا۔ اوس نے پاویاں دی تھاں دو سانگ لکڑی بھوں وچ گڈ کے لکڑاں دے ڈھانچے اُتے سر کرا گھاہ پھوس وچھا کے منہ بنا دتے۔ پچھوں دو ڈھائی مہنے ایہہ منہ منجیاں دا کم دیندے رہے۔ چاچے دلپ سنگھ نوں سویرے ہی کھیتاں نوں پانی لاؤن بھیج دتا سی۔ مراد جانگلی دس گیا سی کہ پانی دی اجے نہ کوئی واری ہے نہ پابندی۔ لوک اجے آئے ہی نہیں سن۔

چاچے نے واگھورو آکھ کے نکے نوں تک لایا۔ تن تک ماریاں پانی چھاں ماردا ساڈے مریجے دے کھال وچ اُتریا۔ کھوہاں دیاں آڈاں موڑن



والے چاچے نوں کیہ پتہ سی پانی اینے زور نال آونا ہے۔ کالھی نال کھال وچوں  
نکلدیاں اوہدی جتی دا اک چھتر وی وچے رہ گیا۔ جیہڑا اگے پیلی دے نکلے توں  
لبھا۔ چاچے نے نکالاں تک سارے کلمے بھر لئے۔

سون لکیاں دن دا لیکھا جو کھا لیا تاں انج چاپیا کہ اسوں اک دن وچ  
بڑا کجھ کر لیا ہے۔ کھیتی وی شروع ہو گئی۔ گھروں وی وس پیا۔ مال ڈنگر دا پر بندھ وی  
ہو گیا۔ سارے خوش سن۔ تیا دور رڑے وچ بیٹھا رہا اس دا پاٹھ کر رہیا سی۔  
جدوں اوس نے پاٹھ مکا لیا تاں بابے نے بوتل کھولی۔ دو دو ہاڑے چونہ بھراواں  
نے آپ لئے، اک اک ہاڑا چاچے نوں تے نوکرنوں دتاتے پر شادے چھک  
سارا ٹبر اطمینان نال ستا۔

سو سجنو! انج گڈی گنی موڑھی گنجی بار وچ ساڈے پنڈ دی تے انج بیتیا  
سارے ٹبر دا پہلا دن گنجی بار وچ۔



## باروچ پہلے کچھ دن

باروچ بجدیاں ہی پہلا کم پٹھے بیجسن داسی۔ اک وگھا (ادھا کله)  
 تاں آوندیاں ہی بیج لیا سی۔ اک وگھا ہور مچھتی ہی بیج لیا۔ دوہر پا کے اک کله  
 چھولے وی بیج لئے۔ ہن بابا کہند اسی کہ کک گھٹوگھٹ چوہر پا کے بیجتی ہے۔ خیر  
 بابے نوں منالیا کہ نویں بھوں وچ تہر ہی کافی ہووے گی۔ بابے نے او سے ویلے  
 نوکرنوں حکم دتا: ”سنیا! سویرے گلڑ دی بانگ اٹھ کے مل جوئے آن“۔ اتھے میں  
 اک گل دسی ضروری سمجھدا ہاں، وڈے بابے دا تاں بوڑھ سنگھ کوئی درلا ہی جان دا  
 سی۔ گھنئے کیاں وچ ہی اوس نوں ”بابا جھتاں“ کہندے سن تے ایہہ نام باروچ  
 وی اوس دے نال ہی آیا۔ جس دن بابا تن چار ہاڑے اکٹھے پی لوے، اوس دن  
 اوہ دریا جھتاں وانگ بجد اسی۔ ایہہ گھنئے کیاں والیاں دا وچاری کہ ایس لئی  
 اوہتاں نے بابے دا نام ”بابا جھتاں“ پادتا سی۔ سنیا ہس کے بولیا: ”بھائی! گلڑ  
 کتھوں لیاواں گے بانگ دین لئی؟“ بابے نے اوس نوں دو چار گرم گرم گالھاں  
 کڈھیاں۔ بابے دیاں گالھاں سن کے سنتے نوں نیندوا ہوا چنگی آوندی سی۔ اگلے  
 دن چنگے تڑکے اٹھ کے موہرے مل دی جھنگی بابے نے پھڑی۔ دو جاہالی سنیا سی۔  
 دوواں نے پر چھاویں ڈھلن توں پہلاں اک کله نوں تہر پا کے سہا گامردتا۔ گھر  
 آ کے بابا کڑک کے بولیا: ”چھیر سہیاں! اسماں سویرے اک پیلی بیجتی اے۔ بی  
 کڈھ کے رکھیں“۔ چاچا تے تیا جھنگی بناؤن لئی لکڑاں وڈھ کے لیائے سن۔ تیا  
 خود لکڑاں چھاگ بنا رہیا سی۔ بابے دی گل سن کے اوہدے ہتھوں کہاڑی ڈگ

پئی۔ کے نون چیتا ہی نہیں سی کہ کک بیجن لئی گھرنی دا اک دانہ وی نہیں سی۔  
 بی خانوال توں نیڑے کتوں ملتا وی نہیں سی۔ تایا او سے ویلے گھوڑی تے چڑھ  
 کے مراد جانگی دی بھنی تے پچا۔ خانوال داراہ کھن لئی۔ مراد نے سمجھایا: ”انج  
 جان دی غلطی نہ کرنا جے کپر وچ کدائیں بھلی پے گئی تاں تے مرویو۔“ اوں کہیا:  
 ”ہک دیہاڑا ہور رُک ونجو۔ ڈکے وین لدے (لادواٹھ) لے کے خانوال  
 نوں۔ اوہ تہانوں نال گھن وین۔“ نال ہی مراد نے پکی کیتی کہ راہ دے نشان  
 چنگی طرح یاد کر لینے تاں جو پھیر کدے جانا پوے تاں راہ یاد ہووے۔ تیجے دن  
 تایا اٹھاں والیاں دے نال گیا۔ بار وچ سجدیاں ہی اک ہور مسئلہ پیش آیا سی۔  
 پلٹن وچ حوالدارنوں چھٹی لکھنی سی کہ اسیں بار وچ پہنچ گئے ہاں۔ گھننے کے  
 والیاں نوں وی دسنا سی کہ اسیں سکھی ساندی بیج گئے ہاں پر اسیں اجاڑ وچ کارڈ،  
 لفافہ، قلم دوات کتے اتے چھٹی لکھ کے پاؤنی کپڑے ڈاک خانے وچ سی، خیر  
 تیجے دن تایا گیا تے سارے کم کر آیا۔ چھٹی لکھ کے پا آیا تے مراد دے دے  
 مطابق منڈی دے اک آڑھتی دا پتہ لے آیا جہدے کول چھٹیاں دے جواب  
 پہنچدے سن۔ واپس آوندیاں تایا دو بوری بی، اک بوری آتا، کچھ گوتے ہور لوڑ  
 والیاں دستاں لے آیا تے نال ہی کچھ ضروری سند وی لیایا۔ تیسرا، آری، ستھری  
 تے ریتی وغیرہ۔ گھر بچاتاں اتھے سارا ٹبر خوش خوش دیا۔ کیوں جے اک ہور  
 سکھ پروار پہنچ گیا سی۔ کنا چنگا دن چڑھیا سی اج۔ گرودی کڈی وڈی بخشش سی۔  
 بابا روڑ سنگھ بڑا گھٹ بولداسی تے جدوں بولے۔ گل پتے دی کرداسی۔ باپو کہن  
 لگا: ”بھراؤ! تسیں آگئے اوساڈے دن پھر گئے نیں۔ ہن اسیں وں پے آں۔“  
 ایہہ ٹبر او سے دن رات نوں کچھ ہنیرے ہوئے پچاسی جس دن تایا خانوال گیا  
 سی۔ اوہتاں نے ساڈے ٹکانے توں کوئی ادھ میل دور ڈیرا لایا سی پر راتی اوہتاں

ساڈے چلبے وچ بلدی اگ ویکھ لئی سی۔ اوہناں وچوں اک جنا سویرے ہی ساڈے ول آیا۔ اوس ویلے صرف باپو تے ماں ہی گھر سن۔ آؤن والا نوجوان سکھ نوں ویکھ کے دوروں ہی بولیا: ”واگورو جی کا خالصہ، واگورو جی کی فتح“۔ نیڑے پنج کے باپو دے پیریں ہتھ لایا تے فیر اوس دے گل نوں لگ کے اینج ملیا جویں چراں دے وچھڑے پیو پتر ملدے ہن۔ ماں تے باپو دوہاں نے اوس نوں دلا سادتا۔ ماں جی ددھ دا چھنا لے آئے۔ اوہ نوجوان بولیا: ”ماں جی! لسی ہے تاں پیاو۔ اج چووی دن ہو گئے نیں لسی پیتیاں“۔ اوہ گٹا گٹ تن چھنے لسی دے پی گیا۔ ماں نے اوس نوں کہیا: جاگھر والیاں نوں دس دے۔ اج ساریاں دی روٹی میں پکاواں گی“۔ جدوں اوہ روٹی کھان آئے تاں اوہناں دے نال اک دس باراں سال دی لڑکی سی۔ اوہ ماں دے گل لگ کے ڈاڈاں مار کے روٹی۔ بڑی مشکل نال چپ کرائی۔ ایہہ وچاری کدے ماں تے بھیناں بھراواں توں دُور نہیں سی ہوئی۔ ہن ایس نوں ٹبر والے اگلی نوں روٹیاں پکاؤن لئی لے آئے سن۔ دوواں ٹبراں نوں جویں سورگاں دی چھاں مل گئی ہووے۔ باپو آکھیا: ”سنگھو! فکر نہ کرو، اسیں دو، نہیں دو لکھ ٹبر آں“۔

بیائی ہن چنگی تے سی کسے نوں وی پل بھر دا ویہل نہیں سی۔ پچھلے دو دنوں توں اک مصیبت ہو رکھری ہو گئی سی۔ پانی دی واری ہن مڈھ والیاں مربعیاں دی سی۔ اتھے کھال مک گیا سی۔ ہن دو ویلے ڈنگراں نوں پانی ڈاہون کوئی ڈیڑھ میل دور جو ہے تے لے جانا پیندا سی۔ اتھے ہی ساریاں نوں نہاؤن جانا پیندا سی تے اتھوں ہی پین والے پانی دا اک گھڑا سویرے تے اک شام نوں لیاؤنا پیندا سی۔ پٹھے وی ڈھائی میل دور توں لیاؤنے پیندے سن۔ ساریاں دیاں ڈیوٹیاں ونڈیاں ہوئیاں سن۔ بابے جھناں دی عمر ستر توں کجھ اُتے سی۔ اوہ ہل دا

پورا جو ترالا کے نکالاں نوں پٹھے وی کتر داسی۔

ایہناں دناں دا اک قصہ تیا بڑے چسکے لا کے سناؤندا ہوندا سی۔ لوڈھے ویلے گھرے وچوں پانی مک گیا۔ باپو نے چاچے نوں آکھیا: ”دیپو! بھج کے جا پانی دا گھڑا لیا۔“ چاچے نے گھڑا پھریا تے گھوڑی نوں جھنبو دے کے پلاکی مار کے اُتے چڑھ گیا۔ سارے آکھن: ”توں گھوڑی تے گھڑا کیوں لیا ویں گا۔ بھریا گھڑا گھوڑی اُتے تینوں پھراؤ کون؟“ پر چاچا آکھی جاوے: ”میں لے آواں گا۔“ کجھ چر پچھوں چاچا گھوڑی تے چڑھیا سرتے گھڑا رکھی، ہتھ چھوڑی گھوڑی نوں رواں چال پائی آوے۔ گھر والے پچھن لگے: ”توں گھڑا کج گھوڑی تے رکھیا؟“ چاچا کہی جاوے: ”میں گھڑا سرتے رکھ کے گھوڑی تے چڑھ گیا سی۔“ اوہ اگلے دن وی ایویں ہی گھوڑی تے گھڑا لیا۔ پچھوں پتہ تاں لگ گیا کہ چاچا کیہ کھیڈ کھیڈ داسی۔ پراوہ خیر تک ایہہ ای کہندارہیا: ”میں گھڑا سرتے رکھ کے گھوڑی تے چڑھ جاندا آں۔“

اک دن مراد نے باپو نوں راجو ہے ول ڈنگر لئی جان دے دیکھ لیا۔ اوہ نکالاں نوں گھر آیا۔ جدوں تائے نے دسیا کہ ڈنگراں نوں راجو ہے توں پانی ڈاہ کے لیاؤندے ہاں تاں اوہ ہس کے بولیا: ”واہ او سردارو! تہاڈے پیراں تلے پنگو پیاو ہے تے تسیں ڈھوراں نوں دو کوہاں تے پانی پیاون کان چکی وہندے او۔“ فیراوس نے دسیا کہ ساڈے ڈیرے دے دو بے پاسے نیڑے ہی اک ہور کھال وگدا سی۔ ساڈے ٹبر نوں ایس کھال دا پتہ ہی نہیں۔ خیر دو میل تے نہاؤن جان تے ڈنگراں نوں پانی ڈاہون والی لوڑ دو تن دن ہی رہی۔ ایہہ جان کے ساریاں نوں بڑی خوشی ہوئی کہ پانی سانوں نیڑے ہی مل جایا کرے گا۔

جیہڑا نواں ٹبر آیا، اوہ اپنے نویں نکانے بارے ٹھیک اندازا نہیں سی لا

سکے۔ اوہناں کول نہ چائی سی نہ کاڑھنی نہ نہیہ۔ اوہ مدھانی لے آئے سن تے سوچ  
 لیا سی کہ باقی سب کجھ اگے مل جائے گا۔ ایس جنگل وچ کیہ لبھنا سی۔ دودن تاں  
 اوہ وادھو پچیا ددھ ساڈے گھر دے جان دے رہے۔ تیجے دن ماں جی گئے تاں  
 اوہناں دا چلہا چونکاں بنا کے آئے، نال آئی پچی و چاری نوں کیہ پتہ سی۔ ماں نے  
 اوس نوں دسیا کہ دُدھ پیلے وچ تتا کر کے ولٹو ہی وچ جما لیا کر۔ ولٹو ہی دا مونہہ  
 کھلا سی۔ اوس وچ مدھانی تے گڑا آسکدے سن۔ ماں جی اپنے گھروں اک چمٹا  
 لے گئے سن۔ زمین وچ اک ڈنڈا گڈ کے نال چمٹا رکھ دتا۔ ایہہ ہن کم چلاؤ نہیہ  
 بن گئی۔ ہور دو چکر مار کے ماں جی نے اوہناں نوں ہارے، بھڑولی وغیرہ بنا کے  
 دے آئے۔ انہیں دنیں اک ہور رواقہ ہو یا جو دیکھن نوں معمولی گل سی پر ایس  
 بیابان دے وسیکاں لئی بہت وڈی ضرورت کھڑا کر گیا سی۔ ماں جی دی چائی بھج  
 گئی تے بھجی وی بڑے رومانٹک ڈھنگ نال۔ اک تکالاں ہنیرے ہوئے ماں  
 جی چلے تے دُدھ تتا کر رہے سن کہ چونکے وچ اک سپ آیا۔ ڈبوسپ نوں ویکھ  
 کے بھونکیا۔ ماں جی نے چلے وچوں بلدا بلدا پوچک کے اپنی زور دی سب دے  
 سروچ ماریا کہ سپ او تھوں ہل ای نہ سکیا۔ پر بُری گل ایہہ ہوئی کہ پو دا سٹریا ہو یا  
 حصہ جیہڑا سپ دے سروچ و جا اوہ ٹٹ گیا تے باقی رہندا ماں جی دے ہتھ وچلا  
 ٹوٹا چائی وچ جا و جا۔ ماں جی نے پتہ نہیں کئے زور نال وار کیتا کہ سپ نے تے  
 مرنا ہی سی نال چائی دے ٹھیکرے دور دور تیکر کھلر گئے۔ سارے ٹبر وچ سوگ پے  
 گیا۔ اگلے دن نہ لسی ملنی سی نہ مکھن تے سبھ توں ودھ فکر ایہہ سی کہ اتھے چائی ملنی  
 کتھوں ہے۔ اگلے دن تایا پھیر مراد دی بھینی تے گیا۔ مراد ہر ویلے نوں  
 وسیکاں دی مدد لئی تیار رہندا سی۔ اوہ ماہرا (چڑھاؤ اٹھ) لے کے کتے گیا۔ (اج  
 مینوں یاد نہیں کتھے) تے لوڈھے ویلے آدیا سو” پر سو کبھار آ سی تھا گھن کے“

جانگلیاں دی بولی وچ ”تھا“ مٹی دے بھانڈیاں نوں کہندے سن۔  
تیجے دن گھمار (گھمیار) آیا۔ چوکھے سارے بھانڈے اُٹھتے  
لدکے۔

ماں نے اپنی لوڑ لئی تے کجھ آون والیاں پرواراں لئی کافی بھانڈے لے  
لئے۔ پر دریا دلی دیکھو غریب جانگی گھمیار دی جدوں ماں پیسے دین لگی تاں بولیا:  
”نہ اماں تساں ساڈے مہمان تھئے۔ تہادروں پیسے گھن کے میں مُکالا کھٹنا ہے۔“  
زور لاون تے وی اوس پیسے نہ لئے۔ اپنے نوں تاپا آ گیا۔ اوس نے آکھیا توں  
ساڈا پکا پر جاپت ایں۔ اتھے بڑے لوک آونے ہن۔ دسیں پندرین دن چکر ماردا  
رہیا کر۔ پچھوں ایہہ گھمیار کئی سال تک ساڈے پنڈا پکا پر جاپت رہیا۔ ترن  
لگے نوں ماں جی نے اک روڑی گڑ دی تے سیر بھر چول دتے۔ جھیرے پنڈوں  
لیاندے سن۔ جانگلیاں لئی ایہہ دوویں سوغاتاں وڈی نعمت سن۔ گڑ بارے  
جانگلیاں دا اپنا گھڑیا ہو یا اک چنکلا اوہ سناوندے ہوندے سن۔ مہاراجے دے  
راج وچ اک نوجوان جانگی اوتھاں دے قافلے نال لاہور گیا۔ اوتھے خالصہ دربار  
دی شان شوکت ویکھ کے اوس دیاں اکھاں چندھیا گئیاں۔ اک دن دوستاں دی  
محفل وچ بیٹھا کہن لگا: ”راجے رنجیت سنگھ دے پلنگ دے پاوے سونے دے  
ہن۔“ محفل وچ اک سوجھوان دوست بولیا: ”توڑے بادشاہ تھیا۔ بھاویں گڑ دے  
پاوے چا بناویں۔“ ایہہ کہانی بھاویں من گھڑت ہووے پر ایس توں جانگی سماج  
وچ گڑ دی اہمیت دا اندازہ لایا جاسکدا ہے۔



## گنجی باردا تحفہ

کے گنام شاعر دا اک بڑا مشہور فارسی شعر ہے۔ ملتان دے علاقے بارے:

چہار چیز است تحفہ ملتان  
گرد، گرما، گدا و گورستان

(ملتان دے چار مشہور تحفے ہن۔ گھٹا، مٹی، منگتے تے قبریں)

شاعر نے اتھے گھٹا مٹی (گرد) دا نام تاں لیا ہے پر ہنیری ایہناں تحفیاں وچ نہیں گنوائی۔ ہنیریاں دا ذکر کیتیاں بنا گنجی بار دے بیون دا اک بڑا اہم انگ ان پچھا تارہ جاندا ہے۔ ہنیریاں شروع توں لے کے ساڈے بار چھڈن تک سانوں بری طرح جھنجوڑ دیاں رہیاں۔ ایہناں ہنیریاں نے ساڈا کدے کجھ سواریا نہیں سی، وگاڑ دیاں بہت کجھ رہیاں۔ بنے بنائے بوہل اڈ جاندے سن۔ توڑی دیاں دھڑاں تے چھولیاں دے کنوں اڈ جاندے سن۔ ایہتوں تک کہ کھلواڑیاں وچ لکیاں کنک دیاں بھریاں وی اڈ جان دیاں سن۔ ڈھاریاں دیاں چھناں وی ہنیری اڈا لے جان دی سی۔ ہنیریاں وچ کئی واری بڑے دلچسپ تے کدے کدے بھیا تک واقعے واپر دے سن۔ اک ہنیری وچ بسکھاں دے چک (52) دا ساہن نال لگدے مسلمان جانگلیاں دے پنڈ دے کھوہ وچ ڈگ پیلے تے رات بھر کھوہ وچ ہی رہیا۔ ونے پتہ لگن تے 82 والے پیلاں تے لجاں لے کے کھوہ وچوں ساہن کڈھن گئے۔ اگے اک دونہ مسلماناں نے اعتراض کیتا کہ بسکھ ساڈے کھوہ وچ نہیں وڑ سکدے۔ بسکھاں نے آکھیا:



”چلو فیرتسیں ساڈا ساہن کڈھ دیو“۔ ایہہ کوئی سوکھا کم نہیں سی۔ آخر پنڈ دے مولوی نے سمجھایا کہ جے ساہن کھوہ وچ مر جاوے تے فیر کیہ کرو گے۔ ساہن دی بیل لمی سی۔ سوڑے وڈھ والے کھوہ وچ اوہ پورا نہیں سی آوندا۔ اوہ کھوہ وچ کوئیں جیوندار ہیاتے اوس نوں کس طرح باہر کڈھیا۔ ایہہ اک دکھری کہانی ہے۔ اک ہور ہنیری وچ اک اٹھاں نواں مہیاں دا ٹوانہ اڈا اڈا مساں بچایا۔ واڈھیاں دے دن سن۔ لوڈھے ویلے لاوے بدھیاں ہوئیاں بھریاں چک چک کے کھلوڑے تے لا رہے سن۔ پچھے پچھے سلا چنن والیاں سٹے چن رہیاں سن۔ اک جینی نے اپنا اٹھ نوں مہیاں دا بچہ رکھدی چھاوئیں سوایا ہو یا سی۔ اچانک بڑی زبردست ہنیری آگئی۔ بچے دی ماں کافی دور سٹے چن رہی سی پر بچہ پہلے ہی بٹے نال رڑھ پیا۔ رڑھداوی جاوے تے روند اووی جاوے۔ ماں نے حال دوہائی پائی۔ کوئی تیبہ جتی گز دور بچہ جا پھڑیا۔ کنک دا وڈھ سی۔ بچے دا سارا سریر بلوند ریا گیا۔

اک ہور ہنیری وچ اک رومانٹک قصہ واپریا۔ مانجھے وچوں اک نونہہ مکلاوے آئی سی۔ بارہجی نوں حالے چار پنج دن ہی ہوئے سن۔ کپڑے دھو کے سکنے پائے ہوئے سن کہ ہنیری آگئی۔ سس نے آکھیا: ”بھج نی بی بی لیڑے سانہ۔ ہنیری آگئی او“۔ ہنیری نے آگھیریا۔ نونہہ دوڑی۔ لیڑے تاں اُس نے لاہ کے چک لئے پر اپنے نوں ہنیری نے آگھیریا۔ ملتان دیاں ہنیریاں وچ اپنا ہی ہتھ اکھاں توں دو کوفٹ دور نظر نہیں آوندا سی۔ نونہہ ہنیرے وچ راہ بھل کے چوکے ول جان دی بجائے باہر دے وڈے دروازے ول نوں تڑپئی۔ اودھروں سوہراوی ہنیرے وچ ٹوہندا آرہیا سی۔ نونہہ سدھی سوہرے وچ وجی: ”اوے توں کیہڑا ایل؟“ سوہرے نے گھبراہٹ وچ پچھیا۔ نونہہ وچاری کیہ جواب

دیندی۔ ابھڑوا ہے دو بے ونے نوں دوڑی۔ اودھروں کس نے واج مار کے آکھیا: ”ایدھروں آ“۔ نونہہ چونکے کول تاں پہنچ گئی پر راہ وچ اڈ کے آئی اک پیڑھی نال اڈ کے ڈگی تے ڈگی گھڑیاں والی گڑونجی اُتے۔ نونہہ دامتھا تاں بھجنا ہی سی، نال دوں گھڑے وی بھج گئے۔

سو، ایہو جیہیاں سن گنجی بار دیاں ہنیریاں۔ اج ایہہ ہنیریاں وی سانوں انج یاد آوندیاں ہن جو یں اپنی جوانی یاد آوندی ہے۔ پر میں گل کرنی ہے ساڈے بزرگاں دے سر بیتیاں پہلیاں دو ہنیریاں دی۔ تایا شیر سنگھ ایہناں دی کہانی واہو اُون مرچ لا کے سناوندا ہوندا سی۔ باروچ ویاں ساڈے بزرگاں نوں کوئی چار پنچ دن ہوئے سن۔ ٹبرنوں جا پدا سی کہ ہن ساڈا گھروس پیا اے۔ اک دن لوڈھے ویلے باپو روڑ سنگھ تے نوکر وِتر بن نوں سہاگا مارن گئے سن۔ (بابے روڑ سنگھ نوں اسیں ”باپو“ آکھدے ہوندے ساں) چاچا دلپ سنگھ دُور کھال تے نہا کے مالش کر رہیا سی۔ تایا کہندا ہوندا سی: ”دیپو مالش کر کے ڈنڈ پٹھکاں کڈھ رہیا سی“۔ (چاچا جے ان داڑھیاں تے سارے اوس نوں ”دیپو“ ہی آکھدے سن) بابا جھناں وی کہتے باہری۔ گھر سن تایا تے ماں جی۔ ماں روٹی پکا رہی سی۔ روٹیاں چانے چانے ہی پکاؤنیاں پندیاں سن کیونکہ سرہوں دے تیل دا دیوا معمولی جہی ہوانال بھج جاندا سی۔ ایسے نوں تائے نے واج ماری: ”چاچی! اپنا آٹا دانہ سانہ، ہنیری آگئی او“۔ ماں نے پچھانہہ مونہہ کر کے دیکھیا۔ کالی بولی ہنیری موڈھیاں تے آچڑھی سی۔ ماں نے چھیتی چھیتی اک تھالی آٹے اُتے موڈھی ماری تے اُتے کوٹھی موڈھی مار دتی۔ دو جی تھالی روٹیاں اُتے موڈھی ماری۔ اُتے رکھن لئی کوئی بھار لہسن لگی کہ ہنیری آ پھنچی تے اڈا کے لے گئی ماں جی دی چنگیر سنے روٹیاں تے سنے تھالی۔ اوتھے نہ کوئی کندھ نہ کوئی کوٹھا۔ نہ واڑ نہ اولھا۔ رڑے

میدان وچ سبھ کجھ بنا کے روکاوٹ توں اڈیا جا رہیا سی۔ ماں جی دے چلے  
وچوں اڈیاں بلدیاں چھاپیاں تے اوہناں وچوں نکلدے چنگیاڑے دور تک اڈ  
دے دسدے سن۔ ہور کجھ نظر نہیں سی آرہیا۔ ہاں ماں جی دی تھالی اڈدی جاندی  
کھڑکدی سی۔ ماں اوس دے مگر دوڑی۔ ڈگدی ڈھیندی نے تھالی تاں جا پھڑی  
پر فیرا یہہ پتہ نہ لگے کے گھر کیہڑے پاسے ہے۔ اپنے نوں اک وچھے دا ڈرنال  
اراٹ نکل گیا تے اودھر ہج نال گاں وی اڑنگی۔ ماں جی نوں اپنے گھر دی سیدھ  
مل گئی۔ کوئی ادھا گھنٹہ ہنیری دا زور رہیا۔ ہور دساں پنڈراں منٹاں پچھوں جدوں  
کجھ دس لگا تاں ماں دی چنگیر دی بھال شروع ہوئی۔ ڈبو (کتا) ایس مہم وچ بڑا  
کامیاب سدھ ہویا۔ ڈبو عام پینڈو کتا سی پر بڑا سوجھوان، فرمانبردار تے صبر  
سنو تھک والا سی۔ ماں جی اوس نوں روٹیاں تے ددھ دی راکھی لئی وی بٹھا جاندے  
سن۔ ڈبو سنگھدا سنگھدا اگے لگا۔ کجھ چر پچھوں اوہ دوروٹیاں لے آیا تے ماں جی  
دے پیراں کول رکھ دتیاں۔ ماں نے روٹیاں مجھاں نوں پاؤن لئی چک لیاں تے  
ڈبونوں کہیا: ”جا چنگیر لہہ کے لیا“۔ ڈبو فیرا اک روٹی چک لیا۔ تہی وار ڈبو چنگیر  
وی کے جھاڑی وچ اڑی چک لیا۔ گھر مڑ کے مال ڈنگر گنیا۔ سبھ ٹھیک سی۔ کوانے  
وچ پوری صفائی ہو چکی۔ اُتے پناں کترے ہوئے پٹھے تے توڑی دیاں دو پنڈاں  
ہونجھیاں کھیاں سن۔ سون والے منجیاں دیاں صرف بھوں وچ گڈیاں لکڑاں ہی  
رہ گھیاں سن۔ باقی سبھ کجھ اڈ گیا سی۔ شکر اے کہ تائے نے لیڑے، کپڑے تے  
بسترے اکٹھے کر کے اک منجی تے رکھ کے اُتے دو جی منجی مودھی مار دتی سی اُتے  
اُتے آپ بیٹھ گیا سی۔

ہن تک ہنیری دا ویک مٹھاپے نوں کوئی دو گھڑیاں ہو گھیاں سن پر ٹبر  
دے جیاں وچوں اکلا بابا جھناں ہی گھر پر تیا سی۔ بھایا گھوڑی لے کے چاچے

نوں لہمن گیا۔ اوس دے نہاؤن والے ٹکانے ول جج کے واج ماری تاں پتہ لگا کہ چاچے دانواں جھگا اڈ گیا سی۔ چاچا اوسے دی بھال وچ ٹکراں مار رہیا سی۔ تیا اوس نوں دلا سادے کے نال لے آیا کہ جھگا سویرے لہ لاں گے۔ اتھے کبھڑا کسے نے چکنا اے۔ فیر تیا گھوڑی تے ڈبونوں لے کے سہاگے والیاں نوں لہمن گیا۔ اوہ سہاگا چھڈ کے مڑ رہے سن کہ ہنیری وچ پھس گئے۔ اڈ دیاں چھاپیاں توں بچن لئی اک ٹہی دی آڑ لئی۔ ہنیری پچھوں مڑن لگے۔ گھروں سیدھ گوا کے سجے ہتھ ول تھر پئے۔ تائے نے دوڑ بھج کر کے واجاں مار کے مساں اوہناں نوں لہمیا۔ گھوڑی تے گتے دوہاں نوں اک وار ویکھے راہ دی بڑی پچھان ہوندی ہے۔ ڈبوتے گھوڑی ایس لانے نوں سدھا گھر لے آئے۔

اوس رات روٹی پکی کہ نہ کسے نے کجھ کھا دایاں بھکھے ہی ستے۔ ایس بارے مینوں ہن کجھ یاد نہیں۔ تائے شیر سنگھ توں سنن دے مطابق ایہہ ساڈے ٹبر دا گنجی باردی ہنیری بارے پہلا تجربہ سی۔

دو جی ہنیری تن چار دن بعد ہی آئی۔ او دوں ٹبر دے جی کافی سوادھان ہو چکے سن۔ اید کی ہنیری ستیاں پیاں آئی۔ پٹھے پھیر اڈ گئے۔ اک گاں کلا پٹھا کے کدھرے نکل گئی۔ کافی دوڑ بھج کر کے لہمی۔ ماں دی چاٹی ہنیری روڑھ کے لے گئی۔ اوہ اگلی سویرے ماں نے آپے ہی ڈبونوں نال لے کے لہ لئی تے لہمی ثبوتی۔ سبھ توں دلچسپ سا کا ایہہ ورتیا کہ باپو تے تائے دوہاں دیاں پگاں اڈ گئیاں۔ ہنیری پچھوں دوویں جنے پگاں دی بھال وچ تھرے۔ ہنیرا بے وی بڑا سی۔ کجھ دور جا کے باپو خوشی نال بولیا: ”لے بھئی میری تاں لہ پئی او“۔ باپو دی پگ اک جھاڑی وچ اُلجھی ہوئی سی۔ پل بھر پچھوں تیا وی بول اٹھیا: ”میری وی لہ پئی اے“۔ دوویں جنے ہنیرے وچ اپنیاں پگاں کنڈیاں وچ اُلجھیاں کڈھن

لگے۔ جدوں کافی محنت پچھوں پگاں کڈھ لیاں تاں پتہ لگا کہ دوہاں نے اِکو پگ دا  
 وکھ وکھ لڑ پھڑیا ہو یا سی۔ ایہہ پگ تائے دی سی۔ باپودی پگ اگلی سویر ڈبونے لہھی۔  
 اساں بار وسا لئی۔ جنگل وڈھ کے صاف کر دتے۔ بے توڑ کے  
 پدھرے کر لئے۔ کلر کپڑی زرخیز بھوں وچ بدل دتے پر ہنیریاں نوں قابونہ کر  
 سکے۔ ایہناں دا ویک ساڈے بار چھڈن تک اودویں ہی رہیا تے اج وی اودویں  
 ہی ہووے گا۔ ہن میں ہنیری نال تعلق رکھن والی اک ہڈ بیتی سناونا چاہوندا ہاں۔  
 ایہہ گنجی بار چھڈن توں صرف پنج سال پہلاں دا واقعہ ہے۔ میں اوہنیں دنیں  
 بی۔ اے پاس کر کے کجھ نجی حالات کارن خانیوال رہ رہیا ساں تے دسیں پندریں  
 دنیں پنڈ آوندا ساں۔ اودوں تک شہر خانیوال توں اک لاری ساڈے پنڈاں نوں  
 چلن لگ پئی سی۔ جیہڑی شامیں چارو بے شہروں پنڈاں نوں جاندی سی اتے  
 سویرے اوتھوں شہر نوں آوندی سی۔ ”بس“ نوں اوس زمانے وچ سارے پنجابی  
 ”لاری“ آکھدے سن۔ میں عام طور تے سائیکل تے جانداساں۔ اک ہفتے  
 والے دن جدوں میں پنڈ نوں جان لگا تاں ساڈے گواہنڈی پنڈ چک 78 دے  
 دوسا تھی ملن آئے۔ اوہ آکھن لگے ”ادھا گھنٹہ ٹھہر جا، اکٹھے چلدے آں“۔ جدوں  
 اسیں پنڈ نوں تڑے، دن ابے چنگا کھڑا سی تاں اسیں سوکھے ہی لوئے لوئے پنڈ  
 پہنچ سکدے ساں پر مساں کوئی تن میل گئے ہواں گے کہ میرا سائیکل پنجر ہو گیا۔  
 اودھر سائیکلاں والے پنجر دا سامان تے پمپ نال لے کے تڑ دے سن۔ پنجر  
 لایا۔ کوئی پندراں منٹ لگے فیر تڑے تے کوئی ڈھائی تن میل چلن پچھوں دوسرے  
 منڈے دا سائیکل پنجر ہو گیا۔ فیر پنجر لا کے تڑے تے کوئی ہورتن میل پچھوں تن  
 وچوں دو سائیکل اکٹھے ہی پنجر ہو گئے۔ ہن اساں سوچیا کہ بے پنجر لاؤن لگ  
 پئے تاں سانوں اتھے ہی ہنیرا ہو جانا ہے تے اگے اساں تقریباً اٹھ میل غیر آباد

علاقے وچوں دی لنگھنا ہے۔ کوئی چھ میل کپرتے تقریباً دو میل جنگل۔ سو اسیں فیصلہ کر کے پیدل تڑپے۔ اگے راجو اہا آیا۔ اوس توں پانی پی کے اسیں کپر وچ وڑ گئے۔ اہجے سورج کھڑا سی۔ اسیں ادھا پنڈا چاننے چاننے کرسکدے ساں۔ کپر وچ کوئی ڈیڑھ دو میل گئے ہواں گے کہ کبھے پاسیوں بھیا تک ہنیری اٹھی۔ اسیں بالکل رڑے وچ ساں۔ ہنیری وچ اڈ کے آئے چھاپیاں توں بچالئی اسیں اک ٹہی دی آڑلئی دوڑے۔ ایہہ ٹہی کوئی دو ڈھائی سو گز دور سی۔ ساڈے اوتھے پہنچدیاں تک ہنیری آگئی۔ کافی لمے سمیں تک ہنیری چلی۔ گھپ ہنیرا سی۔ ٹہی دی اوٹ دے باوجود بکاں دے بگ مٹی گھٹا، کنکر، چھوٹیاں موٹیاں چھاپیاں ساڈے وچ وچ رہیاں سن۔ کوئی ڈیڑھ گھنٹے پچھوں ہنیری بند ہوئی پر ہنیرا اہجے کافی سی۔ سانوں اک دوہجے دے بت ہی نظر آوندے سن۔ ہن اک ہور پریشانی کھڑی ہوگئی۔ ہنیری رُخ بدل دی رہی سی تے اسیں بے دے چوہیرے گھمدے رہے ساں۔ ہن سانوں ایہہ پتہ نہ لگے کہ خانیوال کہڑے پاسے ہے تے ساڈے پنڈ کہڑے بنے۔ میرے دوویں ساتھی خانیوال ول نوں ہتھ کھڑا کر کے کہن کہ پنڈ ایڈھر ہے۔ میں ٹھیک اپنے پنڈ ول اشارہ کراں۔ آخر میں اوہناں نوں کہیا کہ تسیں میری گل منو جدھر میں کہند اہاں اودھر چلو جے ایہہ راہ ٹھیک ہو یا تاں اسیں پنڈ پہنچ جاواں گے تے جے تہاڈے خیال مطابق اسیں اُلٹے پاسے چل رہے ہوئے تاں راہ وچ راجو ہا ضرور آونا ہے۔ پانی پی کے اوتھے سوں جاواں گے۔ سویرے اٹھ کے تڑپواں گے۔ اوہناں میری گل من لئی۔ ہن میرے لائے اندازے مطابق اسیں راہ لہمن لگے جہڑا چھڈ کے اسیں ٹہی دی اوٹ لئی سی۔ کوئی پنڈراں منٹ ٹکراں مار دے رہے۔ پیراں نال ٹوہ ٹوہ کے راہ لہندے ساں۔ دسدا تاں اہجے بہت گھٹ سی۔ کجھ چہ ہوراگے پچھے، سچھے کبھے

بھال کیتی۔ راہ کتے نہ لبھا۔ ہن پوزیشن ایہہ سی کہ سانوں ایہہ وی نہیں سی تھہدا کہ پنڈ سامنے ہے کہ پچھے۔ سچے یاں کہے۔ انج جا پن لگا کہ اسپس ایس بیابان وچ تہائے مر جاواں گے۔

ایس بے وی دی حالت وچ اکو چار اباقی سی دُعا۔ اسماں اک من، اک چت ہو کے با بے نانک نوں یاد کیتا تے بنیتی کیتی: ”بابا! ساڈی مدد کرو“۔ بابا بو ہڑیا۔ چھیتی ہی سانوں راہ لبھ پیا تے اسپس اوس پاسے نوں تڑپے جدھر میرے اندازے مطابق ساڈے پنڈ سن۔ کوئی ادھا گھنٹہ تڑن پچھوں سانوں پتہ لگا کہ ایہہ ساڈے پنڈ دا راہ نہیں۔ اوہ ایدھر نہ آئے۔ فیروں سانوں حوصلہ سی کہ آخر ایہہ راہ کسے پنڈ ہی جائے گا۔ جتا پنڈا کر کے اسپس دو ڈھائی گھنٹے وچ سچ جانا سی۔ ہن تن سواتن گھنٹے تڑ کے وی نہ کوئی جھگی آئی، نہ کھیت، نہ کوئی گتا بھونکے۔ سانوں پانی پیتیاں کوئی پنج گھنٹے ہو گئے سن۔ سخت تیہہ لگی ہوئی سی تے کتے آبادی دا کوئی نشان نہیں سی دس رہیا۔ فیروں ہونے پر اپنے نوں اچانک اسپس اک پنڈ وچ جاوڑے۔ ساڈا ویکھیا بھالیا پنڈ پر اج پتہ نہ لگے کہ ایہہ کہو پنڈ ہے۔ خوش قسمتی نوں اک جانگی کہی لے کے نکلیا۔ پانی لاؤن۔ اوس توں پچھیا: ”کہو اچک اے؟“ اوہنے دسیا: ”کسراواں والا“۔ ساڈا روز دا ویکھیا پنڈ پر اج اسپس اچھے بوند لے ہوئے ساں کہ پنڈ وی پچھان نہ سکے۔ ایس پنڈ وچ ساڈے کئی واقف سن۔ حاجی محمد قیصر میرا گوڑھا یاری۔ اسپس پہلاں اپنے پنڈ اکٹھے پڑھے فیرتلنے وچ ستویں اٹھویں اک تھاں پاس کیتی۔ فیروں حاجی نوں خالصہ ہائی سکول خانیوال لے گیا۔ او تھے وی اک سال اکٹھے رہے۔ او سے جانگی نے حاجی نوں ستیاں پیاں جگایا۔ اوہنیں دنیں ہندو، سکھ مسلماناں دا پانی نہیں سن پیندے۔ حاجی نے اک ہندو دوکاندار نوں اٹھایا تے سانوں مصری دا شربت کر کے پیا تے

حاجی کوئی ادھے میل تک پنڈوں باہر آ کے سانوں راہ پا کے گیا۔ حاجی نوں  
 مڑیاں کوئی دس باراں منٹ ہی ہوئے ہون گے، اسیں فیر راہ بھل گئے۔ اج دن  
 ہی کوئی اجیہا چندرا چڑھیا سی۔ اصلن وچ ایہہ پیدل چلنے والیاں دی ڈنڈی سی تے  
 ساڈے ہتھاں وچ سائیکل سن۔ اک تھاں کتے راہوں لانجھے ہوئے تے کتے  
 دے کتے چلے گئے۔ ہن اسیں نرے دے کھیتاں وچ جاوڑے جتھے سائیکل دھونا  
 وی مشکل سی۔ خیر رُل رُل کے اساں اک سُکا کھال لہ لیا۔ اوس وچ پے کے  
 اسیں اک کچی سڑک تے جا چڑھے جتھے لاری دیاں لہیاں سن۔ ہن سانوں پتہ لگا  
 کہ اسیں کدھر دھکے کھاندے پھر دے ہاں۔ سدھے راہے کھیاں پہلوں میرا پنڈ  
 آونا سی فیر میرے ساتھیاں نے اگے اپنے پنڈ جانا سی۔ ہن پہلاں اوہناں دا پنڈ  
 آیا تے میں اگے اپنے پنڈ گیا۔ گھر دا گیٹ اندروں بند سی۔ کندھ ٹپ کے گیٹ  
 کھولیا۔ کندھ نال سائیکل کھڑا کر کے گھرے وچوں پانی پیتا۔ اک منجی لے کے  
 چپ کر کے سو گیا۔ کسے نوں نہ جگایا۔ سماں ادھی رات توں اُتے داسی۔ ایہہ  
 حال کر دیاں سن ساڈا ہنیریاں۔ پھیر وی یاد آوندیاں ہن۔ مڑ مڑ یاد آوندیاں  
 کیوں؟ ایہہ گنجی بار دیاں ہنیریاں سن تے گنجی بار ساڈا سورگ سی۔

”ٹریون“ وچوں میرے گنجی بار بارے لکھے مضمون پڑھ کے ساڈے

پنڈ چک 79 وچوں اُجڑ کے آئے جہڑے متراں دیاں مینوں چٹھیاں ملیاں،  
 اوہناں وچوں سبھ توں پہلی سی سردار گر بچن سنگھ، پنڈ کالج ضلع لدھیانہ دی۔ اسیں  
 اکو پنڈ دے وسنیک ہی نہیں ساں جماعتی وی ساں۔ ساڈے پنڈ دے نویں بنے  
 سکول وچوں جہڑی جماعت سبھ توں پہلاں چھیویں جماعت پاس کر کے نکلی اسیں  
 دوویں اوس وچ ساں۔ ایہہ 1930 دی گل ہے۔ اسیں توں پہلاں 1928ء وچ  
 سیڈ ماسٹر اتم سنگھ اپنے سکول دی چوتھی جماعت دے چار منڈے وظیفے دے



امتحان لئی لے گیا سی۔ جہاں وچوں تن ساڈے سکول نے مار لئے۔ گورنمنٹ تحصیل وچوں فرسٹ سی میں سیکنڈ تے تھامنڈ احسن دین سی جس نوں پچھوں کے کارن وظیفہ نہ ملیا۔ چھویں پاس کر کے گورنمنٹ سنگھ اپنے پنڈ کالج آ گیا تے پڑھائی جاری رکھی۔ مینوں ستویں جماعت وچ داخل ہون لئی تلبے جانا پیندا سی جو ساڈے پنڈ توں کوئی چوی میل دور سی مینوں کوئی ساتھی نہ ملیا۔ میں دو سال گھر بیٹھا رہیا۔ پچھوں 1932ء وچ ہور ساتھی ملن تے تلبے داخل ہويا۔

ہن جدوں سردار گورنمنٹ دی چھٹی ملی تاں میں جواب لکھ کے بنیتی کیتی: ”مرن توں پہلاں اک واری مل لیے۔ کے نہ کے طرح پٹیا لے پہنچو“۔ سردار گورنمنٹ سنگھ میری بنیتی من کے پٹیا لے پہنچے تے پڑھن سنن والیاں نوں یقین نہیں آئے گا کہ اسیں 62 سال پچھوں ملے اتے سچ سچا ہی میرے مونہوں چراں دا بھلیا ذوق دا شعر نکلیا:

اے ذوق کسی ہمد دیرینہ کا ملنا  
بہتر ہے ملاقاتِ مسیحا و خضر سے

اساں رات بھر رنج کے پرانے زمانے دیاں گلاں کیتیاں پر میں ہنیریاں نال تعلق رکھن والی سردار گورنمنٹ سنگھ دی ہڈ بیتی سناؤنی ہے۔ ایہہ گل 1925-26 دی ہے۔ گورنمنٹ سنگھ شام نوں ڈنگراں نوں پانی ڈاھوان لئی ڈگھی تے لیا تے ہنیری وچ گھر گیا۔ ہنیرا گھپ ہو گیا۔ ڈنگراں نوں تاں ہنیرے وچ وی کجھ دکھائی دیندا ہے۔ اوہ گھر پہنچ گئے پر گورنمنٹ سنگھ بالکل اُلٹے پاسے نوں ترپیا تے سوئی نال ٹوہندا دور جھاڑیاں دی جھنگی وچ جاوڑیا اتے اوتھے ہی بیٹھ گیا۔

اودھر جدوں ڈنگراں نال گورنمنٹ گھر نہ پجاتاں کجھ چر اڈیک کے گھر والے لالٹیناں لے کے اوس نوں لہمن نکلے جدوں اوہ ڈگھی کول پہنچے تاں اچی

اُچی واجاں ماریاں۔ اودھروں گورنچن نے آواز دتی۔ ہن تک ہنیری دا زور وی کچھ مٹھاپے گیا سی۔ جدوں لالٹیناں والے گورنچن دے کول بچے تاں ساریاں نے دیکھیا کہ گورنچن تاپا شیر سنگھ دی مڑھی دوالے اُگیاں جھاڑیاں وچ بیٹھا سی۔ ایس ملنی دوران سردار گورنچن سنگھ نے دسیا کہ پہلاں تاں مینوں کوئی ڈر بھونہیں سی آیا جد میں دیکھیا کہ میں تائے دی مڑھی تے بیٹھا ہاں تاں میرا سریر ڈرنال کنہن لگ پیا۔ ایہہ سی ہنیریاں نال سنبدھت اک ہور کہانی۔

تفصیل توں بچن لئی میں بہت کچھ اجیا لکھنوں چھڈ گیا ہاں جو لکھنا چاہندا سی۔ ساڈے پنڈ دے جیہناں آدمیاں نے سبھ توں پہلاں وفات پائی اوہ دوویں پنڈ دے ہیروسن۔ پہلا مرن والا صوبیدار میجر مستان سنگھ دا ساریاں توں چھوٹا بھرا ٹیک سنگھ جو چڑھدی جوانی وچ ہی مکلا والیا کے الہڑکڑی نوں رنڈی کر گیا۔ ٹیک سنگھ بڑے مٹھے سبھا والا تے ہر کم کرن وچ اگے لگ کے ترن والا جوان سی۔ تھوڑا چر پچھوں تاپا شیر سنگھ چلانا کر گیا۔ تاپا سکھاں وچ ہی نہیں جانگلیاں وچ وی بڑا ہر دل عزیز سی۔ اوس دے تر جان پچھوں ساڈے گھر افسوس کرن لئی جنے جانگی بچے اوانے پچھوں کسے دی موت تے نہیں پہنچے۔ ساڈے گھر دا تاں تائے دی موت پچھوں ستارا ہی ڈبنا شروع ہو گیا۔



## اوکڑاں تے مسئلے

ساڈے ٹبرنوں گنجی بار وچ بجیاں کوئی چودہ دن ہو گئے سن۔ مرتے وچ پانی دی دوجی واری لگ چکی سی۔ بیائی ا بے چوتھا حصہ ہوئی سی۔ ہن تک ٹبرنوں ایہہ پتہ لگ چکیا سی کہ جھڑی کھیتی دے سند (اوزار) اوہ گھنی کیاں توں لیاے سن اوہناں وچوں کئی اتھے کم نہیں سن دے سکدے۔ سبھ توں ضروری اوزار سی بل، جھڑیاں ہلاں ساڈے ٹبر کول سن اوہ ماجھے دی کرڑی بھوں لئی بہت چنگیاں سن پر اتھے اوہ کار آمد نہیں سن۔ اوہناں ہلاں دا گڑ (جس وچ پھالا جڑیا ہوندا ہے) بھوں دے سماتر ہوندا اے۔ گڑ وچ بیل ٹھکی ہوئی ہوندی ہے اتے بیل دے پچھلے پاسے جنگھی ہوندی ہے۔ ایس ہل دا سیاڑ نہ بہتا ڈوہنگا ہوندا ہے نہ ودھیرے چوڑا۔ گنجی بار دی ریتلی بھوں وچ جتاں سیاڑ ایہہ ہل پھدی سی اوہ تقریباً نالوں نال پٹی ہوئی ریت ڈگن نال پوریا جاندا سی۔ بار دا ہل جس نوں ماجھے والے ”ہلڑ“ آکھدے سن تے ملوئی ”منا“ کہندے سن۔ بالکل وکھری طرح دا سی۔ ہلڑ دے پٹھلے پاسے چوں لاؤن والا چھیک ہوندا ہے۔ چوں صرف واہون ویلے ہی لایا جاندا۔ چوں والے سوراخ توں کجھ اُتے ہلڑ وچ بیل ٹھکی ہوئی ہوندی ہے۔ اتے سبھ توں اُتے ہتھ وچ پھرن والی جنگھی یا مٹھ (مٹھا) ایس دا سیاڑ ودھیرے ڈوہنگا تے چوڑا ہوندا ہے۔ جانگلیاں نے سانوں آوندیاں ہی دس دتا سی کہ تہاڈیاں ہلاں اتھے کم نہیں دے سکدیاں پر اتھے ہلڑ ملے کتھوں۔ اتھے نہ کوئی مستری، نہ کوئی کاریگر تے نہ ہی سند وچن والی کوئی دوکان۔ اوہناں ہلاں نال ہی

سرکھپائی کر دے رہے۔

ساڈیاں کہیاں وی اتھے کامیاب نہیں سن۔ ماجھے دی چیکنی مٹی پٹن لئی  
 موٹی چادر دی بنائی جاندی ہے پر ایس دا پھل اُکار وچ چھوٹا ہوندا ہے۔ چیکنی مٹی  
 دی گاچی پٹن لئی تاں ایہہ بہت چنگا سند ہے پر بار دی ریتلی مٹی دے ایس کہی  
 اُتے بس چار پنچ بک ہی آوندے سن۔ نیوان ول نوں جاندے پانی دا نکا بنھن  
 لئی تاں ایہہ کہی بالکل نکمی سی۔ جنی مٹی ایس نال پُچو نالوں نال رڑھدی جاندی  
 سی۔ بار دیاں کہیاں پتلی چادر دیاں پر کھلے پھل والیاں سن۔ ساڈے رہنے وی  
 اتھے ٹھیک کم نہیں سن دیندے پر سوال فیر اتھے رہیا کہ رہنے حاصل کتھوں کیتے  
 جان؟ بابا جھناں تاں کہندا سی کہ جو کجھ ہے او سے نال گزارا کری چلاں گے پر  
 بابا اک دن اُٹھاں والیاں نال جا کے دوہل تے اک کہی خانوالوں لے آیا پر ہن  
 اک نویں پریشانی کھڑی ہوئی نویں قسم دے ہل نوں واہون دا تجربہ نہیں سی ہويا۔  
 پہلے ہی دن سنتے نے اک ڈھگا قال دتا پر معمولی زخم ہويا۔ دو بجے تیجے دن اک  
 رُکھ دی جڑ وچ پھس کے چوؤ ٹٹ گیا تے ٹھاوی با بے کولوں جس نوں ہل  
 واہندیاں سٹھ سال ہو گئے سن۔ اک نویں مصیبت۔ ہن چوؤ بناؤن کتھے جاوے؟  
 تاپا فیر مراد کول گیا۔ مراد نے موہوالی جان دی رائے دتی۔ موہوالی (جس نوں  
 جانگی موہن والیں آکھدے سن) ساڈے ٹکانے توں کوئی ست اٹھ میل دور  
 مسلماناں دی اک پرانی دسوں سی۔ کوئی اٹھ گھر ہون گے۔ شاید ایس توں وی  
 گھٹ پر اتھے اک وگن والا کھوہ سی۔ ایسے طرح دی اک ہور پرانی دسوں سی ”شیخ  
 لدھا“ بار آباد ہون توں پہلاں پنچ پنچ ٹبر ایس اک اُجاڑ وچ کیہ کر دے سن؟  
 کویں جیوندے سن۔ ایس بارے اسان کدی کجھ جانن دی کوشش نہیں سی کیتی۔  
 ایس توں وی ہور اٹھ میل دس میل پورب ول میں اک ہور ہلٹ والا کھوہ دیکھیا جو

ساڈے واپس آون تک وی جنگل ہی سی۔ اتھے صرف چھ ست جھگیاں سن۔ کھوہ نال دو ڈھائی کلفصل بیج لیندے سن۔ جا پدا ہے کہ جتھے ایہو جے کھوہ لگے ہوئے سن اتھے کے سمیں چنگی آبادی سی۔ ہولی ہولی لوک اتھوں اٹھدے گئے جیہڑے چار ٹبر ضد کر کے بیٹھے رہے اوہ اُج وی بیٹھے سن۔ ایہو جے کھوہاں والیاں بھیدیاں ہو روی کئی تھائیں ملدیاں سن۔ ساڈے اپنے پنڈ دے اک مربعے وچ کھوہ دو چنیا دے تے پرانے دو نمبے جے نشان شروع شروع وچ دسدے سن۔ بزرگ جانگی دسدے ہوندے سن کہ سکھاں دے راج وچ اتھے وی کھوہ سی تے اٹھ دس گھر دسدے سن۔

تائے نوں مراد نے موہل والی داراہ وی سمجھا دتا۔ اگلے دن تاپا گھوڑی تے ہلڑ رکھ کے موہل والی گیا۔ اک ہلڑا چوؤ دو بے وچ فٹ نہیں سی آوندا۔ خوش قسمتی نوں اتھے اک کاری گر مل گیا جہڑا لوہارا، ترکھانا دوویں کم کردا سی۔ اوس نے چوؤ چاڑھ دتا۔ تاپا ہنیرے ہوئے گھر پر تیا پر ایہہ خوشی سی کہ ہن سانوں اک مستری مل گیا ہے۔ تقریباً سال بھر نویں آئے سکھاں دالوہارا ترکھانا کم ایہو مستری کردا رہیا۔ اندازہ لایا جاوے، کہی دا دستہ ٹٹ جاوے، داتری دے دندے کڈھوانے ہون تاں ست اٹھ میل پینڈا کر کے جانا پیندا سی۔ فیروی نویں آئے پروار بڑا شکر کردے سن کہ نیڑے کوئی مستری مل گیا ہے۔ خانیوال نہیں جانا پیندا۔ اتھے جے کوئی بیمار ہو جائے، اوس دابس رب ہی راکھا سی۔ روگ آپو ہی دو چار دن جھکھ مار کے چلا جاندا سی۔ دوا داروتاں اتھے کتے کوئی لہدا نہیں سی۔ اک واری چاچے نوں تاپ چڑھ گیا تے چار دن رہیا۔ متھا بڑا بھنڈا سی۔ اک رات تاں اوہ وگڑ واہ ہی کردا رہیا۔ ماں جی اپنا اوہڑ پوہڑ کردے رہے۔ اوہ بڑے مان نال دسدے ہوندے سن: ”میں سُنڈھ، جوائن، کالا لون تے ہڑاں نال لے کے

ٹری ساں۔ بس ایہہ سی دواخانہ ساڈے پنڈ دا۔ ایہناں وچوں کبڑی کبڑی دوائی  
 ماں جی نے چاچے نوں دتی۔ ایس بارے تاں مینوں پوری طرح واقفیت نہیں پر  
 ماں جی دے علاج دا چاچے نوں کوئی فائدہ نہ ہويا۔ جدوں چوتھے دن وی تاپ نہ  
 لتھا سگوں ودھدا گیا تاں ٹبرنوں کجھ فکر ہويا۔ اگلے دن تاپا کے سیانے دی بھال  
 کرن جان دی تیاری کر رہیا سی۔ (وید، حکیم نوں عام بولی وچ ”سیانا“ ہی  
 کہندے سن) ایسے نوں چاچا اپنے منھے توں اٹھ کے بہہ گیا تے کہن لگا: ”میں  
 ہن راضی ہاں۔“ تائے نے متھا ٹوہیا۔ نبض دیکھی۔ اوہناں دناں دے سیانے  
 نبض ہر مریض دی دیکھدے سن۔ بھاویں اوس نوں سر پیڑ، ڈھڈ پیڑ ہووے۔  
 بخار ہووے یاں دست لگے ہون۔ سیانے دی نشانی ہی ایہہ سی کہ نبض دیکھ کے  
 روگی دی پچھان کردا سی۔ تاپا بھاویں سیانیاں وچ پیر رکھدا نہیں سی پر اپنا اوہنوں  
 پتہ سی کہ بخار لئی نبض ضرور دیکھی دی ہے۔ چاچے نوں بخار تاں ابے سی پر پہلاں  
 نالوں گھٹ۔ نکالاں تک تاپ لہہ گیا۔

چاچا راضی ہو گیا تاں ماں جی دی واری آگئی۔ ماں جی نوں پاتھیاں  
 وچوں ٹھونہاں لڑ گیا سی۔ بڑا موٹا کالا ٹھونہاں سی۔ بڑی سخت درد ہوئی۔ ماں جی  
 بڑے جیرے والے سن۔ کیس وٹ کے پیڑ تاں جر گئے پر تاپ چڑھ گیا تے  
 سولاں پہر نہ اُتریا۔

ماں جی دسدے ہوندے سن ”نخصماں لڑیا، تاں مینوں سولاں پہر تاپ  
 چڑھیا رہا“ دوڈنگ تاں روٹی وی ٹبرنوں آپ ہی پکاؤنی پئی۔ باپو چار پنج سال  
 شنگھائی (چین) وچ رہ آیا سی۔ اوہ روٹی پکاؤنی جاندا سی۔ تائے نوں وی سبزی  
 بھاجی پکاؤن دا دل آندا سی۔ اگلے دن ماں جی نے تاپ وچ ہی اٹھ کے روٹی  
 پکائی۔ ایسے دن شام نوں مراد آ گیا تاں تائے نے پچھیا ”میاں جی! ایہہ تاں

ٹھونہاسی پر اتھے تاں سپ بڑے نیں۔ جے کسے نوں سپ ڈنگ مار جائے تاں پھیر کیہ کرنا ہو یا؟“ مراد بولیا ”سردار ناگاں دا ماندری اتھے بہت چنگا اے۔“ (ناگ ملتانی وچ سپ نوں کہندے سن) سپ ڈنگے دا علاج اودوں تک اے جے پرانے وسدے پنڈاں وچ ماندری ہی کردے سن۔ کیہ سچ مچ ہی منتر نال سپ دا زہر اتر جاندا سی؟ ایس بارے میں کوئی رائے نہیں دے سکدا۔

ایہناں دنوں وچ ہی نوں آئے پروار دے نوجوان منڈے نوں سول پے گئی۔ منڈا پیڑ نال لوٹنیاں لوے۔ اوہناں دا اک آدمی ساڈے دل بھجا آیا۔ ماں جی نے جوائن، ہرڑاں تے کالا لون دتا۔ تیا آپ اوہناں دے ڈیرے گیا۔ منڈے دی حالت وگڑدی ہی گئی۔ مراد نے دسیا کہ موہل والی اک سیانا ہے۔ تیا گھوڑی بھجا کے اوتھے گیا۔ تائے نوں آون جان وچ کافی وقت لگنا سی۔ مراد دے کہن تے گھر والیاں نے منڈے نوں گرم ددھ وچ گھیو پا کے پیا دتا۔ منڈے نوں تے آگئی پر پیڑ وچ کوئی فرق نہ پیا۔ گھنٹے بھر وچوں منڈے نوں کھل کے جلاب آ گیا۔ پیڑ دا کجھ فرق پیا۔ اودھر تیا موہلوالی بچا تاں پتہ لگا کہ اوہ سیانا اصل وچ پسوواں دا علاج کردا سی۔ پر بندیاں لئی وی کجھ نسخے اوس نے رکھے ہوئے سن۔ تیا دوائی لے کے مڑیا۔ اودوں تک منڈے نوں اک ہو جلاب آ گیا سی۔ ایہہ دوائی وی دتی۔ نکالاں تک کافی فرق پے گیا تے کتے ادھی رات نوں جا کے منڈا ستا۔ کیہڑی دوائی دا اثر ہو یا؟ ایس بارے کسے نوں کوئی سمجھ نہیں سی آوندی۔ دوویں ٹبر ایہہ کہندے سن ”منڈے نوں گورو نے ہی بچایا“ اک دیہاڑی دی پیڑ نال منڈے دا رنگ پیلا پے گیا۔ جدوں تائے نے بابے نوں سارا حال سنایا تاں اوس نے ایس نوں عام جہی گل ہی گولیا۔ کہن لگا ”ایہو جیہی حرج مرج ہوندی ہی رہندی ہے۔ جٹ دا پتر اچھی ڈھڈ پیڑ، سر پیڑ نال نہیں

مردا۔

ایہہ سی جیون بار وساؤن والے پہلے آباد کاراں دا اوہناں نوں صرف  
 گورو دی اوٹ سی یاں اپنے سرڑتے اپنی محنت تے وشواس سی۔ ہور اتھے کسے دا  
 سہارا نہیں سی۔ وادھا ایہہ کہ ایہناں لوکاں نے اجیہاں کٹھنایاں تے مصیبتاں دا  
 پچھوں کدے گلہ نہیں سی کیتا۔ تن چار سال پچھوں تاں اوہ ایہناں دا ذکر کرنوں وی  
 ہٹ گئے سن۔





## باروساؤنی کوئی کھیڈ نہیں سی

پہلیاں دو ہنیریاں دی مار جھل کے ساڈے ٹبرنوں اپنی سو جھی ہو گئی سی  
 کہ سر لکاؤن لئی جھگی بناؤنی ہووے گی۔ ایہہ کم تائے تے چاچے دے ذمے لایا  
 گیا۔ کیونکہ باپو مال ڈنگر سانہدا سی۔ بابا تے سنتا مل واہوندے سن۔ تائے نوں  
 او سے دن کتے باہر کم جانا پے گیا۔ اوہ چاچے نوں آکھ گیا ”دیپو! توں اج کھال  
 توں سرکڑا وڈھ لیاویں“ چاچا شام تک سرکڑا تاں اک دی تھاں دو جھگیاں دا وڈھ  
 لیا یا پر سارا سریر پچھ لیا یا۔ جھیلیاں نوں سرکڑا وڈھن داوی ڈھنگ نہیں سی آؤندا۔  
 چاچا جھگا لاه کے سرکڑا وڈھدا رہیا سی۔ سرکڑے دیاں پنڈاں سٹ کے جدوں  
 کھال توں نہا کے مڑیا تاں ماں جی نے اوس دے سریر تے لگے پچھ دیکھے۔ ماں  
 نے کاڑھنی توں ادھی ملائی لاه کے چاچے نوں پھڑائی تے کہا ”آہ لے۔ ایہناں  
 پچھاں تے مل لئیں“ ماں نے مونہہ پر اں نوں کیتا تاں چاچا ساری ملائی کھا گیا۔  
 ماں اباتا کرن لگی۔ ایسے نوں بابا آ گیا۔ ساری گل سن کے بابے نے اٹا ماں نوں  
 ڈانٹیا۔ ”پچھ وچ گئے نیں کہ تلوار دا پھٹ و جا اے۔ اج پچھاں تے ملائی ملے گی۔  
 بھلکے کتے جھریٹ وچ گئی تاں مکھن ملنا پوؤ۔ توں منڈے نوں کجھ کھان پین لئی  
 دیا کر جوان ہووے“ چاچا بھاویں ان داڑھیا ہون کر کے اج منڈا کھنڈا ہی سجھیا  
 جاندا سی پر سی چنگے تکرے سریر والا۔ کہی، کہاڑی واہون وچ سبھ توں اگے۔ بھاری  
 توں بھاری پنڈ چکنی پے۔ بل دا جو ترا لاؤنا پے۔ چاچا کدے تھکدا نہیں سی۔  
 ایس لئی بابا اوس اُتے خوش سی۔ پر باپو بھلے مانس افیمی چیدیاں وچ رہ کے آیا سی۔

اوہ کہندا ہوندا سی ”دیپو ہر تیجے دن کوئی اونتر کم کر آوندا اے“ باپو دی گل وی ٹھیک سی۔ چاچا جی کوئی نہ کوئی کارنامہ کر دے ہی رہندے سن۔ دو دن پہلاں چاچا گھوڑی نوں پانی پیاؤن گیا کھال وچ ڈگ پیا سی تے ڈگاوی سی بھرے بدھے نکے وچ۔ سارا مونہہ سرگارے نال بھر گیا۔ چاچے نے تاں نہ دسیا پر نال دے پچھوں دسیا کہ چاچا گھوڑی نوں چھال مار کے کھال ٹپن دی مشق کروا رہیا سی جدوں ڈگا۔ تاپ چڑھن توں پہلے دن چاچا گھر آیا تاں اوسدا سارا مونہہ سجا ہویا سی۔ کہے ”بھونڈاں دی کھکھر اڈ پئی سی۔ ایہہ بھونڈ لڑے نیں“ کئی دن پچھوں پتہ لگا کہ چاچا جی اک ون تے چڑھ کے مکھیر لاہون لگے سن کہ مکھیاں لڑ گئیاں۔ ون توں چھال ماردتی۔ پیرنوں معمولی موج آگئی تے مونہہ وی سج گیا۔ پھیر وی چاچا گھر دا بڑا ضروری ممبر سی۔ ہر اوکھا کم چاچے نوں ہی کرنا پیندا سی۔

چاچے نے سرکڑا وڈھ لیا۔ اگلے دن چاچا تے تایا جھگی لئی لکڑاں وڈھن لگے۔ اک وڈا کہاڑا تے اک کہاڑی پنڈوں ہی لے آئے سن۔ چاچے دے ڈولیاں وچ زوری۔ تایا دی جائے کہ ایہہ ٹاہن وڈھ تے چاچا پلاں وچ موٹے توں موٹا ٹاہن لاہ مارے۔ تایا نالوں نال لکڑاں چھاگی جاوے۔ دوپہر تک لکڑاں وڈھ لئیاں تے تکالاں تک دوسا نگ گڈ کے اُتے شتیراں ورگیاں لسیاں لکڑاں رکھ کے وان نال بنھ بنھ کے چھت دا پورا ڈھانچہ تیار کردتا۔

اگلے دن سویرے تایا تے چاچا چھاتے دے ڈھانچے اُتے سرکھڑا کھلار رہے سن کہ قدرتی سردار چاچا جانگی آنکلیا۔ ”کے پئے کریندے او سردارو؟“ سردارے نے پچھیا۔ تائے نے دسیا کہ اسیں جھگی بنا رہے ہاں۔ سردار اہس کے بولیا۔ ”ایہہ جہیاں چھتاں ایتھاں نہ تگن“ سردارے نے رائے دتی کہ چھن بنھ کے اُتے پاؤ۔ مجھیلاں نوں چھن بنھنی وی نہیں آوندی سی۔ سردارے نے آکھیا

”میں پرسوں دو آدمی لے کے آواں گاتے چھن بنھ دیاں گا۔ تیسرے دن سردارا بندے لے کے آیا۔ اوہناں نے کوئی دو گھنٹیاں وچ چھن بنھ دتی۔ نالے ساڈے ٹبرنوں چھن بنھن دا دل سکھا دتا۔ دوپہر ہون توں پہلاں چھنیاں، ستاں بندیاں نے چک کے چھن چھت دے ڈھانچے اُتے رکھ دتی تے وان نال جکڑ کے بنھ دتی۔ لوڈھے ویلے سردارے دے دے مطابق پوری لمبائی دے چوکھے بنھ تائے ہوراں جھگی دے چوپھیرے گڈ کے کھڑیاں لکڑاں نال جکڑ دتے صرف بوہے جناں ہی تھاں بچیا۔ بوہے لئی وکھرا کھڑک بنایا۔ جھگی بن کے تیار ہو گئی۔ اسیں گھر والے بن گئے۔ جی خوشی ساڈے ٹبرنوں ایہہ جھگی بن دی ہوئی اوئی شاید اج کل دے دھناڈاں نوں لکھاں روپے خرچ کے بنائی کوٹھی دی وی نہ ہوندی ہووے۔ اگلے دن ماں نے اندر گوہے مٹی دا پوچا پھیریا۔ جھگی دے اندر اک پاسے زمین توں کجھ اُچا اک چوکھٹا بنا لیا۔ اوس اُتے اک پاسے بسترے رکھے۔ دو بے پاسے گڑشکر، چھولے، بھانڈے ٹینڈے وی اندر ٹکا لئے۔ ماں جی کہہ رہے سن ”اج ساڈا وسیا ہویا ہے بھوویں جھگی ہی ہے۔ پر گھرتاں ہے نہ۔ اج ساڈے ٹبرنوں ایہہ بیاباں وی وسدا وسدا سی۔“

جھگی بناؤن توں کجھ مگروں اک ہور خوشخبری ملی۔ اک ہور پروار آ گیا سی۔ اوہناں نے وی اپنے مربعے وچ ڈیرا لایا سی۔ ماں جی نے ایس ٹبرنوں وی دو ڈنگ روٹی کھوائی۔ ایسے نوں اوہناں نے اپنا چلہا چوکا تیار کر لیا۔ ایس توں دو دن مگروں اک ہور ٹبر پہنچ گیا۔ اوہناں دی مہمان نوازی وی کیتی گئی۔ ہن تک لاگے پنڈاں چک 78 تے 80 وچ وی کجھ سکھ پروار پہنچ گئے سن۔ مینوں ہن پکا یاد نہیں پر انومان (اندازہ) ہے کہ جیہڑے دو سکھ پروار نال دے پنڈ وچ ساتھوں پہلاں دے بیٹھے سن اوہ شاید چک 80 وچ ہی سن۔ چک 80 وچ ودھیرے گھر

آبادکاراں دے سن جیہڑے ساڈے آون توں پہلاں دے بیٹھے ہوئے سن۔ ہن  
ساڈا پنڈ ہی نہیں ساڈا علاقہ آباد ہو گیا سی۔

ماں جی تائے نوں کجھ دن پہلاں کیہا سی کہ آنا مکن والا ہے۔ اودوں  
اے جے پھنیاں ستاں دناں دا آنا موجود سی۔ وچوں دوبراں نوں روٹی کھوانی پئی۔  
جدوں صرف اک دیہاڑی دا آنا بچیا تاں تائے نوں متھے بنگلے جانا پے گیا۔  
اوتھے کسے افسر نے آنا سی تیا ماں جی نوں کہہ گیا ”دو جے ٹبراں وچوں کسے توں  
دو ڈنگاں دا آنا لے آونا بھلکے سویرے میں خانیوال جاواں گا“۔ دوپہر دی روٹی پکا  
کے جدوں ماں کسے دوسرے ٹبر توں آنا لین تڑن لگی تاں اک ٹبر دی کڑی ماں جی  
کولوں آنا لین آگئی۔ ساریاں کولوں پچھ پڑتال کرن تے پتہ لگا کہ صرف نویں  
آئے ٹبر کول پنچ چھ سیر آنا سی۔ باقی تاں پرواراں کول بس رات دے ڈنگ جوگا  
ہی بچیا سی۔ سارے ایہو سمجھدے رہے کہ دو جیاں کولوں پھڑلواں گے۔ نویں  
آئے پروار نے کھل دلی نال آنا ونڈیا تے انت ساریاں کول اگلی سویر تک داراشن  
بن گیا۔ اگلے دن مونہہ ہنیرے ہی ہر ٹبر دا بندا رلیا تے خانیوال نوں ترپے۔  
گھوڑی صرف تائے کول سی۔ باقی تنوں پیدل سن۔

ماں جی نے سویرے سارے ٹبر نوں اک اک پر ونٹھاتے لسی دتی۔ باقی  
آنا دوپہر لئی رکھ لیا۔ دوپہر پچھوں سارے ٹبر لگے آنا لین گئی ٹولی داراہ تگن۔  
ساریاں نوں پتہ سی کہ آون جان دا چھتی میل پنیڈا ہے۔ واپس مڑدیاں ساریاں  
دے سراں تے من من آنا وی ہونا ہے۔ ایس لئی اوہ سورج ڈبن توں پہلاں  
واپس نہیں مڑسکدے۔ پھیر وی مڑ مڑوں تے چڑھ کے اوہناں داراہ ویکھدے  
ساں۔ رات جوگا آنا کسے کول نہیں سی۔ ماں جی پچھوں چکی نال لیائے سی پر اے  
تک اوس دا گنڈ نہیں سی بنایا۔ ماں نے سوچیا کھیس ہٹھاں وچھا تے چکی دے پڑ

رکھ لینی ہاں۔ اک ڈنگ دا آتا تاں کنک دے بی نال پیہ ہی لواں گی۔ چکی دے پٹر کڈھے تاں وچ کلی ہے نہ۔ ہن کیہ کیجا جاوے۔ بے آٹے والے رات تک نہ مڑے تاں رات وی ٹبرنوں بھکھیاں ہی کننی پوؤ۔ ماں جی کول تھوڑے جہے چھولے بچے ہوئے سن۔ اوس نے سوچیا چلو چھولے بھن لئے۔ ٹبرنوں کجھ نہ کجھ تاں کھان نوں ملو۔ ماں نے چلپے وچ اگ بال کے اُتے کڑھائی دھری۔ صاف کر کے ریت پائی تے بوری وچوں چھولے کڈھ کے بھنن لگ پئی۔ چاہا وی چھوٹا تے اُتے کڑھائی وی چھوٹی۔ مساں دو دو مٹھاں دا پراگا بن داسی۔ سورج ڈب گیا سی۔ ساریاں ٹبراں دا اک اک جی ساڈے ڈیرے تے آیا بیٹھاسی۔ خانیاں والی ٹولی دی اڈیک وچ۔ ماں جی نے کیہڑے کدے چھولے بھننے سن۔ جیہو جیہے کچے بھننے ہوئے کڑھائی وچوں کڈھی گئی۔ دو جیاں ٹبراں دے کجھ ہور بندے وی پچھ گچھ لئی آگئے۔ کھادا کسے نے کجھ نہیں سی۔ ماں جی ساریاں دی مہمان نوازی چھولیاں دی مٹھ نال ہی کر دی رہی۔ جدوں سورج ڈبے نوں گھنٹہ ڈیڑھ گھنٹہ ہو گیا تاں خانیاں گئی پارٹی دے مڑن دی آس تقرپن ختم ہو گئی۔ ماں جی نے چھولیاں دی بوری اُلد کے سارے چھولے کڈھ لئے تے چک 79 دی پوری آبادی لئی چھولے بھن لئے۔ کوئی پہر رات گئی نال سارے مڑے اپنے اپنے ڈیریاں نوں تے اج ساڈے پنڈ دی پوری دسوں ماں جی دے بھننے چھولیاں دا لنگر چھک کے سُتی۔ ہن ساریاں نوں وڈا فکر ایہہ سی کہ بے آتا لیاؤن والے کتے کپر وچ راہ بھل گئے تاں کیہہ بٹو۔ پر بابا کہے ”کجھ نہیں ہوندا چھیر سینہوں (شیر سنگھ) نال اے۔ اوہ راہ بھلاؤن والا نہیں۔“

اودھر خانیاں گئی ٹولی نال کیہہ بیتی؟ اینا لہما پیڈا کدے کسے نے گھٹ ہی کیجا سی اتے ہن سراں تے بھاروی سی۔ کوہ دو کوہ چل کے ساہ لیندے تے پھیر

ٹر پیندے۔ تایا جی واری واری کسے نوں گھوڑی تے چڑھاونداتے۔ کسے دی پنڈ  
 آپ چکدا۔ جدوں کپر وچ وڑیاں نوں کوئی گھنٹہ بھر ہو گیا تاں چنگا ہنیرا ہو گیا۔  
 ہنیرے وچ تردے کتے راہ توں سجے ہو گئے۔ رات چاننی سی۔ اک ہور راہ لہج گیا  
 تے کوئی دو گھنٹے ہور چلن پچھوں آباد ہوئے علاقے وچ تاں سبج گئے۔ کھال توں  
 پانی وی پی لیا پرسوں کتے نظر نہ آئی ہور کجھ سماں نکر اس مارن پچھوں جانگلیاں دی  
 اک بھینی آئی۔ اک بزرگ جانگلی نے دسیا ”سردارو تسیں تاں اپنے چک توں تن  
 کوہ اگے نکل آئے“۔ ایہوں جیہے نہری بنگلے (CANAL RESTHOUSE)  
 انگریزاں نے ہر نہر دے کنڈھے کوئی دس دس میل تے بنائے ہوئے سن۔ ہر بنگلے  
 تے کھوہی تے کر مچاریاں (کم کرن والیاں) واسطے مکان وی ہوندے سن۔  
 ٹیلیفون وی ہوندا سی۔

منتھلے بنگلے اک ہندو بیلدار توں پرات، تو اتے ڈبی (ماچس) لئی۔ آتا  
 گنھ کے جیہو جیہے کچے پکے من بنے اوہ شہروں لیاندے گڑ نال کھادے تے  
 راجوہے دے کنڈھے سوں گئے۔ سویرے تڑکے اٹھ کے پنڈ نوں ترے اتے نکلی  
 چڑھدی نال پنڈ دے پہلے ڈیرے جا اُپڑے۔ ساڈا ڈیرہ ایہوں ہور اگے سی۔  
 اوس ڈیرے والیاں نے اپنے دو بندے بھجا کے ساریاں نوں خبر کردتی کہ اپنے  
 بندے آگئے ہن۔ او تھوں لسی پی کے سارے اپو اپنے ڈیریاں نوں گئے۔ ساریاں  
 دا فکر دور ہو گیا۔ پچھوں کافی سمیں تک ایس معر کے دی چرچا ہوندی رہی۔ پر بابا  
 کہندا ہوندا سی ”کیہڑی آخر آگئی جے اوہ بھل گئے۔ جے بار وساؤنی اے تے  
 جیرا وڈا رکھو“ بابا ٹھیک کہندا سی۔ باراں وساؤن والے لوک وڈے جیرے تے  
 کرڑی ہڈی والے سن۔



## نواں بھائی چارا۔ نویں بولی

پہلے پندرہاں دنوں وچ ساڈے ٹبر توں بناں جیہڑے ہورتن پروار چک  
79 وچ پنچے اوہ کیمڑے کیمڑے سن۔ ایس بارے میں پورے وشواس نال کجھ  
نہیں دس سکدا پر اندازا ہے کہ اوہناں وچوں اک سی صوبیدار بشن سنگھ پنڈ و دھنی  
کلاں ضلع فیروز پور (ہن فرید کوٹ) دائر۔ دو جا جمعدار نرن سنگھ پنڈ بھندیر ضلع امر  
تسردا تے تیجا حولدار نرن سنگھ پنڈ گورے ننگل ضلع امر تسردا۔ اگلے کجھ ہفتیاں وچ  
ہور چار پنج ٹبر آگئے تے ہن چک دے نویں و سنیک گل کردیاں ”ساڈا پنڈ“ یاں  
”اپنا پنڈ“ آکھن لگ پئے۔ پہلاں اوہ ساڈا ڈیرا یاں ساڈی بھینی ہی کہندے  
ہوندے سن۔

ہن سبھ توں پہلاں فکر ہو یا کہ پنڈ دی ڈگھی پٹی جاوے کھوہ لو ان بارے  
تاں اے کوئی سوچ ہی نہیں سی سکدا۔ ڈگھی اوس علاقے وچ پانی اکٹھا کرن لئی  
آپ پٹے ہوئے ٹوبے یاں چھٹرونوں کہندے سن۔ ساتھوں پہلے آبادکاراں نے  
اک چھوٹی جیہی ڈگھی پٹی ہوئی سی۔ اوس وچ اوہ نہر دا پانی پاوندے رہے سن۔ پر  
جدوں ساڈا ٹبر پہنچا ایس ڈگھی وچ بہت تھوڑا جیہا پانی تے کجھ چکڑ گارا سی۔  
ساڈے ٹبر نے کھریاں۔ چوکا چولہا ایتھوں گارالے کے ہی بنایا سی۔

ہن اک دن مقرر کر کے پنڈ دے گھبرو ڈگھی پٹن آگئے۔ نگرانی تیا شیر  
سنگھ کر رہیا سی۔ جوان منڈے ضد بصد کے کیہاں دے ٹک مار دے سن تے پٹی  
ہوئی مٹی دور توں دور سٹن دے مقابلے کر دے سن۔ ایہناں داروٹی ٹکر ایتھے

منگوایا گیا۔ لوڈھے ویلے تک ڈگھی پہلاں نالوں کافی چوڑی تے کجھ ہور ڈونگھی کر  
لئی گئی۔ او سے رات نہر دا پانی وی لا دتا۔ اگلے دن سارے پنڈ دے مال نے پہلی  
وار اپنی پٹی ڈگھی دا پانی پیتا۔ اوس توں اگلے دن سویرے جدوں لوکی پھیر ڈنگر لے  
کے آئے تاں ڈگھی خالی سی۔ اٹھاں پہراں وچ پانی جیور گیا سی۔ پہلے ہی دو مہرو  
ڈگھی وچ وڑے تاں پانی بری طرح کنگھل گیا۔ اتھے اک چھوٹا جیہا واقعہ ہویا  
جس بارے پنڈ دے پہلے وسنیک کافی پچھوں تک وی گلاں کر دے رہے۔ پانی  
پین گھیاں دو مجھاں بھڑ پیاں تے بھڑ دیاں بھڑ دیاں ڈگھی دے اوس حصے وچ  
چلنیاں گھیاں جیہڑیاں نویاں پٹیاں سی۔ اوتھے دوویں کھب گھیاں۔ کھبیاں  
ہوئیاں وی بھڑی جان۔ پچھوں خیرے ہو کے دیکھن تے پتہ لگا کہ دوہاں دے  
سنگ وی پھسے ہوئے سن۔ سارے پنڈ لئی اک نویں مصیبت کھڑی ہو گئی۔  
پسوواں دا کھب جانا یاں دو مہرویاں دے سنگ پھس جانے کوئی ان ہونی گل  
نہیں۔ پنڈاں وچ ایہو جیہے واقعات واپردے ہی رہندے نیں۔ پر وسدے  
پنڈاں وچ ایہیے حادثیاں دا نا کرنا کرن لئی ذریعے ہوندے ہن۔ ہر طرح دا سازو  
سہا مان ہوندا ہے۔ سیانے تجربہ کار آدمی ہوندے نیں۔ اتھے کجھ وی نہیں سی۔  
وڈے بابے نوں سدیا گیا۔ اوس نے رائے دتی کہ اک مجھ دے سنگ دا اگلا حصہ  
آری نال وڈھ دیو۔ سنگ وڈھن لئی وی تجربہ کار تے ٹکڑے سریر والے بندے  
دی لوڑ سی۔ خیر تن چار بندے ہمت کر کے اگے گئے جیہڑا مجھاں کول جائے اوہ  
آپ وی کھبدا سی۔ کوئی ادھا پونا گھنٹہ ٹکڑاں مارن پچھوں اک مجھ دا سنگ وڈھیا  
تے پھسے ہوئے سنگ اڈا ڈکیتے۔ اپنے جے وچ مجھاں اینیاں کھب گھیاں سن کہ  
اوہناں نوں کڈھناں اک بہت وڈی مصیبت سی۔ تایا ارج پنڈ نہیں سی۔ ساری  
کاروائی بابے دی نگرانی پٹھ ہو رہی سی۔ بابے نے دو تن سہاگے تے اک کراہ



منگوا یا۔ سہاگے پانی وچ سٹ کے جوان منڈے سہاگیاں اُتے کھلوتے تے  
 رسیاں بیلاں نال اک مجھ دے موہر لے پیر پٹ کے کراہ اُتے رکھے۔ پھیر مجھ  
 دے پچھلے پیر پٹے۔ گل کیہ کوئی پھر بھر دے کھچ کھچا پچھوں مجھاں ڈگھی وچوں کڈھ  
 لئیاں۔ سارا پنڈ ڈگھی دے چو پھیرے کھڑا سی۔ سویر دیاں کھبیاں مجھاں چنگے پر  
 چھاویں ڈھلے نکلیاں۔ ایہہ ساری کاروائی بانہواں دے زور نال تے تقریبن اناڑ  
 پنے وچ ہی کیتی گئی پر آخر وچ کامیابی ہوئی۔ زنانیاں سمیت پنڈ دی لگ بھگ  
 ساری وسوں ڈگھی تے کھڑی سی۔ دو ٹبرتاں ہل واہندے جو تراوے چھڈ کے  
 آئے سن۔ ایس عام جیہے واقعے نے پنڈ والیاں نوں اک گل پکی کر ادتی کہ اجیہا  
 موقعہ بن تے کہ ساریاں نے اکٹھے ہو کے ہنبل مارنا ہے۔ کم بھاویں کسے دا  
 ہووے۔ اج میں بڑے فخر نال کہہ سکد اہاں کہ پہلے تن چار سال سارا پنڈ رل  
 کے چلن تے ونڈ چھکن دے اصول نوں مذہبی روایت دے مطابق نبھاوند ا رہیا۔  
 پچھوں وی بھاویں پنڈ دے دو دھڑے ہو گئے پر سانجھے کم لئی ہمیشاں اکٹھے ہو  
 جاندے رہے۔ ایس بارے میں اگے ذکر کراں گا۔

اک واری پھیر پنڈ دی جوانی نوں ونگاریا گیا تے منڈیاں نے پورا تان  
 لاکے کہی واہی۔ ہن تک جوان منڈے اک دو بے دے واقف ہو گئے سن تے  
 آپس وچ ہا سا مخول وی شروع ہو گیا سی۔ ساریاں نالوں ودھ مخول بولی نال تعلق  
 رکھدے سن۔ مجھیلاں دے لفظ ”بھایا“ تے ”بھاؤ“ موقعہ بے موقعہ بول کے  
 ملوئی منڈے مجھیلاں نوں ٹھٹھے کر دے سن۔ اودھروں مجھیل ملوئیاں نوں زچ  
 کرن لئی کہندے ”سناؤ سالیا جی کیہ حال سے تھوڈا؟“ چھیتی ہی مجھیلاں نوں  
 ملوئیاں دا اک اجیہا لفظ لہہ پیا جس نے ملوئیاں نوں بھاڑ پادتی۔ ایہہ سی مالوے  
 وچ کمر یعنی لک لئی ورتیا جان والا لفظ (میں اتھے ایہہ لفظ لکھنوں گریز کردا ہاں۔

بھادیں سارا مالوہ اج وی ایہہ لفظ عام ورتدا ہے) مجھیلاں نے ایس لفظ دا اجیہا  
گڈا بدھا کہ چھیتی ہی سارے ملوئیسی ”لک“ نوں لک ہی کہن لگ پئے۔ گنجی بار  
وچ بولیاں جان والیاں وکھ وکھ زباناں نے پہلاں پہل کئی بڑیاں اسچرج حالتاں  
پیدا کردتیاں۔ ایہناں وچوں دو قسے میں اتھے سناؤنا چاہوندا ہاں۔

صوبیدار بش سنگھ دے وڈے بھرا بھائی کشن سنگھ پنڈ وچ تے علاقے  
وچ بڑے ستکارے جان دے سن۔ اوہ گور بانی دے چنگے عالم سن۔ اوہناں کول  
بڑے ہتھ لکھتی گرنٹھ سن۔ میں اوہناں توں ”سارو کتاولی“ تے اک ہور گرنٹھ  
کھرڑیاں توں پڑھیا سی۔ شروع شروع وچ اوہ اپنے کجھ رشتے داراں نوں تے  
روٹی پکاؤن لئی اپنی اک بھتیجی نوں نال لے کے آئے سن۔ صوبیدار صاحب اچے  
فوج وچ سن۔ اک دن اوہ ساڈے گھر آئے تے ساڈی دادی نوں کیہا ”بی بی  
مینوں لسی دا چھنا دینا۔ ساڈی کڑی تاں سوہری کتے اٹھ گئی“ ماں جی نے حیران  
ہو کے کیہا۔ ”بھائی جی۔ اٹھ گئی، کڑی تاں بڑی سیانی اے“ بھائی جی بولے  
”سیانی اے پر کملی تالا لاکے کتے اٹھ گئی“ خیر بھائی جی لسی پی کے چلے گئے۔ ماں  
جی نے مینوں دسیا بھائی آیا سی تے آہندا سی ساڈی کڑی اٹھ گئی اے“ حولدار  
نے ماں جی توں سارے ویروے سن کے ہس کے آکھیا ”چاچی! توں روٹیاں  
پکا مجھیلاں دی ”اٹھ گئی“ تے ملوئیاں دی ”اٹھ گئی“ وچ بڑا فرق اے“  
ملوئیاں نوں کافی چر پچھوں پتہ لگا کہ مجھیلاں دی بولی وچ ”اٹھ گئی“ دا مطلب  
”ادھل گئی“ ہے۔

اک واری ایس توں وی ودھ دلچسپ تے تقریبین خطرناک واقعہ ہويا۔  
ایس کسے ویاہ دے سبندھ وچ اپنے پچھلے پنڈ نوں جا رہے ساں۔ نال دو ٹبر ہور  
وی رل گئے۔ زانیاں تے ایانے گڈے تے بٹھالے تے مرد پیدل تڑپے۔

میں وی ٹولی نال پیدل تریا۔ اسان ریلوے اسٹیشن کچا کھوہ نوں جانا سی۔ راہ وچ  
 ”وٹو دے چک“ وچوں دی لنگھنا سی۔ ایس بارے میں کسے ہور تھاں ذکر کر چکا  
 ہاں۔ وٹو ٹکڑا زمیندار سی۔ ایس نے پنڈ وچ وگن والا کھوہ لایا ہو یا سی جس نال پانی  
 دی ٹینکی بھری جاندی سی۔ ٹینکی وچ ٹوٹیاں لکیاں ہو یاں سن۔ جتھوں پنڈ دیاں  
 تیویاں تے کڑیاں چڑیاں پانی دے گھرے بھر کے لے جاندیاں سن اسان پانی  
 پینا سی ساڈے وچوں اک جنے نے کہا ”کڑیے سانوں پانی پی لین دے پھیر  
 گھرا رکھیں“۔ کڑی نے نک چڑھا کے آکھیا کڑیے ”چھوہر نہیں آکھ سکیندا؟“  
 ساڈے ساتھی نے حیران ہو کے آکھیا ”کڑیے! جے توں اپنی ناراض ایں تاں  
 ایس پانی نہیں پیندے“ ایہہ سن کے نال کھڑیاں زنانیاں وی طیش وچ آگیاں۔  
 دو مرد آگئے اوہ کہن ”اوسکھوتساں کو بولن دا وی شعور نہیں اے؟“ ایس حیران  
 ساں کہ کہیہ خنما ہو گئی۔ ایسے نوں رولاسن کے اک ہندو دوکاندار آ گیا۔ ساری  
 گل سن کے اوس نے جانگلیاں نوں سمجھایا ”سکھ کڑی دھی نوں آکھدے ہن“ تے  
 نال ہی سانوں ہن پتہ لگا کہ ملتانی بولی وچ کڑی ووہٹی دے معنیاں وچ ورتیا  
 جاندا ہے۔

منڈیاں نے ڈگھی واہوا کھلی کردتی تے تن چار واری پانی لاؤن پچھوں  
 پانی خشک ہون دی نسبت وی کافی مٹھی پے گئی۔ ہن پنڈ دا ڈنگراں نوں پانی  
 ڈاہون والا ٹوبھا تیار ہو گیا سی تے پنڈ دا ایہہ پہلا پراجیکٹ سی۔

ساڈے ٹبر نوں بار وچ پہنچیاں تقریباً دو مہینے ہو گئے سن۔ بیایاں ختم  
 ہو گیاں۔ گھر دے پٹھے وی ہو گئے سن تے سیال وی آ گیا سی۔ ہن تک پنڈ وچ  
 دس باراں پروار پہنچ چکے سن۔ ساریاں دے ڈیرے وناں تھلے سن۔ تقریباً ساریاں  
 نے جھگیاں وی پالیاں سن۔ پہلاں آئے چار ٹبروں نے تاں پوری بیائی کر لئی سی۔

پچھوں آؤن والیاں نے وی کے تھوڑی کسے بوہتی کنک بیج لئی سی۔ سیال وچ ڈنگر وناں بیٹھ ہی بنھے سن۔ ایس لئی ساریاں نے آپواپنے ڈیریاں کول وناں دے چو پھیرے سر کڑے بنھ کے ڈنگراں لئی ڈنگ ٹپاؤ تھاں بنا لئی سی۔ ایہنیں دنیں جٹاں کول سوائے ڈنگراں نوں پٹھے پاؤن دے یاں باری آؤن تے پانی لاؤن دے کوئی بہتا کم نہیں سی۔ دوپہرے کسے ون تھلے اکٹھے بہہ کے گپ شپ مار دے سن۔ سارے وکھ وکھ پنڈاں توں آئے سن پر چھیتی ہی اک دوسرے نال چنگی واقفیت ہو گئی سی۔ اک اپنت والا ماحول بن گیا سی۔ اک نواں بھائی چارہ تیار ہو رہیا سی۔ اک نواں سمیا چار (کلچر) پنکر رہیا سی۔ ایہہ سی ماجھے مالوے تے دو آبے دے جٹاں دا سا بھیا کلچر جس اُتے گوانڈھ وسدے جانگلیاں دا وی کافی اثر سی۔ ساڈے اپنے پنڈ وچ دو آبے دا کوئی گھر نہیں سی پر لاگدے پنڈاں وچ کجھ دوا بنے پہنچ گئے سن۔ ساڈے پنڈ وچ اچے ودھیرے گھر ماجھے دے سن۔ مالوے دے اچے دو گھر ہی پہنچے سن۔

مالوے دے لوہے دیاں پتیریاں نال مڑھے ہوئے تے شدکارے ہوئے گڈے مجھیلاں دیاں اکھاں چندھیا دیندے سن۔ ایہناں دے ساہمنے ماجھے دے گڈے نرے چھکڑے جیہے جا پدے سن۔ مالوے دے بلد وی لمی بیل والے تے چنگی ڈیل ڈول والے سن۔ مجھیلاں دے بلد مدھرے قد والے پر گٹھے ہوئے سریر والے سن۔ ماجھے دی کرڑی بھوں پٹن لئی ایہہ بلد کم دے سکدے سن۔ مالوے دے بندے وی مجھیلاں نالوں کجھ ودھیرے لمے سن۔ پر مجھیلاں دی چھاتی چوڑی تے سریر کجھ بھارا سی۔ لباس وچ وی کجھ فرق سی۔ مالوے دیاں تیویاں سر والا کپڑا چھاتی اُتے نہیں سن رکھدیاں۔ گھنڈ کڈھدیاں وی سر اُتلا پلا ہی بیٹھاں کھچ لیندیاں سن۔ سینے اُتے چنی سٹن دار واج نہیں سی۔ ایوں ہی ملوئی مرد

تیز بھنن والا چادر اکلیاں توں کافی اچا بھندے سن۔ جتھے مجھیلاں دی چادر کلیاں  
 دے بیٹھاں تک ہوندی سی۔ پگ دے سائل دا وی کجھ فرق سی۔ پر دو تن سالوں  
 وچ ہی لباس دا ایہہ فرق بالکل مٹ گیا۔ مجھیلاں وی بکال بکل مارن لگ پیاں۔  
 مجھیل دھوتیاں چادر اں دار وراج چھڈ گئے تے ملوئی اپنے چادرے کجھ نیویں کر  
 کے بھنن لگ پئے۔ کھان پین وچ پہلاں ہی کجھ خاص فرق نہیں سی۔

ماجھے وچ اچے اودوں داڑھی کلن دار وراج نہیں سی۔ پر جیہڑے ملوئی  
 پہلاں پہل اتھے بچے اوہتاں وچوں کئی داڑھی کٹے سن۔ کوئی دو ملوئی چلم پین  
 والے سن۔ مجھیلاں لئی ایہہ بڑی اسپرچ گل سی۔ داڑھی کیساں والا سکھ حتی پیوے۔  
 جس سمیں دی مینوں سنبھال ہے اودوں ساڈے پنڈ وچ کوئی سکھ چلم پین والا نہیں  
 سی۔ یاں تاں حتی پین والے حتی چھڈ گئے یاں لگ چھپ کے پیندے ہون گے۔  
 ایس دے اُلٹ کجھ سالوں پچھوں ہی مجھیلاں دے منڈے وی داڑھیاں کلن لگ  
 پئے۔ گناں او گناں دا وٹاندر ا ہوندار ہیا سی۔



## چک 79 وس پیا

ساڈے ٹبرنوں چک 79 وچ پہنچیاں دو مہینے ہون والے سن۔ ہن تک پنڈ دے کوئی پنڈراں ٹبر پہنچ چکے سن۔ ڈیرے ساریاں دے وٹاں تھلے ہی سن۔ اے تک پنڈ وچ کوئی لوہار، ترکھان، تیلی، دھوبی نہیں سی بجا۔ دوکان وی اے کوئی نہیں سی کھلی۔ پنڈ دا کوئی مونہہ متھا بنے تاں ہی کوئی دوکاندار آوے۔ دیس دینس کوئی دو تن جنے خانیاوال جاندے اتے اپنے لئی تے ہور ناں آٹھیاں گوانڈھیاں لئی لوڑیندا سودا سوت لے آوندے۔ ہر چھوٹی موٹی چیز لئی آون جان دا چھتی میل پینڈا کرنا پیندا سی۔ ماجھے توں آئے سارے ٹبر مل تے کہیاں خانیاوال جا کے لیاوندے۔ کراہ دی اتھے ہر گھرنوں لوڑی پراہیہ ضروری سند کے ٹبر کول وی موجود نہیں سی۔ دو تن واری جانگلیاں دیاں بھیدیاں توں کراہ لیاندا۔ پر روز روز منگ کے کیوں کم چل سکدا سی۔ ہر مربع وچ وڈے وڈے بے کھڑے سن کراہن والے۔ ساڈے ٹبر نے تے دوہاں ہور ناں ٹبراں نے خانیاوال ہی کراہ بنوائے تے وٹاں پاؤن واسطے جنڈرے وی اوتھوں ہی لیاوندے۔ اصل وچ ہر تیجے چوتھے دن پنڈ دے دو تن بندے خانیاوال جاندے ہی رہندے سن۔ پینڈا ہن اوہناں دے پیریں چڑھ گیا سی۔ راہ دی وی چنگی پچھان ہو گئی سی۔ پھیر وی کدے کدے پاندھی راہ بھل جاندے سن۔

لاگ چاگ دے پنڈاں وچ وی کافی ٹبر بچ گئے سن۔ پر رہندے اے سارے جھگیاں وچ ہی سن۔ کسے وی پنڈ وچ کوئی کاریگریاں کوئی کمی نہیں سی آیا

تے نہ ہی کتے ہٹی کھلی سی۔ ساریاں نوں اپنیاں لوڑاں پوریاں کرن لئی خانیوال  
 نوں ہی دوڑنا پیندا سی۔ بیایاں ختم ہو چکیاں سن تے ہن ساریاں وسیرکاں نوں  
 سبھ توں وڈا فکری کوٹھے اسارن دا۔ آخر جھگیاں وچ کناں چر کٹیا جاسکد اسی پر کوٹھا  
 اُسارن لئی اٹاں ہتھن والا کوئی نہیں سی اتے نہ کوئی کندھاں دی اساری کرن والا  
 راج سی۔ لوڑ پین تے سنگھ نویاں توں نویاں کاڈھاں کڈھ سکد اہے۔ گنجی بار دے  
 وسیرکاں نے کچیاں اٹاں بناؤن دی وی بڑی چنگی کاڈھ کڈھ لئی۔ اٹاں سچے وچ  
 نہیں سی تھپیاں جانڈیاں سگوں مناسب ڈھنگ نال مٹی گو کے کسے پدھرے  
 کرڑے تھاں ایس مٹی دی اک تیبہ وچھا دتی جانڈی سی۔ کوئی چار پنچ فٹ  
 چوڑی۔ اٹھ دس فٹ لمی تے تقر پین ست اٹھ انچ موٹی۔ ایس مٹی دی تہہ دا کوئی  
 نام وی سی جو اج مینوں یاد نہیں رہیا۔ جدوں مٹی ذرا آٹھر جانڈی تاں اک کرڑی  
 لکڑیاں لوہے دی پتی نال ایس وچ اجیہاں کاناں پادتیاں جانڈیاں جینہاں نال  
 کوئی فٹ بھر چوڑیاں تے کوئی ڈیڑھ دو فٹ لمیاں اٹاں کٹیاں جانڈیاں۔ ایہناں  
 نوں ایوں ہی سکن دتا جاندا۔ جدوں اک پاسا سک جاندا تاں اٹاں اُتھل دتیاں  
 جانڈیاں۔ کوئی پندراں دناں وچ اٹاں پوری طرح سک جانڈیاں۔ ساڈے پنڈ  
 دے پہلے کوٹھے ایہناں اٹاں نال ہی بنے ہوئے سن۔ ایہہ مینوں یاد نہیں کہ  
 اُساری لوکاں نے آپ ہی کیتی سی یاں کوئی راج مل گیا سی۔ میرا اندازہ ہے کہ  
 لوکاں نے آپ ہی کراں مار کے کندھاں اساریاں۔ پہلی کندھ ذرا ونگی ٹیڈھی بنی  
 ہووے گی۔ دوجی وار کجھ سدھار ہو گیا تے کجھ ہور تجربہ ہون پچھوں لوکاں نوں  
 چنگی جاچ آگئی۔ ساریاں پنڈاں دے لوک میرے بار وچ پہچن توں کوئی دس  
 باراں سال مگروں تک وی ایہو جہیاں اٹاں بناوندے رہے تے اپنے ہتھیں  
 اساری کردے رہے۔ ایہہ سبھ کجھ میں اپنی اکھیں دیکھیا ہے۔ ایہناں پہلے بنے

کوٹھیاں وچ کھڑکیاں باریاں بالکل نہیں سی رکھیاں گئیاں۔ اوس ویلے لوڑ سی سر  
 لکاؤن لئی چھت دی تے چو پھیرے کندھاں دی۔ بس ایہو کجھ کیجا جاندا سی۔  
 بوہے، چوگاٹھاں جڑے جڑائے خانیوال توں لے آوندے سن۔ ایس سببھ وچ  
 تایا جی اک قصہ سنایا کردے سن۔ تایا جی اپنے کوٹھے لئی بوہالین لئی خانیوال گئے۔  
 خیال سی کہ مڑدیاں اوٹھاں والے مل جان گے پر اوس دن ساڈے پنڈاں ول  
 آؤن والا کوئی اوٹھ نہ ملیا۔ تایا جی آپ گھوڑی تے چڑھے تے دروازہ سرتے رکھ  
 لیا۔ راہ وچ جہڑا دیکھے ہس پوے۔ پرتائے دی مجبوری سی۔ دوتن تھائیں جانگلیاں  
 نے ٹچکر کیتی ”اوسردار! ایہہ کیہہ جہیا سانگ بنائی بیٹھا ایں“ تایا ہس کے کہہ چھڈدا  
 ”بیلیو! میں بوہا سرتے چکیا ہے کہ گھوڑی نوں بھار نہ لگے“۔ جانگلی سمجھدے ایہہ  
 کوئی مورکھ سکھ ہے۔ اپنی سمجھ نہیں سی کہ اوہ آپ مورکھ ہن۔ کیونکہ ہور کسے طریقے  
 نال دروازہ گھوڑی تے لڈیا نہیں سی جاسکدا۔

بڑے سرڑی تے کرڑی ہڈی والے سن اوہ لوک۔ بوہا ٹاہلی یا ککر دا بنیا  
 ہو یا سی۔ چیرھ، دیار ا بے اودوں تک خانیوال ملدا ہی نہیں سی۔ کوئی من بھر بھار  
 چوگاٹھ تے دروازے دا ضرور ہووے گا اتے تائے نے اٹھاراں میل دے  
 پینڈے وچ صرف تن وار دروازہ سرتوں لاہیا۔ اک واری کسے ہور بندے دی  
 مدد نال تے دو واری گھوڑی کسے ون کول کھڑی کر کے ون دی ٹیک نال بوہا  
 پٹھاں رکھ لیندا رہیا۔ تے پھیرا ایسے طرح گھوڑی تے چڑھ کے بوہا سرتے رکھ  
 لیندا رہیا۔ تایا سریر دا ٹکڑا سی تے بھار چکن وچ خاص کر بڑا ہمتی سی۔ انج ساڈے  
 ٹبر وچوں تایا شیر سنگھ سبھ توں مدھرا سی۔ اوسدا قد صرف پنج فٹ نوں انج یاں  
 ساڈے اٹھ انج ہووے گا۔ باقی کوئی وی پنج فٹ دس انج توں گھٹ نہیں سی۔  
 ساڈے پتا جی تے دادا جی چھ فٹ توں اُتے سن۔ اصل وچ گھنپے کیاں دی کچھلی



پیڑھی تک دے لوک ہوندے ہی بڑے لمے سن۔ بابا جی کہندے ہوندے سن  
 ”گھنپے کیاں دی کنک تے سرہواں داساگ کھا کے تے گھنپے کیاں دے کما  
 دی روہ پی کے جٹاں دے منڈے اکو ورھے وچ چپا چپا اُسر جانڈے نیں“ تارا  
 سنگھ جو کجھ دُور دے رشتے توں میرا چاچا لگدا سی کوئی چار پنج سال ساڈے کول بار  
 وچ رہیا۔ ایس دا قد میرے وانگ مسان پنج فٹ چھ انچ دے قریب سی۔ بابا  
 مخول نال آکھدا ہوندا سی ”ایہہ ناکلیں جمیاں سی ایسے لئی بھید و جیہا رہ گیا اے۔  
 گھنپے کیاں وچ تاں اسیں ایہو جیہے گٹھ مٹھیے جن ہی نہیں ساں دیندے۔“

گھنپے کیاں وچ زمین دی تنگی سی۔ جدوں اسیں بار وچ گئے تاں پیچھے  
 گھنپے کیاں دے دو تن ہو رٹیروی آگئے۔ حصے ٹھیکے تے زمین واہن نوں۔ ایہہ  
 سارے ہی بڑے لمے لمے سن۔ چک 79 والے مخول نال کہندے ہوندے سن  
 ”گھنپے والے دوہلو دابی نیں“۔ دوہلو کما دی اک پرانی قسم سی جس دا گنا بڑا لما  
 ہوندا سی۔ خیر ہن نہ رہی پرانی کنک نہ اوہ سرہوں نہ ہی پرانا کاٹھا کما۔ شاید ایسے  
 لئی ہن گھنپے کیاں وچ وی گٹھ مٹھیے جم رہے ہن۔

کوٹھیاں دیاں کندھاں تاں کچیاں لوکاں نے کڈھ لئیاں پرچھت پاؤن  
 لئی کسے ترکھان دی لوڑ سی۔ مربعیاں وچ ون بڑے کھڑے سن۔ لوکاں نے وناں  
 دے وڈے وڈے ٹاہن وڈھ لئے۔ توڑے (چھتیر) بناؤن لئی تے پتلیاں  
 ٹہنیاں دیاں کڑیاں گھڑ لئیاں۔ ون دی لکڑی سدھی نہیں ہوندى۔ چھتیراں تے  
 کڑیاں وچ ورگے لاکے ورگے دا دو جا سرائال دی کڑی اُتے نکاونا پیندا ہے۔  
 جے چھتیر وچ ونگ ہووے تاں اوس وچ وی ورگ پاؤنا پیندا ہے۔ ایہہ کم کوئی  
 کاریگر ہی کر سدا ہے۔

پنڈ دا سبھ توں پہلا کوٹھا ساڈے ٹیر نے چھتیا۔ ایس دیاں کندھاں کنج

اساریاں تے چھت کیویں پئی۔ ایس بارے مینوں اج کجھ یاد نہیں ہاں اینا پتہ ہے کہ ساڈا ٹبر کوئی چھ مہینے باہر والی جھگی وچ ہی رہیا سی۔ ایہہ کوٹھا چوڑا تاں بہت نہیں سی پرلما بہت سی۔ کھڑکی باری کوئی نہیں سی۔ اندر دے وی ہنیرا ہوندا سی۔ چھلی کندھ وچ اتلے پاسے تن مورییاں سن روشندان دی تھاں۔ ایہناں مورییاں وچ سیخاں دی تھاں پتلیاں لکڑیاں گڈیاں ہویاں سن تاں جو کبوتر، چڑیاں اندر نہ آسکن۔ اساں مگروں رہائش واسطے ہور کمرے بنائے تے ایہہ کوٹھا سیال وچ ڈنگر بھن لئی رکھ لیا۔ اسیں 1947ء وچ ایہہ کوٹھا اویں ٹھیک حالت وچ کھڑا چھڈ کے آئے ساں۔ ہن تک ڈھے گیا ہووے گا یاں ڈھا دتا گیا ہووے گا۔ نویں وسنیک نوں ایہہ پتہ وی نہیں ہونا کہ ایہہ کوٹھا ایس پنڈا دا سبھ توں پہلا بنیا مکان سی۔

ایہہ نہیں دینیں ہی اک ہور واقعہ ہو یا جس نوں میں اک اہم واقعہ کہو اں گا کیونکہ ایس نال پنڈا دا مونہہ متھانکھر آیا۔ راشے (پٹھان) آگئے۔ موڈھیاں تے بیچے رکھی۔ ایہہ لوگ کچیاں کندھاں اسارن دا کم کردے سن۔ پچھوں ایہہ اتاں تھپن دا کم وی کرن لگ پئے۔ کجھ ہور مگروں چھوٹیاں بھٹیاں وچ اتاں پکاؤن وی لگ پئے۔ جدوں ایہہ ساڈیاں پنڈاں وچ پہنچے اودوں ایہہ صرف گارے دیاں کندھاں اسارن دا کم ہی کردے سن۔ پنڈا وچ جنے ٹبر پہنچے سن اوہناں ساریاں نے راشیاں نوں اپنیاں حاطیاں دی چار دیواری اسارن دا ٹھیکہ دے دتا۔ کوئی مہینے بھرو وچ پنڈراں سولاں احاطے بن گئے۔ تے چک 79 دا ہن پنڈا والا روپ نکھر آیا۔ ایس سمیں تک بہتے ٹبراں نے اپنے کوٹھے وی بنائے سن۔ لوک جھگیاں چھڈ کے اپنے گھراں وچ آگئے۔ ساڈا ٹبر پنج چھ مہینے باہر جھگی وچ رہیا۔ ہن گھر پنج کے چلہا، چوکا، کھریاں، کرانے پھیر بنائے تے ڈنگراں لئی

ڈھارے چھناں وی بنائیاں۔ پنڈ ہن صحیح معنیاں وچ وس گیا۔ پر گھر ہی وسے سن  
 ہور ا بے کجھ نہیں سی بنیا۔ کوئی کمی، کاریگر، دوکاندار نہیں سی پُجا۔ گور دوارا بناؤن لئی  
 سارے اتا ولے سن۔ کھوہ تاں ا بے کافی چرنوں لگنا سی۔ پھیر وی پنڈ والے خوش  
 سن۔ ہن اوہ گھراں والے بن گئے سن تے اک تھاں اکٹھے ہو گئے سن۔ بھاویں  
 گور دوارا نہیں سی بنیا پر تائے نے لوکاں نوں پریر کے اک تھاں اکٹھے ہون دا  
 وسیلہ بنا دتا۔ شام نوں تیار ہر اس صاحب دا پاٹھ کر داتے پچھوں جوٹیاں دے شبد  
 پڑھے جاندے۔



## باردا جیون رڑہن لگ پیا

جنہیں دینیں راشے حاطیاں دیاں کندھاں کڈھ رہے سن اتے گھراں  
 والے کوٹھے اسارن دا آپرالا کر رہے سن او دوں نال نال کپاہ بیجن لئی زمین تیار  
 کرن لئی وی ہڈ بھنیویں محنت کرنی پے رہی سی۔ پہلے آبادکاراں نے رُکھ جھاڑیاں  
 وڈھ کے تے اُنچے نیویں تھاں پدھرے کر کے جتی بھوں صاف کیتی سی اوس وچ  
 تاں کنک، چھولے، پٹھے بیج لئے گئے سن۔ ساؤنی دی فصل لئی بھوں تیار کرنی۔  
 بڑے وڈے وڈے ون تے جنڈ کھڑے سن ساریاں مربعیاں وچ۔ لگ بھگ ہر  
 مربعے وچ چھوٹے وڈے بے وی کھڑے سن۔ ایہناں وچ کئی بے تاں اسیں بار  
 چھڈ کے آؤن تک وی نہ کراہ سکے۔ ساڈے اپنے 38 نمبر مربعے وچ اک ٹہہ اخیر  
 تک بچیا رہیا۔ ایس نے ادھا کلہ زمین روکی ہوئی سی۔ پہلاں ایہہ ٹہہ کوئی دوکلیاں  
 وچ پسریا ہویاں سی۔ اساں کوشش کر کے ڈیڑھ کلا بھوں تاں بیجن جوگ بنا لئی  
 پراتھے داسبھ توں اچا حصہ انت تک کھڑا رہیا۔

نویں بھوں آباد کرنا کوئی سوکھا کم نہیں سی۔ ایس لئی اپنے من تے تن دی  
 پوری شکتی لاؤنی پیندی سی۔ وڈے رُکھ پلداں۔ اوہناں دے موچھے پاوندیاں  
 تے ڈونگھے ٹوئے پٹ کے جڑھاں کڈھیاں جوان منڈیاں دے ڈولے ہار  
 جاندے سن۔ اتھے کرا ہونے ہور وی اوکھا کم سی۔ پہلاں ٹہیاں اُتے رُکھ،  
 جھاڑیاں، ملھے پٹنے ہوندے سن۔ پھیر مٹی پٹ کے کہیاں نال دُور سٹنی پیندی سی۔  
 جتھوں کراہ نال دھو ہی جا سکے۔ اک ہور مصیبت ٹہیاں وچوں سب بڑے

نکلدے سن۔ میں خود دیکھیا کہ ساڈے چراگے نال دے مربے وچوں اک ٹا پدیاں کوئی گھنٹے ڈیڑھ گھنٹے دے سمیں وچ تن سب مارے۔ ایہناں وچوں اک سب کافی وڈا سی تے اک سب بڑی عجیب قسم داسی۔ ایس دے پنڈے اُتے گھسملے چٹے رنگ دی چھوٹی چھوٹی جت سی۔ ایہہ سب سی یاں سب ورگا کوئی ہور کیڑا۔ ایس بارے کسے نوں کوئی جانکاری نہیں سی۔ تائے نے ایہہ سب کہیاں لوکاں نوں دکھایا۔ سارے کہن ”اساں ایہو جیہا سب کدے نہیں دیکھیا“۔ سب ہر بے وچوں نکلدے سن ایس لئی بے کراہن والے ڈانگ کول رکھدے سن۔ کیونکہ کئی واری ایڈا وڈا سب نکل آونداسی جس نوں کہی نال مارنا ممکن نہیں سی ہوندا۔ گنجی بار وچ سب بہت سن۔ پانی لاؤن والیاں نوں، جنگل وچوں دی سفر کرن والیاں نوں سوٹا ہتھ وچ رکھنا پینداسی۔ پر گنجی بار دے دوران ساڈے پنڈاں دا کوئی بندہ سب لڑکے نہیں مریا۔ مینوں سب ڈنگے دا کوئی کیس ہی یاد نہیں۔ سپاں داناں لیاں مینوں پھیر اوس سب واقصہ یاد آ گیا جیہڑا پہلے دن ساڈے ڈیرے وچ آوڑیا سی۔ اوس توں پچھوں تن واری اوہ پھیر ڈیرے وچ آیا۔ اک واری تاں دنے سنتے نے اوس نوں ڈنگراں وچوں دی لنگھدے دیکھیا تے دو واری رات نوں اوہ سون والے منجیاں بیٹھ دی لنگھیا۔ دنیں اوسدی لکیر دیکھی گئی۔ آخری وار ایہہ سب اوس دن آیا جس دن ساڈے ٹبر نے جھگی بنائی سی۔ دن ڈبن والا سی۔ چاچا جھگی دے چوفیریوں ککھ کان ہونجھ رہیا سی۔ جدوں اوس نے دیکھیا کہ سب سدھا ساڈے ڈیرے ول آرہیا ہے۔ اوس نے اک موٹی لکڑ پھڑلئی تے سب ول ودھیا۔ سب پچھانہ مڑن لگا تاں چاچے نے دوڑ کے اوہدا رستہ روک لیا۔ جدھروں اوہ جھاڑیاں وچوں نکل کے آونداسی۔ سب دو بے پاسے نوں دوڑیا چاچا اوسدے مگر نٹھا اوہ سب نوں مار سکدا سی پر تائے نے روک دتا۔ تایا آکھن لگا

”سانوں اتھے آیاں مہینہ بھر ہو گیا اے۔ ایہنے سانوں کجھ نہیں آکھیا توں وی لہنوں کجھ نہ آکھ“ چاچے نے سپ نوں نہ ماریا پر لکھ کان سٹ کے اوس دے جھاڑیاں والے ٹکانے نوں اگ لادتی۔ سپ نے وی سمجھ لیا کہ ایہناں سر پھریاں نے مینوں اتھے نہیں وسن دینا۔ اوس نے دور اک ٹہی تے جا ٹکانہ بنایا۔ اتھے اوس نوں کئی وار ویکھیا گیا۔ کوئی دو سال پچھوں ایہہ آتو عیسائی دے ہتھوں ماریا گیا۔ بڑا وڈا سپ سی۔ آتو توں علاوہ شاید کوئی ہور اکلا بندا ایس نوں مارن دا جیرا نہ کردا۔ آتو سپاں دا ویری سی۔ جے اوس نوں کہتے سپ دس پوے تاں جدوں تک اوس نوں مار نہ لوے آتو داروٹی کھان نوں دل نہیں سی کردا۔

ایس توں علاوہ نوں زمین وچ کھال کڈھنے، وٹاں پاؤنیاں ساواں پدھرا پانی لاؤن لئی بھوں دی ڈھال ٹھیک کرنی۔ ہر کم لئی سخت محنت دینی لوڑ سی۔ پیلیاں وچوں پٹے ہوئے رکھاں دیاں لکڑاں مربع وچوں باہر سٹنا وی بڑا وڈا مسئلہ سی۔ دو ڈھائی من تک دیاں لکڑاں تاں گھبر و منڈے سراں موڈھیاں تے چک کے ہی لے جان دے سن۔ ایہناں ساریاں اوکڑاں تے تھکیو یاں دے باوجود لوک خوش سن۔ نوں زمین آباد کرن دا بڑا چاء سی۔ نال دیاں پیلیاں وچ نتیجی ہوئی کنک وی ہن لہہ لہہ کر دی سی۔ نسرن توں پہلاں ہی کنک دے بوٹے لک لک اُچے ہو گئے سن۔ بھاویں کسے کھیت وچ وی روڑی نہیں سی پائی گئی۔ پھیر نوں بھوں تے ماجھے مالوے دے جٹاں دی واہی ہوئی تے کھیتاں نوں پوے راوی دا بھل والا پانی پھیر فصل کیوں نہ ہووے۔ زمینداراں دی اپنی بولی مطابق کنکاں نوں لوہڑا آ گیا سی۔ جٹاں دے حوصلے رب جڈے ہو گئے سن۔ اوہ ساؤنی دی فصل دی روں، کنک نالوں وی دونی تینی ویکھن دیاں آساں لائی بیٹھے سن۔ ایسے لئی بھوں نوں سوارن لئی پورا تان لا رہے سن۔ سیال دے دن سن۔ لوک ٹکی

چڑھدی نال مربعیاں وچ جاوڑ دے تے سورج ڈبڈے پچھوں پیلیاں وچوں نکلدے۔ نوں آباد کرن والی زمین وچ بڑی محنت کرن دی لوڑ سی۔ پر کسے نے کدے تھکیواں محسوس نہیں سی کیتا۔ نکالانوں کھال دے کنڈھے پانی وچ نہا کے گھر آوندے۔ روٹی ٹک کھا کے، دودھ دا چھنا پی کے جاندے تائے شیر سنگھ دے متھے ٹکانے تے۔ اتھے پہر رات گئی تک دیوان لگدا۔ جوٹیاں دے شبد پڑھے جاندے (اوہنیں دنیں ”سبد“ ہی کیہا جاند اسی۔ شبد ہن ہندی دے اثر پٹھ بولیا جان لگا ہے) پہلاں تاں تایا جی ہی اگے لگدے رہے۔ پھیر ہولی ہولی ہو رکئی نوجوان وی سبد یاد کر کے آون لگ پئے۔ تایا جی دسدے ہوندے سن ”ساڈے کول کوئی ساز نہیں سی نہ ڈھولکی، نہ چھینے، نہ چمٹا، پھیر وی چنگا رنگ بھجدا سی“۔ تھوڑیاں ہی دنوں وچ کھیاں منڈیاں نے اک دو جے توں پچھ پچھا کے کئی سبد یاد کر لئے۔ دیوان وچ سبد پڑھن والیاں دی واری لگ جاندی۔ روز شام نوں گوردوارے جا کے سبد پڑھنا وی گنجی بار دی رہتل دا اک انگ سی۔ سکھاں دے ہر پنڈ وچ شام نوں ڈھولکی وجدی سی۔ سبد چوکی دی ایہہ ریت ساڈے بار چھڈن تک لگاتار جاری رہی۔

ایس دوران پچھوں کئی لوک آوندے رہے۔ اپنے مربع حصے، ٹھیکے تے دین یاں صرف اپنی زمین دیکھن۔ ماجھے وچوں آون والے لوک عام طور تے ساڈے گھر ٹھہر دے تے مالوے والے صوبیدار بشن سنگھ دے گھر جاندے۔ انج چک نمبر 79 دی تقریب ادمی وسوں نے ساڈی دادی مائی اندو دے ہتھ دیاں پکیاں کھادیاں ہوئیاں سن۔ مینوں یاد ہے پنڈ دے تن چار آدمی جیہناں دے ٹہر ٹہر نہیں سن اوہ قریب دو دو سال ساڈے گھروں ہی روٹی کھاندے رہے۔ گنجی بار وچ روٹی ٹک توں کوئی نہیں سی بھجدا۔ اناج دی کمی نہیں سی۔ دودھ گھیو کھلا سی۔

دقت صرف پکاؤن والی نوں سی۔ تے ساڈی دادی نے کدے اجیہی دقت محسوس نہیں سی کیتی۔

کنکاں پکن توں پہلاں لاگلے پنڈاں وچ وی کافی لوک آگئے سن۔ راشیاں نے ہر پنڈ وچ حاٹیاں دیاں کندھاں کڈھ دتیاں سن۔ لوکاں نے ساڈے ورگے کوٹھے وی چھت لئے سن۔ حال ہر تھاں سادے پنڈاں والا ہی سی۔ کتے کوئی کارگر نہیں سی۔ کوئی دوکان نہیں سی۔ کوئی وید حکیم نہیں سی۔ اتھے کتے گوردارا نہیں سی۔ ہن ساریاں نوں وڈا فکر ایہہ سی کہ واڈھیاں وچ داتریاں دے دندے کڈھن دا کوئی پر بندھ نہیں سی۔ ہن تک موہوالی والے مستری کول وی اینا کم ہو گیا سی کہ ٹٹا ہو یا چوڑ چڑھاؤن لئی وی تن تن دن چکر مارنے پیندے سن۔ پنڈ وچ کوئی ہٹی نہ ہون کر کے موقعہ بے موقعہ خانیوال نوں بھجنا پیندا سی۔ پنڈ دے سیانے آدمی صلاحاں کردے سن کہ اپنے پچھلے علاقیاں وچوں کارگر تے دوکاندار لیاں دے جان۔ ڈراہیہ سی کہ آبادی حالے بہت گھٹ ہے۔ کارگریاں دوکاندار اتھے تاں ہی ملے گا جے او سنوں مناسب آمدنی ہووے۔ جنے ٹبر پہلے سال دے انت تک ساڈے پنڈ پنچے اوہناں دے سرتے نہ کوئی ہٹی چل سکدی سی نہ ہی کوئی لوہار، ترکھان ٹک سکدا سی۔

ہن تک کجھ کم ضرور چنگے ہو گئے سن۔ لوکاں نے کوٹھے اسارن لئی اتاں ڈگھی وچوں مٹی کڈھ کے بنائیاں سن تے ای تھوں گارالے کے اساری کیتی سی ایس لئی ڈگھی ہن کافی وڈی ہو گئی سی۔ جیہڑا حصہ پہلاں پٹیا سی اوہ ہن اپنے پین والے پانی لئی رکھ لیا گیا سی تے نویں بنی ڈگھی ڈنگراں واسطے تیار کر لئی گئی۔ انج اپنے پین والا پانی وی ڈنگراں والی ڈگھی وچوں دی لنگھ کے جاندا سی۔ پر اوس ڈگھی وچ ڈنگر نہیں سن وڑن دتے جاندے۔ ایس لئی ڈگھی دا پانی صاف سی یاں انج سمجھ



لیا جاندا سی کہ پین والے پانی دی ڈگھی دا پانی صاف ستھرا ہے، ساؤ لوکاں دے پین والا۔ ایہہ ٹھیک ہے کہ ڈگھی دا پانی کھال دے پانی نالوں صاف ہوندا سی۔ کھڑا رہن کر کے ایہہ پانی نتر جاندا سی۔ ایس وچ زیادہ پھٹکوی نہیں سی گھولنی پیندی۔ کھال دے پانی وچ گار بڑی ہوندی سی۔ پھیروی مربعیاں وچ کم کر دے لوک کھالاں دا پانی ہی پیندے سن۔

لوکاں نے ایس اجاڑ وچ رہن دا ڈھنگ سکھ لیا سی۔ اوہ کہیاں، رنبے، چھنڈن یاں تکھے کرن والے سند لے آئے سن۔ کہی، کہاڑی دا دستہ ٹٹ جائے تاں آپے ہی پالیندے سن۔ راشن پانی مہینے بھر دا اکٹھا لیا کے رکھ لیندے سن۔ گھر دے ضروری بھانڈے (چائیاں، کڑاہیاں، توڑیاں، گھڑے) لوڑتوں زیادہ خرید کے رکھدے سن۔ کوئی بھانڈا بھج جائے تاں نہتے نہ ہو جائیے۔ زندگی رڑھدی جا رہی سی۔ بھاویں کتے دھکے، بھکے وجدے رہندے سن۔



## گنجی باروچ بھٹھیاں چڑھیاں

جہنیں دنیں ساڈی جھگی تیار ہو رہی سی بابے جھناں نوں اک ہور مسئلہ پیش آ گیا۔ گنجی باروچے جنگل وچ ایہہ اک وڈا مسئلہ سی۔ میں کچھ دس آیا ہاں کہ بابا بھائیں روز پین والیاں وچوں نہیں سی پر بہتر چوتہر سال دی عمر وچ پورا جو ترا لاؤنا تے پھیر پٹھے کترنے۔ ایس لئی اج کل بابے نوں روز نہیں تاں تیجے چوتھے دن ضرور پینی پیندی سی۔ جیہڑیاں دو بوتلاں سوغات وچوں ملیاں سن اوہ ہن مکن والیاں سن۔ اک دن بابے چاچے نوں آکھیا ”اوائے دیپو! بوتلاں تاں مک چلیاں نہیں توں وی کوئی بندوبست کیتا اے کہ نہیں؟“ چاچے نے اتر دتا ”بھائی! ککراں تے کھال تے کھلوتیاں نیں۔ سک وی چنگے پکے ہوئے نیں۔ پر گڑ کتھوں لیا یے؟“ ”اچے پرسوں تاں چھیر سنگھ لیا یا اے گڑ شہروں۔ اوتھوں کڈھ لے دو تن روڑیاں“ چاچے نوں تاں بس اشارہ ہی چاہیدا سی۔ ماں دیاں نویاں خریدیاں گھڑیاں وچوں اک گھڑا کھسکا لیا تے او سے رات مٹ روڑی وچ دب دتا۔ روڑی ہن مٹ دبن جوگی ہو گئی سی۔ جدوں مٹ تیار ہو گیا تاں بٹھل دی ضرورت پئی۔ پنڈ وچ بٹھل کسے کول نہیں سی۔ اتھی وی بابے نے ہی چاچے نوں راہ دسیا۔ کہن لگا ”اوہناں سنگھاں کولوں لے آوناں جیہڑے سانوں بوتلاں دے گئے سن“۔ چاچا تائے توں چوری گھوڑی لے کے گیا۔ گنجی باروچے لوک اک دو بجے دے ہتھ وٹاؤن لئی سدا تیار رہندے سن۔ نکالاں نوں چاچا بٹھل لے آیا۔ اگلے دن تائے نے خانیوال جانا سی۔ چاچے نے جھگی توں کجھ دور دو

جھاڑیاں دا اوہلا لے کے بھٹھی لادتی۔ نکالاں نوں تازہ کڈھی بابے نوں چکھن لئی  
پیش کیتی تاں بابا نک چڑھا کے بولیا ”اوائے! تیرے مونہہ تے داڑھی آون لگی  
اے توں اے ایہہ کم وی نہیں سکھیا۔ جدوں پھیر مٹ پائیں گا مینوں دس کے  
پائیں“ دوجی وار بابے نے آپ مٹ پایا۔ پر اتھے پورے مصالے نہیں سن  
ملدے۔ بابے دی پوری تسلی نہ ہوئی۔

چاچے نوں دیکھ کے پنڈ دے کئی ہور نو جوان وی بھٹھیاں چاڑھن لگ  
پئے۔ دقماں بڑیاں سن۔ گڑا کھا ملد اسی۔ ہور مصالے تاں ملدے ہی نہیں سن۔  
چنگے مٹ وی نہیں سن لہدے۔ بٹھل وی سارے پنڈ وچ اکوسی۔ ہن تاں  
اوہناں نوں سک وی دو ڈھائی میل دور جا کے نہر دے کنڈھے تے بیجیاں  
نگراں توں لیاو نے پیندے سن۔ پر باراں وساؤن والے بڑے ہمتی سن۔ اوہ  
اجیہاں اوکڑاں دی پرواہ نہیں سن کر دے۔ کوئی نہ کوئی راہ لہ لیندے سن۔  
بھٹھیاں عام چڑھدیاں سن۔ اتھے کیمڑا کے پلس والے نے آوناسی۔ ہاں اک  
دن پواڑہ پے گیا۔ اک سوم پیا کل دا تیار ہو یا مٹ منڈے چوری روڑی وچوں  
کڈھ کے لے گئے۔ اوہ بڑا سیخ پا ہویا۔ گھر گھر دسدا پھرے۔ ”میرا مٹ منڈے  
چرا کے لے گئے نیں“۔ آخر ڈانگ سوٹے تک نوبت آئی تاں پنچاست اکٹھی  
ہوئی۔ منڈے من گئے کہ اوہناں مٹ چرایا اے پر نال اوہناں دوش لایا ”جدوں  
اسیں کڈھدے آں ایہہ کول آ کے بہہ جاندا اے تے ادھی ادھی بوتل پی جاندا  
اے۔ جدوں ایہہ آپ کڈھدا اے سانوں چھکاوٹا وی نہیں“۔ پنچاست وچ  
سیانے آدمی بیٹھے سن۔ اوہناں نے مٹ تاں مڑا دتا پر نال ہی اوس سوم نوں سزا  
دتی کہ اوہ اک بوتل کڈھ کے منڈیاں نوں دیوے گا۔

ایہہ گل چاچا سناوٹا ہوندا سی۔ تائے نوں سبھ پتہ سی پر اوس نے ایس

بارے کدی ذکر نہیں سی کیتا۔ نہ ہی ایہہ کوئی ایڈی وڈی گل ہے۔ جیہڑی ضرور سنائی جاوے۔ میں قصہ ایہہ دن لئی لکھیا ہے کہ باراں وساؤن والیاں نوں پیش آؤن والیاں اوکڑاں وچوں ایہہ وی اک وڈی اوکڑی سی۔ پین والیاں نے پینی سی۔ ٹھیکہ اتھے کوئی نہیں سی۔ آپ ہی کڈھنی پیندی سی۔ بھاویں پورے مصالے نہیں سن ملدے۔ ساز سامان وی گھٹ سی پر جدوں ہمت ہووے۔ جیرا ہووے تاں بندہ سبھ کجھ کر لیندا ہے۔ ساڈے بار چھڈن تک مٹ دیندے رہے۔ بھٹھیاں چڑھدیاں رہیاں۔ مھلاں لگدیاں رہیاں۔ ایہہ وی گنجی بار دے کلچر دا اک ضروری انگ سی۔

کافی چر پچھوں سرکار نے ایہناں پنڈاں وچ شراب دا ٹھیکہ کھولنا چاہیا تاں کوئی وی پنڈ ایہہ ٹھیکہ لین نوں تیار نہیں سی۔ کیونکہ سو جھوان فوجی شراب دے ٹھیکے نوں اک لعنت سمجھدے سن۔ اتے پھیر ایہہ ٹھیکہ ایس علاقے دے سبھ توں چھوٹے تے کسے حد تک سبھ توں کچھڑے ہوئے پنڈ چک نمبر 81 وچ کھولیا گیا۔ بھٹھیاں دے نال نال ٹھیکے والیاں دا کاروبار وی چنگا چلدا رہیا۔ پر میں بڑے فخر نال کہہ سکداں ہاں کہ ساڈے علاقے دے کسے وی پنڈ دے کسے وسنیک نے شراب پی کے جائیداد نہیں سی اجاڑی۔ شرابیاں دے دنگے وی بہت گھٹ ہوئے۔ اپنے پنڈ دی مینوں صرف اک کہانی یاد ہے اتے ایس داسدہ پنڈ دے سبھ توں شریف منے جاندے فوجی حولداری کیسر سنگھ نال ہے۔

سردار نرن سنگھ دے لڑکے بچن سنگھ دا چھوہارا پیا۔ بھاویں جمعدار صاحب دے سارے ٹبر وچوں کوئی وی بہت پین والا نہیں سی پر اوہناں دے جہاں متراں نے شراب دا چنگا دور چلایا۔ حولداری کیسر سنگھ کجھ زیادہ ہی پی گیا تے گھروں باہر نکل کے کسے معمولی جیہی گل پچھے اوس نے پنڈ دے دوکاندار

سادھورام نوں ڈانگ مار دتی۔ سٹ سروچ لگی سی پر ہسپتال دے ڈاکٹراں نے موقعے سر سنبھال لیا تے دس دتا کہ سادھورام دی حالت خطرے توں باہر ہے۔ پنڈ والیاں نے زور پا کے دوہاں دھراں دی صلح صفائی کروا دتی پر حولدار کیسر سنگھ نوں 600 روپے جرمانے وجوں سادھورام دے علاج کراون لئی دینے پئے۔ 600 روپے اوہنیں دینیں اک وڈی رقم سی تے حولدار نے ایہہ رقم قرضہ چک کے دتی سی۔ اوہ کئی سال پچھوں تک ایس قرضے دے بھارتھلے دیار ہیا۔

بھٹھیاں نال سبندھت میاں چنوں دے نیڑے دے اک پنڈ دی گھٹنا بڑی دلچسپ ہے۔ اک بزرگ دامریج میاں چنوں نوں جان والی سڑک دے نال لگدا سی۔ سڑک دے کنڈھے تے اوس نے اپنا ڈیرا پایا ہو یا سی۔ بابا دوپہرے ہی کھلے میدان بھٹھی چڑھائی بیٹھا سی۔ بد قسمتی نوں پلس دی اک ٹولی کسے قتل دی تفتیش لئی اگے گئی ہوئی سی جو اوس سمیں واپس پر تپتاں بابے دی بھٹھی ویکھ کے تھانیدار بابے کول گیا تے جا کے پچھن لگا ”بابا جی کیہ کر رہے ہو؟“ بابے نے سہج سجا اتر دتا ”شراب کڈھ رہیاں جی۔ بڑے مصالھے پا کے مٹ تیار کیتا سی۔ دو بوتلاں کڈھ لیاں نیں۔ آؤ بیٹھو ذرا چکھ کے ویکھو“ ایہہ کہے بابے نے منجیاں ڈاہ دتیاں۔ تھانیدار طیش وچ آ کے بولیا ”بابا! توں شرع عام جرم کر رہیاں ایں تے نال سانوں وی مجرم بناوندا ایں“۔ بابے نوں ایس گل دی سمجھ نہیں سی آرہی کہ اوہ کیہ جرم کر رہیا سی پر اپنے نوں دور ہل واہندے بابے دے منڈے کول آگئے۔ نال دے مربعے والے کچھ ہور لوک وی آگئے۔ اوہناں آ کے تھانیدار نوں بینتی کیتی کہ ایس سادھ بزرگ نوں اینا پتہ ہی نہیں کہ شراب کڈھنا جرم ہے۔ نال ہی اوہناں دسیا کہ بابے دی کڈھی شراب و سکی نوں مات کر دی ہے۔ تسیں ذرا چکھ کے ویکھو۔ روٹی ٹک دا پر بندھ اسیں کر دے ہاں۔ تھانیدار وادل لپچا آیا۔

اوہ بہہ گیا۔ نال دے تن مسلمان کانٹھیل شراب نہیں سی پیندے۔ اوہناں لئی مسلمان تیلی نوں سد کے مرغے تے روٹیاں تیار کروادتیاں۔ تھانیدار تے دو ہور ہندو تے اک سکھ کانٹھیل لئی بکرا جھکا لیا۔ دو ہاں ہندو کانٹھیلاں نے پہلاں کدے نہیں سی پیتی۔ اج مفت دی ملی اوہ وی وتوں باہر پی گئے تے پچھوں تے کرن لگے پئے۔ اوہناں دی حالت وگڑدی ویکھ کے تھانیدار نوں تے پنڈ والیاں نوں فکر پے گیا۔ آخر اوہناں نوں گڈے تے پا کے میاں چنوں ہسپتال پہنچایا گیا تے دسیا گیا کہ ایہناں نے ادھ پکے چھوڑ کھائے سن۔ جس کارن ایہناں نوں ہیضہ ہو گیا ہے۔ خیر دوویں کانٹھیل بچائے گئے اتے پنڈ والیاں نے بابے دے منڈیاں نوں سمجھایا کہ اوہ بابے دی بھٹھی کسے لکویں تھادیں بنا دین۔

شراب گنجی بار دے سھیا چارواک انگ سی۔ بھادویں ہر پنڈ وچ چوکی گنتی اجیہے لوکاں دی سی۔ جیہڑے شراب دی بوتل نوں ہتھ وی نہیں سن لاوندے پھر وی پنجاب دے پنڈ و سماج وچ جنی شراب اج کل اڈائی جا رہی ہے گنجی بار دے پنڈاں وچ ایس دا دسواں حصہ وی نہیں ورتی جاندی سی۔ سو جھوان لوکاں دا نوجواناں اُتے وی کافی کنٹرول سی اتے کسے وی برائی نوں مناسب حد توں اگے نہیں سی ودھن دتا جاندے۔ کنیاں پنڈاں وچ تاں پنچائتاں دی بجائے اصول بڑی کامیابی نال نبھائے جاندے سن۔ میں بڑے مان نال کہہ سکدا ہاں کہ گنجی بار دے پنڈاں وچ سماجک ڈسپلن اج نالوں کئی گنا زیادہ سی۔



## سبھ توں اوکھے دن

جویں کچھے دسیا جا چکا ہے ساڈے علاقے دے سارے لوک اہے  
 ڈگھیاں دا پانی ہی پیندے سن۔ کھوہ اہے کسے پنڈ وچ نہیں سی لگا۔ ساڈے پنڈ  
 وچ پین والے پانی دی ڈگھی ڈنگراں والی ڈگھی دے نال جڑدی سی۔ نہر دا پانی  
 سدھا ڈنگراں والی ڈگھی وچ آوند اسی تے اوس وچوں لنگھ کے ساڈی ڈگھی وچ پانی  
 آوند اسی۔ نہر دا پانی تقریباً مہینے کچھوں پیند اسی۔

پنڈ والیاں نوں کئی ہدایت سی کہ پین والے پانی دی ڈگھی وچ ڈنگر نہیں  
 وڑن دینے۔ کوئی اوتھے نہائے گا نہیں، کپڑے نہیں دھوے گا، ہتھ مونہہ نہیں  
 دھوے گا۔ ایہناں ہدایتاں اتے پوری طرح عمل کیتا جاندا سی۔ پر اک مسکے دا  
 حل انت تک نہ لہ سکیا۔ پنڈ دے سارے کتے پین والے پانی دی ڈگھی وچوں ہی  
 پانی پیندے سن۔ سگوں اشناں وی ایسے ڈگھی وچ کردے سن۔ کتیاں نوں موڑن  
 لئی سارا پنڈ تان لاوند ا رہیا۔ جہڑا کوئی ڈنگراں نوں پانی ڈاہون جاوے اوہ نال  
 کتیاں نوں موڑن دی ڈیوٹی وی نبھاوند اسی۔ لاگے چاگے ڈنگر چارن والے ڈگھی  
 کولوں دی لنگھن والے کتیاں نوں موڑنا اپنا فرض سمجھدے سن۔ آخر ساریاں نے  
 پانی تان ایہتھوں ہی پینا سی۔ پر گنجی بار دے کتے وی تاں سرداراں دے کتے  
 سن۔ اوہ اپنے آپ نوں سرداراں نالوں گھٹ نہیں سن سمجھدے۔ جدوں تک اسیں  
 ڈگھیاں دا پانی پیندے رہے کتے وی ایہتھوں ہی پانی پیندے رہے تے اتھے ہی  
 نہاوندے رہے۔ مینوں ہن پورا یاد نہیں پر اندازہ ہے کہ اساں کوئی پنج سال

## چھڑاں دا پانی پیتا۔

چھڑاں دا پانی وی غنیمت سی۔ کجھ چر پچھوں اچھے دن وی آگئے کہ  
 چھڑاں دا پانی وی ملنوں بند ہو گیا۔ پٹواریاں تے پنڈاں وچ گھم گھم کے دسیا کہ دو  
 مہینے (یاں ڈیڑھ مہینے) لئی نہر بند رہے گی مرمت وغیرہ لئی۔ مینوں اج ایہہ یاد نہیں  
 کہ نہر دی بندی کیہڑے مہینیاں وچ ہوندى سی۔ اندازے نال کہہ سکدا ہاں کہ  
 بندی مئی، جون یاں ادھ اپریل توں پچھوں ہوندى سی۔ ایہنیں دنیں کنکاں پک  
 چکیاں ہوندىاں سن تے کپاہ دی بیائی وچ اچے کجھ سماں ہوندا سی۔ بندی دا نام  
 سندیاں ہی سارے علاقے نوں فکر پے گیا۔ ساڈیاں ڈگھیاں ہن بھاویں کافی  
 کھلیاں سن پر ایہناں وچ پنڈراں ویہہ دن توں ودھیرے سمیں تک پانی نہیں سی کھلو  
 سکدا۔ پین والی ڈگھی دا پانی تاں باراں چوداں دنوں پچھوں ہی تھلے لگ جاندا سی۔  
 آخر بندی آگئی۔ پنڈران دنوں پہلاں ہی دوویں ڈگھیاں تھلے لگ  
 گیاں۔ پانی اپنے تے ڈنگراں دے پین جوگانہ رہیا۔ ہن ساڈے علاقے دے  
 لوکاں دا سبھ توں اوکھا سماں شروع ہو یا۔ پین والا پانی لین لئی متھے بنگلے جانا پیندا  
 سی۔ جو ساڈے پنڈ توں کوئی چار پنچ میل دور سی۔ سویرے ہی روٹی ٹک کھا کے  
 چار چار پنچ پنچ گھر رل کے گھرے گڈیاں تے رکھ لیندے تے متھے بنگلے پہنچ  
 جاندے سن۔ کدے کدے واری بڑی چر مگروں آوندی سی تے پانی دے گڈے  
 سورج ڈبن نال واپس پنڈ پہنچدے سن۔ ساریاں لوکاں نے پانی سنکوچ کے ورتن  
 دے آپو اپنے ڈھنگ طریقے لبھ لئے سن۔ لسی ہر گھر وچ کافی سی۔ کوشش کیتی  
 جاندى سی کہ جتھوں تک ہو سکے پانی دی تھاں لسی دی ورتوں کیتی جاوے۔ سویرے  
 مونہہ ہتھ دھون لئی اک گلاس توں ودھ پانی نہیں سی ملدا۔ بھانڈے سکے مانجھے  
 جاندے سن۔ دھون لئی پانی بچاؤنا اوکھا سی۔ بندی دے دنوں وچ کپڑے دھون دا



کوئی اوسر (موقعہ) ہی نہیں سی۔ ملتان دی گرمی وچ کپڑے مڑھکے نال بھج جاندے سن پر کئی کئی دن ایہو مڑھکے والے کپڑے پاؤنے پیندے سن۔ گل دے کپڑے تاں مڑھکے نال آکڑ کے چم ورگے کرڑے ہو جاندے سن۔ دُدھ والے بھانڈے دہنی، کاڑھنی، چائی وغیرہ روز ضرور دھونے پیندے سن۔ کوشش ایہہ کیتی جاندی سی کہ جس پانی نال دہنی دھوتی جاوے اوہو پانی کاڑھنی تے پھیر چائی دھون لئی ورت لیا جاوے۔ ایہو جیہے ہو رکئی ڈھنگ پانی سنبھال کے ورتن لئی لوکاں نے آپی کڈھ لئے سن۔

ایہہ تاں سی گھراں وچ ورتن والے پانی دا حال۔ ڈنگران نوں پانی پیاندا ہور وی کٹھن مسئلہ سی۔ ساڈی قسمت نوں موہوالی وچ وگن والا کھوہ سی۔ ایس علاقے وچ وگن والا کھوہ شاید ایہہ اکلا ہی سی۔ کھوہ دا مالک مسلمان نیک دل آدمی سی۔ اوہ بندی توں پہلاں کھوہ دیاں ٹنڈاں، ماہل، پاڑچھا، نثار سبھ ٹھیک ٹھاک کروالیندا سی۔ کیونکہ سارے علاقے دے پسوواں نے ایہتھوں پانی پینا سی۔ ساریاں پنڈاں دے لوک سویرے دھاراں کڈھ کے ڈنگر موہوالی ول نوں ہک لیندے۔ (ساڈے پنڈ توں موہوالی کوئی اٹھ میل دور سی) تقریباً اتھے ہر پنڈ واری واری پانی پلا دیندا۔ پانی پین لئی پنڈ دے ڈنگر آڈ دے دوہیں پاسے لا دتے جاندے۔ اک واری پانی ڈاہ کے ڈھور اوٹھے ہی رکھاں بیٹھ بیٹھا دیندے۔ رکھ کھوہ لاگے بہت سن۔ ٹھنڈے ویلے اک واری پھیر پانی ڈاہ کے ڈنگر گھراں نوں ہک لیندے۔ ہر گھر دے مرد واری واری مال لے کے پیاندا جاندا کیونکہ جہڑا ڈنگر نال جاوے اوس نوں اوٹھے نہاؤن دا موقعہ وی مل جاندا سی۔ اتے نال اپنے اتے ٹبر دے کسے ہو جی دے کپڑے وی پانی وچ گھجول لیندے سن۔ پنڈ وچ تان نہاؤن دا تے کپڑے دھون دا پر بندھ ہی نہیں سی۔

کیسیں نہاؤن دا کینہ بندوبست سی؟ ایس بارے اج مینوں کجھ یاد نہیں۔ ہاں چیتا آوند ا ہے اک واری تایا شیر سنگھ ڈنگراں نال گیا اوہ گھروں ہی بالٹی تے دہی دا چھنالے کے گیا۔ او تھے تایا جی نے کیسیں اشناں کیتا۔ اپنے تے دو بابیاں دے کپڑے پانی وچ ملے تے تکالیں مال توں مگروں گھوڑی تے واپس مڑ کے ڈنگر اوس نے کسے ہور نال بھیج دتے سن۔ ایہہ سلسلہ کوئی پنج سال چلدا رہیا۔ جدوں تک پنڈ وچ کھوہ نہ لگا۔

گھٹوگھٹ اجیہاں تن ”بندیاں“ دے سمیں میں بار وچ ہی ساں۔ لوکی ایہہ ساریاں اوکڑاں کھڑے متھے سگوں ہاں سے مخول کردیاں جھلدے سن۔ میری عمر اودوں بہت چھوٹی سی پر متھے بنگلے تون پانی لین جاندے گاڈیاں دے تے موہلوالی لئی پنڈوں نکلدے وگاں دے نظارے اج وی میریاں اکھاں ساہنے گھم رہے سن۔ بندیاں دے موقعے دے کجھ ہاں سے ٹھٹھے وی کنیاں ورہیاں دے بھلے بھلائے اج پھیر چیتے آ رہے سن۔ اک واری متھے بنگلے توں پانی لئی آوندے اک گڈے دے ڈھگے ڈر کے دوڑ پئے۔ گڈے دا اک پہیہ ٹوئے وچ پے گیا تے گڈا پاس ہو گیا۔ گڈے تے رکھے ادھیاں توں ودھ گھڑے تاں ٹوٹ گئے۔ جیہڑے بچے اوہناں دا پانی ڈھل گیا۔ گڈے اتے چونہہ ٹبراں دے گھڑے سن۔ ہن ایہناں چونہہ ٹبراں نوں پنڈ وچوں پانی اکٹھا کر کے دینا سی۔ جوان منڈیاں دیاں دو ٹولیاں توریان گئیاں ہمتھاں وچ بالٹیاں دے کے ہر گھر توں دو دو چھنے پانی لین لئی۔ منڈے بڑے سٹلی نکلے۔ اوہناں نے پانی منکن لئی چنگے ساگ بنا لئے۔ جیہڑے ٹولی ساڈے گھر منکن لئی پچی اوہناں پہلاں منکن والے مراٹیاں والی کلان کیتی (مینوں ہن اوہناں دے کہے لفظ یاد نہیں) پچھوں کیہا ”مائیو، بی بیو گورو مہر کرے، خیر پاؤ، دو چھنے پانی دے“ جدوں پانی مل گیا تاں مراٹیاں

وانگ ایس دتی ”بجماناں دی ویل ودھے، گورو تہاڈے گھرے بندی وچ وی پانی نال بھرے رکھے۔ بابا تہانوں نہاؤن جوگا پانی وی بخشے“ جیوں جیوں ایہہ ٹولی گھر گھر پھر دی گئی منکن والیاں دی گنتی ودھ دی گئی تے ہر گھر وچ ایہہ نویں توں نویں کلان کر دے رہے۔ ساڈے سارے پنڈ توں جناں پانی منکن والیاں ایہناں ٹولیاں نے اکٹھا کیتا ایہناں کسے بھنڈاں، مراٹیاں دے ٹولے نے وی نہیں جمع کیتا ہونا۔

بندی نال سنبدھت اک ہور قصہ یاد آ گیا۔ ایس سمیں تک ساڈے پنڈ وچ گورو دوارہ بن گیا سی پر ڈھولکی چھینے اے نہیں سی لیاندے گئے۔ کسے خاص موقعے تے ڈھولکی لاگ دے کے پنڈ توں منگ کے لیاندی۔ پر ساڈے پنڈ والیاں توں ڈھولکی پاٹ گئی۔ ہن کوئی ڈھولکی موڑن نہ جاوے۔ کپھڑے مونہہ نال پائی ہوئی ڈھولکی موڑن۔ مہینہ بھر اڈیک کے دو جے پنڈ والے آپ ڈھولکی لین آئے۔ پائی ہوئی ڈھولکی ویکھ کے بڑے اداس ہوئے۔ اوہناں وچوں اک جنا بول اٹھیا ”جاؤ اوئے اناسی والیوتساں ساڈی ڈھولکی پاڑ دتی اے گورو کرے تہاڈے پنڈ وچ تناں مہیناں دی بندی ہووے۔ لاگیوں دی اک بزرگ اپنے ڈنگراں نوں پانی ڈاہن واسطے لئی جا رہیا سی۔ اوہ کہن لگا ”جواناں ایہہ ایس نہ دے سانوں ایہہ لے میرا جھوٹا لے جا ایہدے چم نال بھاویں دس ڈھولکیاں مڑھ لھیں“۔

بندیاں دے دن پہلے چار پنچ سال ساڈے علاقے دے لوکاں لئی سبھ توں اوکھے دن سن۔ پر لوکی ایہہ دن وی ہسدے کھیڈ دے بتاوندے رہے۔ کجھ چر پچھوں کدے لوک ایہناں اوکڑاں دا ذکر تک وی نہیں سن کر دے۔



## گنجی باردا اپنا سبھیا چار نکھر رہیاسی

بندی ختم ہوئی۔ کھالاں وچ پانی آگیا۔ پانی کیہ آیا جو یں خود رب چل  
کے آگیا۔ سبھ توں پہلاں دو یں ڈگھیاں بھریاں گھیاں۔ لوک کوئی مہینے پچھوں  
کھلے پانی وچ نہاتے۔ کھالاں تے جا کے کپڑے دھوتے۔ چوکیاں وچ، کوٹھیاں  
دے اندر پوچا پھیریا۔ پسوواں نوں نہایا۔ کھل، کوانے لبے۔ لوکاں داتے لوکاں  
دے گھراں دامونہ مہاندار پھیر نکھر آیا۔

ساؤنی دی بیائی پہلاں ہی کجھ کچھڑ گئی سی۔ ہن پورے زور نال بیائیاں  
شروع ہوئیاں۔ جس دی پہلی وتر آجاندی دو تن ٹبر رل کے پہلاں اوس دے  
کھیت بیج لیندے۔ ایس طرح رل مل کے کم چلدا سی۔ اے سارے مربعے آباد  
نہیں سن ہوئے۔ ایس لئی پانی بہت سی۔ ہر مربعے دی چار پھردی واری رکھی ہوئی  
سی تے تقریبن ہفتے بھر پچھوں واری آجاندی سی۔

ہور نو یں لوک وی آرہے سن۔ پر ہن نو یں آؤن والیاں نوں کوئی وقت  
نہیں سی ہوندی۔ اگے اوہناں نوں سانہن والے وسدے سن۔ پنجابی محاورے  
مطابق ون ون دی لکڑی اکٹھی ہو رہی سی۔ ساڈے اپنے پنڈ وچ کجھ گھر پہلاں  
امر تر دے سن۔ کجھ گورداسپور دے۔ دو سیالکوٹ دے، اک ضلع گجرات دا۔  
ایدھر مالوے وچوں شاید دو گھر فیروز پور دے۔ اک لدھیانے داتے اک  
ریاست جینداسی۔ پہلاں دکھ دکھ تھاواں توں آئے لوکاں دے ریتی، رواج کجھ  
فرق والے سن۔ رہن سہن دا ڈھنگ وی کجھ فرق والا سی۔ لیڑے کپڑے پاؤن

دا، بول چال دا، اٹھن پٹھن داوی کجھ انتر (فرق) سی۔ پر ایہناں نے بہت چھتھی  
 اک دو جے توں سکھ کے دو جیاں دے گن گرہن (حاصل) کر لئے تے اپنے  
 کڈھے دسدے لچھن تیاگ (چھڈ) دتے۔ اک نواں تے صحت مند سہیا چار  
 (کلچر) ابھر رہیا سی۔ جس وچ پرانے ان ونڈے پنجاب دی ہر نکر دے سہیا چار  
 دے کجھ گن شامل سن۔ بار دے جانگلیاں توں وی کجھ نہ کجھ حاصل کیتا گیا۔  
 ساریاں پنڈاں وچ سیانے آدمی موجود سن۔ فوجی پنشنر پہلاں وی اک سانجھی  
 رہتل وچ رہ کے آئے سن۔ نال اوہناں کول فوجی جیون دی روایت اتے فوجی  
 ڈسپلن دے گن وی سن۔ ویاہ شادی، منگنی وغیرہ نال تعلق ویاہرتاں ساریاں  
 پنڈاں دے سوجھوان بندیاں نے اکٹھے بہہ کے مقرر کیتے۔ اوہنیں دنیں اکالی لہر  
 اچے چل رہی سی۔ سنگھ سبھا لہر دا پر بھاو (اثر) وی اچے زوراں تے سی۔ ساڈے  
 علاقے دے ریتی رواجیاں اُتے ایہناں لہراں دا کافی اثر پیا۔ پاس کیتا گیا کہ ویاہ  
 دے سہیں بینڈ استبازی وغیرہ نہ ساڈے پنڈاں وچ آون گے اتے نہ ہی ایہناں  
 پنڈاں وچوں جان والی کے جج نال جان گے۔ ایہیہ موقعیاں تے لچرتے مریدا  
 توں گرے ہوئے گیت وغیرہ نہیں گائے جان گے۔ محض دکھاوے والا کوئی ریتی  
 رواج نہیں کیتا جاوے گا۔ ایس مریدا دی اتم دناں تک پالنا کیتی جاندی رہی۔  
 ایہتوں تک کہ سری گورو گرنتھ صاحب دے سچ پاٹھ تے اکھنڈ پاٹھ دی مریدا وی  
 مقرر کیتی گئی۔ اوہنیں دنیں مالوے دے کجھ کھتیراں وچ بھوڑیاں دا پرچار  
 زوراں تے سی۔ ساڈے علاقے وچ وی اک دو سنگھ ایس پرچار توں پر بھاوت  
 (متاثر) سن۔

شاید ایہناں دے بچھا دے ادھار تے سی ساڈے علاقے وچ ”سری  
 گورو گرنتھ صاحب“ دے پاٹھ دے بھوگ سمیں ”راگ مالا“ دا پاٹھ نہیں سی کیتا

جاندا۔ پر ایس توں ودھ بھسوڑیاں دا کوئی ہور بچھا سویکا رنہ کیتا گیا۔

ایہہ سبھ کجھ ہولی ہولی ہویا۔ پہلیاں پنجاں چھیاں سالاں وچ ساڈے علاقے دے سکھاں دے پنڈاں وچ اک نواں سبھیا چار پر پھلت ہو گیا سی۔ بولی دے نال تعلق رکھن والے مسئلے تاں پہلیاں دو سالاں وچ ہی حل ہو گئے سن۔ شروع شروع وچ بولی دے فرق کر کے کئی بڑے دلچسپ واقعے ہوئے۔ ایہناں دا ذکر میں کچھے کر آیا ہاں۔

ساڈا پنڈ و سے نوں کوئی ڈیڑھ سال ہو گیا سی پر اچے پنڈ وچ گور دوارہ نہیں سی بنیا۔ ایس سمیں پنڈ دے دو پروار ایہتوں مربعے بدلی کروا کے ہور تھاں چلے گئے۔ ایہناں دوہاں ٹبراں نے حاٹے ولے ہوئے سن تے وچ اک اک کوٹھا وی پایا ہویا سی۔ ایہناں وچوں اک ٹبر دے مکان نوں گور دوارہ بنا لیا گیا ”سری گورو گرنتھ صاحب“ دی بھیڑ کون لیا یا ایس بارے مینوں واقفیت نہیں۔ نال ہی مالوے وچوں بھائی چن سنگھ گرنتھی لے آندا۔ پنڈ دے اٹھ دس منڈے گرنتھی کول پڑھن پادتے۔ میں وی ایہناں وچوں اک ساں۔ ساڈے کول پھٹی، سلیٹ، کاپی کجھ وی نہیں سی ”بھال اُپدیس“ وی صرف دو ہی سن۔ ایس زمین تے انگلاں نال لکھدے ہوندے ساں ”بال اُپدیس“ پڑھا کے سانوں ”بچ گرنتھی“ پڑھن لا دتاتے پچھوں اوس سمیں دے مطابق ”بائی واراں“، ”بھگت بائی“ پڑھائیاں گئیاں۔ ساڈے وچوں گھٹوگٹ دو جنیاں نے ”سری گورو گرنتھ صاحب“ دا پاٹھ وی کر لیا۔ ایس ساری پڑھائی نوں تقریباً ڈیڑھ سال لگا ہووے گا۔

ہٹی دی گھاٹ سارا پنڈ محسوس کر رہیا سی۔ انت جمعدار نرن سنگھ اپنے پنڈ بھندیر ضلع امرتسر توں گراں دتا برہمن نوں لے آئے اوس نے آکے پنڈ وچ

دوکان کھولی۔ ایتھوں، لون، مرچ، مصالحہ، تیل، صابن، سوڈا، ڈبیاں (ماچساں) وغیرہ عام ورتوں دا سامان ملن لگ پیا۔ پنڈ والیاں دے سرتوں اک وڈا بھارتھا۔ اوہنیں دنیں ہی لاگ دے پنڈ چک 80 والے مالوے وچوں مستری ہرنام سنگھ نوں لے آئے۔ ہرنام سنگھ لوہارا، ترکھانا دوویں کم کردا سی۔ سکھاں دے تقریبین ادھے پنڈ ایس کولوں کم کرواندے سن۔ ہرنام سنگھ ساڈے نال ہی بار چھڈ کے آیا۔ ہرنام سنگھ دے آون توں کوئی ڈیڑھ سال پچھوں ساڈے پنڈ والے اپنا مستری لے آئے۔ ایہہ سی مستری نظام دین جو کافی چر ساڈے پنڈ دا لوہارا، ترکھانا کم کردا رہیا۔ پر کوئی باراں تیراں سال ساڈے نال رہ کے ایہہ واپس آ گیا۔ نظام دین بڑا سیانا مستری تے مذہبی خیالاں والا بندہ سی۔ پنڈ والے ایہدا آور مان کر دے سن۔ ایہہ کچھے حولدار سرجن سنگھ دے پنڈ بگھے چھینے (ضلع امرتسر) دا وسنیک سی۔ ایسے سمیں چک 80 وچ اک حکیم وی آ گیا۔ روڑا، روڑا پیٹھے وجوں نائی سی پر اوس نے کجھ نسخے سکھ لئے سن تے ہن اوہ حکیم بن گیا سی۔ نام بھاویں ہندواں والا سی پر ہے سی مسلمان۔ روڑا تاپ، کھنگ، زکام وغیرہ دیاں پڑیاں، جوشاندے وغیرہ دیندا سی۔ کھیاں بیماریاں دے تاں اوہنے چنگے نسخے لیکھے ہوئے سن۔ پر ہے سی ”نیم حکیم“ ہی۔ پر پھیروی جتھے ہو رکوئی وی نہیں سی اوتھے روڑے دی بڑی اہمیت سی۔ اوس دی ساریاں پنڈاں وچ لوڑ رہندی سی۔ لوک دُور دور توں اوس توں دوائی لین آوندے سن۔

ہن ساڈے پنڈ والیاں دے دو مسئلے سن۔ کھوہ لگوانا تے پنڈ وچ سکول کھلوانا۔ اک دونوں چھڈ کے باقی سارے فوجی پنشنر آگئے سن۔ اوہناں نے دوڑ بھج کر کے پنڈ وچ پرائمری سکول کھلوا یا۔ سن 1925ء دیاں گرمیاں وچ سکول شروع ہو یا۔ پہلا ماسٹر منشی اتم سنگھ سی جس نوں جمعدار وزیر سنگھ اپنے پنڈ دھار والی

(ضلع گورداس پور) توں لیا یا سی۔ منشی جی بڑے محنتی تے لگن تے دیانتداری نال کم کرن والے استاد سن۔ طالب علم اوہناں نوں ”منشی جی“ کہندے سن۔ چھوٹے سکولاں دے استادان لئی عام طور تے ایہو لفظ ورتیا جاندا سی۔ ایس سمیں تک گور دوارے دی اپنی عمارت بن گئی سی۔ گور دوارے دے حاٹے وچ اک ڈھارا چھتیا ہو یا سی۔ ساڈا سکول او سے ڈھارے تھلے شروع ہو یا۔ لاگدیاں پنڈاں دے منڈے وی سکول وچ داخل ہو گئے۔ جدوں میں ایس سکول دی پہلی جماعت وچ داخل ہو یا میری عمر او دوں اٹھ سال سی۔ دو تن منڈے وی وڈیری عمر دے سن۔ کجھ دن مگروں منشی جی خانیوال گئے تے ساڈے لئی اُردو دے قاعدے، پھٹیاں، دو اتاں، خوشخط لکھن والیاں کاپیاں لے کے آئے۔ مینوں یاد ہے ہر لڑکے نوں دتیاں گئیاں۔ ایہناں ساریاں چیزیاں دی قیمت باراں آنے (75 پیسے) سی۔

سکول کھلن پچھوں پنڈ والیاں نے ہمت کر کے پنڈ وچ ڈاک خانہ کھلو الیا تے ڈاک داکم وی منشی جی نوں ہی سوپیا گیا۔ ڈاک خانے دی بڑی لوڑ سی۔ ایس توں پہلاں ساڈے پنڈ توں باراں باراں میل تک کوئی ڈاک خانہ نہیں سی۔ مینوں نہیں پتہ کہ ہن تک ساڈے پنڈ دی ڈاک کتھوں آندی سی۔ آوندی وی سی کہ نہیں سی آوندی۔

سکول کھلن تک پنڈ وچ دو مہرے وی آگئے سن۔ بہادر سنگھ تے آتما سنگھ۔ پانی ایہہ ڈگھی توں ہی لیا وندے سن پر لوکاں نوں گھر بیٹھاں ہی پانی مل جاندا سی۔ اک مرانی وی آگیا سی۔ ویرؤ۔ شاید ایک چھیدا (دھوبی) وی پہنچ گیا سی۔ ایس سمیں تک دو دوکاناں وی ہو رکھل گئیاں سن۔ لاگ، چاگ دے پنڈاں دے لوک وی سودا سوت لین اتھے ہی آوندے سن۔ سکول تے ڈاک خانہ کھلن



نال پنڈ دی اہمیت کافی ودھ گئی سی۔ اک کھوہ توں علاوہ باقی سبھ کجھ ہن پنڈ وچ موجود سی۔ تے کھوہ دا ٹھیکہ وی 1924 یا 1925 وچ دے دتا گیا۔

گنجی بار دے ہر علاقے تے ہر پنڈ دی ترقی تقریباً ایسے طرح ہی ہوئی۔ اک فرق ظاہر سی۔ جو ترقی سکھاں دے پنڈاں نے کیتی، جو مونہہ مہاندرا سکھاں دے پنڈاں دا بنیا اوہ مسلماناں دے کسے پنڈ دا نہ بن سکیا۔ تحصیل خانیوال دے نویں وے پنڈاں وچوں کل ست لوئیر مڈل سکول سن۔ جیہناں وچوں پنج سکھاں دے پنڈاں وچ سن۔ ایس علاقے دے پنڈاں وچ تن سرکاری ڈپنسریاں سن۔ تن سکھاں دے پنڈاں وچ۔ ڈاک خانے وی سارے ہی سکھاں دے پنڈاں وچ سن۔ پر ایس علاقے وچ سکھاں دی آبادی 20 فیصدی توں وی گھٹ سی۔



## ساڈے علاقے واسدوہارن جیون

کھوہ داٹھیکہ ملتان ول دے اک مسلمان نوں دتا گیا۔ اوہ کھوہ لاؤن وچ چنگا تجربے کار تے ماہر ٹھیکیدار سی۔ اٹاں وی اوس نے اپنے آدمیاں توں تھپوایاں تے بھٹھی وچ پکوائیاں۔ آپے ہی کھوہ دی پٹوائی تے محل دی اُساری کیتی۔ پورے کم داٹھیکہ اوس نوں دتا گیا سی۔ اٹاں پکواؤن لئی جہڑیاں بھٹھیاں گنجی بار وچ بنائیاں جاندیاں سن اوہو جیہاں میں ایدھر کتے نہیں ویکھیاں۔ شاید ایس لئی کہ ایدھر وڈے بھٹھے عام ہن۔ اتے جنانا بن گنجی بار دیاں بھٹھیاں وچ بالیا جانداسی اونا ایدھر مل نہیں سکدا۔

گنجی بار والیاں بھٹھیاں بناؤن لئی پہلاں زمین وچ چورس ٹویا پٹیاں جانداسی جس وچ چونہ پاسیں پٹھوں اُتے تک کچیاں اٹاں دی اُساری کیتی جاندی سی۔ زمین دی سطح دے برابر تے پٹھلے ٹوئے اُتے وتھاں رکھ کے ڈاٹاں بنائیاں جاندیاں سن۔ چوپھیرے دیاں کندھاں تقریباً چھ ست فٹ ہور اُچیاں اساریاں جاندیاں سن۔ ایہناں ڈاٹاں اُتے وتھاں رکھ کے اٹاں چن دتیاں جاندیاں سی۔ ایس طرح پکدیاں سن اٹاں گنجی بار وچ۔ کھوہ لئی بنائی گئی ایہہ بھٹھی خستہ حالت وچ ساڈے بار چھڈن تک کھڑی سی۔ ایسے وچ ہی پچھوں راشیاں نے ساڈے گور دوارے لئی اٹاں پکائیاں تے اک دو ٹبریاں نے اپنے مکاناں لئی وی اتھے ہی اٹاں پکوائیاں۔ بالن چراگے وچ بہت سی۔ ایس بھٹھی نے ہی چراگا صاف کیتا۔

جس دن کھوہ دا ٹک لاؤنا سی اوس دن کھوہ والی تھاں دے لاگے شبد  
 کیرتن کیتا گیا۔ سارا پنڈا تھے اکٹھا ہويا۔ تیویاں داناں دیاں تھالیاں بھر کے  
 لیاںیاں۔ ویل چڑھاون لئی۔ کیرتن توں پچھوں دعاواں منگیاں گئیاں۔ ایس  
 توں بعد ٹک لایا گیا۔ پچھوں کھلے دل نال گڑ وٹیا گیا۔ پھیر جدوں چک کھوہ  
 وچ اتاریا اوس دن وی شبد کیرتن تے دعاواں کیتیاں گئیاں۔ پانی 40 ہتھ  
 تے جا کے نکلیا تے افسوس ساڈے کھوہ دا پانی کھارا سی۔ لاگے چاگے دے  
 سارے پنڈاں دا پانی ٹھیک سی صرف ساڈے پنڈا پانی ہی کھارا سی۔ ایہہ اینا  
 کھارا نہیں سی جو پین جوگا نہ ہووے۔ پر دو جے پنڈاں دے پانیاں نالوں  
 ضرور کھارا سی۔ دو جے تھاں توں آئے پر وہنیاں نوں ایہہ کافی کھارا جا پدا  
 سی۔ میں وی جدوں تن چار مہینے بعد پنڈا جاندا تاں دو تن دن پانی کافی کھارا  
 جا پدا سی۔ پچھوں پھیر پتہ ہی نہیں سی لگدا کہ پانی کھارا ہے۔ مونہہ دا سوادا ہو  
 جیہا بن جاندا سی۔ جس دن کھوہ مکمل ہو یا تے ہن ایس دا پانی ورتوں لئی کڈھن  
 دی رسم کرنی سی۔ اوس دن چنگا جگ کیتا گیا۔ چاول کیہاں نال وٹے جا  
 رہے سن تے ایس دن سانوں پتہ لگا کہ ساڈے پنڈا دے وسنیکاں دی  
 خوراک کنی کو ہے۔ ساڈے پنڈا دے کئی سورے چاؤلاں دی بھری ہوئی کہی  
 کھا گئے۔ گھٹو گھٹ چار جنے کہی توں ودھ چڑھا گئے۔ آتو عیسائی پوریاں دو  
 کہیاں چھک گیا۔ ایہناں وچوں کسے دا کجھ نہ وگڑیا۔ سبھ نو برنور ہے۔

کھوہ سن 1926ء وچ نیچرے چڑھیا۔ ایس سمیں تک پنڈا وچ اک  
 وڈی دوکان وی کھل گئی سی۔ تھوڑے سمیں وچ ہی سکھاں دے ساریاں پنڈاں  
 وچ کھوہ لگ گئے۔ ہن ساڈا علاقہ گھوگ وس رہیا سی۔ وکھ وکھ پنڈاں دے  
 لوکاں دی آپس وچ چنگی جان پچھان ہو گئی سی۔ آپس وچ رشتے ناٹے وی

ہون لگ پئے سی۔ آپسی میل جول تے سانجھ بھیلی ودھاؤن والا پر مکھ وسیلہ سی گوردوارہ۔ ہر پنڈ دے گوردوارے وچ مسیا۔ سنگراند والے دن دیوان لگدا سی۔ کسے نہ کسے پنڈ وچ وڈا جوڑ میلہ ہوندار ہندا سی۔ جتھے سارے پنڈ اکٹھے ہوندے سن۔ ہر پنڈ دے جتھے شبد پڑھدے جوڑ میلے والے پنڈ پہنچدے۔ اوتھے دیوان لگدا۔ پچھوں لنگر چھکایا جاندا۔ ایہناں جوڑ میلیاں تے کئی واری امرت پر چاروی کیتا جاندا۔ (امرت چھکاؤن والی تقریب نوں اوہنیں دنیں امرت پر چار ہی کیہا جاندا سی)

ساڈے علاقے وچ تن وڈے سالانہ دیوان لگنے شروع ہو گئے۔ اک خانیوال وچ، اک میاں چنوں وچ تے اک علاقے دے کسے پنڈ وچ بدل بدل کے۔ ایہہ دیوان ہر سال لگدے تے تن تاناں تک لگدے۔ ہر دیوان دا پر بندھ بڑا شاندار ہوندا سی۔ تے شاندار ہی لنگر چلدے سن۔ اوس سمیں دے مشہور راگی، ڈاھڈی کتھہ کار، پر چارک ایہناں دیواناں تے پہنچدے سن۔ ڈاھڈی اوس سمیں سبھ توں مشہور دوسن۔ اک کشن سنگھ کڑ توڑ تے بھائی سوہن سنگھ گھکے والی۔ پچھوں آکے سن 1940ء دے لاگے چاگے گیانی سنگھ سیٹل چک نمبر 82 وچ ہوئے دیوان تے آئے۔ اوہناں دی بڑی تعریف ہوئی۔ شاید ایس توں پچھوں وی اوہ ساڈے علاقے دے دیواناں تے پہنچدے رہے پر میں فوج وچ چلا گیا ساں۔ ایس سمیں دے دیواناں بارے مینوں واقفیت نہیں۔ کتھا کہن والیاں وچوں سنت سنگت سنگھ جی کیلے والے خانیوال دیوان تے ہر سال درشن دیندے سن۔ اک سال خانیوال والیاں چیف خالصہ دیوان نوں بنیتی کر کے بھائی جودھ سنگھ جی نوں وی سدیا۔ پر چارکاں وچ پرپسل گنگا سنگھ دا نام سبھ توں اُتے آوندا ہے۔ آپ ساڈے دیوان

تے عام آوندے ہوئدے سن۔ اک سال گیانی لال سنگھ جی وی آئے۔ آپ اودوں اچے ان داڑھیے سن پر بولدے او سے نرے نال سن جس نال اج بولدے سن۔ میں اودوں خالصہ سکول خانیوال وچ طالب علم ساں۔ اودوں کون سوچ سکد اسی کہ ایسے نوجوان نے کدے ایڈی وڈی پوزیشن تے پہنچنا ہے اتے ایسے اثر و رسوخ والا عالم بننا ہے۔ اتے مینوں کیہ پتہ سی کہ ایسے نوجوان پر چارک دی اگوائی پٹھ میں ”شبد جوڑ کوش“ تیار کرنا ہے۔

ساڈیاں دیواناں تے پہنچن والے راگیاں وچ بھائی چاند (حضوری ربابی) دا نام پر مکھ ہے۔ آپ کئی وار ساڈے دیواناں تے آئے۔ پنٹھ دے ہیر و بھائی ہیرا سنگھ، راگی دے بھراتا بھائی سمن سنگھ جی راگی لگ بھگ ہر سال آوندے رہے۔ ایہناں دیواناں سمیں اک رات توک کوی دربار وی ہوندا سی۔ اتھے پہنچن والے کویاں وچ بابو فیروز دین شرف، ودھاتا سنگھ تیر سبھ توں ودھ ہر د عزیز سن۔ ہر نام سنگھ کہوٹا، خوشنود (مسلمان کوی سن پورا نام یاد نہیں آرہیا) وی تقریبین ہر سال آوندے رہے۔ اک دو واری گیانی گور مکھ سنگھ مسافر وی آئے۔ کجھ چر مگروں لائل پور ول دے نوجوان کوی وی آؤن لگ پئے۔ ایہناں وچ سن نند لال نور پوری، تیجا سنگھ صابر، عاصی تے کجھ ہور جیہناں دے نام اج یاد نہیں آرہے۔ ساڈے اپنے علاقے داساکھ والا کوی صرف کرتار سنگھ شمشیر سی۔ شمشیر سنگھ جی کوتا وی سکھ لائی وچ میرے استاد سن۔ آپ دا پنڈ چک نمبر 79 سی۔ کجھ چر پچھوں ساڈے علاقے دے کویاں وچ سردار سادھو سنگھ ہمدرد وی شامل ہو گئے۔

کدے کدے ایہناں دیواناں دے موقعے پنٹھ دے مشہور لیڈر وی خانیوال یاں میاں چنوں پہنچدے سن۔ بابا کھڑک سنگھ جی جیل وچوں رہا

ہو چکے سن تے پنتھ دے بے تاج بادشاہ دے نام نال مشہور سن۔ ایہنیں  
دیں اوہناں نوں خانیوال دیوان تے پہن لئی بنتی کیتی گئی جو آپ نے منظور  
کر لئی۔ دیواناں دے اشتہار سارے پنڈاں وچ اپڑائے جاندے سن۔ بابا  
جی دی آمدن کے سارا علاقہ خانیوال پہنچ گیا۔ ساڈے پنڈے چک 78 دا  
سانجھا جتھا پنڈوں شبد پڑھا نکلیا۔ پنڈ دے چراگے تک شبد پڑھدے  
گئے۔ پنڈوں پیدل و ہیرا پا کے خانیوال پہنچے۔ میری عمر اودوں دس توں  
باراں سال دے درمیان سی۔ دیوان توں پہلے دن نگر کیرتن سی۔ ساڈا جتھہ  
اوس وچ شامل ہويا۔ اگلے دن بابا کھڑک سنگھ جی نوں جلوس وچ ریلوے  
اسٹیشن توں گوردوارے لیاؤتا سی۔ ایس میل بھر دے پنڈے وچ سڑک  
دے دوہیں پاسیں کھلون لئی تھاں نہیں سی ملدا۔ جلوس تاں کیہ خود بابا جی لئی  
راہ بناؤنا اوکھا ہو گیا سی۔ جنی رونق میں ایس دیوان تے دیکھی اپنی اپنے  
علاقے دے ہور کسے دیوان تے نہیں ہوئی ہونی۔ ایس توں کوئی دس سال  
پچھوں سن 1935ء یاں 36 وچ اک دیوان تے ماسٹر تارا سنگھ جی آئے۔  
اودوں تک ماسٹر جی پنتھ دے واحد لیڈر وجوں مشہور ہو چکے سن۔ اوہناں  
دے درشناں لئی وی بڑے لوک پہنچے۔ اوہناں دا لیکچر سنن لئی سارا خانیوال  
اُلٹ کے آ گیا۔ ایہہ اوہ سماں سی جدوں پوٹیکل ماحول وں پھونک بندا  
جا رہیا سی۔ ایس لئی ہندو تے مسلمان وی ماسٹر جی دا لیکچر سنن آئے۔  
ماسٹر جی اوہ لہجے وچ بولے جس وچ اوہ عام بولدے ہوندے سن۔ سکھ  
قوم دے دھڑلے دار لیڈر دے روپ وچ۔

میلے مشاہدے ساڈے علاقے وچ کوئی نہیں سن لگدے۔ میلیاں دے  
چھپے کوئی اتہاس ہوندا ہے۔ ایہہ کسے مشہور شخصیت، کسے خاص اہمیت والے واقعے

دی یاد وچ لگدے ہن۔ جس جنگل وچ اسیں جا بیٹھے ساں اوتھے دا اتہاس کیہ ہونا سی یاں اوتھوں دا کسے سادھو سنت۔ پیر، فقیر، بادشاہ وغیرہ نال کیویں سبندھ جوڑیا جاسکد اسی؟ جیون کجھ خشک جیہا رہندا سی۔ سارا سال بس گھر دے کم کا جاگ وچ رُجھے رہنا۔ ساڈے جان توں کوئی دس سال پچھوں لوکاں نے میلہ لاؤن دا اک بہانہ لہہ لیا۔ ساڈے پنڈ توں کوئی چار میل دور جاٹگیاں دے پنڈ ”بلوچاں والا“ وچ اک تھاں کجھ قبریں ٹہی وچ دیاں مل گئیاں۔ جدوں اسیں دیکھن گئے اتھے دبائے مردیاں دیاں کھوپریاں تنکیاں کیتیاں ہوئیاں سن۔ شاید چار قبریں سن بالکل نال نال جویں اکو سمیں دفنائے گئے ہون۔ ایہناں نال کئی قسم دیاں کہانیاں تے کرامتاں جوڑ لئیاں گئیاں تے اتھے ہر سال میلہ لگنا شروع ہو گیا۔ ایس میلے وچ کافی رونق ہوندی رہی۔ ایس توں علاوہ میاں چنوں دا دسہرہ وی منڈے کھنڈے بڑی شوق نال دیکھن جاندے سن۔ ساڈیاں پنڈاں توں میاں چنوں تقریباً 24 میل دور سی۔ پیدل جانا آونا پھیر وی میلہ دیکھن دا بہت چاء ہوندا سی۔

پنڈاں وچ دل پر چاؤے دے کوئی سادھن (ذریعے) نہیں سن۔ ریڈیو اے اودوں تک پنڈاں وچ تاں کیہ شہراں وچ وی نہیں سی پہنچیا۔ پہلے کجھ سالوں تک پنڈ وچ کوئی اخبار نہیں سی آوندا۔ کجھ پتہ نہیں سی لگدا کہ دنیا وچ کیہ ہو رہیا ہے۔ نہ ہی اودوں تک لوکاں نوں خبراں سنن دا بہت شوق ہی سی۔ ملکی لیڈراں نال تاں پنڈاں دے لوکاں نوں کوئی دلچسپی ہی نہیں سی۔ سکھاں نوں اپنے مذہبی پروگراماں بارے جاٹکاری حاصل کرن دی تانگھ ضرور رہندی سی پر حال ایہہ سی کہ سردار تیجا سنگھ سمندری جیل وچ سرگ واس ہوئے تاں ساڈے پنڈ والیاں نوں کوئی دس دن پچھوں پتہ لگا۔

جیون دے اجیہے رکھے پن دے باوجود لوک خوش سن۔ من پر چاوے لئی  
 ہور شغل لہہ لیندے سن۔ پھیر وی لوکاں نوں میلیاں، دیواناں، دیوالی، وسا کھی  
 ورگے تیوہاراں دی بڑی اڈیک رہندی سی۔ جدوں پنڈ وچ کوئی ویاہ ہونا ہووے  
 لوک کئی مہینے پہلاں توں ہی دن گن دے رہندے سن۔ انج چلدا رہیا جیون  
 ساڈے علاقے دے پنڈاں وچ۔ جیہڑے چک شہراں دے نیڑے سن اوہناں دا  
 ساڈے نالوں چوکھا فرق سی۔ مہینے دو مہینے پچھوں شہر وچ اک چکر مار لینا ہی میلہ  
 دیکھن ورگا ہو جاندا سی۔





## گنجی باروچ ساڈا علاقہ

ساڈے علاقے دا کوئی خاص نام نہیں سی۔ سرکاری کاغذاں مطابق ساڈے پنڈتھانہ میاں چنوں وچ آوندے سن۔ پرتھانہ میاں چنوں بڑی دُور دُور تک پسریا ہو یا سی۔ اسیں قصبہ میاں چنوں توں کوئی 24 میل دُور پیندے ساں۔ مقامی بول چال وچ ساڈے لاگے چاگے دے پنڈاں نوں علاقہ ”متھا بنگلہ“ کر کے جانیا جاندا سی۔ سکھاں دے پنڈا اتھے کل ملا کے اٹھ سن۔ ساڈا پنڈ چک نمبر 79 تے نال دا چک 78 دوویں اکو پلٹن دے فوجیاں دے پنڈ سن۔ اج ایس پلٹن دا نمبر ہے ”تھرڈ سکھ“ (سکھ رجمنٹ دی تیجی بٹالین) ایس دا پرانا نام سی 45 ”ریٹرز سکھنز“ چک 78 الف (78 اے) ادھا سکھاں دا تے ادھا ماجھے۔ دوا بے وچوں آئے مسلماناں دا سی۔ 78 ب (78 بی) وچ صرف اک گھر سکھاں دا سی باقی سارے کسرا گوت مسلمان جانگلی سن۔ چک 80، 82 تے 83 تنوں سکھاں دے پنڈ سن۔ ایہناں تناں وچ ہی کجھ گھر فوجیاں دے تے کجھ آبادکاراں دے سن۔ چک نمبر 81 دے دو حصے سن۔ مُول چک 81 آبادکار سکھاں دا سی۔ ایس توں علاقہ تقریباً 16 مربع اکورا او پینڈی ول دے سکھ دے سن۔ ایہہ سردار آپ اتھے نہیں سی رہندا اوسدا کوئی کارندہ رہندا سی تے یاں اتھے سردار دے راہکاں دے مکان سن۔ ایہناں سکھاں دیاں پنڈاں توں کوئی پنج چھ میل دور چک 76 ب (76 بی) وچ اکلا سکھاں دا گھر سی۔ جس دے اتھے 16 مربع سن۔ مالک دا نام سی سردار بوڑ سنگھ۔ ایہناں سکھاں دیاں چکاں وچوں 78 تے 83 چک پورے

مالوے دے سن۔ باقی ساریاں پنڈاں وچ مانجھے، مالوے دی سانجھی وسوں سی۔  
وچ کجھ گھر دو آ بے دے وی سن۔

چک 78 تے 79 دے فوجیاں نوں عام فوجیاں نالوں ڈیوڑھا رقبہ ملیا  
ہویا سی۔ پہلی وڈی لڑائی وچ شامل ہوئے فوجیاں نوں یاں لڑائی توں کجھ چر  
پہلاں پرسنسا (قابل تعریف) جوگ سروس کر کے ریٹائر ہوئے پنشنراں نوں  
انگریز سرکار نے گنجی بار وچ مربعے دتے سن۔ جواناں (سپاہی توں حولد ارتک)  
نوں اک مربع تے سرداراں (جمعدار، صوبیدار، صوبیدار میجر) نوں دو مربعے پر  
ساڈیاں دونہہ پنڈاں دے فوجیاں نوں یعنی 45 چک دے جواناں نوں ڈیڑھ  
مربع تے سرداراں نوں تن مربعے دتے سن۔ ایس دا کارن دسدیاں دو وکھ وکھ  
راواں دتیاں جان دیاں سن۔ کجھ فوجی کہندے ہوندے سن کہ 45 سکھ نے کوتل  
مارے دے مورچے وچ بڑی بہادری نال جاناں مار کے مورچہ فتح کر لیا سی۔  
ایس لئی سانوں ڈیوڑھا رقبہ ملیا ہے۔ کجھ ہور لوک کہندے سن کہ ساڈا علاقہ شہر  
توں، ریلوے سٹیشن توں بہت دُور سی، زمین وی کجھ ہولی سی ایس لئی سرکار نے  
ساڈی حق رسی کرن لئی زمین ڈیوڑھی کر دتی۔ جے دو جی رائے ٹھیک ہووے  
تاں نال دیاں ساریاں پنڈاں دے فوجیاں دا رقبہ ڈیوڑھا ہونا چاہیدا سی۔ پر  
ڈیوڑھی زمین صرف 45 چک دے فوجیاں نوں ملی سی ایس لئی پہلی رائے ٹھیک  
جاپدی ہے۔

ایہناں سکھ پنڈاں دے چو پھیرے جانگی مسلماناں دے پنڈ سن۔  
ساڈیاں پنڈاں توں بست اٹھ میل دور چڑھدے پانی ول مطلب لاہور والے  
پاسے پھیر سکھاں دے پنڈ شروع ہوندے سن تے نہر لور باری دو آب دے مڈھ  
تک یعنی گنجی بار دی حد تک سکھاں دی آبادی لگاتار ملدی سی۔ وچ وچ جانگلیاں

دے اتے ماجھے، مالوے، دو آ بے توں آئے مسلماناں دے پنڈ وی سن۔ علاقہ  
 میاں چنوں تے علاقہ تلنبہ وچ کجھ چک پٹھاناں دے وی سن۔ جیہناں نوں فوجی  
 نوکری دے عوض مربعے ملے ہوئے سن۔ دو تن چک فوجی ڈوگریاں دے سن تے  
 دو چار عیسائیاں دے۔ ایہہ صورت حال تحصیل خانیوال دی سی جس وچ ساڈا پنڈ  
 آوندا سی۔ میجر گورکھ سنگھ توں ملی جانکاری دے مطابق گنجی بار دے شروع وچ  
 رینالہ خورد، ہڑپہ دے لاگے چاگے سکھاں دی آبادی ساریاں توں ودھیرے  
 سی۔ ایسے علاقے وچ کئی وڈے وڈے رئیس وی سن جیہڑے اک یاں  
 اک توں ودھیرے پنڈاں دے مالک سن۔ ساڈے لاگے سبھ توں وڈا رئیس سی  
 خان صاحب فرید خان۔ پرانا خانیوال ایسے خان صاحب دی ملکیت سی تے گنجی  
 بار وچ وی ایس دے کجھ نویں آباد کیتے پنڈ سن۔ ساڈے پنڈاں توں ریلوے  
 اسٹیشن کچے کھوہ توں جاندیاں راہ وچ اک ہور مسلمان رئیس دا پنڈ آوندا سی۔ جس  
 دا نام ”جہانگیر آباد“ سی پر مالکاں دی گوت وٹو سی۔ ایس وجہ توں ایہہ ”وٹو والا  
 چک“ کر کے ہی مشہور سی۔ ایہہ اصل وچ ساہیوال نسل دیاں گائیاں دا فارم سی۔  
 ایس نسل دیاں گائیاں پالن تے خالص ددھ شہراں تک پہچاؤن لئی گنجی بار وچ  
 ایسے کئی فارم سن۔ گائیاں دی اک مقررہ گنتی رکھنی پیندی سی۔ شاید دو ہزار۔  
 ہناں دی پرورش لئی تقریباً اک سو مربعیاں دا پنڈ وٹو ہوراں نوں ملیا ہو یا سی  
 گائیاں تے مربعیاں دی گنتی بارے میری جانکاری وچ کجھ فرق وی ہو سکدا  
 ہے (وٹو صاحب بڑے مہمان نواز سن۔ ہر راہی نوں کھانا دتا جانداسی۔ ہندواں،  
 لہاں لئی کھانا اک ہندو دوکاندار تیار کرداسی۔ رات رہن والیاں نوں منجا، بسترا  
 تے ددھ دا گلاس وی دتا جانداسی۔ خان صاحب فرید خان تے وٹو صاحب دوویں  
 بڑے ہر دل عزیز رئیس سن۔ سکھاں وچ ایہناں دا بڑا آدمان سی۔

سرکڈھ سنگھ رئیس تحصیل خانیوال وچ صرف دو ہی سن۔ میجر ٹھا کر سنگھ  
 تے سردار اُجل سنگھ۔ میجر ٹھا کر سنگھ خاندانی رئیس سن۔ اوہناں دے دادا، پڑدادا  
 مہاراجا رنجیت سنگھ دی فوج وچ افسر سن۔ میجر صاحب دوجی عالمی جنگ  
 سمیں وائسرائے دی ایگزیکٹو کونسل دے ممبر سن۔ انگریزاں دے سمیں سرکاری  
 حلقیاں وچ آپ دا بڑا اثر رسوخ سی۔ اوہناں دی زمین کئی تھائیں سی۔ خانیوال  
 دے لاگے وی اوہناں دے کجھ مربے سن۔ خانیوال وچ اوہناں دی عالی شان  
 کوٹھی سی۔ گنجی بار، سندھ وغیرہ وچ اوہناں دی 80 مربے زمین سی۔ ایدھر آکے  
 اوہناں نوں صرف چار مربے ملے۔ سرکاری افسراں نال آپ دا میل ملاپ ہون  
 کر کے کماں کاراں والے لوک آپ کول عام آوندے رہندے سن۔ لوڑ ونداں  
 دی مدد کر کے آپ نوں بڑی خوشی ہوندی سی۔ آپ علاقے وچ بڑے ہر دل عزیز  
 سن۔

سردار اُجل سنگھ ضلع سرگودھا ول دے اک رئیس خاندان وچوں سن۔  
 میاں چنوں وچ آپ دے اک یاں دو کپاہ دے کارخانے سن۔ میاں چنوں توں  
 ملتان ول جاندیاں پہلا ریلوے اسٹیشن ”کوٹ سبحان سنگھ“ شاید آپ دے پتاجی  
 دے نام تے سی۔ پہلاں ایس اسٹیشن دا نام ”تلنبہ روڈ“ سی کیونکہ ایٹھوں قصبہ  
 تلنبہ نوں سدھی کچی سڑک جاندی سی۔ اسٹیشن دے نال ہی کوٹ سبحان سنگھ ناں دا  
 چھوٹا جیہا پنڈ سی جو سردار اُجل سنگھ دی ملکیت سی۔ ان ونڈے پنجاب دے سکھ  
 حلقیاں وچ سردار اُجل سنگھ دا چنگا مقام سی۔ آزادی توں پچھوں وی آپ دا  
 پنجاب دی سیاست وچ چنگا تھاں رہیا۔ آپ کجھ چر پنجاب دے تے پچھوں تامل  
 ناڈو دے گورنر رہے۔ آپ زیادہ لاہور رہندے سن۔ ایس لئی ضلع ملتان دے  
 سکھاں یاں ہور لوکاں وچ آپ کوئی خاص مقام نہ بنا سکے۔

علاقہ متھا بنگلہ دی ساری آبادی وچوں میں صرف اک ذگر جوگ ہستی دا نام لے سکدا ہاں۔ ایہہ سن میجر جنرل روند سنگھ گریوال۔ آپ چک نمبر 78 دے وسنیک لیفٹیننٹ نرن سنگھ دے سپرن۔ کنگ جارج سکول جہلم توں تعلیم حاصل کرن مگروں آپ نوں دوجی عالمی جنگ توں کجھ چر پہلاں کمیشن مل گیا سی۔ ایس عالمی جنگ وچ آپ نوں بہادری لئی ملٹری کراس ملیا۔ دیش دی آزادی توں پچھوں آپ چین نال لڑائی سمیں لداخ وچ بریگیڈ دی کمانڈ کر رہے سن۔ جے میری یادداشت ٹھیک ہے تاں شاید ایس لڑائی دوران آپ نوں ”مہادیر چکر“ ملیا سی۔ افسوس کہ ساڈے علاقے دا ایہہ ہونہار وسنیک چھیتی ہی ساتھوں وچھڑ گیا۔ لداخ توں واپس آوندیاں ہوائی جہاز اک پہاڑی تے ڈگ پیا۔ ایسے حادثے وچ جنرل گریوال دی موت ہو گئی۔ آپ بڑے ٹھنڈے سبھا دے زمان افسرن۔ جدوں پنڈ چھٹی آوندے تیر چادر بنھ کے پورا جٹاں والا پہراوا بنالیندے تے کھیتی دے کم وچ ہتھ وٹاوندے۔ لڑائی توں پہلاں میں اوہناں نوں خود کھیتاں وچ رُوڑی پاوندے ویکھیا۔ اوس سمیں آپ کیپٹن سن۔ فوجی افسردی حیثیت وچ آپ بڑے کامیاب تے ہر دلعزیز سن۔ علاقہ متھا بنگلہ دا ایہہ اکلا سپوت ہے جس تے سارا علاقہ مان کر سکدا ہے۔

ساڈے اپنے پنڈ وچ سبھ توں ودھ سنیر فوجی افسر صوبیدار میجر مستان سنگھ سی۔ جو سبھ توں پچھوں 1935 وچ ریٹائر ہو کے آئے۔ صوبیدار چارن، پنڈ دے لمبردار بشن سنگھ سن۔ ایہناں توں علاوہ صوبیدار دھرم سنگھ تے صوبیدار دھرتا سنگھ پنڈ وچ رہندے سن۔ صوبیدار لہنا سنگھ اتھے آ کے نہیں وسے۔ سردار ملوک سنگھ دے پتا صوبیدار لہنا سنگھ تے لمبردار تارا سنگھ دے پتا صوبیدار بندھان سنگھ کوتل مارے دے مورچے وچ مارے گئے سن۔ اتھے تن جمعدارن، وزیر سنگھ، نرن سنگھ

تے سنتو کھ سنگھ۔ باقی مربعے پٹھلے رینک والیاں دے سن۔

ساڈا پنڈ ایس علاقے وچ سبھ توں وڈا تے مرکزی تھاں تے واقع سی۔ پنڈ وچ کجھ چنگے سمجھدار آدمی وی سن۔ ایہناں نے کوشش کر کے پنڈ وچ لوئر مڈل (چھیویں جماعت تک دا) سکول کھلوا یا۔ ڈاک خانہ وی کھلوا لیا تے سرکاری ڈسپنسری وی کھلوا لئی۔ وسوں کافی ہو جان توں بعد پنڈ وچ کئی دوکاناں کھل گئیاں۔ جیہناں وچوں اک کافی چنگی دوکان سی۔ اُجڑن توں صرف اک سال پہلاں اساں کوشش کر کے سکول نوں لوئر مڈل توں مڈل بنا لیا۔ لڑکیاں دے سکول دی منظوری وی لے لئی پر ایہہ سکول کھلن توں پہلاں ہی اسیں پنڈ چھڈ آئے۔ جے میں اپنے پنڈ دی کوئی تھوڑی بہت سیوا کیتی ہے تاں اوہ ایہوسی کہ سکول نوں مڈل بناؤن وچ میں کافی جتن کیتے۔ پنڈ دیاں دو پارٹیاں بن گئیاں سن۔ نہ پنڈ والے اکٹھے ہو کے بہندے سن نہ کوئی سانجھا کم ہوندا سی۔ میں مارچ 1946 وچ سماٹرا توں چھٹی آیا تاں دوہاں پارٹیاں نوں مل کے بنیتی کیتی کہ گھٹو گھٹ تسیں سکول دا کم کٹھے ہو کے کر لو۔ اوہناں میری بنیتی من لئی اساں سکھاں دے پنڈاں دی میننگ سدھی تے چندہ اکٹھا کر کے اک سانجھی کمیٹی دے ذمے ایہہ کم لایا۔ اسیں ملتان گئے۔ ڈپٹی کمشنر کول گئے۔ بڑا رکھا بولیا ”سکھاں دی آبادی ایس ضلعے وچ صرف چار فیصدی ہے اساں چھ سکول مڈل بناؤن ہن۔ دو پہلاں ہی سکھ لے گئے ہن۔ اک ہور تہانوں کیوں دے دیواں؟“ اسیں نراس ہو کے نکلے تاں دو جے ڈی۔ سی کول جان دی صلاح بنائی۔ ایہہ مسلمان افسر سانوں بڑے تپاک نال تے خوش ہو کے ملیا۔ بولیا! ”آؤ سردارو۔ قربان جائیے تہاڈی قوم دے۔ اسیں مسلماناں نوں آوازاں مار کے سکول دیندے ہاں کوئی لین لئی تیار نہیں۔ تسیں پلیوں خرچ کر کے سکول منگ رہے او“

## کار، ویہار، فصل واڑی

باروساؤن والیاں نوں پہلے تن چار سال جتھے ہور کئی قسم دیاں کٹھنایاں جھلایاں پیاں اوتھے نال ہی کھیتاں وچ وی کرڑی محنت کرنی پئی۔ جدوں تک کھوہ لگا، دوکاناں کھل گھیاں، پنڈ وچ کاریگر آگئے اودوں تک کھیتی داکم وی کافی سکھالا ہو گیا۔ لوکاں نے دن رات محنت کر کے مربعیاں وچوں رکھ، درخت، جھاڑیاں وڈھ کے واپی والی زمین صاف کر لئی۔ بھوں پدھری کر لئی، کھال کڈھ لئے، وٹاں پالیاں، ودھیرے بٹے وی کراہ لئے صرف تھوڑے جیسے بہت وڈے بٹے ہی بچے یاں کجھ اجیہاں ٹبیاں پچیاں جیہناں نوں آپ رکھیا گیا سی تاں جوہور تن چار سال پیلیاں وچ نویں مٹی پائی جاسکے۔ زمینداراں داکم کافی ہولا ہو گیا سی۔ اوہناں نوں آرام کرن لئی کافی ٹائم مل جاندا سی۔ باردے سکھ زمینداراں دا عام پروگرام کجھ ایس طرح دا ہوندا سی۔ سویرے امرت ویلے ہل جو ناتے ٹکی چڑھدی تک ادھا جوترالا لینا۔ اپنے نوں پنڈوں چھاہ ویلا پہنچ جانا۔ ہور ادھا گھنٹہ لا کے ہل چھڈنے۔ جیہناں ٹبراں وچ ہالیاں توں علاوہ کوئی ہور بندہ وی ہوندا سی اوہ اپنے چر وچ پٹھے وڈھ لیندا سی تے جے کوانا نیڑے ہووے تاں اوتھے سٹ کے پٹھے کتر وی لیندا۔ جے کوانا دور ہوندا ہووے تاں ہل چھڈن پچھوں پٹھے گڈے تے رکھ کے لے جاندا۔ ڈنگراں نوں پٹھے پا کے، نہا دھو کے پرشادے چھکدے تے پھیر دوپہرے آرام کردے۔

آرام کرن توں مطلب ایہہ نہیں سی کہ پے کے سوں رہندے یاں منجے

تے اُسل وٹے بندھے رہندے۔ سگوں منڈے کھنڈے جوان تے ادھکھڑ عمر  
 دے لوک دکھ دکھ ٹولیاں وچ وناں بیٹھ بہہ کے تاش یاں چوڑ دیاں بازیاں  
 لاوندے یاں قصے پڑھدے۔ کرتار سنگھ کلاس والے دے قصے اوہنیں دنیں بڑے  
 مشہور سن۔ ایہہ بڑے جوش نال پڑھے تے سنے جانڈے سن۔ روپ بسنت، راجہ  
 رسالو، پورن بھگت قصیاں نوں پڑھن سنن والے وی بہت سن۔ مانجھے والیاں وچ  
 وارث دی ہیر تے ملوئیاں وچ، ”ہیر بھگوان سنگھ“ کافی ہر دلعزیز قصے سن، وارث  
 شاہ دا عام اچارن وارے شاہ سی۔

ایہناں وناں بیٹھ ہی دوپہر ویلے نکلیاں نکلیاں منڈیاں دے گھول کرائے  
 جانڈے۔ وڈیاں دے وینی پھرن دے، بھار چکن دے مقابلے ہوندے۔ کئی وار  
 اتھے مورکھتا دے مقابلے وی ہوندے۔ مئی جون دی دوپہرے دھے کھلون دا  
 مقابلہ۔ ایہناں مقابلیاں وچ کدے کوئی ہار یا جتیا نہیں سی۔ اٹکھ دا سوال سی، کون  
 میدان چھڈ کے نئے۔ سارے ڈٹے رہندے۔ جدوں تک کوئی سیانا آدمی آکے  
 بانہوں پھڑ کے چھاویں نہ بٹھا دندا۔ کدے کسے نوں ہیٹ سٹروک یاں کوئی ہور  
 روگ نہیں سی ہویا۔ گنجی بار دیاں کنڈیاں مجھاں دا دُدھ، لسی پین والیاں تے  
 مکھن، دہی کھان والیاں نوں روگ کیہہ کہہ سکدا سی۔

لوڈھا ویلا ہوندیاں ہی سارے آپو اپنے کماں تے لگ جانڈے۔  
 منڈے کھنڈے مال ڈنگر چارن لے جانڈے۔ وڈیاں لئی ہور کئی کم ہوندے سن۔  
 کھیتاں وچ وناں پاؤنیاں، رُکھ، درخت چھاگنے، کھال کھالنے وغیرہ۔

جانگلیاں نے واہی کرنی ساتھوں ہی سکھی سی۔ ساڈے نال رہندیاں وی  
 اوہ سکھاں جنی پیداوار نہ لے سکے۔ اوہناں نوں تڑکے اٹھن دی عادت ہی نہیں  
 سی۔ ساڈے ہالیاں نالوں کوئی گھنٹہ بھر بعد سٹے اٹھدے تے اٹھ کے حقے دے



سوٹے مارن لگ پیندے۔ جس ویلے سکھاں دا ”چھاہ ویلا“ جاندا ہوندا سی۔ اودوں جانگلیاں دیاں ہنڈھالیاں کھتیاں نوں تر دیاں سن۔ اسیں 26 سال بار وچ رہ کے اوہناں دتاں دے سٹینڈرڈ مطابق محل اُساں کے تے ہر طرح دیاں نعمتاں نال بھرے ہوئے گھر چھڈ کے آئے۔ ساڈے نالوں تن تن گنی زمین والے جانگلی جدوں اسیں گئے اودوں وی جھگیاں وچ سن تے جدوں اسیں مڑے تاں اودوں وی جھگیاں وچ یاں جھگیاں ورگے کچے کوٹھیاں وچ رہندے سن۔ جیہناں دے اندر کچھ مٹی دیاں بھانڈیاں یاں میلیاں تھندیاں جلیاں توں علاوہ ہور کچھ نہیں سی۔ ایڈھروں ماجھے، مالوے، دوآبے وچوں گئے مسلمان کھیتی دے دھندے وچ سکھاں وانگوں ہی ماہر تے محنتی سن پر حقے داروگ اوہناں نوں وی سی۔ ایہہ بیماری پاکستانی مسلماناں وچ آج وی اونی ہی ہے۔ شاید پہلاں نالوں وی زیادہ۔ سن 1971ء دی لڑائی پچھوں پنجابی یونیورسٹی نے ساڈے تئاں جنیاں دی ٹیم بھیجی۔ تحصیل شکر گڑھ دے اوس کھیت وچ جیہڑا اوس سمیں بھارتی فوجاں دے قبضے وچ سی۔ میرے دو بے ساتھی سن ڈاکٹر پرکاش سنگھ جموں تے ڈاکٹر ایس۔ ایس جوشی۔ اساں ایہہ جانچ کرنی سی کہ پاکستانی پنڈاں دی ترقی دا سٹینڈرڈ کیہ ہے۔ حقے دے سبندھ وچ اساں جو کچھ دیکھیا اوہ ساڈے لئی حیران کن سی۔ کنیاں گھراں وچ دے وچالے فرش وچ ٹوئے کڈھے ہوئے سن۔ جو سواہ نال بھرے ہوئے سن۔ ایہہ رات نوں حقہ پین والیاں دے کھنگھار سٹن لئی سن۔

سارے پنجاب وچ تے خاص کر کے گنجی بار وچ سبھ توں اوکھا کم سی کنک دی واڈھی تے گاہی۔ واڈھی اپریل دے اخیر توں مئی دے پہلے ادھ تک چلدی سی۔ ایس سمیں گرمی سخر تے بچ جاندی سی۔ پکی ہوئی کنک نوں سمیں سر

وڈھنا بڑا ضروری سی نہیں تاں سٹے جھڑ جان دے سن۔ کوئی وی زمیندار اپنی ساری کنک اپنے آپ نہیں وڈھ سکدا نال لاوے لاڈنے پیندے سن لاویاں دی دیہاڑی دی اجرت کنک دی اک بھری ہوندی سی۔ لوڈھے ویلے وڈھی ہوئی کنک مکڑیاں دیاں بھریاں بدھیاں جان دیاں تے پھیر چک کے کھلو اڑے تے لیا لیاں جان دیاں۔ جیہڑے کھلے وچوں بھریاں چکیاں جان دیاں اوس وچ سٹے چن والیاں وڈ جان دیاں تے نال ہی پالی اپنے ڈنگر اوس وڈھ وچ ہک دیندے۔ کنک دا تازا بھتھا پسو بڑے سواد نال کھاندے۔ کنک وڈھن والے دوپہرے گھٹو گھٹ دوواری شکر دا شربت پیندے۔

کدے کدے لاوے وی بڑے اوکھے ملدے سن۔ جے کسے زمیندار دی کنک اکٹھی تیار ہو جاوے تاں منگ پاؤنی پیندی سی۔ واڈھیاں نوں منگ تے جان دا بڑا شوق ہوندا سی۔ بھاویں اوہناں نوں کنک دی بھری نہیں سی ملدی پر اوہناں دی سیوانجج وانگ ہوندی سی۔ منگ تے آون والے سورج چڑھن توں پہلاں ہی ٹک لا دیندے سن۔ چھیتی ہی اوہناں نوں چھاہ ویلا مل جاندا۔ پراونٹھے، شکر گھیوتے لسی۔ دوپہر دی روٹی نال کھیر، کڑاہ ملدا۔ دوپہرے دوواری شکر دا شربت۔ جے کم مکاوندیاں تکالاں پے جان تاں رات دی روٹی جس لئی بکرا جھنکایا جاندا سی۔ کھیت والے نوں بھاویں منگ لاویاں نالوں مہنگی پیندی سی پر فصل سمیں سرسانجھی جان دی سی۔ کئی واری ہلاں دی منگ وی پاؤنی پیندی سی۔ پر ہلاں دی منگ نہ ایڈی وڈی ہوندی سی تے نہ ہی ایہہ سارا دن دا کم ہوندا سی۔ دوپہر ہون توں پہلاں ہی کم مکا لیا جاندا سی۔

کنک دی گہائی وی وڈی جوکھوں دا کم سی۔ جیٹھ ہاڑ دیاں ڈھپاں۔ اوہ وی ملتان دے علاقے دیاں۔ دوپہرے پھلے واہونے اک کٹھن تپسیا سی۔ میں

وی دو سال پھلے دا ہے۔ او دوں میری عمر چوداں پندراں سال سی۔ ایہہ میری عمر دا  
 سبھ توں کرڑا تے سریر نوں سنتاپ دین والا کم سی۔ پھلیاں والے پڑدے نیڑے  
 کھال وگدا ہوندا سی۔ میں گھنٹے، ڈیڑھ گھنٹے پچھوں سنے کپڑیں کھال وچ ٹپیاں مار  
 لیندا سی۔ گلے کپڑیاں نال ہی پھلا ہکن آ لگدا۔ پندراں ویہہ منٹاں وچ لیڑے  
 بالکل سک جاندے۔ پھلے واہون والیاں دی خوراک دا خاص دھیان رکھیا جاندا  
 سی۔ شکر دا شربت، تاں ڈھکیاں نوں وی پیاونا پیندا سی۔ بندیاں دی روٹی نال  
 شکر گھیو، سویر ویلے لسی دے چھنے نال مکھن۔ رات نوں رجواں دُدھ۔ ایہہ خوراک  
 سی کھاندے پیندے گھراں دی۔ غریب لوک کجھ گھٹ خوراک نال وی گزارا کر  
 لیندے سی۔ ساڈے گوانڈھی جانگی ساڈے جنی گرمی نہیں سن مناوندے۔ اوہناں  
 نوں اساں کدے کدائیں ننگے پنڈے پھلے واہندیاں وی دیکھیا۔ نال ہی کدے  
 کدایں اوہ دوپہرے پھلے چھڈ کے آرام وی کرن لگے جاندے سن۔ کوئی سکھ  
 دوپہرے پھلے نہیں سی چھڈدا۔ دوپہرے کڑکدی ڈھپ وچ کنک دا ناڑ چھتی  
 بھردا سی۔

گاہون توں پچھوں چھیتی توں چھیتی اڈاؤن تے دانے سانہن دی  
 کوشش کیتی جاندی سی۔ کیونکہ ہنیریاں دا خطرہ رہندا سی۔ کئی وار کھلوڑیاں تے  
 لکیاں بھریاں اڈ جاندیاں۔ دھڑاں یاں بنے ہوئے بوہل اڈ جاندے۔ ساریاں  
 زمینداراں نوں کنک دی فصل چھیتی توں چھیتی سنبھالن دا فکر ہوندا سی۔

گنجی بار دی دوجی وڈی فصل کپاہ سی جس نوں آج کل اسیں زما  
 کہندے ہاں۔ ساڈے علاقے وچ ایس دا ودھیرے مشہور نام ”امریکن کپاہ“  
 سی۔ نرمے دا بی امریکہ وچوں آیا منیا جاندا سی۔ جیہڑی کپاہ ساڈے وڈیرے  
 کنیاں صدیاں توں بیجدے آرہے سن اوسدا ناں باراں وچ ”دیسی کپاہ“ سی۔

دیسی کپاہ دا بوٹا نرے نالوں کافی لما ہوندا سی۔ پر ایس دا جھاڑ گھٹ سی تے ایس دا ریشہ وی نرے دے ریشے نالوں کافی گھٹیا ہوندا سی۔ دیسی کپاہ لوکی صرف کتن تتبن جوگی ہی بیجدے سن۔ ساؤنی دی مکھ فصل نرما ہی سی۔ جدوں نرما کھڑا تاں چن لئی چونیاں دی بڑی منگ رہندی سی۔ ساڈے مالوے دو آ بے وچوں کئی ٹبر صرف کپاہ چن لئی ہی صرف دو مہنیاں لئی بار جانداں سن۔ نرماں دے کھیتاں وچ ثیاراں ضد ضد کے کپاہ چندیاں۔ ہا سے محول کردیاں، طعنے مہنے مار دیاں واہو دا ہی جھولیاں بھری جان دیاں سن۔ گنجی بار دے جیون دے ایسے نظارے کدی نہیں بھلائے جاسکدے۔ سورج چھین توں کجھ پہلاں چونیاں اپنی چٹی کپاہ سراں تے چک کے کھیت دے مالک دے گھر لے جان دیاں۔ اوتھے ہر چونی دی چنی ہوئی کپاہ دیاں ڈھیریاں پائیاں جان دیاں۔ شاید ست ڈھیریاں ہون دیاں سن (گھٹ ودھ وی ہو سکدیاں نیں) چونی ایہناں ڈھیریاں وچوں اپنی مرضی دی اک ڈھیری چک لیندی۔

چٹی ہوئی کپاہ لوک بہتا چر گھراں وچ نہیں سن رکھ سکدے۔ وپاری گھراں توں کپاہ تلالیندے سن جو چار چار من دے بوریاں وچ بھر کے اوٹھاں تے لدی جان دی۔ دو بورے اک اوٹھ اُتے کسے تکرے اوٹھ اُتے تن بورے وی لد لئے جانداں سن۔ ایہہ کپاہ منڈیاں وچ جان دی سی۔ منڈی والے ہر شہر وچ کپاہ دے کارخانے سن جیہناں وچ کپاہ ویلی جان دی سی۔ ویلی ہوئی کپاہ دیاں گنڈھاں انگلینڈ بھیجیاں جان دیاں سن۔ ساڈے کول پچھوں وڑیویں ہی رہ جانداں سن۔

دالاں وچ مانہہ سرعام بیجے جانداں سن۔ ہر ہر پچن دار وادج نہیں سی۔ مانہہ دیاں دو قسماں ہون دیاں سن۔ کالے تے ہرے۔ ایڈھر آکے کالے مانہہ

اساں کدے ویکھے ہی نہیں۔ سبزیاں وچ کدو، تونے، الاں، توریاں، بھنڈیاں،  
 ٹینڈے عام ہوندے سن۔ کدو عام طور تے کما دے بنے بیج دتے جاندے سن۔  
 یاں پھیر ایہناں دیاں ویلاں رکھاں تے چڑھ جاندیاں سن۔ توریاں وی رکھاں  
 تے چڑھ جاندیاں سن۔ ٹینڈے تے بھنڈیاں دے بی کپاہ وچ ہی سٹ دتے  
 جاندے سن۔ گونگلو بہت ہوندے سن پر ایہناں دی سبزی لوک گھٹ ہی بناوندے  
 سن۔ ایہہ صرف ڈنگراں نوں پائے جاندے سن۔ شاید اج یقین کرنا اوکھا  
 ہووے۔ پر گنجی بار وچ اٹھ اٹھ، دس دس سیر دے گونگلو وی ہو جاندے سن۔

چار چار، پنج پنج سیر دے گونگلو تاں عام ہوندے سن۔ سرہوں، لوسن،  
 برسیم، چرہی، گوارا، موٹھ، پٹھیاں دیاں فصلاں سن۔ موٹھ کئی وار اپنے پھس  
 جاندے سن کہ وڈھ دیاں کدے کدے اٹھ کے کھچنے پیندے سن۔ اک وار  
 ساڈے اپنے موٹھ کتر دیاں وچ دوسپ دے بچے کترے گئے۔ ایہہ موٹھاں وچ  
 انج لگے ہوئے سن کہ وڈھ دیاں دے ہی نہ۔ کما داذ کر میں اگے کراں گا۔

کیمیائی کھاداں تے نویں بی اجے او دوں نہیں سن آئے۔ گوہے دی  
 روڑی یاں ٹپیاں دی مٹی کھاداں داکم دیندی سی۔ کنک تے کما دیاں اک دو  
 نویاں قسماں ضرور نکلیاں سن پر ایہناں نال کوئی بہتا فرق نہیں سی پیا۔



## دُ دھ، گھیو، لسی دی سبھیاتا

کچھ سماں پہلاں جدوں میں ”لاہور بک شاپ لدھیانہ“ دے مالک جیون سنگھ نال گل کیتی کہ میں گنجی بار بارے کتاب لکھنا چاہوندا ہاں۔ تاں سردار جیون سنگھ جھٹ بول اٹھے ”بار بارے لکھدیاں اک گل ضرور لکھیں کہ باراں دی راتل دُ دھ، لسی، گھیو دی تہذیب سی“ سردار صاحب دا ایہہ بیان بالکل ٹھیک سی۔ گنجی بار دے وسیکاں لئی دُ دھ، لسی، گھیوانج سن جویں روٹی، پانی، ہوا۔ گنجی بار وچ دُ دھ، گھیو لئی مجھاں ہی رکھیاں جاندیاں سن۔ گائیاں عام طور تے وچھے لین لئی پالدے ساں۔ بار دیاں مجھاں تھلے دُ دھ ماجھے، دوآبے دیاں مجھاں نالوں بہت زیادہ ہوندا سی۔ ساڈی اپنی اک مجھ 20 سیر توں اُتے دُ دھ دیندی سی۔ ایس دا ناں ”ٹیکا دہی“ سی۔ کیونکہ ایہہ اک ”ٹیکا دہی“ نام دی برہمنی توں خریدی سی۔ پندراں، سولاں سیر دُ دھ دین والیاں مجھاں عام سن۔ ڈنگراں دی سیوا بڑی رتجھ نال کیتی جاندی سی۔ پٹھے کھلے بیجے جاندے سن۔ چرانداں وی کھلیاں سن۔ کھل، وڑیویں ول بڑے ستے سن۔ کھل، وڑیویں کھان والیاں مجھاں دے دُ دھ وچوں گھیو وی رنج کے نکلد اسی۔ ایس سلسلے وچ میں اک قصہ سناؤنا چاہوندا ہاں۔ ساڈے گواہنڈی پنڈ چک 80 وچ اک ویاہ سی۔ ایس میل وچ گئے ہوئے ساں تے ویاہ والے گھر دے گوانڈھ گوردت دے گھر بیٹھے ساں۔ ڈنگراں ویلے کھریاں توں ہٹا کے بدھے ہوئے سن تے ساڈیاں منجیاں لاگدی اک گھری وچ وڑیویں انج پئے سن جویں پٹھیاں دے کرڑے ڈنٹھل پئے ہوندے سن۔ ساڈے

وچوں اک جنے نے گھردی مالکن بی بی توں پچھیا کہ ”اینے ان موہے وڑیویں  
کیوں پاوندے ہو“۔ اوس بی بی نے اتر دتا ”انج مجھ دے دڈھ وچوں گھیو بڑا نکلا  
ہے۔ ایس لئی میں لیہنوں رجویں وڑیویں پاوندی ہاں“۔ ایہہ کچھن تے کہ ”کنا  
کو مکھن نکلا ہے“ اوہ اندروں تن سیر پانی پاؤن والا ٹیوڈ (کھڑے کنڈھیاں والا  
پتیلا) چک لیائی جو مکھن نال بھریا ہو یا سی۔ ایہہ اوس مجھ دا اک دن دا مکھن سی۔  
اساں پچھیا ”کنا گھیو نکلا اے اینے مکھن وچوں؟“ بی بی نے اتر دتا ”ایس  
وچوں سیر بھر گھیو روز دا ہوا ای جاندا“ ایہہ وی اوس بی بی نے دسیا ”ایس مجھ دا دڈھ  
تاں پورے دا پورا میں کاڑھ لینی آں۔ دوئی مجھ دا دڈھ ٹیر پی لیندا اے“۔

خیر اینا گھیو، مکھن دین والی ہور کوئی مجھ تاں میں نہیں دیکھی پر ہور مجھاں  
وی ہوسکدیاں ہن۔ ساری بار دیاں مجھاں تاں میں دیکھیاں نہیں۔ بار وچ لسی،  
دڈھ، گھیو رلدے سن۔ ہر زمیندار دے گھر وچ دو تن مجھاں ضرور ہوندیاں سن۔  
رہے بچے گھراں وچ اٹھ اٹھ، دس دس لورییاں ہوندیاں سن۔ میرے اپنے  
سوہریاں دیاں کھریاں اتے اٹھ نو مجھاں ہمیشاں ہوندیاں سن تے نوکراں نوں  
روز چھنا چھنا دڈھ ملدا سی۔ بہتیاں گھراں وچ نوکراں نوں دڈھ دین دی پکی  
پر ت سی۔ کیاں دے گھراں وچ وی مجھاں ہوندیاں سن۔ مینوں اپنے پنڈا کوئی  
کمی اجیہا یاد نہیں آ رہیا جس دے گھر لوریا نہ ہووے۔ دڈھ وچکن دا کوئی رواج  
نہیں سی۔ ساڈے اپنے علاقے وچ تاں دڈھ وچکن دا کوئی ذریعہ ای نہیں سی۔ پر  
شہراں دے نیڑے وسدے زمیندار وی دڈھ وچکن نوں اک کلنگ سمجھدے سن۔  
سارا دڈھ گھر وچ کھپاونا پیندا سی۔ ایانیاں نوں لادے لاکے دڈھ پیایا جاندا سی۔  
گھیو کھان دے کئی طریقے سن۔ سویرے پروٹھے پکاوونے تے نال کھلا مکھن رکھنا۔  
دال، سبزی وچ اینا گھیو پاؤنا جناج دے نوجوان ہضم ہی نہیں کر سکن گے۔ دڈھ

وچ گھیو پا کے پینا وغیرہ۔ ساڈے ماں جی سیال وچ تھالی بھر کے گھیو جمادیندے  
سن تے برنی وانگ اوسدیاں نکلیاں کٹ کے مینوں کھان نوں دتیاں جاندیاں  
سن۔ ایہہ نکلیاں بے سواد ہوندیاں سن۔ پر ساڈیاں مناں وچ ایہہ پکا وشواش سی کہ  
گھیو کھا کے اسیں چنگے جوان بناں گے۔ ساڈے سریر وچ اتھاہ طاقت آ جاوے  
گی۔ ایس لئی خوشی خوشی گھیو کھاندے ساں۔

گھیو و پچیا وی جاسکدا سی تے لوڑ وند لوک و پچدے وی سن پر بھاء سی  
اک روپے سیر۔ ایہو نرخ 1942-43 تک رہیا۔ میں 1937 توں 41 تک  
خالصہ کالج امرتسر دا طالب علم رہیا۔ اسیں باراں والے منڈے چھٹیاں پچھوں  
کالج جان لگے۔ 18 سیر گھیو دا ٹین لے کے جاندے ہوندے ساں تے جے پورا  
گھیو گھروں نہ نکلے تاں اک روپے سیر مل لینا پیندا سی۔ ایہہ اٹھاراں سیر گھیو  
تقریبن تاں ساڈھے تنا مہنیاں وچ مکاؤنا پیندا سی نہیں تاں اگلیاں چھٹیاں توں  
دو چار دن پہلاں آئڈھی گوانڈھی اپنا گھیو مکا کے تہاڈی لٹ مار کر لیندے سن۔

کالج وچ گھیو کھان دے تے پھلکے چھکن دے مقابلے ہوندے رہندے  
سن۔ ”پھلکا کمپیشن“ تاں سال وچ اک واری پہلاں تاریخ مقرر کر کے ہوندا  
سی۔ مقابلے وچ حصہ لین والے جوان پوری تیاری کر کے میدان وچ کد دے  
سن۔ ساڈے کالج پچھن توں اک سال پہلاں اک شیر مرد نے 62 پھلکے کھا کے  
پچھلا ریکارڈ توڑ دتا۔ پچھوں اوس نوں کرسی توں اٹھن وچ کجھ دقت ہوئی۔ منجی  
تے لما پینا تاں تقریبن ناممکن سی۔ بھاویں اوہ کہی جانداسی کہ میرا کجھ نہیں وگڑیا پر  
مخالفاں نے رولا پا کے کالج دے ڈاکٹرنوں سدلیا۔ ڈاکٹر نے دو تن دوائیاں دے  
کے چنگے بھلے تندرست نوں بیمار کر دتا۔ اودوں تک کالج دے پرنسپل بھائی  
جو دھ سنگھ بن چکے سن۔ سارا قصہ اوہناں تک پہنچیا۔ اوہناں نے پکا حکم کر دتا کہ



آئندہ پھلکا گھیو کمپنیشن نہیں ہوئے گا۔ انج پھلکا کمپنیشن تاں سدالئی بند ہو گیا پر گھیو کمپنیشن لک چھپ کے ہوندا رہیا۔

ایہہ کمپنیشن تاں خالصہ کالج امرتسر دے سن۔ گنجی بار وچ وی گھیو کمپنیشن ہوندے رہندے سن۔ پنڈاں وچ وی، شہراں وچ وی۔ میں صرف اوس کمپنیشن دا ذکر کراں گا جس وچ میں خود شامل ساں۔ ایہہ کمپنیشن خالصہ ہائی سکول خانیوال وچ ہویا۔ میں تے حاجی محمد قیصر 1934ء وچ خالصہ سکول وچ داخل ہوئے۔ اساں دوہاں نے چک نمبر 79 وچوں چھیویں تے پھیر ٹڈل سکول تلمبہ توں اٹھویں جماعت پاس کیتی سی۔ میں ہی حاجی نوں خالصہ سکول لے آیا سی۔ اک دن حاجی دی سدھنے علاقے دے سکھ منڈیاں نال شرط لگ گئی۔ ادھ سیر گھیو پین دی۔ گھیو اک سکھ منڈے اجیت نے دتا۔ شرط ایہہ سی کہ جے حاجی چونہہ ڈیکاں وچ گھیو پی جاوے تاں اجیت دا گھیو گیا۔ جے اوہ گھیو نہ پی سکے تاں حاجی اجیت نوں سیر گھیو دے پیے دیوے۔ حاجی چھ فٹ لماتے بھرویں جہے والا جوان سی اوہ آسانی نال ادھ سیر گھیو پی گیا۔ کسے منڈے نے مخول نال کہہ دتا ”ہن گیانی گھیو پیوگا (میںوں خالصہ سکول وچ گیانی دا خطاب ملیا سی جو کالج وچ وی قائم رہیا) کولوں اک منڈے سوہن نے کہہ دتا ”جے گیانی پا گھیو پی جاوے تاں گھیو میں دیندا ہاں“۔ میرا قد صرف پنج فٹ چھ انچ تے سریرا کہرا سی۔ پر ایہہ غلط فہمی سی کہ پا گھیو کیہڑی چیز ہے۔ نالے پھیر شریک دی وزگار سن کے میدانوں بھجناں تاں مرداں دا کم نہیں۔ اساں چیلنج قبول کر لیا تاں میں پا گھیو پی گیا۔ حاجی سیاناسی۔ اوہ اوس ویلے باہر گراؤنڈ وچ چلا گیا تے اودوں تک دوڑ دار رہیا جدوں تک گھیو ہضم نہ ہويا۔ میں جُنڈی وچ بیٹھا اپنی جت دیاں شیخیاں ماردا رہیا۔ اگلے دن حاجی تاں چنگا بھلا سی تے میںوں جلاب لگ گئے۔

ایہہ سبھ کجھ دن توں میرا مطلب ایہہ سی کہ گنجی بار وچ گھیو دی اینی بہتات سی جو ایس نوں مورکھاں وانگ کھانا وی اک گن سمجھیا جاندا سی۔ ایہہ ٹھیک سی کہ سارے گھر اکو جیبے نہیں سن۔ کجھ ٹبر ماڑے وی سن۔ جیہناں نوں مساں روٹی چوپڑن جوگا مکھن ہی ملدا سی۔ گھیو بناؤن جوگا کجھ بچدا ہی نہیں سی۔ پر ایہو جیبے گھر بہت تھوڑے سن۔

پھل پھل ساڈے علاقے وچ کوئی نہیں سی ہوندا۔ ہاں ایہتوں دے خربوزے بڑے مشہور سن۔ خانیوال دے خربوزے اتر وچ لاہور تک، تے دکن وچ سندھ دے اتری کھیتراں تک جاندا سی۔ لاہور وچ سٹیشن توں لے کے انارکلی بازار تک چھا بڑیاں والے ”خانیوال دے خربوزے“ دا ہوکا دیندا ہوندا سی۔ ساڈے خربوزے سچ مچ ہی بڑے مٹھے ہوندا سی۔ اک لموتری شکل والا تے چھوٹے آکار دا خربوزہ ہوندا سی۔ جس نوں ایس ”ترنڈی“ کہندے ساں۔ ایہہ خربوزہ میں بار چھڈن پچھوں ایدھر کتے نہیں دیکھیا۔ ایس وی گرمی ہرے رنگ دی تے کجھ کرڑی ہوندا سی۔ پر شہد ورگی ہوندا سی۔ کھجور بلتان دا مشہور پھل ہے۔ پر ساڈے علاقے وچ کھجوراں دا بوٹا کوئی ورلا ہی ملدا سی۔ کھجوراں ایس مثل لے کے ہی کھاندے ساں۔ وناں دیاں پیلو بے شک ان موہیاں سن۔ جنیاں کوئی چاہے توڑ کے کھاوے۔ پر پیلونوں کوئی خاص پھل ای نہیں مینا جاندا۔ کجھ لوکاں نے باغ لائے سن جو زیادہ کامیاب نہ ہوئے۔ صوبیدار بشن سنگھ نے اک کلار قبے وچ پھلاں دا باغ لایا سی۔ ساڈے تایا جی نے چار کنالاں وچ آڑو، نُو، سنگترے، انار وغیرہ لائے سن۔ پر ایہناں وچوں کسے نے وی چنگا پھل نہ دتا۔ ساڈے بار چھڈن سمیں ساڈے باغ وچ صرف اناراں دے دو چار بوٹے کھڑے سن۔

دیس دی ونڈ توں پہلاں سارا پنجاب خانی لُون ہی ورتدا سی۔ اج  
 ایس ایس نوں پاکستانی لُون کہندے ہاں۔ تے ایہہ دس روپے کلو وک رہیا  
 ہے۔ بار وچ ایس ایہہ لُون دو روپے من خرید دے ساں۔ ایس لُون دے دس  
 دس پنڈراں پنڈراں سیر دے ڈلے پشوواں دیاں کھریاں وچ ہمیشاں پئے  
 رہندے سن۔ ڈنگر پٹھے کھاندے نال جدوں دل کرے لُون چٹن لگ پیندے  
 سن۔ ایس نال پشوواں دی بھکھ ودھدی سی تے ہاضمہ ٹھیک رہندا سی۔

باردی کنک دا ذکر کرنا ضروری جا پدا ہے۔ ساڈی کنک دادانہ بہت موٹا  
 ہوندا سی۔ تحصیل بٹالہ دے جس علاقے وچ ایس اودھروں آکے بیٹھے ہاں ایہہ  
 پرانے سمیں توں ہی کنک لئی مشہور رہیا ہے۔ جدوں ایس بار وچوں ایدھر آئے  
 تاں اتھے دی کنک دی روٹی ہی بے سواد جا پے۔ ایس کنک دے دانے باردی  
 کنک نالوں ادھے جا پدے سن۔ ساڈے ماتا جی کہندے سن ”کنک دے ایہو  
 جیہے دانے تاں ایس بار وچ چھٹ کے مین وچوں کڈھ کے سٹ دیندے  
 ہوندے ساں۔ آس ہے گنجی باردی کنک اچے وی پہلاں وانگ ہی موٹے دانے  
 والی ہووے گی۔



## پانی دی تہائی گنجی بار

ساڈے پنڈ والیاں تے علاقے والیاں نے کوشش کر کے پنڈ وچ سرکاری ڈپنٹری وی کھلائی۔ ہن ساڈے علاقے دیاں ودھیرے لوڑاں پوریاں ہو گئیاں۔ سکول، ڈاک خانہ، ڈپنٹری، چنگیاں دوکاناں سبھ کجھ ساڈے پنڈ وچ موجود سی۔ شہرتوں دور ہون کارن تے گنجی بار دے قدرتی ماحول کارن پیش آؤن والیاں اوکڑاں اخیر تائیں قائم رہیاں۔ سبھ توں وڈی اوکڑ پین والے پانی دی سی۔ مٹھویں گھڑے پینج ہر گھر وچ دے جان دے سن۔ پراہہ پانی مساں گھر دیاں لوڑاں جوگا ہی ہوندا سی۔ لیڑے کپڑے تاں کھالاں تے یاں ڈھگی تے جا کے دھوتے جان دے سن۔ پر بچیاں نوں نہاؤن لئی، پوچے دین لئی، بھانڈے دھون لئی پانی چاہیدا سی۔ ہر گھر نوں دن وچ دو تن گھڑے پانی دے آپ کھوہ توں لیاونے پیندے سن۔ پھیر وی پانی دی تھوڑی ہی رہندی سی۔

ریلوے اسٹیشن ”کچا کھوہ“ تے یاں خانہوال توں آوندیاں راہ وچ کپر پیندا سی۔ جس وچ پانی کتے نہیں سی ملدا۔ ایس کپر وچوں دی لنگھدیاں کئی لوک مردے مردے بچے یاں بچائے گئے۔

میرے پتا جی اپنے پچھلے پنڈوں ہو کے آئے اتے ”کچا کھوہ“ تے گڈی توں اترے۔ ایہہ اسٹیشن لاہور ولوں آوندیاں پہلاں آوندا سی۔ جدوں تک خانہوال توں اگے پنڈاں نوں لاری نہ چلی لوک اتھے ہی اتر دے رہے۔ کچا کھوہ توں ساڈا پنڈ کوئی 14 میل دُوری تے راہ وچ چھ (6) میل کپڑی۔ جدوں پتا جی

کتر وچ داخل ہوئے ایہناں نوں کجھ تہہ لگی ہوئی سی پر خیال کیتا کہ میں ڈیڑھ گھنٹے وچ کتر پار کر لینا ہے۔ اینا چرتاں میں پیاس جڑی سکاں گا۔ پرتپدے کتر تے تکھی دھپ نے ایہناں نوں چھیتی ہی نڈھال کردتا۔ جدوں اجے آبادی کوئی دو میل دور سی۔ سریر وچ پیر پٹن دی ہمت نہ رہی تاں راہ وچوں کجھ ہٹویں اک جنڈول نوں ٹر پئے کہ بے مرنا ہی ہے تاں چھاویں تاں مراں۔ قدرت دا کرشمہ جنڈدے کول اک ٹوئے وچ کجھ پانی کھڑا سی۔ اجیہے پانی دی اتھے کوئی اُمید نہیں سی کیتی جاسکدی۔ پانی نتریا ہو یا سی پر وچ پورے سن۔ اسیں باران والے پوریاں والا پانی پین دا دل سکھ گئے ساں۔ پتا جی نے پگ دا پلہ مونہہ اگے رکھیا تے چا پنج بگ پانی دے پیتے۔ سریر وچ کجھ جان آگئی تے ہمت کر کے اگے چک نمبر 80 وچ پج گئے۔ جو ایس پاسے توں آوندیاں پہلا پنڈ سی۔

ایس راہ دا اک ہور قصہ ہے۔ کچھ کھوہ توں آوندیاں راہ وچ دو پٹھاناں دے پنڈ سن۔ ایہناں پنڈاں دے دو پٹھان اک واری ساڈے پنڈ نوں آ رہے سن۔ اوہ وی غلطی نال تہائے کتر وچ وڑ گئے۔ جدوں 80 چک وچ پہنچے تاں اوہ تقریباً ڈگن والے ہو چکے سن۔ پنڈ دے پہلے ہی گھر وچ وڑ کے واج ماری ”سردارو! سانوں پانی پیاؤ۔ اسیں مر چلے بے“ گھر والی نے منجا ڈاہ کے دتاتے آپ ددھ پا کے شکر والا شربت بناؤن لگ پئی۔ پٹھان جتھیرا کہندے رہے ”سردارنی! سانوں چھیتی گھرے دا سادہ پانی دے دے“ پر سردارنی ایس طرح پھوکا پانی دینا پروہنچاری دے اصولاں دے خلاف سمجھدی سی۔ پھیر وی اوہ کافی چھوہلی کر کے پانی بنا کے لے آئی۔ اک پٹھان بہت نڈھال ہو رہیا سی اوہ تن چھنے پانی پی کے چوتھا ہور منگے۔ ایدوں تک گھر دا مالک وی آ گیا سی۔ اوہ کافی سو جھوان بندہ سی۔ اوس نے پٹھان دا ہتھ پھڑ کے آکھیا۔ ”خان! دو پل رک کے

ہور پانی پی لھیں۔ پر خان بے تاب ہو رہیا سی۔ اوس نے سردارنی دے ہتھوں  
 بالٹی وچوں آپ چھنا بھر لیا۔ ہونی سرتے کھڑی ہس رہی سی۔ خان نے اچے ادھا  
 چھنا پانی پیتا ہووے گا کہ پران نکل گئے۔

ساڈے اپنے پنڈ پانی دی تھوڑ کارن اک بھیا نک واقعہ واپریا۔ پنڈ دا  
 سکول کھوہ توں کجھ ہٹواں سی۔ پیچ سویرے پانی دے چار گھڑے سکول لئی دے  
 جاندا سی۔ پر ایہہ چھستی ہی مک جاندا سن۔ بچیاں نوں پانی دی بڑی تنگی سی۔  
 ہیڈ ماسٹر اتم سنگھ نے لوکاں کولوں چندہ اکٹھا کر کے سکول وچ نکا لوایا۔ کوئی دو  
 ڈھائی سال پچھوں نلکے وچ پانی آؤنا بند ہو گیا۔ فلٹر بدلن دی لوڑ سی۔ فلٹر بدلن لئی  
 نال زمین وچوں کھنی چینی سی۔ ماسٹر اتم سنگھ نے منڈیاں نوں لاکے نال دے  
 چوہیرے کھوہی پٹوائی پر غلطی ایہہ کیتی کہ کھوہی زیادہ ڈھونگی لے گئے۔ اک جانگی  
 منڈا ایٹھاں مٹی پٹ رہیا سی کہ کھوہی ڈگ پئی۔ منڈا ایٹھاں دب کے مر گیا۔ پنڈ  
 والیاں دوڑ بھج کر کے ماسٹرنوں کوئی کرڑی سزا ملنوں تاں بچا لیا پر محکمے نے اوس  
 نوں نوکری توں برخاست کر دتا۔

ساڈے علاقے وچ شہر دے پانی دی وی تنگی ہی رہندی سی۔ نہری پانی  
 نال صرف ادھی بھوں ہی نیجی جاسکدی سی۔ ساری گنجی بار وچ ایہو طریقہ چلدا  
 سی۔ ساڈیاں پنڈاں وچ پانی دی ہور وی تھوڑ سی۔ کیونکہ اسیں راجواہے پنڈراں  
 ایل دی ٹیل اُتے آوندے ساں۔ ساڈے چکاں نوں بچیا گھچیا پانی ہی پہنچدا سی۔  
 میاں چنوں دے نیڑے پیندے پنڈاں چک 98, 99, 105, 109 وغیرہ وچ  
 جتی روئی اک داری وچ ہو جاندی سی۔ اوئی ساڈے علاقے وچ نہیں سی ہوندی۔  
 ضلع ملتان وچ اوسطن بارش صرف چار انچ سالانہ ہوندی ہے۔ ایس لئی زمیندار  
 مینہ دی اڈیک گھٹ ہی کردے سن۔

مینہ بھاویں ساڈے علاقے وچ بہت گھٹ پیندا سی پھیر وی ساؤن  
 بھادروں وچ مینہ لئی دعاواں کیتیاں جاندیاں سن۔ جگ کیتے جاندے سن۔ اکھنڈ  
 پاٹھ کیتے جاندے سن۔ پنڈاں دے منڈے کڑیاں اپنے روائتی طریقے نال مینہ  
 دی منگ کردے سن۔ گوہا، رولی کھیڈ کے، گوہا، رولی دانسانہ عام طور تے بڈھے  
 تے بڈھیاں بن دے سن۔ وشواس کیتا جاندا سی کہ بڈھیاں اُتے گوہا سٹن نال  
 مینہ ضرور پیندا ہے۔ پہلے کئی سال پنڈا بزرگ دوکاندار بابا دالا گوہا، رولی دا شکار  
 ہوندا رہیا۔ بابا بھیرا گالیاں کڈھے، ڈنڈے مارن پوے پر منڈھیر پھیر وی بابے  
 اُتے گوہے دے گھول دی بالٹی پا ہی دیندی۔ کجھ سالاں پچھوں اک ہور بڈھا  
 دوکاندار آ گیا۔ ہن بابے دالے دا بھار کجھ ہولا ہو گیا۔ انج وی دلا ہن کافی ضعیف  
 ہو گیا سی۔ اک سال ساؤن لنگھ گیا پر مینہ نہ پیا۔ بابے اُتے گوہا سٹن دا کوئی اثر نہ  
 ہویا۔ اک راتیں ایہہ بزرگ (جس دا نام ہن مینوں یاد نہیں آ رہیا) اپنی دوکان  
 دے ساہنے چوک وچ ستا پیا سی۔ اٹھاں دساں منڈیاں نے بابے دی منجی چکی  
 تے چھٹرنوں دوڑ پئے۔ بابا گالھاں کڈھے، حال دہائی پائے پر کوئی نہ سنے۔  
 منڈیاں بابے دی منجی ڈگھی وچ جارکھی۔ جھتے منجی اُتے بیٹھے بابے دے لک تک  
 پانی آ گیا۔ منجی رکھ کے منڈے دوڑ گئے۔ اگلے دن بابے نے پنچائت کول  
 شکایت کیتی۔ پنچائت والے دو منڈے پھڑ لیاے بابے توں معافی منگن نوں۔  
 منڈیاں نے ہتھ جوڑ کے آکھیا ”باباجی! سانوں معاف کرو“۔ بابے دا پارا منڈیاں  
 نوں ویکھ کے ہور چڑھ گیا تے ہورتا ہو کے گالھاں کڈھن لگا۔ منڈے پھیر  
 بولے ”بابا ہور گالھاں کڈھ لے پر مینہ پوادے“ بابا کجھ نرم ہویا۔ جدوں گالھاں  
 کڈھدا تھک گیا تاں کھج کے بولیا ”ونجھو، دفعہ تھیوو“ منڈے کہن لگے ”بابا۔ دفعہ  
 وددوں تھیواں گے جدوں سانوں معافی دیویں گا“۔ بابا اکیا ہویا بولیا ”سچھا،

معاف کیتا، ہُن جاؤ، کھری کرو، منڈے بول اٹھے ”بابا معاف کیتا اے تاں  
 مونہہ مٹھاتاں کروانہ“۔ اتے بابے نے مٹھ مٹھ ریوڑیاں دے کے منڈیاں توں  
 جان چھڈائی۔ رب دی قدرت اگلی رات چنگا مینہ پے گیا۔

جدوں ساؤن وچ مینہ پے جاندا تاں اوہو ماجھے، مالوے والا رنگ بجھ  
 جاندا۔ کھیراں رچھدیاں، پوڑے پکدے، جرولیاں بن دیاں۔ ایہو جیہے دناں تے  
 گھراں وچ روٹی گھٹ ہی پکدی۔ کھیر، پوڑے ہی رچ کے کھادے جاندے۔  
 باہر وناں اُتے پینگھاں پندیاں۔ سارے پنڈ دیاں کڑیاں اکوتھاں اکٹھیاں  
 ہوندیاں۔ اتھے گیت گاؤن دے مقابلے ہوندے تے جتدیاں ہمیشاں ملویناں۔  
 مالوے دے گیتاں دے ساہنے ساڈے والیاں کول کجھ وی نہیں سی۔ تیاں دے  
 تے ساؤن دیاں پینگھاں دے گیت ملویناں کول بڑے چسکے دار ہوندے سن۔  
 منڈے جھاڑیاں اوہے لگ کے سندے ہوندے سن۔

جس سال ساؤن بھادروں وچ چنگا بھرواں مینہ ورہ جاوے اوس سال  
 نرمیاں نوں لوہڑا آجاندا سی۔ کماذوی ڈھین والے ہو جاندے سن۔ وادھا ایہہ  
 کے میہناں سمیں وی گنجی بار وچ چکڑ نہیں سی ہوندا۔ بھوں ریتلی ہون کر کے پانی  
 چھیتی چیر جانداسی۔ چھرتاں اسیں گنجی بار وچ کدے ویکھیاں، سنیا ہی نہیں سی۔  
 ساتھوں پچھلے علاقے وچ خاص کر ضلع منگمری وچ پانی دی اینی تنگی نہیں  
 سی۔ ساڈے علاقے وچ تاں ہتھ نال گیرن والے نلکے وی اپنے کامیاب نہیں  
 سن کیونکہ پانی بہت ڈونگھاسی۔ پچھلے علاقے وچ نلکے عام سن۔





## لباس، رسم و رواج تے منور بنج دے سادھن

ساڈا علاقہ 1926-27 تک پوری طرحاں آباد ہو گیا سی۔ لوک سکھی  
 وسدے سن جنساں دے بھاء چنگے سن۔ لوکاں دی آمدنی معقول سی۔ سارے فوجی  
 پنشن وی لے رہے سن۔ عام لوکاں دی مالی حالت چنگی سی۔ اج والی فیشن پرستی دا  
 پرچھاواں بالکل نہیں سی پیا۔ مرداں دا عام پہراوا گپ کرتا تے چادر سی۔ صرف  
 پرانے فوجی یاں گورسکھ شرینی وچ آون والے تیز پاجامہ پاوندے سن۔ کم کار  
 ویلے تیز کچھہرا ای ہوندا سی۔ زنانیاں دا لباس سی دوپٹہ، کرتہ تے سلوار۔ پنڈ دیاں  
 نونہاں گھروں باہر جان لکیاں سرتے چادر نلے کے نکلدیاں سن۔ کسے حد تک  
 گھگرے دار وراج وی سی، جو سلوار دے اتوں دی پایا جاندا سی۔ سیال وچ تیویاں  
 پھلکاری لیندیاں سن تے مرد کھیس دی بکل مار لیندے سن۔ چھیتی ہی لوئی دی  
 ورتوں وی شروع ہو گئی سی۔ کھاندے پیندے لوک کوٹ وی پاوندے سن۔ سویٹر  
 دی ورتوں کافی چر پچھوں شروع ہوئی۔

ویاہ، شادیاں سادہ ڈھنگ نال کیتیاں جاندیاں سن۔ ساڈے علاقے  
 وچ لڑکی دے ویاہ تے گھر والے اک روٹی سارے پنڈنوں دیندے سن۔ لڑکے  
 دے ویاہ تے دو روٹیاں۔ روٹی گھر والے اپنی حیثیت مطابق کسے طرحاں دی  
 دے سکدے سن۔ برادری ولوں کوئی بندش نہیں سی۔ عام طور تے اک روٹی کھیر،  
 کڑاہ تے چونہ سبزیاں نال دتی جاندی سی۔ دوجی روٹی چاول، کھنڈ، گھیو، دہی  
 بھلے دی ہوندی سی یاں کوئی اپنی مرضی نال مٹھیائی وی دے سکدا سی۔

سادگی دے باوجود باراں دے لوک سبھی ہی پچھانے جاندے سن۔  
 ایہناں دے کپڑے صرف قیمتی نہیں سن ہوندے۔ پچھلے علاقے دے لوکاں نالوں  
 ودھیرے صاف ستھرے تے پچھے ڈھنگ نال پہنے ہوئے ہوندے سن۔ پنڈوں  
 باہر جان لکیاں باراں والے لوک پگ مایا والی بنھ کے جاندے سن۔ جتھوں تک  
 ہو سکے کپڑے استری کروا کے پاؤندے سن۔ شاید ایہہ ویروے پڑھ کے نویں  
 پیڑھی دے نوجوان کہن گے کہ ایہہ کیہ بکواس ہے۔ اج تاں غریب توں غریب  
 لوکاں دارہن سہن وی ایس توں کتے چنگا ہے۔ میں اپنے عزیزاں نوں دس دیاں  
 کہ اج توں پنجاہ سال پہلاں دے پنڈوں لوکاں نوں تہاڈے اج والے جیون  
 سٹینڈرڈ دا کدے سُننا وی نہیں سی آیا۔ ساڈا پنڈ چک 79 اوس سمیں دے سٹینڈرڈ  
 مطابق رجبے پچھے لوکاں دا پنڈ سی۔ پر ساڈے پنڈ وچ صرف دو (یاں شاید تن)  
 سائیکل سن۔ ساڈے سارے علاقے وچ پینٹ پاؤن والا کوئی نہیں سی۔ ڈسٹرکٹ  
 بورڈ ڈپنٹری دا ڈاکٹر جو چنگی تنخواہ لے رہیا سی اوہ وی پاجامہ ہی پاؤندا سی۔ کالج  
 پڑھدیاں وی میں پاجامہ ہی پاؤندا رہیا۔

باراں والے لوکاں دی گل بات وچ تے بہن کھلون وچ ودھیرے شائستگی  
 سی۔ اوہ عام ورتوں دیہار وچ ودھیرے کھل دے سن۔ کوٹھی وچ دانے ہون تاں  
 دل اپنے آپ وڈا ہو جاندے ہے۔ کیونکہ لوک اپنیاں پچھلیاں انگاں ساکاں نالوں  
 کافی دور چلے گئے سن۔ ایس لئی جدوں پچھلے علاقے وچوں کوئی ملن لئی جاوے تاں  
 سارے ٹبر نوں چاء چڑھ جاندے سی۔ پروہنا چاری کوئی کھیڈ نہیں سی سگوں اک مٹھی  
 احسان مندی سی۔

باراں دا جیون، ستر دا پچھلے علاقے نالوں بڑا فرق سی۔ ایس لئی بہن  
 کاری گر، کمی، گاؤن و جاؤن والے گنجی بار وچ عام آون لگ پئے۔ اوہ لوک وی

آون لگ پئے جیہناں نوں اج اسیں کلاکار یاں سمہیا چارک پروگرام دین والے کہندے ہاں۔ ایس شرنی دے کلاکاراں وچوں سبھ توں پہلاں بجن والا سی نبیا جلسے والا۔ نبیا مالوے وچوں آیا سی تے اپنے کسے واقف دے گھر پہلاں چک 80 وچ بچا۔ اگے والیاں نے سارے پنڈاں نوں سنیہا بھیج دتا کہ پرسوں ساڈے پنڈ جلسہ ہووے گا۔ ساڈے والیاں لئی جلسہ اک نویں چیز سی کیونکہ ساڈے وچ جلسیاں دا رواج نہیں سی۔ انج وی پہلی وار ساڈے علاقے وچ منور بجن والا پروگرام آیا سی۔ لوکی ہم ہما کے پہنچے۔ پنڈوں باہر جلسے لئی پڑ بنایا گیا۔ وچالے کھلا تھاں چھڈ کے چار چوفیرے گڈے دیاں پٹیاں وچھایاں ہوئیاں سن۔ لوک ایہناں اُتے بیٹھدے گئے۔ پھیر لاکڑی کھڑے باہروں آیاں نوں ”جی آیاں“ آکھدے تے مناسب تھاں تے بٹھاوندے سن۔ تھوڑے چر پچھوں پنڈ نیہیے دی پارٹی نکلی۔ دو گھگرے والیاں، اک سارنگی والا، اک ڈھڈ والا تے اک نبیا آپ۔ نبیا ذات دامراٹی سی۔ پراوس دے رنگ روپ، لباس توں مراشیاں والا کوئی نشان نہیں سی نظر آوندا۔ سرتے چٹی دڈھ پگ مایا نال آکڑی ہوئی۔ اہو جیہی چٹی چادر کھڑ کھڑاوندی، ڈھڈ، سارنگی والیاں دا لباس وی سوہنا سی۔ گھگریاں والیاں دے گھگرے چمکدار گوٹے طے نال مڑھے ہوئے۔ اہو جیہی ہی کڑتے تے سرتے ستاریاں والے گوڑھے رنگ دے دوپٹے۔ ایہناں نے گھنڈ کڈھے ہوئے سن۔ ایہناں پہلاں آکے روائتی ڈھنگ نال اکھاڑے نوں نمسکار کیتی۔ پھیر سارے حاضرین نوں ہتھ جوڑ کے ست سری اکال کہی تے اکھاڑے وچ اترے۔ نیہیے نے بڑے تھوڑے جیہے لفظاں وچ اج دے پروگرام دا ویروا دتا تے پروگرام شروع ہويا۔ سارنگی تے گز پھیریا، ڈھڈاں تے دھپے وچے، گھگرے والیاں نے بڑے نخریلے انداز نال نچدیاں اکھاڑے دا گیزا کڈھیا تے پھیر آکے سارنگی

والے دے موہرے کھلو گئیاں۔ ہن ایہناں گھنڈ لاه دتے۔ ایہناں بڑے سچے  
 ڈھنگ نال سروپ ملیا ہو یا سی (جس نوں اج اسیں پاوڈر کہندے ہاں۔ ایس دا  
 ساڈی اپنی زبان دا نام سروپ سی) ایہناں دے چہریاں تے ہتھاں دارنگ بڑا  
 گورا سی۔ پر پیر دسدے سن کے ایہہ اینیاں گوریاں نہیں جنیاں دسدیاں ہن۔  
 نیہے نے موہرے آکے ڈھڈتے دھما ماریا تے بولیا ”شبابا بی سارنگی والیاں کڈھ  
 کیراں سارنگی وچوں سُر جیہڑی جماناں دا دل ٹب دے“ سارنگی دی سُر گونجی نیہے  
 دیاں انگلاں ڈھڈتے نچیاں تے گھگھریاں والیاں نے سجا ہتھ چک کے تے کھے  
 کن تے رکھ کے بھگوان سنگھ دی ہیر دا بکت شروع کیتا۔ ”ککھ کان توڑ کے بنایا  
 تارا نچھنے نے بیٹھ کے تے اُتے خواجے پیرنوں چتار دا“ سچ مچ ہی گاؤں والیاں  
 دی سرلی تان، جماناں دے دل ٹب گئی۔ ایہناں نے پھیرنچ کے اکھاڑے دا  
 گیرا کڈھیا تے مُو سارنگی والے دے نیڑے آکھڑیاں۔ پہلی پنکتی اک وار پھیر  
 دُہرا کے اگلی پنکتی دا الاپ کیتا ”لڈن جھمیل دیاں ناراں نے آواز ماری ڈوہیں گا  
 مسافراں بے خون کیوں گزار دا“ ناجیاں نے پھر نچدیاں اکھاڑے دا گیرا  
 کڈھیا۔ ناچیاں روپیہ ہتھ وچ پھڑ کے ویل الاپ دیاں تے روپیہ سارنگی وچ  
 پادیندیاں۔ نیہے دے کئی سچے اصول سن۔ اوہ روپیہ صرف او سے پنڈ والیاں کولوں  
 لیندا سی جس وچ جلسہ ہو رہیا ہووے۔ باہروں آئے تماشائیاں دے روپے دی  
 ویل سنا کے واپس موڑ دتا جاندا۔ ایوں ہی اک آدمی توں صرف اک وار ہی روپیہ  
 لیندا۔

نیہے دے جلسے نے رنگ بنھ دتا۔ گنجی بار دے جیون وچ اک رنگینی  
 آگئی۔ ایہہ جلسے سکھاں دے تقریباً ہر پنڈ وچ ہوندے۔ منڈے کھنڈے تے  
 جوان بڑا چہ پچھوں تیک نیہے دے سنائے بکت ہوکا لالا کے گاؤندے رہے۔

ساڈے درگی منڈیرنوں چر پچھوں پتہ لگا کہ ناچار کڑیاں نہیں سن منڈے سن۔  
منڈیاں نے گھگرے پائے ہوئے سن۔

نبیا تقریباً ہر سال آوندا رہیا تے ساڈے بار چھڈن توں کجھ سال  
پہلاں تک آوندا رہیا۔

نیے دے جلسے توں کجھ چر پچھوں بازگیر پہنچ گئے۔ ایہناں دے  
ودھیرے کرتب اوہ سن جیہناں نوں اج اسیں جمناسٹک دیاں فلور ایکسرسائز  
کہندے آں۔ ایہناں توں علاوہ اُچی چھال سی جو لکھدار پڑی دے سہارے  
ماری جاندی سی۔ تقریباً دس فٹ اُچی موٹی لکڑ گڈی ہوئی سی جس دے اتلے سرے  
اک پھٹی جڑی ہوئی سی جس دی لمبائی چوڑائی ودھ توں ودھ تن فٹ سی۔ ایس پھٹی  
اتے کھلوکے اک نوجوان منڈے نے پھٹی چھال ماری سی۔

بابا جھناں جلسیاں والیاں، راس دھاریاں، ہور گاؤن و جاؤن والیاں  
توں نفرت کردا سی۔ پرگھول، کھیڈاں، بازگیراں دے کرتب وغیرہ دیکھن دا بڑا  
شوقین سی۔ جدوں کوئی بازگیر منڈا کوئی چنگا کرتب دکھاوندا بابا ڈب وچوں کڈھ  
کے اوس نوں روپیہ دے دیندا۔ جدوں بازی گر منڈا پھٹی نال چھال مارن لئی پھٹی  
تے چڑھیا بابا جوش نال اُٹھ کے کھلو گیا۔ بازگیر منڈے نے دس فٹ اُچی تے  
کوئی تن فٹ لمی چوڑی پھٹی تے کھلوکے تن پٹھیاں چھالاں ماریاں۔ دنیا عش  
عش کر اُٹھی۔ ”شاوا بازگیر، بلے او جونا، جیوندا رہو منڈیا“ دے آوازے ہر  
پاسیوں اُٹھے۔ تاڑیاں مارن دا اونہیں دنیں رواج نہیں سی۔ جدوں منڈا پھٹی توں  
اُتریا بابے جھناں نے اوس نوں چھمی وچ لے لیا تے جنے روپے ڈب وچ سن  
سارے اوس نوں پھڑا دتے۔ بازگیر منڈے نے ہتھ جوڑ کے کہیا ”بابا جی!  
تھاڈے کولوں بہت کجھ مل گیا ہے ہور نہیں لینا“ ڈھول و جاؤن والا بزرگ بازی گر

وی آگیا تے کہا ”سردار جی! تساں بڑا کجھ دتا ہے تہاڈے کولوں ہور لیندیاں  
سانوں آپ نوں شرم آوندی اے“۔ بابے دے مجبور کرن تے دو روپے چھال  
مارن والے منڈے نے رکھے باقی بابے نوں موڑ دتے۔ بازیگراں دیاں دو تن  
پارٹیاں آوندیاں رہیاں۔ پچھوں بازیگراں نے پکے پنڈل لئے تے ہر سال  
بازی پاؤن آوندے رہے۔

راس دھاریے وی چھیتی ہی پہنچ گئے۔ ایہہ مراٹی سن تے صرف  
دھارمک (مذہبی) ٹانگ دکھاوندے سن۔ پورن بھگت، پرہلا د بھگت، راجہ ہریش  
چندر وغیرہ۔ راس رات نوں پائی جائدی سی۔ ناٹ، مریدا پرائی بھارتی روایت  
والی ہوندی سی۔ اہو سوتر دھر، سرسوتی دیوی تے ہور روایتی ریتیاں۔ سری کرشن جی  
دا ہر ٹانگ وچ آونا ضروری سی۔ کانہہ جی دا پارٹ مسلمان مراٹی نہیں سی کر  
سکدا۔ ایس پارٹ لئی اک برہمن منڈا ناں رکھیا ہویا سی۔ کوئی سٹیج نہیں، پردا نہیں  
کوئی اچھا پر بندھ نہیں۔ بس رڑے میدان وچ ڈرامہ کھیڈیا جاندا سی۔ ایہہ وی  
باردے لوکاں لئی بڑا روچک منورنجن (دلچسپ دل بہلاوا) سی۔

ایہناں توں علاوہ کئی ہور کھیڈ تماشے دکھاون والے وی آوندے رہے۔  
بازی گرناں آوندیاں رہیاں جیہڑیاں تنے ہوئے رسے تے چڑھ کے ہتھ وچ  
بانس پھڑکے نچدیاں سن۔ بانس بھار ساواں رکھن دا کم دیندا سی۔ پتلیاں والے  
کدے کدائیں آجاندے۔ رچھاں، باندرراں والے عام پھر دے رہندے سن۔  
ایہوں باروچ منورنجن دے وسیلے۔

ساڈے اپنے علاقے وچ کوئی چنگا بھلوان نہیں سی۔ چک 78 الف دا  
مسلمان نائی سبھ توں وڈا بھلوان نیا جاندا سی۔ اوس دا شاگرد چک 78 دا شام سنگھ  
(جس نوں ملوائی ”شیام“ کہندے سن) چھوٹے جوڑاں وچوں سی۔ ایس دے

مقابلے داسی ساڈے پنڈاں دا بنتا سنگھ (جو پچھوں امرت چھک کے گور چرن سنگھ بنیا) ایہناں دا گھول کئی واری ہويا۔ عام طور تے شام جتدا رہیا۔ اک واری جدوں بنتا جتیا تاں سارے پنڈ نے بڑی خوشی منائی۔ میرے نانکے تحصیل شکر گڑھ وچ سن۔ اوتھوں اک واری میرے مامے دا پت کرنا سنگھ سانوں ملن آیا۔ اوہ چھوٹے جوڑ دے گھلاٹیاں وچوں سی۔ اوس دا مقابلہ شام نال کروایا۔ کرنا شام نوں ڈھا گیا۔ پنڈ والے ساڈے گھر ودھائیاں دین آوندے رہے۔

گنجی بار دے پچھلے حصے وچ کھیڈاں دا شوق کافی زیادہ سی۔ اتھے کئی چنگے بھلوان سن تے چھنجاں عام پیندیاں رہندیاں سن۔ چک نمبر 109/15 اپریل دی رے دی ٹیم بڑی تکرری سی۔ ایہہ دور دور تک رے دے مقابلیاں لئی جان دے ہوندے سن۔ نیڑے دے پنڈ ونجاری (چک 105) دی فٹ بال دی ٹیم کافی چنگی سی۔ تے ایہہ نیڑے دے پٹھاناں دے پنڈاں نال میچ کھیڈ دے رہندے سن۔ ایہناں دو چکاں بارے میں کجھ ہور ویروے اگے دیاں گا۔ ساڈے علاقے دے سالانہ دیواناں بارے میں پچھے ذکر کر آیا ہاں۔ جاٹگیاں دے کھیڈ پنڈ دھودا بارے اگلے حصے وچ لکھاں گا۔

اونیس دین کھیڈاں تے منورجن دے سادھن (دل خوش کرن دے ذریعے) اتھے تک ہی محدود سن۔ گنجی بار وچ ہی نہیں پچھلے علاقے وچ وی ایہو حال سی۔ مانجھ، مالوے وچ میلے کافی لگدے سن تے ایہناں علاقیاں وچ مذہبی تے تاریخی مقام بہت سن۔ جیہناں دی گنجی بار وچ ان ہوندی۔



## ساڈے پنڈ دا چھوکر

گنجی بار بارے لکھدیاں اپنے پنڈ دا کجھ خاص ذکر کرن لئی میں جذباتی طور تے مجبور ہاں۔ جویں کچھے دسیا جا چکا ہے ساڈے دو پنڈ چک 78 تے 79 کو پلٹن دے پینشنر دے سن۔ ایس پلٹن دا پورا ناں سی 45 ریٹیریز سکھز۔ کیونکہ ایس نوں 1856 وچ اک انگریز افسر ریٹرنے کھڑا کیتا سی۔ ایس پلٹن دی اک خاص خصوصیت ایہہ سی کہ ایس دے جواناں دا قد ہندوستانی فوج وچ سبھ توں ودھیرے سی۔ ایس وچ بھرتی ہون والے جوان گھٹ توں گھٹ 5 فٹ 10 انچ لمے ہونے چاہیدے سن۔ قد دی ایہہ حد دوجی عالمی جنگ وچ قائم رہی۔ فیر ایس لڑائی سمیں بھرتی ہون والے جواناں دی گھاٹ کارن قد بارے شرط ڈھلی کر دی گئی۔

اج ایس پلٹن دا نمبر 3 سکھ (برڈ سکھ) ہے۔ ایس توں پہلاں سکھ پلٹناں (فرسٹ سکھ تے سیکنڈ سکھ) انگریزاں نے پنجاب اتے قبضہ کرن توں پہلاں کھڑیاں کیتیاں سن۔ ساڈے پنشنر ایس نوں پنپالی سکھ ہی کہندے ہن تے پرانے فوجی پنڈا سکھ دے کارنامے بڑے مسالے لاکے سناوندے ہوندے سن۔ ایہہ کارنامے سناؤن دا موقعہ ملدا اسی خاص کر کے کماد دی چھیلی سمیں۔ کیونکہ چھیلی کردیاں گل سناؤن نال کم وچ کوئی وگھن نہیں سی پیندا۔ اتے سنن والے کافی ہوندے سن۔ ایس لئی گل سناؤن والا وی بڑے اُتساہ نال وارتا سناوند اسی۔

بار وچ کماد لوکی گھٹ بیجدے سن۔ کیونکہ سارا کماد آپ ہی پیڑنا ہوندا



سی۔ پیڑائی دے کم لئی کافی بندیاں دی لوڑ ہوندی سی تے سماں وی بہت لگدا سی۔ ایس لئی لوک عام طور تے گھر دی لوڑ لئی گڑ، شکر کڈھن جوگا ہی کما د بیج دے سن۔ جس دن کسے دے کما دی چھیلی پیندی چھیلے لوڑ توں ودھیرے پہنچ جان دے سن کیونکہ جنے گنے کوئی پچھ چھل کے دیوے اوہناں نالوں لتھے آگ جھلمن والے دے ہوندے سن۔ آگ پٹھیاں دا کم دیندے سن۔ خاص کر جس دن ساڈے تائے ہوالدار کھر سنگھ دی یاں حولدار سرجن سنگھ دی چھیلی پینی ہووے تاں رونق ہووے وی زیادہ ہوندی سی۔ کیونکہ ایہہ دوویں بڑے گاڑ سن۔ کتھا کہانی سناؤن دا ایہناں دا اپنا ہی سٹائل سی۔ فوج وچ ایہہ گھرے دوست سن تے اک دو بے نوں چاچا کہہ کے مخاطب کر دے سن۔ جو یں اُتے دسیا جا چکا ہے ایہناں دیاں کہانیاں پختالی سکھ دے کارنامیاں نال تعلق رکھدیاں سن۔ جدوں سن 1911 وچ کلکتے دی تھاں دلی راجہ ہانی بنی تاں دلی وچ اک بہت وڈا دربار ہو یا سی۔ جس وچ بادشاہ جارج پنجاواں خود شامل ہو یا سی۔ شاہی پریڈ وچ سکھ پلٹن دی نمائندگی 45 سکھ نے کیتی سی تے ایس دے جواناں دا ڈیل ڈول، ایہناں دی چڑھت تے ایہناں دے حسن دی بہت تعریف ہوئی سی۔ ایہہ کہانی ایس بڑی وارسی سی۔ ایسے موقعے ساڈے پنڈ دے حولدار کیسر سنگھ نے جماسٹک دے کرتب دکھائے تے اوہ ”سرب، اتم جمناسٹ“ چنیا گیا۔ حولدار کیسر سنگھ اپنے سمیں دا منیا ہو یا کھڑاری سی۔ پر افسوس کہ کجھ سرداراں دی بدنیتی کر کے ایہہ وچارا حولدار ای رہیا۔

بھتوں ودھ رومانچک تے دلچسپ سن ایس پلٹن دے رسہ کشی دے مقابلیاں دے قصے اتے کوتل مارو دے مورچے دی کتھا۔ ایس وچ 45 سکھ دی ٹیم پہلی عالمی جنگ توں پہلاں کوئی باراں تیراں سال لگاتار ہندوستانی فوج وچوں جیتو رہی۔ ایس پلٹن نوں رسے وچ اک واری صرف امرتسر دے اک

پنڈ دی ٹیم نے ہرایا۔ اوہ ہاروی حقیقت وچ ہار نہیں سی۔ جے میری یادداشت ٹھیک ہے تاں ایس پنڈ دا نام سی ”ڈھوٹیا“۔ ڈھوٹیا والیاں نے سارے پنجاب نوں کھلا چیلنج دتا ہو یا سی کہ اوہناں نال کوئی وی رسہ کھچ سکدا ہے۔ اودھر 45 سکھ دی وی رسے وچ بڑے شہرت سی۔ جدوں ایہہ پلٹن کسے ہور سٹیشن توں بدل کے ملتان آئی تاں ڈھوٹیا دی ٹیم بناں دسیاں ملتان پہنچ گئی۔ بزرگ دسدے ہوندے سن کہ اوس سمیں رسے دی اصلی ٹیم چھٹی گئی ہوئی سی۔ ساری ٹیم نوں اکٹھیاں چھٹی بھیجا جاندا سی۔ افسراں نے اپنی نمبر 2 ٹیم نوں مقابلے تے کھڑا کر دتا۔ اوہ وی بناں تیاری۔ ڈھوٹیا والے اوہناں نوں کھچ کے لئے گئے۔ ساڈے پنڈ دے پنٹراں دے دن مطابق اوہناں دی سروس دے سمیں وچ پنٹالی سکھاں دی رسے وچ ایہہ اکواک ہار سی۔

رسے دے دو ہور مقابلیاں دے حال وی ساڈا تایا بڑے شوق نال سناوندا ہوندا سی۔ اک مقابلہ سی کہ پنجابی پلٹن نال (جیہناں رجمنٹاں دا نام چکھوں ”پنجاب رجمنٹ“ پیا۔ اوہناں نوں پہلی عالمی جنگ تک ”پنجابی“ کہیا جاندا سی) ایس ”پنجابی“ پلٹن دی ٹیم وچ 6 سکھ جوان سن تے 4 مسلمان۔ سارے بڑے لمے اُچے تے بھارے سریر والے جوان سن۔ پنٹالی سکھ اوہنیں دینیں جھانسی وچ سی۔ پنجابی دے افسرے صوبے دار میجر اپنی ٹیم نوں نال لے کے 45 سکھ دی ٹیم دیکھن آئے۔ پنٹالی سکھ دی ٹیم دے جواناں دا سریر کمایا ہو یا سی۔ ایہناں وچوں کوئی وی بھارے سریر والا نہیں سی۔ ایہناں نوں دیکھ کے پنجابیاں نوں انج جاپیا کہ اوہ پنٹالی دی ٹیم نوں دھو کے سٹیشن تک لے جان گے۔ ایہناں دے صوبیدار میجر (یاں کسے ہور) نے اپنی ٹیم نوں ہلا شیری دیندیاں کہہ دتا ”رسہ نہیں جتنا بتو ویاہ کے لیجانی اے“۔ پنجابی لوک جاندے ہن کہ کڈی وڈی تے کڈا

پھٹ مارن والی گل کہی گئی سی۔ پنٹالی دے صوبیدار میجر نے ٹیم نوں سد کے کہا  
 ”میری داڑھی ہن تہاڈے ہتھ وچ ہے“ ٹیم والے وی ”پنجابیاں“ دے قد کاٹھ  
 نوں دیکھ کے کجھ سہم گئے سن۔ ٹیم دی گھبراہٹ نوں جانچ کے سی۔ او آپ ٹیم نوں  
 ملن آیا۔ انگریزاں دے سمیں سکھ پلٹناں تے افسراں نوں اپنے جواتاں تے بڑا  
 مان ہوندا سی۔ ونگار یا اوہناں نوں ہمیشاں ”خالصہ“ دے نام تے جاندا سی۔  
 سی۔ اوہنے کہا ”خالصہ کیوں گھبراتا ہے۔ کھینچنا توں تم نے صرف چھ خالصوں کو  
 ہے باقی تو صرف گنتی کے جوان ہیں“۔ اوس توں پچھوں جیہڑے کجھ دن مقابلے  
 وچ باقی سن اوہناں وچ جنے پیسے گھیو دے ٹیم کھا سکی کھوائے۔ جنیاں بوریاں  
 باداماں دیاں گھوٹ کے پی سکے پیاںیاں۔ پریکٹس کردیاں ہویاں رکھاں دیاں  
 جڑھاں ہلا دتیاں۔ اخیر مقابلے دا دن آ گیا۔ مقابلہ جھانسی وچ ہی ہوندا سی۔

پنجابیاں نوں اپنی جت دا اینا یقین سی کہ اوہناں نے ریلوے اسٹیشن  
 توں لے کے مقابلے دی تھاں تک دو دو گز دے فاصلے تے اک جوان رانفل  
 دے کے کھڑا کیتا ہو یا سی اودوں تک اے ٹیلیفون صرف ریلوے اسٹیشن اتے ہی  
 ہوندا سی۔ مقصد ایہہ سی کہ جدوں سکھ پلٹن دا اک جوان کھچیا جائے کول کھڑا رانفل  
 والا اک فائر کر دیوے گا۔ اوس نوں سن کے اگلا آدمی فائر کرے گا۔ انت ریلوے  
 اسٹیشن تے بیٹھا افسر اپنی پلٹن والے اسٹیشن نوں دس دیوے گا کہ اساں مخالفان دا  
 اک آدمی کھچ لیا ہے۔

اودھر سکھاں نال اک ہور واقعہ ہو یا۔ ٹیم دا اک بہت اہم ممبر سی رب۔  
 اوس نوں سارے رب ہی کہندے سن۔ مالوے داسی۔ قد کوئی 6 فٹ 10 انچ  
 سی۔ سریر وی باقی ٹیم نالوں بھاراتے طاقت ایس وچ لوہڑے دی سی۔ دونہ  
 ٹیماں دے جواتاں نوں چھڈ کے باقی پلٹن دے اوہ دو دو بندے کھچ لیندا ہوندا



ایس جت دا حال وی ساڈے پینٹرز او سے جوش نال سناوندے ہوندے سن۔ جس نال کوتل مار دے دے مورچے دا حال سناوندے سن۔

ر سے دا دوجا مقابلہ کسے سکھ پلٹن نال سی۔ اج مینوں یاد نہیں کہ ایہہ کیہڑی سکھ پلٹن سی؟ مقابلہ کتھے تے کیہڑے سال ہو یا؟ انج ایہہ سارے واقعات پہلی وڈی لڑائی توں پہلاں دے سن۔ سن 1900ء تے 1914ء دے وچالے دے۔ دوجی پلٹن ایس مقابلے توں اک سال پہلاں 45 سکھ توں کرڑے مقابلے پچھوں ہار کھا گئی سی۔ پر اوہ کچھیاں وٹدے گئے سن تے او دوں ہی ونگار کے گئے سن کہ اگلے سال تہانوں ملاں گے۔ افسوس کہ ایس مقابلے دے پورے ویروے اج سانوں یاد نہیں۔ تیا کھر سنگھ ایس مقابلے دا حال وی بڑی تفصیل نال سناؤندا ہوندا سی۔ جو کجھ مینوں یاد ہے اوہ لکھ رہیا ہاں۔

دوویں ٹیماں پوری تیاری وچ سن۔ جتھے پنٹالی والیاں نوں اپنیاں اینکاں جتاں دامن سی او تھے دوجی ٹیم نوں اپنی کچھلی ہار چھاتی وچ کجے کل وانگ رڑک رہی سی۔ مقابلہ شروع ہو یا۔ رسہ انج تن گیا جو یں کسے رُکھ نال بدھا ہووے۔ نہ رسی چپا اودھر کھسکے نہ ایدھر۔ پنٹالی والے ہنڈھے ہوئے تجربہ کار سن۔ اوہناں نے پہلاں دوجی ٹیم نوں زور لاؤن دتا۔ جدوں اوہناں نے اپنی تان لاکے انت دم مارن لئی رسہ بدھا تاں پنٹالی والیاں نے اپنی پوری طاقت نال بھکے مارنے شروع کیتے۔ پر دوجی ٹیم چٹان وانگ جمی رہی۔ رسے دے وچالے بدھا رومال وچکار لی لیک دے اُتے ہی ہل رہیا سی۔ تقریبن پندرہاں منٹاں تک دوویں ٹیماں واری واری بھکے مار دیاں رہیاں پر رسہ کسے پاسے نہ ہلیا۔ ہن ہر اک ٹیم دی کوشش ایہو سی کہ دوجی ٹیم نوں دموں کڈھیا جاوے۔ تہ منٹ بیت گئے۔ پچھنی منٹ لنگھ گئے۔ ایس سمیں وچ دوہاں پاسیاں دے جوان ٹڈھال ہو

چلے سن۔ ہن اوہناں وچ بھکا مارن دی ہمت وی نہیں سی رہی۔ بس رسہ کھچ کے کھڑے سن۔ ریفری نے واری واری دوہاں پلٹناں دے کمانڈراں نوں کیہا کہ رسہ ساواں چھڈ دتا جاوے۔ پر ہر کمانڈر کہے کہ دو جی ٹیم ہارمن جاوے تاں اسیں رسہ چھڈ دیندے ہاں۔ آخر اوتھے حاضر ڈاکٹر کیپٹن نے دوہاں کرنٹاں نوں کیہا کہ ہن رسہ جواناں دی صحت لئی خطرناک ہے۔ مقابلہ ختم کیتا جاوے۔ پختالی دا کمانڈر آکھے ”من جواناں نوں اپنے ٹین گھیوتے اینیاں بوریاں باداماں دیاں کھوا دتیاں ہن۔ دو جی ٹیم ہارمن دی ہے تاں رسہ چھڈ دیو“۔ دو جا کرنٹل کہے ”من جواناں نوں سونے چاندی دے ورق کھوا کے پلٹن دا فنڈ ختم کر دتا ہے۔ پختالی سکھ ہارمن دی ہے تاں رسہ چھڈ دیو“۔ آخر ڈاکٹر گھوڑا دوڑا کے سدھا جنرل صاحب دی کوشی پچا۔ جنرل نے حکم دتا ”رسہ فورن چھڈ دیو“ ڈاکٹر نے آکے جنرل دے حکم مطابق رسہ چھڈایا۔ مقابلہ تقریباً 35 منٹ چلیا۔ دوہاں پاسیاں دے کجھ جوان رسہ چھڈ دیاں ہی ڈگ پئے۔ اوہناں نوں سہارا دے کے باہر لیا ندا گیا۔ دوہاں تتاں جواناں دیاں مٹھاں رسے نالوں نہ کھلن۔ مالش کر کے کھولیاں کھیاں۔

رسے دے ایہناں دونہہ مقابلیاں دا اتے کجھ ہور مقابلیاں دا حال اسماں کما دیاں چھلیاں وچ تے ہور گپ شپ والیاں مٹھلاں وچ کئی وار سُنیا۔ بڑا مان سی ساڈے پنشنراں نوں اپنی رسے دی ٹیم اُتے۔ حولداری کیسر سنگھ ورگے کھڈاریاں اُتے۔



## ساڈے پنڈاں دا پچھو کڑ۔ مورچہ کوتل مارا

کوتل مارے دا مورچہ پنڈالی سکھ دے 1939 تک دے اتہاس دا سبھ توں وڈا کارنامہ سی۔ ساڈے پنڈ دے سارے پنشنر ایس مورچے دا حال بڑے شوق نال سناوندے ہوندے سن۔ ساڈا اتایا حولدار کھر سنگھ ایس مورچے توں کجھ چ پہلاں ہی زخمی ہو کے یاں بیمار ہو کے ہسپتال داخل سی۔ اوہ ایس مورچے وچ شامل نہیں سی۔ جو گلاں میں اپنے پنڈ دے بزرگاں توں سنیاں اوہ ساریاں ایس مورچے دیاں کتاباں وچ لکھے حالات نال پوری طرحاں میل نہیں کھاندیاں۔ ایس دے کئی کارن ہن۔ اک ایہہ کہ کتاباں لکھن والے صرف موٹے موٹے حالات لکھدے ہن۔ جو اوہناں نوں سرکاری طور تے ملے ہون۔ پر میدان جنگ وچ لڑن والا سپاہی اوہ کجھ بیان کردا ہے جو اوس دے سر بیتیاں ہووے۔ ایہہ وی ٹھیک ہے کہ عام سپاہی نوں پورے ویریاں دی اونی جانکاری نہیں ہوندی جنی اُتے بیٹھے سنئیر افسراں نوں ہوندی ہے تے ایہناں افسراں دیاں لکھتاں ہی اتہاس لکھن والیاں دا بنیادی ذریعہ ہوندیاں نیں۔ ایس دے اُلٹ کجھ اجیہاں گلاں وی ہوندیاں ہن جو نہ سنئیر افسراں دے ریکارڈ وچ درج کیتیاں جا سکیاں ہن۔ اتے نہ ہی اجیہے گھنیر نکلتے کوئی تاریخ لکھن والا ہی قلم بند کرن دی جرات کردا ہے۔ مثال لئی بزرگ پنشنر دس دے ہوندے سن کہ کوتل مارے دے مورچے وچ پہلاں اک برٹش بریگیڈ بار بار حملہ کر کے اپنا کافی نقصان کروا چکی سی۔ پر مورچہ نہ توڑ سکیا (کئی پنشنر دسدے سن کے دو برٹش بریگیڈ مار کھا چکے

سن)۔ ترکی و ایہہ مورچہ توڑنا ضروری سی۔ انت اک بریگیڈیر نے جو پرانا سکھ رجمنٹ دا افسر سی والیٹر کیتا کہ ”مینوں اک سکھ بریگیڈ دے دیو میں مورچہ توڑ دیاں گا“ اوس سمیں بریگیڈ وچ صرف اک بٹالین سی۔ اک ہور بٹالین اوسے ویلے بدل کے لیاندی گئی۔ تہی سکھ بٹالین کتے نیڑے نہ مل سکی۔ اوس دی تھاں بریگیڈ کمانڈر دی منظوری نال اک گورکھا بٹالین لیاندی گئی۔ جیہڑیاں دو کتاباں وچ میں کوتل مارے دا حال پڑھیا ہے (اوہناں دے نام ہن مینوں یاد نہیں) اوہناں وچ ایہہ ویروے درج نہیں۔ او دوں سارے فوجی افسر وی انگریز سن تے اتہاس کاروی انگریز۔ کوئی انگریز ایہہ کیوں منے گا کہ جیہڑے مورچے تے اک یاں دو برٹش بریگیڈ بری طرحاں ہارے سن اوہ پھیر ہندوستانی سپاہیاں نے سر کیتا۔ خیر اگے جو کجھ میں لکھ رہیا ہاں اوس نوں اتہاس و جوں نہیں لکھ رہیا۔ سگوں اپنے پنڈ دے بزرگ پنشنراں دے سنائے حالات دے ذریعے نال لکھ رہیا ہاں۔ اپتے پنشنر خود اوس معرکے وچ شامل سن۔ ایہناں وچوں اگے پنشنر سن جمعدار وزیر سنگھ جو اوس سمیں دے سینڈرڈ مطابق پڑھیا لکھیا فوجی سی۔ مورچے سمیں ایہہ شاید نائیک یاں لانس نائیک سی۔ دو جاسی سردار نارائن سنگھ۔ ایہہ اوس سمیں حولداری تے تیجا سی حولدار سرجن سنگھ جو او دوں لانس نائیک یاں نائیک سی۔

ایٹیک دے موقعے سینٹر وچ 45 سکھ سی۔ اک فلینک تے 47 سکھ۔ دو بے تے گورکھے۔ اگے ترکی والیاں دے مورچے دیاں پنج یاں چھ لائنیاں سن۔ بریگیڈ کمانڈر نے حکم دتا کہ دشمن دے تیجے مورچے تے قبضہ کرو۔ ایٹیک اینا زبردست سی کہ ترکی دے پیر اکھڑ گئے تے انڈین بریگیڈ پہلے پہلے وچ تیجے مورچے وچ جاوڑیا۔ غلطی اک پڑا تے ہوئی۔ ایس بارے تاں سپاہی



کچھ نہیں سن دس سکدے۔ پر اوہ اینا دسدے سن کہ گور کھے تے 47 سکھ تاں تیجے مورچے تک پہنچ کے رُک گئے۔ پر وچالے 45 سکھ دشمن نوں پچھے دھکی گئے۔ تے پنجویں مورچے وچ جاوڑے۔ جدوں ترکی والیاں ویکھیا کہ فلینک خالی ہن اوہ بڑی بہادری کر کے 45 سکھ دے پچھے چوتھے مورچے وچ آوڑے۔ 45 گھیرے وچ آگئے۔ ایس دوران ٹیلیفون لائن مارٹر گولہ وچ کے ٹٹ گئی سی۔ وارنرس اودوں اچے آئی نہیں سی۔ پلٹن دا ہیڈ کوارٹرنالوں تعلق وی ٹٹ گیا۔ جدوں کمانڈرنوں دسیا گیا کہ ”اسیں گھیرے وچ ہاں، فلینکٹ خالی ہن“ تاں اوہ ایہہ گل منے ای نہ۔ حولد ار سرجن سنگھ کدے کمانڈر دا اردلی رہیا سی۔ دوسرداراں نے سرجن سنگھ نوں کہا ”صاحب تیری گل مندا ہے اوہنوں سمجھا کہ دشمن ساڈے پچھے آ گیا ہے۔ ساڈیاں فلینکاں والیاں پلٹناں پچھے رہ گئیاں نیں“ سرجن سنگھ دسداسی کہ جدوں میں صاحب نوں ایہہ گل کہی اوہ کڑک کے بولیا ”سرجن سنگھ! تم سکھ ہو کر ڈرتا ہے“ ایہہ آکھ کے بہادر کمانڈر ہتھ وچ دور بین پھڑ کے مورچے توں باہر نکل کے کھلو گیا تے دور بین لا کے سجے فلینک ول ویکھن ہی لگا سی کہ گولی اوس دی پڑ پڑی وچ وجی۔ کمانڈر مورچے وچ ڈگاتے ڈگدا ہی دم توڑ گیا۔

ایس توں پہلاں وزیر سنگھ نوں ٹیلیفون دی لائن جوڑن لئی بھیجیا گیا سی۔ سردار وزیر سنگھ دسداسی کہ میں ہتھ والی لائن پھڑ کے ورہدیاں گولیاں وچ اوتھے پچا جتھے لائن ٹٹی ہوئی سی۔ ہتھ والی تار اک تھاں رکھ کے میں دو جے پاسے دی تار لہسن لگا۔ جدوں اوہ تار لہسی تاں ایہہ پہلی نہ ملے۔ پچھون گولیاں میہنہ وانگ آرہیاں سن۔ انت وزیر سنگھ نے اک پاسے دی تار اک مردے دی لت نال بھنی پھیر دو جی تار لہ کے تاراں جوڑ دتیاں۔ بریگیڈ نال رشتہ قائم ہو گیا

(وزیر سنگھ نوں ایس بہادری لئی آئی۔ ڈی۔ ایس۔ ایم ملیا) ایس سمیں تک کرنل ماریا گیا سی۔ بریگیڈ توں حکم ملیا کہ اپنے فلیزکاں ولوں دی پچھوں پہچن دی کوشش کرو۔ ایس توں اگلے حالات جمعدار نارائن سنگھ دی زبانی انج سن:

”جدوں ایس اٹیک وچ اگانہہ ودھ رہے ساں اودوں میں اپنے کبھے پاسے اک چھوٹا جیہا نالہ ویکھیا سی جو ساڈے پچھلے ہیڈ کوارٹر ول جا رہیا سی۔ جدوں حکم ملیا ”جوانو! جدھر دی راہ ملدا ہے بھج کے کچھے پہنچ جاؤ“ میں دوڑ کے اوس نالے وچ جاوڑیا تے ایس نوان دی اوٹ وچ پچھا نہہ نوں دوڑیا۔ کجھ ہور جوان وی میرے کچھے آئے۔ کجھ دور پہنچن تے اک گولی میرے کن کولوں دی شوکدی لنگھ گئی۔ جدھروں گولی آئی اودھروں رفل دی شست لے کے میں جنیا گولیاں میگزین وچ سن ساریاں داغ دتیاں۔ پچھوں اودھروں کوئی فار نہ آیا۔ ہن ڈرسی کہ پچھا نہہ دوڑ دیاں نوں کتے اپنیاں پلٹناں ہی گولی نہ مار دین۔ پر اوہناں نوں حکم مل چکا سی کہ پختالی دے جوان پچھا نہہ آرہے نیں۔ ایہناں نوں سنبھالنا۔ جدھروں دی میں گیا اودھروں کچھے گورکھا پلٹن سی۔ اک گورکھا صوبیدار مورچے توں باہر کھڑا ساڈی اڈیک کر رہیا سی۔ مینوں نالے وچ دوڑ دیاں ویکھ کے اوہنے واج ماری ”سردار جی! ایدھر آجاؤ۔ دوڑ کے پہنچو“ میں اودھر دوڑیا۔ مورچے وچ چھال ماری ہی سی کہ پچھوں اک ٹھنڈی ہوئی گولی میرے موڈھے وچ وجی جو اندر ہی رہ گئی۔ میرے مگر مگر ہور وی کئی جوان آگئے۔ گورکھا صوبیدار ورہدیاں گولیاں وچ مورچے توں باہر کھڑا جواناں نوں واجاں ماردار ہیاتے انت زخمی ہو کے مورچے وچ اُتریا۔“

کئی ہور جوان کسے دو جے پاسیوں بچ کے نکل آئے۔ پر بہت سارے مارے گئے۔ مرن والیاں وچ افسر، سردار، جوان سبھ شامل سن۔ جیہڑے بچ کے نہ

نکل سکے اوہ ترکی والیاں نے قیدی بنائے۔ ایہناں وچ شامل سی سردار سُر جن سنگھ اوہ دسد اسی کہ قید کرن پچھوں ساڈے سارے ایس کپڑے لاه لئے تے گل تے تیر پوؤن نوں سانوں بوریاں دے دتیاں۔ اسماں گل تے باہواں لنگھاؤن نوں بوریاں وچ موریاں کیتیاں۔ سروں سارے ننگے ہی رہے۔ کھان نوں گھاہ بوٹ دا ادھ ردھا ساگ جیہا دتا جاندا اسی جس وچ معمولی لون توں علاوہ ہور کجھ نہیں سی ہوندا۔ ایہہ ساگ اک مٹی دی کنالی وچ پا کے دوالے ایسے آدمی بٹھائے جاندا سن کہ سانوں پاسا مار کے بہنا پیندا اسی۔ جس نال صرف اک ہتھ کنالی تک پہنچدا اسی۔ ایہہ ساگ جیہو جیہا وی ہے سی صرف اینا ملدا اسی کہ اسیں جیوندے رہ سکے۔

اج سانوں یاد نہیں کہ ایہناں فوجیاں نے کنا چہ قید کئی کافی چہ پچھوں سن 1961 وچ (شاید 1960 وچ) میں ایم۔ اے ہندی دا امتحان دین گیا۔ میرٹھ سکھ رجمنٹل سینڈ وچ ٹھہریا ہویا ساں۔ قدرتی اونہیں دینس ہی سکھ رجمنٹ دی وی یونین سی جس وچ بہت سارے پرانے پنشنز آئے ہوئے سن۔ اوہناں وچ مینوں مل پیا 45 سکھ دا صوبیدار میجر آنریری کیپٹن کا کا سنگھ جو کوئل مارے دے مورچے وچ شامل سی تے ترکی دی قید وچوں بھج کے نکل آون وچ کامیاب ہویا اسی۔ میں کیپٹن صاحب نوں ایس مورچے دا حال سناؤن دی بینتی کیتی۔ اوہناں گل سناؤنی وی شروع کیتی پر اوس ویلے سماں رات دے 12 بجے داسی۔ کیپٹن صاحب کافی بزرگ سن کہن لگے ”سردار جی! میں بہت تھک گیا ہاں۔ کہانی لمی ہے سویرے تڑک سا میں واپس مڑ جانا ہے جے پوری گل سنی ہووے تاں میرے پنڈ آ جانا۔ میں پھیر اوہناں نوں کدے نہ مل سکیا۔“

کوئل مارے دے مورچے اُتے رے دے مقابلیاں توں علاوہ 45  
 سکھ دیاں ہو روی انیکاں کہانیاں ساڈے دونہ پنڈاں دے پنشنر سناوندے رہے  
 سن۔ ایہناں وچوں بہت تھوڑے قصے اج مینوں یاد ہن۔ پر ایہناں نوں اتھے قلم  
 بند کرن دی لوڑ نہیں جا پدی۔ اُتے دتیاں کہانیاں ایس لئی بیان کیتیاں ہن کیونکہ  
 45 سکھ دا اتہاس دن توں علاوہ ساڈے پنڈ سگوں ساڈے علاقے دی کہانی  
 ادھوری رہ جاندی۔ ساڈا پنڈ ایس علاقے دا جغرافیائی مرکز ہی نہیں سی سگوں  
 تہذیبی مرکز وی سی۔ اتے ایس رہتل دا پریرتا سرت سی۔  
 45 ریٹرز سکھز دا جیون۔



## گنجی باردا پچھلا علاقہ

کچھے دسیا جا چکا ہے کہ ساڈے پنڈ گنجی بار دے اخیر لے حصے وچ آوندے سن۔ ہوراگے علاقہ جہانیاں تے پج کے گنجی بار دا انت ہوندا سی۔ علاقہ جہانیاں وچ سکھاں دے تیرھاں پنڈ سن۔ گنجی بار دا صحیح مہاندرا پیش کرن والا علاقہ اصل وچ ساڈے پنڈاں توں کچھے رہ جاندا سی۔ ایہہ علاقہ قصبہ میاں چنوں توں نیڑیوں لے کے ڈھر کچھے ہڑپے توں وی کجھ کچھے تک پہنچدا سی۔ جتھوں گنجی بار شروع ہوندا سی۔ ایہہ اصل وچ سکھ کاشتکاراں دا علاقہ سی۔ آبادی بھاویں اتھے مسلماناں دی ودھیرے سی پر بار دی نوں آباد ہوئی زمین وچوں تقریباً 70% سکھاں نوں دتی گئی سی۔ (سرکاری اعداد و شمار مینوں کتوں نہیں ملے۔ گزیٹیئر تے سیٹلمنٹ رپورٹاں وی کوئی اشارا نہیں دیندیاں)۔

میاں چنوں دے لاگے دے پنڈاں بارے مینوں کجھ ذاتی واقفیت ہے۔ ایسے علاقے دے چک نمبر 109/15 ایل (رسالے والا) وچ ساڈے پروار نے تقریباً دس سال گزارے سن۔ ایسے پنڈ وچ ہی رہن سمیں میں ستویں توں لے کے بی۔ اے تک دی پڑھائی کیتی۔ ایسے پنڈ دا وسنیک ہے پنجاب دا جانا پچھانیا شاعر تے لکھاری اتے میرا عزیز مٹر سکھپال ویر سنگھ حسرت۔ ساڈے تے حسرت ہوراں دے پروار دی بڑی نیڑتا سی۔ قدرتی ایدھر آکے وی اسیں نال نال دے پنڈاں وچ ہی بیٹھے سوکچھلی سانجھ جاری رہی۔ حسرت دے ماتا جی پچھلے سال چلانا کر گئے۔ اوہناں دے پتا جی ایدھر آون توں کجھ سال مگروں ہی

سُرگباش ہو گئے سن۔ ساڈے ماتا جی دا 1977ء وچ دیہانت ہو گیا سی تے پتا جی باروچ ہی سانوں وچھوڑا دے گئے سن۔ انج اتلی پیرھی دی سانجھی دھڑکن ختم ہو گئی ہن دراڈی جہی سانجھ باقی ہے۔ میری تے میرے چھوٹے بھرا جسونت سنگھ جی حسرت نال۔ جس نوں ساڈے پروار وچ ”سکھ“ کہہ کے یاد کیتا جاندا ہے۔  
ایہہ حسرت دا بچپن دا نام سی۔

چک 109 بڑا وڈا پنڈ سی۔ ایس وچ کئی سہنیر فوجی افسر سن۔ تن تاں پاکستانی ہی سن۔ کپتان پہلی عالمی جنگ وچ وڈے توں وڈا رینک سی۔ جو کسے ہندوستانی نوں دتا جاندا سی۔ سبھ توں سنیر سن کپتان بھگت سنگھ۔ ایہہ ساڈے ایس پنڈ آون توں پہلاں سورگباش ہو گئے سن۔ ایہہ وی پرانے 45 سکھ دے سردار سن۔ دو جے سن کپتان بحال سنگھ تے تیجے کپتان تیجا سنگھ۔ حسرت ڈے پتا جی دا وی بڑا اثر سوخ تے چنگا کاروبار سی۔ ایس پنڈ دی رے دی ٹیم بہت تکرڑی سی۔ ایہہ ٹیم مقابلیاں لئی دُور دُور تک جاندی ہوندی سی۔ ایہہ رے بچے تے ساڈے طبیعت والے لوکاں دا پنڈ سی۔

ایس پنڈ توں کوئی دو میل دور سی چک 99 جتھے دے رہن والے سن سردار کرتار سنگھ شمشیر جیہناں دا ایس دی ونڈ توں پہلاں دے پنجابی شاعراں وچ چکا تھاں سی۔ شمشیر صاحب شاعری دی سکھلائی وچ میرے استاد سن پر ساڈا اصل رشتہ سی مڑتا دا۔ سکول توں مگروں کالج پڑھدا جدوں میں چھٹی آوندا تاں پہلا کم ہوندا سی شمشیر سنگھ نوں ملن جان دا۔ اسیں دوویں جنے دوہاں پنڈاں دے وچالے پیندے اک بے تے آہٹھ دے۔ اتھے گپ شپ ماردیاں رات دے دس گیاراں وچ جاندے۔ گھر والیاں نوں پتہ ہوندا سی کہ اج ایہہ جنڈی اکٹھی ہوئی ہے ایہناں ادھی رات نوں ہی گھر مڑتا ہے۔ اوہ روٹی پکا کے رکھ دیندے

تے آپ سوں جاندے۔ آزادی پچھوں ایدھر آ کے جدوں شمشیر مینوں پہلی وار ملیا تاں ایس نے دیا ”پنڈوں نکلن لکیاں میں اوس بے تے بہہ کے رج کے روکے آیا ہاں“ اوہ گنجی بار دیاں دوستیاں ایدھر کتے نہیں لہیاں۔ شمشیر جی مینوں ملن توں بنا ہی کینیڈا چلے گئے تے اودھرے ہی ڈیرا لالیا۔ بھاویں اوہناں دی ایدھر بڑی جاند اسی۔ افسوس صد افسوس مینوں اوہناں دی موت توں کئی سال پچھوں پتہ لگا کہ اپنے ایس گل وکڑی دے دوست نال پھیر ملاقات نہیں ہونی۔

چک نمبر 108 توں دکن ول کوئی دو میل دور سی۔ چک نمبر 105

(ونجاری) ایس نوں میں گنجی بار دا ماڈل پنڈ کہاں گا۔ ایس پنڈ وچ کجھ بڑے سوجھوان سردار آباد سن۔ اج مینوں ساریاں دے نام وی یاد نہیں آرہے۔ ایہناں وچوں اک سن جمعدار جیون سنگھ جو ساڈے پچھلے پنڈ گھنئے کے بانگر (ضلع گورداسپور) دے وسنیک تے ساڈے گوت بھرا (رندھاوے) سن۔ دو بے سرکڈھ لیڈر سن صوبیدار رام سنگھ۔ اک ہور بڑے سیانے تے بار سوخ نوجوان سن سردار سنت سنگھ۔ ایہو جیسے کجھ ہور بدھی وان بزرگ وی سن۔ زیادہ فوجی سردار۔ ایہناں نے اپنے پنڈ نوں اک نمونے دا پنڈ بنا دتا سی۔ ایس پنڈ وچ مڈل سکول وی ساڈے پنڈ (چک 79) نالوں پہلاں بنیا۔ ڈپنٹری تے ڈاک خانہ وی ساڈے نالوں کافی پہلاں کھلے اتے ایہناں نے اک عالی شان گوردوارہ وی بہت چھیتی بنا لیا سی۔

پنڈ دی پنچائیت اجیسے مدبر تے نرپکھ سبھا والے لوکاں دے ہتھ وچ سی

کہ پنڈ کدے کوئی لڑائی جھگڑا ہون ہی نہیں سی دتا جاند۔ کدے کوئی چوری نہیں سی ہوئی۔ کدے پنڈ وچ پلس نہ آئی۔ اتھے تک کہ اک واری اک قتل دے کیس دا وی پنڈ دی پنچائیت نے صلح صفائی راہیں فیصلہ کروادتا۔ پلس تک کیس نہ جان

دتا۔ ایسے پنڈ نے سبھ توں پہلاں مذہبی سکھاں نوں اپنے کھوہ توں پانی بھرن دی اجازت دتی۔ شاید نویں پیڑھی دے نوجواناں نوں ایہہ اک نگونی جیہی تے ہاسے اپنی گل جا پے پراوہنیں دینیں ایہہ اک بہت بڑا کارنامہ سی۔ ایس توں وی وڈا کارنامہ کہ ایس پنڈ نے پنڈ دا گرنٹھی اک مذہبی سنگھ نوں رکھیا جس دا نام سی بھائی حکم سنگھ۔ میرے پتا جی لمے سمیں تک ضلع ملتان دے اکالی جتھے دے ممبر رہے تے کجھ سمیں لئی ضلع دے جتھے دار وی رہے۔ اوہ ضلع دی دھرم پرچار کمیٹی تے امرت پرچار جتھے دے وی پکے ممبر سن۔ اوہ امرت پرچار والے پنجابیاں، پیاریاں وچ بھائی حکم سنگھ نوں سدا نال رکھدے سن۔ ایس سبب دھ وچ واپریا اک قصہ شاید پڑھن والیاں نوں دلچسپ جا پے۔

میری پتی دے تائے دی دھی بی بی ہندر کور چک نمبر 78 الف وچ ویاہی ہوئی سی (میرے سوہریاں دا پنڈ چک نمبر 82 سی) بی بی ہندر کور دے سوہرے بی بی اُتے دبا پارہے سن کہ اوہ اپنی بھین سورن کور دا رشتہ اپنے دیور سادھو سنگھ لئی لیاوے۔ بی بی سورن کور نے امرت چھکيا ہو یا سی۔ اوس دے ماپیاں نے شرط رکھی کہ سادھو سنگھ امرت چھک لوے تاں اسیں رشتہ کر دیاں گے۔ سادھو سنگھ دا پروار آخر ساڈی رشتے داری وچ سی۔ اوہناں نے پتا جی نوں امرت پرچار دا پر بندھ کرن لئی بنیتی کیتی۔ پتا جی نے پنج پیارے بلا لئے اتے وچ بھائی حکم سنگھ نوں وی شامل کیتا۔ سادھو سنگھ نے عین موقعے تے بھائی حکم سنگھ دے ہتھوں امرت چھکن توں انکار کر دتا۔ پتا جی دی پوزیشن بڑی عجیب سی۔ اک پاسے رشتے داری دا لحاظ سی دو جے پاسے گور سکھی دا مریدا۔ پتا جی نے بھائی حکم سنگھ توں بنا امرت چھکاؤن توں صاف انکار کر دتا۔ سادھو سنگھ دے ماپے سانوں الاہمہ دین وی آئے پر پتا جی مریدا تے اٹل رہے۔ انت چھ ست مہینے بعد



سادھو سنگھ نے پنجاں پیاریاں توں تے بھائی حکم سنگھ توں معافی منگی اتے اوہناں دے ہتھوں امرت چھکیا۔ ایس واقعے توں جتھے ایہہ اندازہ لایا جاسکدا ہے کہ گنجی باروچ سکھ مریدا پرچار کھیڑیاں لائناں تے چل رہیا سی۔ اوتھے ایہہ وی پتہ لگدا ہے پنڈ ونجاری دے وسنیک ایس کچھ توں اپنے سمیں توں کناں اگے چل رہے سن۔

شاید ڈاکٹر سادھو سنگھ ہمدردی اپنی اولاد نوں وی ایہہ پتا نہ ہووے کہ پنجاں دے ایس سر مور پترکار نے وی اپنے جیون دے کجھ مڈھلے دن ایسے پنڈ (ونجاری) وچ بتائے سن ایتھوں ہی ہمدرد جی میاں چنوں چلے گئے۔ جتھے اوہناں دے پترکاری والے جیون دار نبھ ہویا اتے اتھے ہی میری اوہناں نال جانکاری ہوئی۔

ایہہ سارے پنڈ لاہور توں ملتان کراچی نوں جان وانی ریلوے لائن دے کجھے پاسے سن۔ ”میاں چنوں“ دے لاگے ریلوے لائن دے سجے پاسے وی سکھاں دے کجھ چک سن جیہناں وچ ودھیرے دوآبے توں آئے لوک آباد سن۔ ایہناں پنڈاں دے منڈے ہری سنگھ، شو سنگھ، کندن سنگھ، شکر سنگھ تلنبے وچ میرے جماعتی سن۔ پر ایہناں پنڈاں بارے مینوں ودھیرے واقفیت نہیں۔

گنجی بارو دا ضلع منگمری وچ پیندا علاقہ سبھ توں ودھ خوشحال تے خاص اہمیت والا علاقہ سی۔ ایس کھیتر وچ کئی وڈے وڈے بار سوخ تے مشہور سردار آباد سن۔ میاں چنوں دے نیڑے ہی سر جوگندر سنگھ دے مربعے سن۔ سر جوگندر سنگھ کسے جان پچھان دے محتاج نہیں۔ ایہناں دا تعلق مہاراجہ رنجیت سنگھ دے سمیں دے سر کڈھ خاندان نال سی۔ آپ آزادی توں پہلاں کئی وار وزیر رہے تے آزادی پچھوں وی اوہناں دا کافی اثر سوخ رہیا۔

ایس توں پچھلے علاقے بارے میری کوئی ذاتی جانکاری نہیں۔ اگے دتے حالات میں اپنے پرانے متر میجر گورکھ سنگھ تے اردو دے مشہور شاعر ڈاکٹر ستنام سنگھ خمارتوں ملی اطلاعات دے ذریعے نوٹ کر رہیا ہاں۔

سر جوگندر سنگھ تاں بہت وڈے زمینداراں وچوں سن۔ پر ایہناں توں علاوہ وی دس دس باراں مربعیاں دے مالک کئی سردار سن۔ ساڈے اپنے علاقے وچ سردار اُجل سنگھ تے میجر ٹھا کر سنگھ توں علاوہ کوئی سکھ اپنی وڈی ملکیت والا نہیں سی۔

میجر گورکھ سنگھ دسدے ہن کہ اوہناں دے پنڈ چک 77/5 آردا ذیلدار کشن سنگھ ریٹائرڈ فوجی رسالدار سی۔ ایس دے پنڈ وچ دو مربعے فوجی سروس دے دو گھوڑی پال مربعے سن۔ ایہناں توں علاوہ ایسے رسالدار دے 7 گھوڑی پال مربعے اقبال نگر لاگے (میاں چنوں نیڑے) سن۔ کسے ہور شخص دے ایسے گھوڑی پال مربعے نہیں سنے۔

مشہور اکالی لیڈر سردار حکم سنگھ بھاویں زمیندار نہیں سن پر ایہہ گنجی بار ہی نہیں پنجاب دے چوٹی دے اکالی لیڈراں وچوں سن۔ آپ منگمری وچ وکالت کر دے سن۔ دیس دی آزادی توں پچھوں آپ لوک سجا دے سپیکر رہے تے راجستھان دے گورنر وی رہے۔ پچھوں آپ اپنے اخیری ساہاں تک سنگھ سجا کمیٹی دے صدر رہے۔

ڈاکٹر خمارولوں دتی گئی جانکاری مطابق ضلع منگمری دے کجھ ہور اُگھے ویاکتی (شخصیتاں) بھاویں صحیح معنیاں وچ گنجی بار دے وسنیک نہیں سن۔ کیونکہ ایہناں دیاں زمیناں دیپالپور پاک پٹن دے علاقے وچ آوندیاں سن پر گنجی بار وچ اوہناں دا اثر رسوخ بہت سی۔ شاید کسے دی کجھ زمین وی گنجی بار وچ آوندی

ہووے۔ ایہناں وچوں نمایاں سن بابا سرکھیم سنگھ بیدی۔ ایہناں دی پاک پٹن علاقے وچ 137000 ایکڑ زمین سی۔ ایہناں دی اولاد وچوں کئی اُچے افسر ہوئے ہن۔ ٹکا جگجیت سنگھ بیدی ہائی کورٹ دے جسٹس رہے۔ بیدی سریندر سنگھ آئی۔ اے۔ ایس افسر سن۔ منے پر منے اُردو شاعر تے لکھاری کنور مہندر سنگھ بیدی ڈپٹی کمشنر رہے تے کئی ہور اُچیاں عہدیاں تے وی رہے۔

اک ہور اُگے زمیندار سن سردا تار سنگھ۔ ایہناں دی پاک پٹن علاقے وچ 135000 ایکڑ زمین سی۔ ایہناں دا جدی پنڈ کلیان سی۔ ایس لئی ایہہ کلیانے کر کے مشہور سن۔ ڈاکٹر خمار دسدے ہن کہ کلیان نام دی کنک نوں سردا تار سنگھ دوارا ہوراں ای ترقی دتی سی۔ میری جانکاری مطابق گنجی بار وچ وی داتار سنگھ دی زمین سی۔ آزادی پچھوں سردا تار سنگھ بھارت سرکار دے محکمہ کھیتی دے صلاح کار (ایڈوائزر) رہے۔ اوہناں دی دوہتی سریمتی مینکا گاندھی اج وی دیش دی سیاست وچ سرگرم حصہ لے رہی ہے۔

خود ڈاکٹر ستنام سنگھ خمار علاقہ دیپالپور دے اک رئیس گھرانے دے نمائندہ رہے۔ آپ دے دادا جی پنجاں پنڈاں دے مالک سن۔ خمار صاحب دے اپنے حصے اک پنڈ آیا سی جو اوہناں دے پتا جی دے نام تے چک سرجن سنگھ کہو اندا اے۔ ایہہ علاقہ وی گنجی بار وچ نہیں سی آوندا۔

سردار بے انت سنگھ جی (مکھ منتری پنجاب):

میں پچھے دس آیا ہاں کہ گنجی بار دے مڈھلے علاقے یعنی منگمری بارے میری جانکاری بہت تھوڑی ہے۔ ایس علاقے بارے میں جو تھوڑا بہت لکھیا ہے اوہ اپنے متراں میجر گورکھ سنگھ تے ڈاکٹر ستنام سنگھ خمار توں پچھ کے لکھیا ہے۔ میں

گنجی بار دے اوہناں ساریاں مان جوگ سپوتاں بارے کجھ لائناں لکھنا چاہوندا  
 ساں جیہڑے بار وچ سرکڈھ تے سمنانت سن یاں جیہناں نے ایدھر آکے نامنا  
 کھٹیا ہے۔ ضلع منگمری بارے میری معلومات نہ ہون کارن میں ایس علاقے دیاں  
 مہان شخصیتاں بارے کجھ نہ لکھ سکیا۔ جدوں ”یاداں گنجی بار دیاں“، ”پنجابی  
 ٹریبون“ وچ لڑی وار چھپیا اودوں تک مینوں پتہ نہیں سی کہ پنجاب دے موجودہ  
 مکھ منتری سردار بے انت سنگھ جی وی گنجی بار دے ہی پرانے وسنیک ہن۔ اک  
 دن اپنے وائس چانسلر ڈاکٹر جوگندر سنگھ پوار نال سرسری گل بات کر دیاں میں پچھیا  
 ”کیہ سردار بے انت سنگھ ساندل بار وچوں آئے ہن؟“ مینوں کسے توں ایہو  
 جانکاری ملی سی۔ ڈاکٹر پوار نے ہس کے جواب دتا ”سردار بے انت سنگھ تے میں  
 اکو پنڈ دے ہاں۔ دوں گنجی بار وچوں ہی آئے ہاں۔ ساڈا چک نمبر 53/2 ایل  
 اوکاڑا منڈی توں پورب ول سی“۔ مینوں ایہہ جان کے ہور وی شرمندگی ہوئی  
 کیونکہ ڈاکٹر پوار ساڈے وائس چانسلر ہی نہیں سگوں پرانے متر وی سن۔ ایس  
 دوہاں کافی سماں ایسے یونیورسٹی دے اکو شعبے وچ اکٹھیاں کم کیتا۔ اوہناں دے  
 ایٹھوں گورونانک دیو یونیورسٹی جان پچھوں وی ساڈا تعلق بنیا رہیا کیونکہ ایس  
 دوویں اکو موضوع (زبانناں دے علم) دے طالب علم ہاں۔ خیر میں جو تھوڑی  
 جانکاری سردار بے انت سنگھ بارے تے ڈاکٹر پوار بارے حاصل کر سکیا ہاں اوہ  
 او سے روپ وچ قلم بند کر رہیا ہاں۔

سردار بے انت سنگھ دے پتا کیپٹن حضورا سنگھ نوں تعریف دے قابل فوجی  
 سروس بدلے گنجی بار وچ مربعے ملے سن۔ پہلی عالمی جنگ ختم ہون تک آنریری  
 کیپٹن وڈے توں وڈا رینک سی۔ جیہڑا کسے ہندوستانی نوں مل سکدا سی۔ ایس  
 طرح کیپٹن حضورا سنگھ فوج دی اچی توں اچی پدوی (عہدے) حاصل کر کے

ریٹائر ہوئے۔ اپنے علاقے وچ کیپٹن صاحب دا بڑا آدمان تے دب دبا سی۔  
 کیپٹن صاحب دے سپر سردار بے انت سنگھ نے اپنے علاقے دا نام  
 ہور وی کئی گنا اچیرا کیتا ہے۔ اتے اوہناں توں اے جے ہور وی اُمیداں ہن۔ سردار  
 صاحب نے اوکاڑہ توں میٹرک پاس کیتا۔ بعد وچ گورنمنٹ کالج لاہور وچ داخل  
 ہوئے جتھوں اوہناں 1941 وچ بی۔ اے کیتا (ایسے سال ہی میں خالصہ کالج  
 امرتسر توں بی۔ اے کیتا سی)

آزادی حاصل کرن پچھوں آپ دے پروار نوں ایدھر زمین الاٹ  
 ہوئی۔ کجھ چرتاں دیش دی ونڈ سمیں ہوئے اجاڑے دے اثر توں نجات حاصل  
 کرن اتے اپنے پیراں تے کھلون لئی لگا۔ چھیتی ہی پچھوں آپ پنجاب دی  
 سیاست وچ سرگرم حصہ پاؤن لگ پئے تے تھوڑے ہی سمیں وچ اُچے توں اُچے  
 اٹھدے گئے۔ آپ ایم۔ ایل۔ اے رہے۔ پنجاب دے کیبنٹ منسٹری رہے  
 اتے اوس سمیں ایس راج دے مکھ منتری بنے جدوں پنجاب انتہائی نازک دور  
 وچوں دی لنگھ رہیا سی۔ سیاسی تانا بانا بڑی طرح الجھیا ہو یا سی۔ ایسے حالات وچ  
 کسے وی سیاسی لیڈر دا پنجاب دا مکھ منتری بننا شیر دے مونہہ ہتھ پاؤنا سی۔ آپ  
 ایہناں ان متھویاں مشکلاں تے خطریاں دے باوجود پوری طرح کامیاب مکھ  
 منتری سدھ ہوئے۔ تھوڑے ہی سمیں وچ پنجاب دا ماحول بالکل بدل دتا۔ اوہ کجھ  
 کر دکھایا یا جسدی کسے نوں آس نہیں سی۔ ہن پنجابی آس رکھدے ہن کہ آپ  
 راشٹری پدھرتے وی کوئی کرشمہ کر دکھاؤن گے۔

انت وچ میں اوہناں دی زندگی دا اک اجیہا واقعہ سناؤنا چاہوندا ہاں جو  
 سرکاری نظر نال ویکھیاں اک عام کاروائی سی۔ پر ذرا گوہ نال وچاریاں ایس دی  
 عظمت ظاہر ہو جاندی اے۔ دیش دی ونڈ سمیں آپ دا علاقہ اپنے گھر بار چھڈ کے

قافلے دے روپ وچ بھارت ول نوں آرہیا سی۔ سلیمانگی ہیڈ ورکس دے پل توں لنگھ کے ایہہ قافلہ بھارت دی جُوہ وچ داخل ہو یا تاں دو جے پاسیوں مسلماناں دا اک قافلہ پاکستان جان لئی آرہیا سی۔ ایہہ قافلہ پہلاں ہی بُری طرح مار کھا کے آیا سی۔ کئی لوک لہولہان سن۔ کئی روندے پتدے آرہے سن۔ ایہناں نوں دیکھ کے بھارتی قافلے دے کجھ سکھ نوجوان مسلماناں دے قافلے تے ہلہ بولن لئی دوڑے۔ بے انت سنگھ گھوڑی تے سواری تے ہتھ وچ دونالی بندوق سی۔ اوہ گھوڑی دوڑا کے اگے ودھیا تے ایہناں دھاڑویاں نوں دیکا ماریا۔ ”شرم نہیں آندی۔ اج ادا گھنٹہ پہلاں تسیں دعاواں کر دے آرہے سو کہ گوروسانوں سکھیں ساندیں پار لے چلے۔ ہن حد پار کر دیاں ہی تسیں اوہناں لوکاں نوں مارن لئی دوڑے ہو جیہڑے پہلاں ہی مارے لٹے آرہے ہن۔“ دھاڑویاں دی ڈھانی شیردل نوجوان دی لکار سن کے ٹھٹھمر گئی۔ نڈر بے انت سنگھ نے ساہویں کھلو کے مسلماناں دے قافلے نوں سرحدوں پار کیتا۔

جیہناں لوکاں نے اوہ خونی تے جنونی سماں دیکھیا ہویا ہے۔ اوہ سنتاپ اپنے پنڈے تے ہنڈھایا ہویا ہے اوہ ہی اندازہ لاسکدے ہن کہ کڈی مہان کاروائی سی۔ جدوں پنجاب وچ انسانیت ناں دی کوئی چیز ہی باقی نہیں سی۔ جدوں ہر پنجابی درندہ، وحشی، خونخوار بن چکا سی اودوں جیہڑا انسان خاص کر جیہڑا نوجوان اپنے پنڈے تے ایس جھکھرو دے تھیڑے جھلن پچھوں وی اپنا دماغی توازن قائم رکھ سکیا اوہ سچ سچ ہی اک مہان انسان سی۔ سردار بے انت سنگھ نوں مکھ منتری وجوں ودھائیاں دین والے ہور بہت ہون گے میں اک نما نے لکھاری وچوں اج سنتالی ورہیاں پچھوں نوجوان بے انت سنگھ نوں اوس دی ایس لائٹانی تے فرشتہ سیرت کاروائی لئی ودھائی دین دا حوصلہ کر دا ہاں۔

## ڈاکٹر جوگند سنگھ پوار: (وائس چانسلر)

پنجابی یونیورسٹی پیالہ دے موجودہ وائس چانسلر ڈاکٹر جوگندر سنگھ پوار دے پتا سردار کرتار سنگھ نوں فوجی سروس بدلے چک نمبر 53/2 ایل وچ مربع ملے سن۔ دیش دی ونڈ سمیں پوار صاحب دی عمر 12 سال سی۔ پر اوہناں نوں گنجی بار دے اجاڑے دا تے اوس سمیں ہوئے قتل و غارت دا حال چنگی طرح یاد ہے۔ اوہ دسدے ہن کہ گھر بار چھڈن پچھوں اوہناں دا قافلہ اپنے گڈیاں سمیت دودناں وچ سلیمانکی پل لنگھ کے بھارت وچ داخل ہو گیا۔ رستے وچ اوہناں دے قافلے اُتے کوئی حملہ نہیں ہویا۔ اوہناں دے دن مطابق پاکستان دی حد وچ اوہناں نوں کوئی لاش نہیں ملی۔ پر بھارت دی حد اندر لاشاں دے ڈھیر لگے ہوئے سن۔ ڈاکٹر پوار نے ایدھر آ کے پنجابی دا ایم۔ اے کیتا۔ بعد وچ اُچیری تعلیم لئی انگلینڈ چلے گئے۔ اوہوں ”بھاشا وگیان“ دا ایم۔ اے کر کے واپس آئے تاں پنجابی یونیورسٹی دے زباناں دے شعبے وچ لیکچرر لگ گئے۔ ایہوں ہی اوہناں نے پی۔ ایچ۔ ڈی کیتی اتے کجھ سمیں بعد گورونانک دیو یونیورسٹی وچ ریڈر چنے گئے۔

امر تر رہندیاں اوہناں نے کئی بالکل نویں تے خاص اہمیت والے کم کیتے جیہناں دی بڑی لوڑ سی۔ ”پنجابی ساہت اکیڈمی“ دے مقابلے، ”پنجابی بھاشا اکیڈمی“ شروع کیتی جس دی بڑی لوڑ سی کیونکہ ”ساہت اکیڈمی“ نے کدے کسے بھاشا وگیانی نوں پنجابی دا لکھاری منن بارے سوچیا ہی نہیں سی۔ گورونانک دیو یونیورسٹی دے سلیپساں وچ ڈاکٹر پوار دیاں کوششاں صدقہ بھاشا وگیان تے اکرن نوں مناسب تھاں دتا گیا۔ پچھوں جدوں ڈاکٹر پوار پنجابی یونیورسٹی دے

پرو۔ وائس چانسلر توں بعد وائس چانسلر بنے تاں اتھے وی اوہناں نوں کئی دلیرانہ قدم چکنے پئے۔ ایہہ اوہ سماں سی جدوں پنجاب دے نال نال یونیورسٹی وی گھنیر مسکلیاں نال گھری ہوئی سی۔ اجیہی صورت وچ یونیورسٹی دے حالات نوں سدھارنا کوئی سوکھا کم نہیں سی۔ ڈاکٹر پوار نوں کئی ان سکھاویاں صورت حال نال لڑنا پیا۔ کئی اجھے قدم چکنے پئے جینہاں کارن اکیڈمیک سٹاف پر بندھکی عملے تے خاص کر کے طالب علماں وچ کجھ بے چینی وی ہوئی۔ پر ہن سبھ لوک محسوس کر دے ہن کہ جو کجھ کیتا گیا اوس وچوں بہت کجھ ضرور کرن والا ہی سی۔

یونیورسٹی دا مونہہ مہاندرا سوارن لئی ڈاکٹر پوار نے خاص اپرا لے کیتے سن۔ چراں توں لنگدے آرہے اساری دے کم نپیرے چاڑھے ہن۔ یونیورسٹی دیاں سڑکاں ہن کسے وی ترقی یافتہ ملک دیاں سڑکاں دا ٹاٹا کر اسکدیاں ہن۔ سینٹ ہال، سینڈیکٹ روم، گورو گوبند سنگھ بھون ورگیاں عمارتاں دا خستہ حال فرنیچر پورے دا پورا بدل دتا ہے۔

ڈاکٹر پوار دیاں اجیہاں کامیابیاں دا اندازہ تاں پڑھے لکھے اتے اچے عہدیاں تے بیٹھے لوک ہی لاسکدے ہن۔ پر اک عام انسان دا ڈاکٹر پوار بارے کیہ خیال ہے ایس دا اندازہ بیٹھے لکھے واقعے توں لایا جاسکدا ہے۔

اگست 1993 وچ ڈاکٹر پوار نے سینڈیکٹ دی منظوری نال پنجاب عالماں نوں اجیون فیلوشپ دتی۔ مینوں عالم ہون دی غلط فہمی نہیں پر میرا نام وی ایہناں پنجاب وچ شامل سی جدوں میں اپنی گھر والی نوں ایہہ خوشبری سناؤندیاں دیا وائس چانسلر صاحب نے سانوں لائف ممبر شپ دے دتی اے“ تاں خوشی ظاہر کر دیاں اوس نے جواب دتا ”بڑی مہربانی ہے وائس چانسلر صاحب دی پر مینوں تاں وائس چانسلر دا اوہ اُپکار نہیں بھلدا جدوں ہڑاں دے دینیں اوہدی اپنی



کوٹھی پانی نال بھری ہوئی سی تے وی۔ سی خود گوڈے گوڈے پانی وچوں لنگھ کے ساڈا حال چال پچھن آیا سی۔“

میں ڈاکٹر پوار بارے ایہہ کجھ لائنیاں ایس لئی لکھیاں ہن کیونکہ ڈاکٹر پوار وی گنجی باردا جم پل ہے۔ سانوں مان ہے گنجی بار دے اجیہے وسنیکاں تے۔ وسدی رسدی رہے گنجی بار تے اچیاں سحراں چھوہندے رہن تے مہک ونڈ دے رہن گنجی بار دے اُجڑے وسنیک۔



## گنجی بار دے جانگی

گنجی بار دے جدی و سنیک مسلماناں نوں ساڈے لوک ”جانگی“ کہندے سن۔ اوہناں نوں ایہہ اپادھی (جانگی) ایس لئی نہیں سی ملی کہ اوہناں وچ جانگی پن والے کوئی لچھن سن یاں اوہ کوئی غیر مہذب اُجڈ لوک سن۔ سگوں جانگی اوہناں نوں ایس لئی کہا جاندا سی کیونکہ اوہ جنگلاں وچ رہن والے تقریباً پٹری واس رہنی والے لوک سن۔ ایس پچھے وچار آئے ہاں کہ شبد بار دا بنیادی مطلب ہی جنگل ہے۔ ایس لئی واردے و سنیکاں دا نام ”جانگی“ پے گیا۔ ایہناں وچوں کئی مسلمان دریاواں دے لاگے چاگے پرانے وسدیاں پنڈاں وچ وی رہندے سن۔ پر جانگلیاں دے بھرا بھائی ہون کر کے ایس اوہناں نوں وی جانگی ہی کہندے ساں۔

ایہہ جانگی بڑے سدھے سادے صاف دل، ملنسار تے صبر سنتو کھ والے لوک سن۔ اپنے وت مطابق پروہنچاری کرنا ایہناں دا سجا بنیا ہو یا سی۔ جس نال مترتا ہو جاوے اوس لئی سبھ کجھ واردین لئی حاضر سن۔ ایہناں دی برادری ساڈے دلش دیاں پرانیاں روایتاں مطابق چل رہی سی۔ ساکا داری دیاں ساریاں ذمہ داریاں نبھاونا ایہناں دا دھرم سی۔ ساک ایہہ نزدیکی رشتے داراں وچ کردے سن۔ چاچے دی دھی اُتے پہلا حق سمجھیا جاندا سی۔ جے کوئی چاچا اپنے بھتیجے نوں اپنی دھی نہ دینا چاہوے تاں سمجھیا جاندا سی کہ بھتیجانا اہل نوجوان ہے تے یاں پھیر چاچا برادری وچ رہن جوگ نہیں۔

ایہناں دی رونی بڑی سادہ سی۔ عام طور تے جنگلاں وچ گھمدے  
 رہندے سن جتھے کتے پانی مل جاوے اوتھے جھگیاں پالیدیاں۔ ایہناں دا سازو  
 سامان ہوندا سی کجھ مٹی دے بھانڈے جیہناں نوں ایہہ ”تھاں“ کہندے سن۔  
 کھجور دے پتیاں دیاں بنیاں پچھیاں یاں چھکو، کجھ سیال وچ ورتن والے جُلے  
 تے کجھ لوڑ والے سند۔ ایہناں دی جائداد ہوندی سی بکریاں، بھینڈاں تے اُوٹھ۔  
 ایہہ پسو جنگلاں وچ چر کے پلدے سن۔ بکریاں، بھینڈاں دی اُن وچ کے یاں  
 گوشت واسطے بکرے چھترے وچ کے گھر دا کم چلاون لئی چار پیسے وٹ لیندے  
 سن۔ دُدھ، گھیوتے گوشت ایہناں دی عام خوراک سی۔ ایس لئی ایہہ چنگے قد آور  
 جوان ہوندے سن۔ سارا سارا دن اجڑاں دے پچھے پھر دے رہن کر کے ایہناں  
 دے سریر چنگے کمائے ہوئے ہوندے سن۔ لے لے پینڈے کرنا ایہناں دا سبھا بنیا  
 ہو یا سی کیونکہ ایہناں دیاں بہکاں کافی دور دور ہوندیاں سن۔ گھر دیاں لوڑاں  
 خریدن لئی وی ایہناں نوں لمیاں منزلاں مارنیاں پیندیاں سن۔

اوتھاں والیاں نوں ”ڈکھنے“ کہا جاندا سی۔ ایہہ وپاریاں دا سامان  
 اوتھاں تے لد کے اک تھاں توں دوجی تھاں لے جاندا سن۔ پرانے بزرگ  
 ”ڈکھنے“ دسدے ہوندے سن کہ اپنی جوانی سمیں اوہ ملتان توں لاہور یاں ملتان  
 توں دلی تک وی جاندا رہے سن۔ ایہہ ”ڈکھنے“ عام طور تے اوتھاں دیاں  
 لمیاں قطاراں لے کے ٹردے سن۔ اک اُوٹھ دی مہارا گلے اُوٹھ دے پچھلے پاسے  
 بدھی ہوندی سی۔ ایس طرح ایہہ اُوٹھ اک لمی پال وچ چلدے سن۔ اک ڈکھنا  
 موہر لے اُوٹھ اُتے بیٹھا ہوندا سی۔ اک سبھ توں پچھلے اُوٹھ اتے باقی جنے ہون اوہ  
 وچالے والے اوتھاں اُتے ہوندے سن۔ سفر عام طور تے رات نوں کردے سن۔  
 ایس لئی واری واری اک جنا جاگدار ہندا سی تے گیت گاؤندار ہندا سی۔ ملتانی بولی

وچ گیت نوں ”ڈھولے“ آکھیا جاندا ہے۔ پچھلے سمیں وچ ڈکھنیاں دیاں  
ڈھولیاں نوں وی ”ڈکھنے“ ہی کیہا جاندا سی۔ شاید ایسے نام توں ہی گوروارجن دیو  
جی نے اپنی ملتانی بھاشا وچ رچی بانی دا نام ”ڈکھنے“ رکھیا ہے۔

جانگیاں دے ڈھولے بڑے پیارے تے مٹھے گیت ہوندے سن۔  
شاید ایہہ کہنا غلط نہ ہووے کہ ملتانی جھاگی دے ڈھولیاں دے مقابلے دے لوک  
گیت ہور کسے زبان وچ نہیں ملدے۔ میلیاں، مشاہدیاں تے ڈھولے گاؤن  
والیاں دے پڑ بھجدے سن۔ شاعر لوک واری واری اٹھ کے ڈھولے سناوندے  
سن۔ سنن والے واہ واہ کر اٹھدے سن۔ باراں دے ڈھولیاں دا اک خاص گن  
ایہہ سی کہ ایہناں وچ سدا چار توں گریاں ہوئیاں یاں فحاشی دے زمرے وچ  
آون والا کوئی نشان نہیں سی ہوندا۔

جھومرتے لڈی ایہناں دے مشہور لوک ناچ سن پر ایہناں دا اظہار کتے  
میلیاں یاں ویاہ شادیاں تے ہی ہوندا سی۔ جھومر نال خاص قسم دے گیت  
(ڈھولے) گائے جاندے سن۔ مثال دیکھی جاوے:

میں جو تینوں آکھیا  
ماہی تھل وچ بنگلہ پوا بھلا  
نکیاں نکیاں باریاں  
ماہی پچھوں دی لگے ہوا بھلا  
میں جو تینوں آکھیا  
ماہی تھل وچ کھوہا لوا بھلا  
ڈاچیاں تاں پانی پی سکیاں  
ماہی تیڈے تاں اپنی دُعا بھلا

جانگلیاں دی سبھ توں مشہور کھیڈ سی ”پڑدھودا“۔ ایہہ کھیڈ ساڈی پرانی  
 ”سوچی“ نال ملدی جلدی سی تے ایس لئی جانگلیاں وچ بڑا جوش ہوندا سی۔  
 ”پڑدھودے“ دے مقابلے دی تاریخ کافی سماں پہلاں مقرر کر لئی جاندی سی تے  
 سارے علاقے نوں خبر کردتی جاندی سی۔ ایس نوں ”کھیڈ پونی“ کہیا جانداسی۔  
 ”کھیڈ پون“ وائے دیہاڑے مقرر کیجے تھاں اُتے لوک اکٹھے ہو جاندے سن۔  
 وچالے بڑا کھلا پڑ رکھیا جانداسی تے چوہیرے دُور دُور توں آئے تماشین کھڑے  
 ہوندے سن۔ جیہڑے لوک اوٹھاں تے چڑھ کے آوندے سن اوہ اوٹھاں تے بیٹھے  
 ہی ویکھدے سن۔ مقابلے والیاں ٹیماں پڑ دے مخالف پاسیاں تے کھڑیاں  
 ہوندیاں سن۔ اک ٹیم دے دو گھبرو نکلدے سن تے مخالف ٹیم دا اک ایہہ گلوں  
 ننگے ہوندے سن۔ تیز عام طور تے لانگڑ کڈھی چادر ہوندی سی جس نوں ایہہ جھلی  
 آکھدے سن۔ سرتے تقریبین ڈھائی گز دا پٹکا جس دے سر دوالے تن ول  
 آوندے سن۔ پڑ وچ اترن والے گھبرو وال دے سرتے پٹکا ضرور ہوندا سی۔  
 بھاویں ایہہ پٹکا چھیتی ہی ڈگ پیندا سی۔ ایہہ گھبرو ”یاعلی“ داعرہ لاکے پڑ وچ  
 اُتردے سن۔ جہڑا اکلا ہوندا سی اوس دی کوشش ہوندی سی کہ دونہہ مخالف جواتاں  
 نوں تن دھپے مار کے بیچ کے نکل جاوے۔ دونہہ وچوں ہر اک نوں اک دھپہ  
 ضرور وجنا چاہیدا سی۔ دو جیاں دونہہ نے دھپہ مارن والے نوں پھڑنا ہوندا سی۔  
 پراچیہے جیتو میں بہت گھٹ ویکھے۔ کدے کوئی ورلا ہی جواتاں جیتو سدھ ہوندا سی  
 تے جت ہار دا فیصلہ ایہناں دھپہ مارن والے جواتاں دی جت دے ادھارتے ہی  
 ہوندا سی۔

وینی پھڑنا اک ہور زور آزمائی دا مقابلہ سی۔ ایس نوں جانگلی ”گھنتی پنا“  
 کہندے سن۔ کتے کتے گھلن والے گھبرو جانگلی وی نکل آوندے سن پر بہت گھٹ۔

باردے جانگلی شراب بالکل نہیں سن پیندے۔ روزے، نماز دے پکے  
سن۔ پر تعصبی بالکل نہیں سن۔ ساڈے نال اوہناں دے بڑے چنگے تعلقات  
رہے۔ جدوں اسیں اوتھے گئے اودوں اوہناں نے ساڈی بڑی مدد کیتی تے جدوں  
اسیں اوتھوں نکلن لگے اوہناں نے سانوں رو رو کے توریہ۔

چوری کرنا جانگلیاں لئی اک کسب سی۔ کئی قبیلے اجھے وی سن جیہناں وچ  
اک عجیب رواج سی۔ جدوں تک منڈا کوئی چوری کر کے نہ لیاوے اونا چہ اوہ سر  
تے پٹکا نہیں سی بنھ سکدا۔ پر ساڈے لاگے چاگے دے جانگلیاں وچ چوری دی  
وفا دے نشان سانوں گھٹ ہی نظر آئے۔ چھبیاں ورہیاں دے سمیں وچ صرف  
دو چوریاں ہوئیاں۔ اک واری بابے دالے دی ہٹی سنھ لا کے بھنی تے دو جی وار  
حولدار کیسر سنگھ دی جوگ چرائی گئی۔ اصل وچ جانگلی ودھیرے مال ڈنگر دی چوری  
ہی کر دے سن۔ جدوں حولدار کیسر سنگھ دے بلد چرائے گئے۔ کھوجی جانگلی تہہ کوہ  
بلداں داتے چور دا گھر اکڈھدے ٹھیک نکانے تے جا چکے۔ جدوں کھرا کے پنڈ  
وچ جاوڑے تاں پنڈ والیاں دا فرض سی کہ یاں مال دین یاں پھیر کھرا پنڈ وچوں  
باہر جاندا دکھاؤن۔ حولدار کیسر سنگھ دے بلد چراؤن والے نے بڑی دلیری نال منیا  
کہ ”چوری میں کیتی ہے“ اوس نے پورے ویروے دتے کہ ”میں کنج بلد چرا کے  
لیا یا ہاں۔ اوس نے بلداں دی جوگ اگے اک مسلمان مہرنوں دتی سی۔ جیہڑا رسا  
لیندا سی۔ افسوس کہ واہر نال گئے ساڈے اپنے آگوا ایماندار سدھ نہ ہوئے تے  
حولدار دے بلد نہ مڑے۔

کھیتی کرن دا جانگلیاں نوں چج نہیں سی۔ ایہہ رکتا اوہناں ساڈے لوکاں  
توں ہی سکھیا۔ پھیر وی لما سماں ساڈے نال رہن پچھوں وی اوہ کھیتی وچ ساڈے  
لوکاں جنے کامیاب نہ ہوئے۔ جانگلیاں دا ورتوں ویہار، لین دین سبھ زبانی ہوندا

سی، کوئی لکھت پڑھت نہیں سی ہوندى۔ جھگڑیاں، شکائتاں، دواواں دے فیصلے پنچائت کردی سی۔ کچھزیاں وچ ایہہ لوک نہیں سن جاندے۔

جانگلی پڑھے لکھے گھٹ ہی ہوندے سن۔ کوئی ورلا، وانجھا منڈا (یاں کڑی) پنڈ دے مولوی توں قرآن شریف پڑھن دا کجھ ابھیاں کر لیندا سی۔ ایہہ اُن پڑھتے ساد مرادے لوک اپنی پرانی دہنی نوں سنبھالی آ رہے سن اتے اوہناں نوں اپنے ایس ”سمھیا چار“ اتے فخر سی۔



## گنجی بار دی ویونت بندی

گنجی بار بارے یاں پنجاب دی کسے وی بار بارے لکھدیاں ایہناں  
 باراں دی ڈول جگت دا ذکر کرنا بڑا ضروری جا پدا ہے۔ بار دے چکاں (پنڈاں)  
 دی ویونت بندی تاں سنسار دے کسے وی دیش دے پنڈاں لئی ماڈل پیش کر دی  
 سی۔ میں دھنوادے ہاں اپنے متر ڈاکٹر پرکاش سنگھ جموں دا جیہناں نے مینوں بار دا  
 مہاندرا اگھاڑن والے ایس پکھ سبندھی تفصیل نال لکھن دی پریرنا دتی۔ ڈاکٹر  
 جموں خود ساندل بار دے پرانے وسنیک ہن۔ پنجاب دیاں ساریاں باراں دے  
 پنڈاں دی ویونت بندی تقریباً اکو جیہی سی پر میں اتھے گنجی بار دے پنڈاں دی  
 روپ ریکھا ہی پیش کراں گا کیونکہ اوہناں بارے مینوں ذاتی جانکاری ہے۔

گنجی بار (بلکہ کسے وی بار) دے پنڈاں وچ گلیاں نہیں سن ہوندیاں  
 سگوں کھلیاں سڑکاں ہوندیاں سن۔ ایہہ سڑکاں اینیاں چوڑیاں ہوندیاں سن کہ  
 لدے لدائے دو گڈے آسانی سال اکو ویلے لنگھ جان دے سن۔ ساریاں سڑکاں دی  
 چوڑائی برابر ہوندی سی۔ پنڈ دیاں دو مکھ سڑکاں اک دو جی نوں توے ڈگری دے  
 درجے تے کھدیاں ہوئیاں چونہہ پاسیں پنڈ دی حد تک پہنچدیاں سن۔ جتھے ایہہ  
 سڑکاں کھدیاں سن اوہ پنڈ دا وڈا چوک ہوندا سی جس وچ پنڈ دا سا جھا کھوہ ہوندا  
 سی۔ ایس چوک دیاں چونہہ نکراں وچوں ہر اک تے دو دو دوکاناں ہوندیاں سن۔  
 وڈی دوکان اک کنال دی تے چھوٹی ادھی کنال دی۔ ادھی ادھی کنال دیاں دو  
 دوکاناں بناؤن نال چک بڑا کھلا رہ جاندا سی۔ ایہناں وچوں اک وڈی دوکان



والی تھاں تے گور دوارہ، مسجد وغیرہ دھرم ستھان بنا لیا جاندا سی۔ تے اک ہور دوکان عام پنڈاں وچ پٹوار خانیاں ڈیرا بناؤن لئی رکھی جاندی سی۔

دوکاناں توں اگے سڑکاں تے دونہہ پاسیں رہائشی احاطے ہوندے سن۔ ”حاطہ“ مول عربی لفظ ”ایحاطہ“ دا بول چال وچ ورتیا جان والا روپ سی۔ ہر حاطہ دو کنال دا ہوندا سی۔ اتے کنال اودھر 605 ورگ گز دی رکھی جاندی سی۔ جنے کسے شخص دے مربعے ہون اونے ہی اوس نوں حاطے ملدے سن۔ پر گھوڑی پال تے لمبرداری دے مربعیاں لئی حاطے نہیں سن دتے جاندے۔ وچکار لیاں سڑکاں دے دوولی بنے حاطیاں دے پکھواڑے حاطیاں دی دوجی لائن چلدی سی تے ایہناں حاطیاں دے ساہنے پھیر سڑکاں ہوندیاں سن۔ ہر سڑک دوجی سڑک نوں نوے درجے دی کون بناؤندی ملدی سی۔ انج پنڈ دیاں ساریاں سڑکاں بالکل سدھیاں ہوندیاں سن تے حاطے ٹھیک اک لائن وچ ہوندے سن۔ ہر پنڈ دے حاطیاں دے اپنے نمبر ہوندے سن جو اک خاص ترتیب نال دتے جاندے سن۔ کیاں دے حاطے اک باہی تے وکھری لائن وچ ہوندے سن۔ ہر کمی نوں ادھا حاطہ دتا جاندا سی۔

ہر پنڈ دے چوہیرے کھلی چراند چھٹی جاندی سی جس نوں گنجی بار وچ چراگا (پنگ) کہا جاندا سی پر ساندل بار وچوں آئے اک عالم نے دسیا کہ اودھر ایہہ ناؤں استری لنگ لئی ورتیا جاندا سی۔ ایسے چراگے وچ ہوندیاں سن پنڈ دیاں دو یاں ودھیرے ڈھکیاں۔ بے پنڈ وچ کوئی سکول ہووے یاں سرکاری ڈسپنسری ہووے تاں اوہ وی چراگے وچ ہی ہوندی سی۔ ساڈے پنڈ داوسوں والا تھاں تے چراگا ملا کے کل چار مربعے (اک سوا ایکڑ) رقبہ سی۔ نال لگدے ہور ناں پنڈاں وچ وی تقریباً ایہو حالت سی۔

حاطے کیونکہ کافی کھلے ہوندے سن ایس لئی مال ڈنگروی حاطیاں وچ ہی رکھیا جاندا سی۔ حاطے دے اک پاسے رہائشی مکان ہوندے سن تے دوجے پاسے ڈنگراں دیاں گھر لیاں کوانا۔ سیال نوں ڈنگر بنھن لئی کڑھ وغیرہ۔ ڈیوڑیاں بناؤن دا خاص رواج نہیں سی۔ پر بیٹھک تقریبن ہر گھر وچ ہوندی سی۔ چبارے اُسارن دا زیادہ شوق نہیں سی کیونکہ ملتان دی گرمی وچ چبارے بہت تپ جاندا سی۔ گنجی بار وچ مینہ بہت گھٹ پیندا سی ایس لئی چھتی ہوئی رسوئی بناؤن دی لوڑ نہیں سی پیندی۔ چلہا چونکا وسوں والے کمرے دے نال لگدا ان چھتیا ہی ہوندا سی۔ پھیروی کھیاں گھراں نے رسوئیاں بنالیاں سن۔

کچھے دسیا جا چکا ہے کہ جہڑے کوٹھے شروع وچ چھتے سن اوہناں وچ کھڑکیاں باریاں بالکل نہیں سن۔ پر مگروں اُسارے مکان چنگی ویونت نال بنائے گئے سن۔ ہر کمرے وچ کھڑکیاں روشن دان ہوندے سن۔ وڈے کمریاں نوں دو دو دروازے رکھے جانداے سن۔ چھتاں ہن چیل یاں بیاردے شہتیراں اُتے بالے پا کے ایہناں اُتے ٹائلاں بیڑ کے پائیاں جان لگ پیاں سن۔ گارڈردی ورتوں وچ آگے سن۔ کپے مکان حالے بہت گھٹ لوکاں نے بنائے سن۔ نہ ہی کپے مکاناں دی خاص لوڑ سی۔ کیونکہ بارش بہت گھٹ ہوندی سی۔ اُنج کپے مکان گرمیاں وچ تپ جانداے سن۔ گنجی بار دے گھر اوس علاقے دیاں اتے اوس سمیں دیاں لوڑاں مطابق بڑے سوہنے تے صاف ستھرے ہوندے سن۔ پتہ لگا ہے ساڈے پچھوں اوہناں گھراں دی پہلی والی دکھ نہیں رہ سکی۔ کیونکہ اک اک حاطے وچ ایڈھروں گئے مسلماناں دے تن تن چار چلہاں بیٹھے ہن۔

مربعیاں دی ویونت بندی وی بڑے سچے ڈھنگ نال کیتی گئی سی۔ پنڈ دی کھیتی والی زمین دے ادھارتے ہر پنڈ نوں دو یاں تن موگھے پینداے سن۔

موگھے لئی بنائی گئی کھال دے دوہیں پاسیں مربعے ہوندے سن۔ مربعیاں دے وی نمبر سن جو اک مقررہ ترتیب دے مطابق ہوندے سن۔ میں اج اوس ترتیب بارے صحیح جانکاری نہیں دے سکدا کیونکہ ہن مینوں مربعیاں دے نمبر ہی یاد نہیں رہے۔ اینا یاد ہے کہ ساڈے پنڈ دے سارے مربعے آباد نہیں سن ہوئے اتے غیر آباد مربعیاں دے نمبر 1 توں 10 یاں 15 تک سن۔ ایہہ پنڈ توں بہت دور خانیوال دے راہ وچ پیندے سن۔ ہر پنڈ وچ اک مربع کمیال لئی ہوندا سی پرکئی نوں دو کلمے زمین دتی جاندی سی۔ نمبر دار نوں پنجو ترے توں علاوہ ادھا مربع زمین دتی جاندی سی۔ ہر مربعے دے کلیاں (ایکڑاں) دے وی نمبر ہوندے سن جو اک بانھویں سکیم مطابق دتے جاندے سن۔

ہر مربعے لئی پہنچ سڑک ہوندی سی۔ ایہہ سڑکاں وی بالکل سدھیاں ہوندیاں سن تے اینیاں چوڑیاں ہوندیاں سن کہ آہمو ساہمنے آوندے دو گڈے آرام نال لنگھ جاندے سن۔ پنڈاں نوں آپس وچ جوڑن والیاں سڑکاں کجھ ہور کھلیاں ہوندیاں سن۔ ایہناں ساریاں سڑکاں وچوں دی جتھے کتے کوئی کھال یاں راجواہا لنگھدا سی او تھے پکی پکی بنائی ہوندی سی۔

گنجی بار وچ پکیاں سڑکاں بہت گھٹ سن۔ تھانہ میاں چنوں دے سارے علاقے وچ کوئی اک وی پکی سڑک نہیں سی۔ ایس لحاظ نال نیلی بار ساتھوں بہت اگے سی۔ اودھر مربعیاں دی الاٹ منٹ توں پہلاں ہی پکیاں سڑکاں بنا دتیاں گھیاں سن۔ ایس بار دے کجھ علاقے وچ تاں پکیاں سڑکاں دا جال وچھیا ہویا سی۔ دسیا جاندا ہے کہ برٹش سرکار ایس علاقے وچ انگریز زمینداراں نوں وڈے وڈے فارم دینا چاہوندی سی۔ پر ملتان دی گرمی کر کے اتے علاقے دی جغرافیائی صورت کر کے کوئی انگریز اتھے وس لئی تیار نہ ہویا۔

ایس لئی زمین پنجابی زمینداراں نوں دے دتی گئی۔ شاید ایہہ گل ٹھیک ہووے پر  
میں ایس دی کتوں تائید نہ کروا سکیا۔

گنجی بار دے چکاں دے نمبر وی اک مقررہ سکیم دے مطابق لائے گئے  
سن۔ چھ دس آئے ہاں کہ نہر ”لوئر باری دو آب“ وچوں نکلیں والے ہر مکھ  
راجواہے دے چکاں دے نمبر اں دی اپنی لڑی ہوندی سی۔ مثال لئی ساڈے  
راجواہے 15۔ ایل دے کجے پاسے ول پہلے چک دا نمبر اک سی اتے کجے بنے  
دے چکاں دے نمبر اک توں 77 تک چلے سن۔ چک نمبر 77 راجواہے  
15۔ ایل دے کجے پاسے دا اخیری چک سی۔ اوس توں اگلا چک 78 راجواہے  
دے سجے پاسے پیندا سی تے ہن 78 توں اگلے چک 79، 80، 81 وغیرہ سجے  
پاسے آوندے سن تے ایہہ لڑی ہن پچھلے پاسے (راجواہے دے مڈھ) ول نوں  
چل دی سی۔ میاں چنوں دے کول چک نمبر 115 آوندا سی۔ پر 15۔ ایل اوس  
توں کوئی دس میل پچھے نکلدی سی۔ مینوں پتہ نہیں کہ اخیری چک دا نمبر کیہہ سی؟

باراں وچ وسائے گئے نویں شہراں تے قصبیاں دی ویونت بندی وی  
بڑے سوچویں ڈھنگ نال کیتی گئی سی۔ ساندل بار دا مشہور شہر لائل پور (ہن فیصل  
آباد) تاں دنیا بھر وچ اک آدرش شہر سی۔ ایس دے وچالے کھلا چونک سی جس  
وچ گھنٹہ گھر اُساریا گیا سی۔ ایس چونک چوں اٹھاں پاسیاں ول اٹھ سڑکاں  
نکلدیاں سن جیہناں دے دوہیں پاسیں دوکاناں بنیاں ہویاں سن۔ ایہناں  
ساریاں سڑکاں دے ڈیزائن اکوجیہے سن۔ کئی واری مرکزی چونک وچوں مڑدیاں  
کھلیکھے نال غلط بازار وچ جاوڑی دا سی۔ گنجی بار وچ وسائے گئے نویں شہراں  
وچوں کوئی وی لائل پور دے نمونے اتے نہیں سی بنایا گیا۔ پھیر وی ایہناں شہراں  
تے قصبیاں دی روپ ریکھا بڑی سچی سی۔ میرے ساہمنے ایس سمیں اپنے شہر

خانیوال دا ڈھانچہ ہے۔ ایس شہر دے وچالے دی دو وڈیاں سڑکاں اک دوجی نوں کھدیاں لنگھدیاں سن۔ ایہناں وچوں اک سڑک دے اک پاسے رہائشی مکان سن دوجے پاسے پارک، ادارے۔ شہر دے سبھ توں وڈے بازار دا نام ”گوردوارہ بازار“ سی کیونکہ اسے دے اک سرے اُتے شہر دا وڈا گوردوارہ سی۔ دوجا مشہور بازار سی ”کچھری بازار“ تے تیجا سبھ توں پرانا سی گورونانک بازار۔ ملتان، جھنگ، لائل پور ولدے تقریبین سارے ہندو سبھ دھاری سکھ تے نت نیم نال گوردوارے جاندے سن۔ خانیوال دیاں کچھریاں، ٹھانہ تے سرکاری دفتر شہر توں باہر سن۔ کچھریاں توں ہور اگے سی گورنمنٹ ہائی سکول۔ ایس دے ساہنے پندیاں سن ”سول لائنز“ جیہناں وچ وڈے وڈے افسر تے امیر لوکاں دیاں کوٹھیاں سن۔ ”سول لائنز“ دے تے شہر دے وچالے پچھوں آکے خالصہ ہائی سکول اُساریا گیا سی جتھوں میں میٹرک پاس کیتا۔ گنجی بار دے ساریاں شہراں دا نقشہ تقریبین ایہو جیہا ہی سی۔ لاہور تے ملتان ول نوں جاندیاں راہ وچ آوندے کجھ ہور شہر سن۔ منٹگمری، اوکاڑا، چیچا وطنی، میاں چنوں ایس توں اگے پندیاں سی خانیوال تے پھیر ملتان۔ ایہہ سارے شہریاں قصبے لاہور توں کراچی جان والی ریلوے لائن تے آوندے سن۔ جنکشن ایہناں وچوں اکلا خانیوال سی۔ ملتان تے منٹگمری ضلع ہیڈ کوارٹر سن پر جنکشن نہیں سن۔ خانیوال توں لاہور کراچی لائن توں علاوہ اک پاسے لائل پور نوں ریلوے لائن جاندی سی تے دوجے پاسے جہانیاں، وہاڑی، پاکپٹن ہو کے رائے ونڈ پہنچدی سی۔ ایستھوں اک لائن سجے ہتھ ستلج پار کر کے فیروز پور پہنچدی سی دوجی لاہور نوں جاندی سی۔

ایہناں ساریاں شہراں، قصبیاں وچ کپاہ دے کارخانے سن جیہناں وچ کپاہ (نرما) ویلی جاندی سی۔ تے رُوں دیاں گنڈھاں بنھ کے کراچی بندرگاہ تے

پہنچائیاں جاندیاں سن۔ میں بارتوں جنوری 1944 وچ چلا گیا ساں اج پنجاب  
سال پچھوں لکھدیاں یاد نہیں آرہیا کہ ساڈے علاقے دے شہراں وچ کنے  
کارخانے سن۔ خانیوال وچ پنج یاں چھ کارخانے سن تے میاں چنوں وچ شاید  
چار سن۔

پینڈو علاقے وچوں شہراں تے ریلوے سٹیشناں نوں جان لئی سڑکاں  
بنائیاں کھیاں سن۔ ایہہ سڑکاں بڑیاں کھلیاں سن۔ تے ایہناں دے دونہہ پاسیں  
رکھ لائے گئے سن۔ عام طور تے ٹاہلی دے رُکھ۔ ساڈے علاقے وچ منتھلا بنگلہ  
توں سڑک نکلی سی۔ اگے چک 78 الف کوئل ایس وچوں خانیوال نوں جان  
والی سڑک دکھ ہو جاندی سی جو کوئی دو میل اگے کپر وچ پنج کے 78 ب کول ختم ہو  
جاندی سی۔ مول سڑک دیاں ساڈے پنڈ لاگے پھیر دو برانچاں بندیاں سن۔ اک  
ریلوے سٹیشن خانیوال (پیرانوالہ) نوں جان والی تے دو جی کچا کھوہ نوں جان  
والی۔ ایہہ وی چک 80 لنگھ کے کپر وچ ختم ہو جاندیاں سن۔ انج سڑکاں صرف  
آباد علاقے وچ ہی سن۔ کپر تے غیر آباد علاقے وچ سڑکاں نہیں سن بنائیاں  
کھیاں۔ دو بے پاسے چھنب بنگلے توں شروع ہون والی سڑک اک پاسے کچے  
کھوہ نوں جاندی سی دو بے بنے نیلی بار وچ وھاڑی نوں۔

سڑکاں ساریاں کچیاں سن اتھے تک کہ ریلوے اسٹیشن دے نال نال  
لاہورتوں ملتان جاندی سڑک وی ساڈے علاقے وچ کچی سی۔ منگمری کول جا کے  
ایہہ کچی ہو جاندی سی۔ لاہورتوں ملتان جان والی شیر شاہ سُوری دی بنائی سڑک  
ساتھوں دور پینڈی سی۔ ایہہ راوی دے نیڑے پینڈے پرانے آباد علاقے وچوں  
دی لکھدی سی۔ گنجی بار دا بہت تھوڑا حصہ ایس سڑک اتے آوندا سی۔ ایسے سڑک  
دے کنڈھے اتے وسدا ہے تلبہ شہر جتھے شیر شاہ سُوری دا بنایا اک قلعہ وی ہے۔

ایسے سڑک اُتے تلہے توں کوئی 14 میل ملتان والے پاسے ہے مخدوم پورہ جو بجن  
 ٹھگ دائِکنا سی۔ اج کل ایہہ خانیوال۔ لائل پور ریلوے لائن دا اک سٹیشن ہے۔  
 پرانے سمیں ایہہ لاہور۔ ملتان جان والے اتے دلی توں ساندل بار جان والے  
 قافلیاں دے راستے دورا ہا سی۔ پرانا راہ سی دلی حصار، ابروہ، پاک پٹن تے مخدوم  
 پور دا چوراہا۔ اگے راوی لنگھ کے ساندل بار دے پرانے شہر  
 ایہہ ہے گنجی بار دے پنڈاں تے شہراں دی اتے گنجی بار دے علاقے  
 دی ویونت بندی بارے موٹی موٹی جانکاری۔ ودھیرے ویروے دین دی لوڑ نہیں  
 جا پدی۔



## گنجی بار کیوین اُجڑی

میں جنوری 1944 وچ فوج وچ بھرتی ہو یا ساں تے 1947 دے شروع تک کدے ٹبر نال نہیں ساں ملیا۔ میں اودوں جبل پور ساں۔ میں اپنے بچے لین بار وچ اپنے پنڈ گیا۔ ایس توں پہلاں مارچ 1947 وچ پوٹھوہار دے علاقے دیاں گڑ بڑاں ہو چکیاں سن۔ ایہناں گڑ بڑاں وچ پوٹھوہار دے انیکاں ہندو سکھ مارے گئے سن۔ ایتھوں تک کہ ایس علاقے دے سارے ہندو سکھ اپنے جدی گھر چھڈ کے پوربی پنجاب وچ یاں اگے ہندوستان دے جیہڑے وی علاقے وچ کسے نوں ٹکانہ ملیا پہنچ گئے سن۔ ایہناں گڑ بڑاں دا اثر ملتان دے ضلعے وچ وی پیا سی۔ سکھاں دے پنڈاں لاگے تاں کوئی چھیڑ خانی نہیں سی ہوئی۔ پر ساڈیاں علاقیاں توں دُور مسلمانان دے پنڈاں وچ وسدے ہندو دکانداراں دی کافی ٹٹ مار ہوئی سی۔ ایس دے ردِ عمل وجوں ہن ماجھے، مالوے، دوآبے وچ سکھ بھڑکے ہوئے سن اتے وارداتاں وی شروع ہو چکیاں سن۔

جدوں میں اپنے پنڈ پچا تاں ماحول کجھ سہم والا ضروری پر لوکاں دے حوصلے بلند سن۔ کسے گڑ بڑ دا ٹاٹا کرنا کرن لئی اوہ پوری طرح تیار سن۔ اوہناں نے دیسی بمب تے نلکیاں دیاں نالاں نال توپاں ورگے ہتھیار وی بنائے ہوئے سن۔ ایس سمیں تک پاکستان بننا تاں یقینی ہو چکا سی پر اوس دی حد کتھوں تک ہووے گی ایہہ کسے نوں کوئی پتہ نہیں سی۔ سو جھوان لوکاں دا ایہہ اندازہ سی کہ پاکستان دی حد راوی توں اگے نہیں آسکدی۔ ایہہ وی سوچیا جا رہیا سی کہ جے ساڈا علاقہ وی



پاکستان وچ آجاوے تاں کیہ آخر آگئی۔ راج بدل دے رہے ہن۔ کدے کے نے اپنے جدی گھروں چھڈے ہن؟ اپنے نکانیاں تے ڈٹے رہن دا لوکاں دا وشواس اینا مضبوط سی کہ پنڈ دے جیہڑے دو معتبر آدمی اپنے ٹبر اپنے پچھلے پنڈاں وچ چھڈ گئے سن پنڈ دی پنچائت نے اوہناں نوں اپنے ٹبر لیاؤن لئی بھیج جیا۔ میں وی پنڈ والیاں نوں ایہو رائے دتی کہ گھر نہ چھڈو۔ جے اسیں پاکستان وچ وی آجائیے پھیر وی اتھے ای وساں گے۔

میں اپنے بچے لے کے آگیا پر میں گھروں بہت تھوڑا سامان نال لیا تاں جو لوکاں نوں ایہ نہ جا پے کہ میں اپنے ٹبر تے مال اسباب لے جا رہیا ہاں تے لوکاں نوں پنڈ وچ ڈٹے رہن دا پرچار کر رہیا ہاں۔ اتھے تک کہ میں سیال دے بسترے وی نال نہ چکے۔

انت پاکستان دا اعلان ہو گیا اتے حد اوتھے بنی جتھے دا کدے کسے ہندو، سکھ نے قیاس وی نہیں سی کیتا۔ سکھاں دے دل پہلاں ہی ولوندھرے ہوئے سن۔ ہن اوہ جنگل دی اگ وانگ بھڑک اٹھے، ماجھے، مالوے، دوآبے وچ مسلماناں دا قتل عام شروع ہو گیا۔ اودھر پاکستان وچ آئے علاقیاں اندر ہندو، سکھاں نوں مار پین لگ پئی۔ پوری وسوں دی مکمل اولاد بدلی توں علاوہ ہور کوئی چارا نہ رہ گیا۔ دونہہ پاسیں خونخوار جنونیاں دا راج سی۔ ہر تھاں تلوار، چھریاں، بندو قاتل چل رہیاں سن۔ کوئی گورنمنٹ نہیں سی، کوئی قانون نہیں سی، کسے دی کتے کوئی شنوائی نہیں سی۔ لوگ جیوں رہے سن رب دے آسرے یاں اپنے بازو دے زور دے سہارے۔ ریل، ڈاک، تار سبھ ٹھپ۔ پنجاب وچوں نکلن والے اخبار وی تقریباً بند سن۔ دُور دراز دے علاقیاں وچوں خبراں کون پچاسکدا سی؟ ڈپٹی کمشنراں، کمشنراں تے گورنر تک نوں پتہ نہیں سی کہ کتھے کیہ ہو رہیا اے۔ پلس

راہیں پہنچیاں ادھ پچدھیاں خبراں ریڈیو والیاں نوں ملدیاں سن۔ ایہو خبراں پنجاب توں باہر دے اخباراں نوں پہنچدیاں سن۔ اسیں دور دور بیٹھے ایہو ریڈیو توں نشر ہوندیاں خبراں سندے ساں۔ خبراں تے کوئی سنسر نہیں سی۔ مار، دھاڑ، قتل و غارت دیاں جو خبراں لاہور تک پہنچدیاں سن سبھ ریڈیو توں نشر کردتیاں جاندیاں اتے ایہہ خبراں بڑیاں ہولناک ہوندیاں سن۔ خون خرابہ، تباہی، بربادی دونہہ پاسیں بری طرح ہو رہی سی۔ ایجھے حالات وچ مینوں کوئی آس نہیں سی کہ ساڈے پنڈ بچ کے نکل سکن گے۔ سکھاں دے کل چھ ست پنڈ چار چوہیرے مسلمان علاقہ، اٹھاراں اٹھاراں میل تک کوئی شہر نہیں۔ ایجھے تھاں توں ایجھے حالات وچ بچ کے کیوں نکلیا جاسکدا سی؟

فوجیاں دیاں چھٹیاں بند کردتیاں گئیاں سن۔ کجھ سکھ جوان پلٹناں وچوں اپنے ہتھیاراں سمیت بچ کے پنڈاں وچ پہنچ گئے سن تے اوہناں نے اپنے دل وی بھڑاس پوری طرح کڈھی سی۔ ایہہ وی خطرہ سی کہ سکھ پلٹناں بے قابو ہو کے پنجاب وچ نہ جاوڑن۔ ایس لئی بڑیاں پکیاں روکاں لایاں گئیاں سن، کرڑے پر بندھ کیتے گئے سن کہ دلی توں آگے پنجاب ول کوئی فوجی نہیں جا سکدا۔ لوک اپنے بچا لئی کیمپاں وچ اکٹھے ہو گئے سن۔ ساڈے علاقے دے سارے لوک ساڈے پنڈ 79 وچ آگئے سن۔ پر اوہ اپنے گھراں دے گیرے مار دے رہندے سن۔ اتھے کوئی واردات نہیں ہوئی۔ میاں چنوں ول دے پنڈ چک نمبر 109 وچ کیمپ لائی بیٹھے سن۔ اوہ پنڈ وچ جتھے ساڈے ٹبر نے در سال بتائے سن۔ ایہہ کیمپ بڑا وڈا سی اتے اتھے کئی وارداتاں وی ہوئیاں۔ مینور اتھے دے سارے حالات سکھپال ویر سنگھ حسرت دے پتا سردار لال سنگھ نے جنوری 1948 وچ سنائے سن۔ پر میں سبھ کجھ بھل چکا ساں۔ پنجابی ٹریبون وچ

گنجی بار بارے پڑھ کے ایس پنڈ داوسنیک سردار وریام سنگھ داسپتر سورا سنگھ مینوں  
گھر آ کے ملیا۔ ایس نے کیمپ دے حالات پھیر سنائے۔ پہلا وڈا سا کا چک  
111 وچ واپریا۔ لوک پنڈ چھڈ کے کیمپ وچ آ گئے سن۔ پر بھرے بھرائے گھر  
دیکھن جاندے رہندے سن۔ اک دن نال لگدے عیسائیاں دے پنڈاں دے  
لوک پنڈ لٹن آ گئے۔ کیمپ والیاں نوں خبر پہنچ گئی۔ اوہناں ہتھیار بند گھوڑا سوار جتھا  
تے اک پیدل جتھا ہر سمیں تیاری دی حالت وچ رکھیا ہو یا سی۔ گھوڑا سوار جتھا  
گھوڑیاں دوڑا کے موقعے تے پہنچ گیا تے پھرتی نال حملہ کر کے 11 عیسائی مار  
دے۔ باقی جان بچا کے بھج گئے۔ عیسائی اپنے ڈر گئے کہ اوہناں نے پلس نوں  
اطلاع تاں کیہ دینی سی اپنے مردے دی نہ چکے۔ جدوں دس گیاراں دناں پچھوں  
کیمپ والے پنڈ نوں چھڈ کے میاں چنوں کیمپ وچ جاندیاں چک نمبر 111 وچوں  
دی لنگھے تاں ایہہ گیاراں لاشاں ا بے او تھے ای پیاں سن۔

دو جا واقعہ چک 105 ونجاری دا ہے۔ اتھے گواہنڈ وچ کجھ پٹھاناں  
دے پنڈ سن۔ پٹھان کجھ جاٹگلیاں نوں نال لے کے ونجاری نوں لٹن آ گئے۔  
کیمپ والیاں نے گھوڑا سوار تے پیدل دو جتھے بھیج دتے۔ ایہناں پورے جوش وچ  
بلہ بول کے پٹھاناں دے پنچ چھ بندے مار دتے۔ کجھ زخمی حالت وچ کما داں،  
چریاں وچ جا لکے تے باقی ساری دھاڑ بھج گئی۔ اک سکول ماسٹر بڑا معتصب سی۔  
اوہ پاکستان بن نال ہی ہندواں سکھاں دے خلاف مسلماناں نوں بھڑکاؤن لگ  
پیا سی۔ جتھے والیاں نے ایس نوں مناسب سزا دین لئی گٹ گٹ کے اوس دی  
کوئی ہڈی پسلی شہوتی نہ رہن دتی۔ اپنے ولوں اوس نوں مار کے سٹ گئے پر اوہ پنچ  
گیا تے اوس نے پچھوں تفتیش کرن آئی پلس نوں جتھے وچ آئے کجھ معتصب  
آدمیاں دے نام دے دتے۔ ایہناں وچ حسرت دے پتا سردار لال سنگھ داناں

وی سی۔ پلس کیمپ وچوں چھ (یاں اٹھ) آدمی پھڑ کے لے گئی۔ سردار لال سنگھ ایس سمیں کسے طرحاں گرفتاری توں بچ گئے۔ جیہڑے پھڑے گئے سن اوہناں نے پاکستانی جیل وچ بڑے تہیے جھلے۔ کوئی ڈیڑھ سال پچھوں ایہہ قیدیاں دے تباد لے سمیں واپس بھارت وچ پہنچے۔

ہن کیمپ والیاں نوں ایہہ خدشہ ہو گیا کہ مسلماناں دے پنڈ پاکستانی پلس دی مدد نال کیمپ اُتے حملہ کرن گے۔ ایس لئی اوہ اک دن لوڑ والا سامان گڈیاں تے لد کے میاں چنوں پہنچ گئے۔ تے سردار اُجل سنگھ دے کپاہ دے کارخانے وچ جا کیمپ لایا۔ اتھے وی ایہناں نوں اک وڈا معرکہ مارنا پیا۔ میاں چنوں توں کوئی دس میل دوری قصبہ تلنبہ جو مکھ روپ وچ ہندواں دا قصبہ سی تے ہندواں دی وسوں چار، پنج ہزار دے قریب ہووے گی۔ پر ایہہ لوک اپنے ڈرے ہوئے سن کہ اپنے آپ میاں چنوں پہنچن دی دلیری وی نہیں سن کر رہے۔ حالانکہ تلنبے دے نیڑے دسوں سکھان دے دو چھوٹے چھوٹے چک کافی چر پہلاں میاں چنوں پہنچ گئے سن۔ ایہناں نے کسے طرحاں میاں چنوں کیمپ دے سکھاں نوں سنبھالیا جیسا کہ کسے طرحاں ایہنوں کڈھو۔ سردار سچا سنگھ دے دن مطابق کیمپ والیاں نے ہتھیار بند جتھے دے نال کوئی پنجاہ سٹھ گڈے بھیجے۔ ایہہ جتھا تلنبے دی ساری ہندو آبادی کیمپ وچ لے آیا۔

ایس کیمپ وچ لوک بڑے لمے سمیں تک رُلدے رہے ایہناں دی آخری ٹولی دسمبر 1947 دے انت وچ بھارت پہنچی۔

ساندل بار وچ ایس اُجاڑے دا سبھ توں وڈا کیمپ چوہڑکانے وچ سی۔ پروفیسر شیر سنگھ شیرتے ڈاکٹر پرکاش سنگھ جموں دوویں ایس کیمپ وچ رہے سن۔ ایہناں دے دن مطابق کیمپ 12 مربع میل رقبے وچ پھیلیا ہویا سی۔ ساندل بار

دے پنڈاں وچ تاں کئی تھائیں بڑے ڈٹویں مقابلے ہوئے۔ دو تن پنڈاں نے تاں اپنے نالوں چھ چھ گنا ہتھیار بند ہجوم دا 24 گھنٹے (یاں ایس توں وی زیادہ سمیں تک) جاناں ہیل کے مقابلہ کیتا۔ پر ایس کیمپ وچ کوئی وڈی واردات نہیں ہوئی۔ ایس کیمپ وچ لوک کئی مہینے زلدے رہے سی کتے دسمبر وچ جا کے کیمپ خالی ہویا۔

ساڈے علاقے دے لوکاں نے پاکستان بن دی خبر تاں سن لئی سی پر ایہناں ستاں پنڈاں نوں 3 دسمبر تک کوئی خبر نہیں سی کہ باہر دُنیا وچ کیہ ہو رہیا ہے۔ ریڈیو ابجے اوڈوں تک پنڈاں وچ پہنچیا نہیں سی تے ہور کسے طرحاں خبر اتھے پہنچ نہیں سی سگدی۔ انج پنڈاں والے ہر واقعے دا ٹاکرا کرن لئی پوری طرحاں تیار سن۔ پرانے فوجیاں نے کسے حملے سمیں مقابلہ کرن دیاں پوری سکیمیاں بنائیاں ہوئیاں سن۔ ہر آدمی دی ڈیوٹی مقرر سی۔ رات نوں پنڈاں دے چونہہ پاسیں پکا پہرا لگدا سی۔ گواہنڈھی جاٹگلیاں نے دوستی پوری طرح نبھائی۔ اوہناں ساڈے نال کوئی ودھیکی نہیں کیتی۔ ایہہ سبھ کجھ ٹھیک سی پر ستاں پنڈاں وچوں کسے نوں کوئی پتہ نہیں سی کہ باقی پنجاب وچ کیہ کجھ واپر رہیا اے تے نہ ہی کسے نوں کدے ایہہ خیال آیا سی کہ سانوں ایہہ گھر بار چھڈنے پینے نیں۔ کوئی اپنانت واا کار و بہار کر رہے سن۔ پٹھے مکئی وغیرہ بیجے جا رہے سن۔ نرمے دی پوری سنبھال کیتی جا رہی سی۔ چوکے چلبے لوڑ مطابق لنبے پوچے جا رہے سن۔ ہل وگ رہے سن، ونے رات پانی دیاں واریاں سمیں سر لیاں جا رہیاں سن۔ جیون بالکل عام وانگ سی۔ ایہہ کجھ 3 ستمبر 1947 تک چلدا رہیا۔ 3 ستمبر سویرے میرے بھرا جسونت سنگھ نے مکئی بیجی۔ بار وچ اسیں مکئی گھٹ ای بیجدے ساں۔ پر جا پدا ہے کہ جسونت سنگھ توں کوئی غیبی طاقت ایہہ فصل بجواری سی۔ اسیں مکئی بیج کے

پاکستانیاں لٹی چھڈ آئے۔ اتے سانوں ایدھر آوندیاں ہی پکی پکائی مکئی دی فصل  
میل گئی۔

3 ستمبر دی رات نوں اک بھیانک واقعہ واپریا۔ اک نویں قسم دا گھلو  
گھارا۔ روٹی تک کھا کے لوکی دکھ دکھ ٹولیاں وچ کھڑے اک دو بے توں پچھ  
رہے سن ”کتوں کوئی خبر آئی اے؟“ پہرے والے آچھاپنے ٹکانیاں تے پہنچ گئے  
سن۔ چنگا ہنیرا ہو چکیا سی۔ جمعدار وزیر سنگھ دا لڑکا دورین پھڑی اپنے چو بارے  
تے کھڑا سی۔ اچانک اوس نے اُچی آواز وچ دسیا۔ ”اٹھتر ولوں دو ٹرک آرہے  
نیں“ سارے دوڑ کے اوس پاسیں گئے۔ دو ٹرکاں دیاں لائحاں صاف دس رہیاں  
سن۔ ایہہ ٹرک فوجی ہی ہوسکدے سن۔ تے فوج وی پاکستانی ہووے گی۔ بھارتی  
فوج تاں اوس سمیں تک پاکستانی علاقے وچوں جا چکی سی۔ پاکستانی فوج دے  
آؤن دا کیہ مطلب ہوسکد اسی؟ یاں تاں اوہ پہلاں سکھاں دے مرکز چک 79  
نوں تباہ کر کے پھیر دو جیاں پنڈاں نوں گھیرن گے یاں پھیر سانوں ایہہ دن  
آرہے ہن کہ تسیں پاکستان دی رعایا ہوڈرن دی لوڑ نہیں۔ اسیں تہاڈی حفاظت  
کراں گے۔ دونوں وچوں کوئی وی اندازہ ٹھیک ہوسکد اسی۔ خیر قیاس کاری لٹی  
بہت سماں نہیں سی۔ چک 78 ساڈے چک توں صرف میل۔ ڈیڑھ میل دور سی۔  
چھتتی ہی ایہہ گڈیاں ساڈے پنڈ دی حد وچ پہنچ گئیاں۔ ایہناں وچ اک جیپ  
سی تے اک وڈا ٹرک۔ گڈیاں ساڈے بندیاں دے نیڑے آ کے رُکیاں۔ سردار  
وزیر سنگھ تے جمعدار نرائن سنگھ دا پتر چرن سنگھ اگے ودھے۔ جیپ دی اگلی سیٹ  
توں اک فوجی باہر نکلیا۔ گڈیاں دیاں لائحاں سدھیاں ساڈے لوکاں تے پے  
رہیاں سن۔ ایس لٹی اوہ پچھان نہ سکے کہ باہر نکلن والا فوجی کون ہے۔ اوہ ساہنے  
کھڑے نوجوان بچن سنگھ ول آیا تے اوس نوں چھٹی پا کے بولیا ”بھاجی واہ گورو جی

کا خالصہ واہ گورو جی کی فتح“ ساریاں دی جان وچ جان آئی۔ ایہہ فوجی کیپٹن برکت سنگھ سی۔ اوس دے نال ڈوگرا جواناں دا اک سیکشن سی۔ اٹھ یاں دس جوان۔ کیپٹن برکت سنگھ بچن سنگھ دی بھین بی بی تارو دا دیوری۔ بی بی تارو دا پتی سردار گیان سنگھ محکمہ نہر دے ہیڈ آفس وچ لاہور نوکری۔ کیپٹن برکت سنگھ دی پلٹن وی پنجاب وچ سی۔ دوہاں گورنمنٹاں ایہہ فیصلہ کیتا ہویا سی کہ سکھ رجمنٹ دی کوئی نکلڑی پاکستانی علاقے وچ نہیں جائیگی تے بلوچ رجمنٹ بھارتی کھیترو وچ نہیں وڑے گی۔ ایس لئی برکت سنگھ ڈوگرے جوان نال لے کے آیا سی۔ بی بی تارو نے اوس نوں زور دے کے بھیجیا سی اپنے ماپیاں نوں کڈھ کے لیاؤن لئی۔ جدوں برکت سنگھ نے دسیا کہ پچھلا سارا علاقہ تاں خالی ہو چکيا ہے۔ تسیں اتھے کیہ کردے ہو۔ تاں ایس خبر دا اثر ہیروشیما تے ڈگے ایٹم بمب نالوں گھٹ نہیں سی۔ ہیروشیما والے تاں سارے ختم ہو گئے۔ کچھ اوہناں نوں رون والا کوئی نہ رہیا۔ پر بارتوں اجڑ کے آئے لوکاں دیاں دو پیڑھیاں اج تک رو رہیاں ہن۔ اتے اگانہہ آؤن والے پتہ نہیں کدوں تک روندے رہن گے۔

سارے علاقے نے ایکا کیتا ہویا سی کہ اکلا ٹبر گھر چھڈ کے کوئی نہیں جائے گا جے جانا پیا تاں اکٹھے نکلاں گے۔ برکت سنگھ نوں علاقے دا ایہہ فیصلہ دس دتا گیا۔ آفرین ہے بی بی تارو تے بچن سنگھ دے پتا سردار نرائن سنگھ دے جس نے علاقے ولوں کیتے فیصلے نوں انت تک نبھایا۔ ہُن جدوں برادری ختم ہو رہی سی۔ بھائی چارے ولوں بائیکاٹ دایاں طعنے مہینے سنن دا کوئی خطرہ نہیں سی۔ جمعدار صاحب اپنے پروار نوں لے کے ٹرک وچ آسکدے سن پر اوہناں نے بھائی چارے دے بالکل وکھرے حالات وچ کیتے فیصلے نوں سرمتھے تے نبھایا۔ آفرین ہے کیپٹن برکت سنگھ دے جس نے کل دس جواناں نال کوئی پنج ہزار

اُجڑے پجڑے لوکاں دا قافلہ کوئی ڈیڑھ سو میل دے نہایت خطرناک علاقے  
 وچوں دی لے جان دا حوصلہ کیتا۔ مسلماناں دے پنڈاں دے سارے ہندو  
 دوکاندار وی ساڈے پنڈ وچ آگئے ہوئے سن۔ ایس لئی ہن ایس قافلے نال جان  
 والیاں دی گنتی پنج ہزار دے قریب ہو گئی سی۔

گور دوارے دا سٹکھ پوریا گیا۔ سارا پنڈ اکٹھا ہو گیا تے ساریاں نوں  
 ایہہ موت دی سزا سناؤن ورگی بھیا تک خبر سنا دتی گئی۔ ”اساں بھلکے سویرے  
 اپنے گھر بار چھڈ کے نویں بنے دیش بھارت ول چالے پاؤنے ہن۔ راتورات  
 تیاری کر لو۔“ گور دوارے بیٹھ کے ہی نال دے پنڈاں نوں چٹھیاں لکھیاں  
 کھیاں۔ سارا ویروادے کے لکھ دتا گیا کہ بھلکے 4 ستمبر نوں سویرے 10 توں 12  
 وجے دے دوران چھنب بنگلے والے پل کول پہنچ جاؤ۔ ایہہ چٹھیاں جوان  
 منڈیاں نے گھوڑیاں تے چڑھ کے ساریاں سکھاں دیاں پنڈاں وچ پہنچائیاں۔

کسے دی کوئی تیاری نہیں سی۔ کجھ ایک گھراں کول گڈے وی نہیں سن۔  
 جیہڑے گڈے سن اوہناں نوں واگن دا ٹائم نہیں سی۔ ضروری مرمت لئی وی  
 وسہل نہیں سی۔ ہر ٹبر نے بہت ضروری بسترے تے کپڑے چکے۔ کجھ تھوڑے  
 بھانڈے لئے، کجھ آٹا، دال، لون، گھیو جتا کوئی چک سکدا سی چکیا۔ باقی بھرے  
 گھر چھڈنے سن۔ ”گھر“ کنا اہم کڈا مہان، کنا پیارا لفظ ہے۔ خاص کر پنجابی  
 لوکاں لئی۔ کرائے دا گھر چھڈن لکھیاں وی دل اداس ہوندا ہے۔ ایہہ گھرتاں  
 ساڈے بزرگاں نے کھیاں مورچیاں تے تیغاں مار کے حاصل کیتے سن۔ اوہ گھر  
 چینہاں دے اک اک ردے وچ سو سو تہجھاں چنیاں ہوئیاں سن۔ جیہناں دے  
 توڑے (شہتیر) وڈھدیاں تے چھانگدیاں پنڈ دی جوانی دا مڑھکا آب حیاں  
 دیاں بونداں وانگوں چویا سی۔ جیہناں دیاں کندھاں لہدیاں پنڈ دیاں ٹھیاں



نے ملتان دی کڑکدی ڈھپ وچ ہس دیاں کھیڈ دیاں پہاں بھار ہو کے لے لائے  
 سن جیہناں دے پھس کے پاوندیاں دلاں دی ڈونگھائی وچوں اسیساں نکلیاں  
 سن۔ ایہہ گھر چھڈنے سن اساں۔ نہایت بے وی دی حالت وچ۔ کجھ اک  
 گھراں دیاں بروہاں اگے اے سر یہہ دے پتے لمک رہے سن۔ بہتیاں گھراں  
 دیاں کندھاں اُتے بیٹی وسا کھی نوں بنائے ویل بوٹے اے چمکدے سن۔ اک  
 دونہہ نویں بنے کوٹھیاں دیاں اے کندھاں وی نہیں سن لنبیاں۔

رتجھاں نال بنائے ہوئے چو بارے، اُچے گیٹ جیہناں پٹھ دی لدے  
 لدائے اُوٹھ لنگھ جان۔ کھلیاں پٹھکاں جیہناں وچ دس دس پلنگ ڈیہہ جان۔  
 سجیاں سجائیاں ثباتاں جیہناں دیاں پڑچھتیاں اُتے بھانڈیاں دیاں ٹینڈاں لکیاں  
 ہونیاں سن۔ ایہہ سبھ کجھ چھڈ کے ترنا سی۔

رات نوں کس نے سونا سی۔ کچھڑ والے ایانے وی نہ ستے۔ اوہناں  
 دی معصوم عقل نوں وی جا پدا سی کہ کوئی ان ہونی گل ہو رہی ہے۔ لوکاں دو دو  
 ڈنگاں دیاں روٹیاں پکالئیاں۔ کجھ مٹھیاں کڈھ لئیاں، پنخیری بنا لئی، جو کسے  
 نوں سجھیا کر لیا۔

ساڈے گھر دارب راکھا سی۔ میرے پتا جی سن 1941ء وچ چلانا کر  
 گئے سن۔ ایس سال میں بی۔ اے کیتا سی۔ اوہناں دی موت نے میرے جیون  
 دیاں ساریاں سدھراں تے پانی پھیر دتا۔ ایس اُجاڑ سمیں گھر دی ساری ذمے  
 داری ساڈے ماتا جی دے سرتے سی۔ میرا چھوٹا بھرا جسونت سنگھ اے مساں  
 پندرہاں سولہاں سال داسی۔ تیجا سریندر مساں دس سال دا۔ اوہناں کولوں جو کجھ  
 ہو یا کیتا۔ ساڈی چھوٹی بھین وتی (اندرون کور) وی انہیں دنیں ساڈے کول ہی  
 سی۔ اوس دے سوہریاں نے خود ہی بھیجی سی کیونکہ اوہ نیلی بار وچ بڑے کتھاں

بیٹھے سن۔ ساڈے چاچے دے گھر ساڈی ماسی سی۔ ایہناں دوہاں جیاں نے  
 بڑیاں شاں سہاریاں سن۔ ایہناں دے تن پتر تھوڑی جیہی وتھ نال وچھوڑا دے  
 گئے سن۔ ہن ایہناں دیاں تن لڑکیاں سن تے کھچڑاک کا کا۔ چاچے تے جسونت  
 نے گڈے تے گھر دا سامان لے دیا۔ جتا کو لے دیا جاسکدا سی۔ جمعدار نرائن سنگھ  
 ہوراں نال ساڈے رشتے داری وی سی۔ پر رشتے داری توں ودھ دوہاں ٹہراں دی  
 دوستی سی۔ اوہناں کہہ بھچیا سی کہ ساڈی ماں جی، بھین جی، ماسی تے اوسدے بچے  
 اوہناں دے ٹرک تے جان گے۔ گڈے نال چاچے نے تے جسونت سنگھ نے  
 جانا سی۔ پر جانا ٹرک نے وی قافلے دے نال ہی سی۔ سارے پنڈ دیاں جوان  
 لڑکیاں وی ایسے ٹرک وچ بٹھائیاں گئیاں۔

قیامت دا دن آ گیا۔ 4 ستمبر دا سورج چڑھیا۔ اجیہا سورج پہلاں  
 کدے نہیں سی چڑھیا۔ پنڈ دے لوک گور دوارے گئے۔ جس گور دوارے دی  
 کدہ آتے پتھر لکھیا ہو یا سی۔ ”اچل نیو دھری گرنانک نت نت چڑھ سوائی“ تے  
 پٹھاں لکھیا سی ”45 ریٹرز سکھز۔ گور دوارہ چک نمبر 79/15 ایل بسنت پورا“  
 ارداسا سودھیا۔ ارداس وچ کیہ کیہا ایہہ مینوں پتہ نہیں کیونکہ میں تاں اوتھے حاضر  
 نہیں ساں۔ سری گورو گرنتھ صاحب دیاں دو بیڑاں گور دوارے دیاں سن تے  
 تیجی ساڈے گھر سی۔ ایہہ تے بیڑاں تے رومالے دو ٹرکاں وچ پائے تے ایہہ  
 ٹرک لے جان دی ذمے داری صوبیدار میجر میا سنگھ دے بھرا ہری سنگھ نے لئی۔  
 (صوبیدار میجر پنچ چھ سال پہلاں چلانا کر گیا سی) ہری سنگھ نے گھر دا ہور کوئی  
 سامان نہیں سی چکیا۔ بس گل دیاں کپڑیاں وچ ہی ٹر پیاسی۔

لوکاں نے گھر دا سارا ساز و سامان وی بیڑیاں وچ کھلاریا ہو یا سی۔ نال  
 لے جان والیاں وسطاں چن کے کڈھن لئی۔ ہن پنڈ دے مسلمان کیاں نوں

تے ہمسایاں نوں سدیا تے کہا ”جو چکنا ہے چک لوؤ“۔ کوئی کمی کے چیز نوں ہتھ نہ لاوے۔ سارے رور ہے سن۔ کئی بھباں مار رہے سن۔ آخر وسطاں ہتھیں پھڑ پھڑ کے ونڈیاں۔ ساڈا ٹبر کوئی بہت امیر گھر انہ نہیں سی۔ پھیر وی گھر بھریا ہویا سی۔ رضایاں سنبھالن لئی گوجرانوالے توں منگوائی ہوئی پٹی گامے لوہار نوں چکائی۔ میری گھر والی دے داج دے بسترے ناموں عسائے تے آسومراشن نوں دتے۔ نواری پلنگ رتجھاں نال اُنے ہوئے رنگین سوت دے منجے میریاں بھیناں مہندرو، وتی تے میری پتی نرنجن کور دیاں کرڑی محنت کر کے اُنیاں ڈیزائن دار دریاں۔ سدھیاں کرتار پور توں منگایاں ہوئیاں کرسیاں (کرسی اوہنیں دینیں پنڈاں وچ بڑی وڈی چیز منی جاندی سی) میرے ساٹرا وچوں لیاندے ہوئے چینی دے برتن سبھ کجھ بڑی بیدردی نال سٹیا۔ لین والے نہ نہ کر رہے سن۔ دین والے دھکے نال دے رہے سن۔

گڈے جون والی اک جوگ چھڈ کے باقی ڈنگراں دے رے کھول دتے۔ کنڈھیاں مجھاں جیہناں دے ہوانے چڈیاں وچ نہیں سن آوندے۔ نارھے بلد جیہڑے چھاٹ دی چھو نہیں سن سہار دے۔ ساہناں ورگے ویہڑ کے جیہڑے گھیو دیاں نالاں دے دے کے پالے سن سبھ کھلے چھڈ دتے اتے آخری تھاپی دے کے کہ دتا ”جاؤ بھائی ہن ساڈا تہاڈا رشتہ ختم ہو گیا“۔ کھلے چھڈے ڈنگر وی کلیاں توں نہ ہلن اوہ رات دے ہی حیرانی نال سبھ کجھ ہوندا ویکھ رہے سن۔ کئی پھوٹاں ساری رات بیٹھے ہی نہیں سن۔

ہن لوکاں نے کلیجے تے ہتھ رکھ کے گڈے جوئے تے اتھے اپنے گھر دے اک واقعے دا میں خاص ذکر کرنا چاہوندا ہاں۔ ساڈی دادی مائی اندو جس نے ایس پنڈ دے پہلے چلے وچ اگ بالی سی۔ جس دیاں پکیاں ہوئیاں روٹیاں

ادھے پنڈ نے کھادیاں سن۔ اوہ اہجے جیوندی سی۔ پر پچھلے پنجاں چھیاں سالاں  
توں بالکل انھی سی۔ اوہ کلم کلی اپنے کمرے وچ بیٹھی رہندی سی۔ نوہاں تے  
پوترے پوتریاں اوس دی اوہ سنبھال نہ کیتی جو کرنی چاہیدی سی۔ مائی نے اپنی عمر  
دے پچھلے سال بڑے اوکھے کئے۔ گڈاں جو کہ اوس نوں پہلی واردیاں سن ”ماں  
چل گڈے تے بیٹھ ہن اساں ایتھوں چلے جانا ایں۔ اتھے مسلماناں داراج ہو گیا  
اے“ ماں دا پٹھلا ساہ پٹھاں تے اُتلا اُتے رہ گیا۔ اوہ کجھ بول نہ سکی۔ اوس نوں  
سھاو لئی گڈے اُتے تھاں بنایا ہو یا سی۔ ماں نوں اوتھے لٹا دتا گیا۔ جیہڑی ماما  
26 سال پہلوں بٹالہ توں چک 79 گڈے تے سفر کردیاں روز ٹبر نوں تازہ  
کھن، لسی دیندی رہی سی تے پروٹھے پکا کے دیندی رہی سی۔ اج اوس وچ  
گڈھے تے چڑھن دی ہمت نہیں سی۔

آخر لوکاں نے بلد بکے تے گڈے پنڈوں باہر نکلے تے نکلے وی  
ساڈے مربعے وچوں دی۔ جس مربعے وچ ساڈے بزرگاں نے پنڈ دا پہلا جوترا  
لایا سی۔ جمعدار وزیر سنگھ دے چھوٹے لڑکے زندر سنگھ نے اپنے سائیکل دے کیرر  
تے صرف ہارمونیم رکھیا ہو یا سی۔ اوہ اُچی سُر وچ کسے شاعر دی گورو گو بند سنگھ جی  
دے آنند پور چھڈن بارے لکھی نظم گا رہیا سی۔ مینوں اج ایس نظم دے پہلے کجھ  
لفظ ہی یاد ہن۔ ”سکھیں وسیں آنند پور یے۔۔۔۔“ لوک گڈے ہکی جا رہے سن  
تے پچھانہہ مڑ مڑ کے اپنے گھراں نوں وی ویکھدے جا رہے سن۔ کڈے وڈے  
جیرے دی لوڑ ہے۔ ایڈی وڈی سٹ سہارن لئی۔ ایس دا اندازہ اوہ لوک لا  
سکدے ہن جیہناں دے سر بیتی ہووے۔ انت گڈے چھنب بنگلے والے پل تے  
چج گئے جتھے ہو رناں پنڈاں دے لوک ساڈی اڈیک کر رہے سن۔

سجنو! انج اُجڑی گئی بار۔۔۔۔۔ لفظ ”اُجڑی“ کہہ دینا یاں لکھ دینا

سوکھا ہے پر اج 47 ورہے بیتن پچھون وی ایس اجاڑے نوں یاد کر کے دل نوں  
 قابو وچ رکھنا کے مہان سادھک دا ہی کرتب ہو سکدا ہے۔ ایہہ کتھا ہے ساڈے  
 چھیاں ستاں پنڈاں دی، ہر علاقے دی، ہر پنڈ دی اپنی کہانی ہے۔۔۔۔۔ افسوس  
 کہ ایہہ کجھ پنجابیاں دے سر بیتنا سی۔ اوس دا اک فیصد وی کسے نے قلم بند نہیں  
 کیتا۔ میں بہت کجھ چھڈیا ہے۔ صرف سر بیتی دا ایہہ پر چھاواں جیہا ہی پیش کیتا  
 ہے۔ اج کوئی ادھی صدی پچھوں جدوں میں ایس نہ بیان کیتے جان جوگے  
 اجاڑے نوں بیان کرن دا جتن کیتا ہے تاں شاید میری لکھت وچ دلچسپی لین  
 والے وی تھوڑے لوک رہ گئے ہون پھیر وی مینوں تسلی ہے۔ گنجی بار لکھن لئی میں  
 پچھلے چالیس سالوں توں تانگھ رہیا ساں۔



## تے قافلہ ٹر پیا

جھنب بنگلے والے پل دے دوہیں پاسیں دُور دُور تک گڈیاں دیاں  
 لائناں لکیاں ہوئیاں سن۔ ہر پنڈ دے معتبر بندیاں نوں سد کے تسلی کیتی گئی کہ  
 اوہناں دے پنڈ دے سارے ہندو سکھ پہنچ گئے سن۔ ہن فوجیاں نے ایہناں  
 جیوندیاں لاشاں دے قافلے نوں کوئی تھوڑی بہت ترتیب دے کے چلن دا حکم دتا  
 تے قافلہ ٹر پیا۔ اجیہی بے وی، لاچارگی تے عاجزی دی حالت وچ جس طرحاں  
 سکھاں دا قافلہ پہلاں کدے نہیں سی ٹریا۔ افسوس کہ ساڈے نیتاواں وچ دُور  
 شادی گھاٹ کارن شیراں دی قوم نوں گڈاں وانگ بھجن لئی مجبور ہونا پیا۔ اج  
 (4 ستمبر 1947) تک پاکستان بنے نوں ویہہ دن ہو گئے سن۔ پاکستان دا اعلان  
 تاں کافی چہ پہلاں دا ہو گیا سی تے قتل و غارت دوہیں پاسیں کئی مہینے پہلاں توں  
 چل رہیا سی۔ پر اے تک ساڈی سرکار نے پاکستان وچ آئے دور دراڈے  
 علاقے وچوں ہندواں، سکھاں نوں کڈھ کے لیاؤن لئی سوچیا ہی نہیں سی۔ ساڈا  
 علاقہ بچ کے نکل آیا تاں کیپٹن برکت سنگھ دی بہادری نال تے برکت سنگھ سرکار دا  
 بھیجیا نہیں سی گیا۔ اپنے کمانڈنگ افسرتوں اجازت لے کے اپنے آپ گیا سی۔  
 سِدھنے علاقے دے سکھاں دے 15 پنڈ تے نال دے پنڈاں دے ہندو اپنی  
 ہمت نال خانیوال کمپ وچ پہنچ گئے جتھے اوہ لمے سمیں تک رُلدے رہے۔ علاقہ  
 جہانیاں وچ تیرھاں پنڈ سکھاں دے سن تے ہندو آبادی وی کافی سی۔ ایہناں دی  
 کسے سار نہ لئی۔ انت ایہناں نوں پاکستانی فوج ہی ایدھر پہنچا کے گئی۔ راہ وچ

پاکستانی فوجیاں نے قافلے دے سکھ لیڈرنوں مار دتاتے باقی قافلے نوں پٹوواں وانگ ہک کے سرحد تے چھڈ کے گئے۔ پھیر وی اوہناں دی مہربانی ہے کہ ایہناں نے راہ وچ کسے قافلے اُتے کتے حملہ نہیں ہون دتا۔ کچے کھوہ لاگے سکھاں، ہندواں دے سانجھے تن یاں چار پنڈن جو اک تھاں اکٹھے ہو گئے سن۔ ایہناں وچوں کجھ ہمت والے لوک راتوں رات نکل کے میاں چنوں کیمپ وچ جا وڑے۔ باقیوں اُتے اگلے دن چوہیرے دے مسلماناں نے حملہ کر دتا۔ پچھے رہے سارے مرد قتل کر دتے تے عورتاں دی پچھوں کوئی اُگھ سکھ نہیں سی نکلی۔ ضلع لائل پور دے اوس پنڈ دی کہانی بہتیاں نے سنی ہووے گی۔ جس نے 24 گھنٹے یاں ایس توں زیادہ سماں باہروں آئے ہجوم دا ڈٹ کے مقابلہ کیتا پر جدوں آخری لڑائی لئی کر کنسی پئی تاں ماپیاں نے جوان دھیاں دے اپنے ہتھیں سر وڈھے۔ ساندل بار دے وسنیک پروفیسر شیر سنگھ دے دن مطابق ضلع شیخوپورہ دے پنڈ بھلیر وچ وی اجیہا ہی واقعہ واپریا۔ ساندل بار وچوں آیا اوہ انکھ دا دھنی سنگھ اے جیوند اے۔ جس نوں اکلا دیکھ کے اوس دی خوبصورت پتی نوں کھوہن لئی غنڈیاں دی اک دھاڑ نے گھیر لیا سی۔ غیرت دی پوج ثیار نے پتی نوں دنگار کے کہا ”جے گورو دا سکھ ہیں تاں پہلاں میرا سر وڈھ تے پھیر ایہناں وچوں ادھیاں نوں مار کے مرین“۔ جدوں شیردل نوجوان پتی دی دھون وڈھ کے وھاڑویاں اُتے ہلہ کرن لئی ودھیا تاں پنجیاں تہیاں دی ایہہ ٹولی سنگھ دی لہو لڑی کرپان دیکھ کے ہرنا دی ڈار وانگ دوڑ گئی۔ ایس نوجوان نے جوہن بزرگ ہے ایدھر آ کے دو جاویاہ نہیں کروایا۔ ساری عمر اپنی اوس دیوی روپ پتی دی یاد وچ اکیلیاں گزاری ہے۔ جس نوں اوہ اپنے ہتھیں شہید کر آیا سی۔ ضلع شیخوپورہ دے وسنیک ڈاکٹر پرکاش سنگھ جموں نے اپنے علاقے دے اک ادھکھڑ جوڑے دی اجیہی ہی کہانی سنائی۔ ایہہ

جوڑا لکدا چھپدا کسے دو جے پنڈتوں اپنے پنڈنوں جا رہیا سی۔ بڑے تہائے سن۔ اک کھوہ توں پانی پین نوں نکلے تاں چری وچ لکے غنڈیاں تے جدوں سنگھ نے کرپان میان وچوں کڈھی تاں گھر والی نے لکاریا ”مینوں ایہناں بوچڑاں دے وس پا کے نہ جائیں۔ پہلا وار میرے سرتے کر“۔ پتی نے سہرے بنھ کے لاواں لے کے سمیڑ کے لیاندی جیوں ساتھن دی دھون تے بھرواں وار کیتا۔ پر اپنے نوں پچھوں اوہدے سرتے ڈانگ آوجی۔ کرپان دھون دن تھاں جباڑے تے وچ پر پھٹڑ ہوئی شیرنی نے ایسے حالات وچ دوڑ کے کھوہ وچ چھال مار دتی۔ دھاڑ وی اوس ڈگے پے شیر دل نوں مار کے چلے گئے۔ کرنی کرتا دی کھوہ وچ پانی تھوڑا سی۔ بی بی ماہل پھڑ کے کھڑی رہی۔ ایس نوں اگلے دن ایہوں لنگھدے سکھاں دے اک قافلے نے کھوہ وچوں کڈھیا۔ ایہہ بی بی انج تک جیوندی ہے۔ اتے اوس دے جباڑے تے دسدا ڈونگھے پھٹ دانسان گورنمنٹاں ولوں دتے جان والے کسے وی بہادری دے میڈل توں گھٹ اہمیت والا نہیں۔

ایس توں پہلاں مارچ 1947 وچ پوٹھوہار دے علاقے وچ ہوئے ہندو سکھاں دے قتل عام وچ بوہا خالصہ کلر پنڈاں وچ جو یں مرداں دے میدان جنگ وچ جھوجھ مرن پچھوں پبیاں نے کھوہاں وچ چھالاں مار کے اپنی پت تے قوم دی انکھ بچائی اوہ کہانی بہتیاں نوں یاد ہووے گی۔ دسیا جاندا ہے کہ کھوہ بھر گئے سن۔ ایہہ ساری ہولناک داستان پچھلیر لے سال ”دور درشن“ اتے دکھائی گئی فلم ”تمس“ وچ بڑے فنی ڈھنگ نال دکھائی گئی سی۔ ایہو جیہاں انیکاں کہانیاں میری عمر دے پنجابیاں نے سنیاں ہون گئیاں۔ پر جدوں پنجاب دے ہندو سکھاں اتے ایہہ سبھ کجھ واپر رہیا سی دلی وچ آزادی ملن دی خوشی وچ جشن منائے جا رہے سن۔ شادیاں وچ رہے سن۔ آتھبازیاں چل رہیاں سن۔ دیپ مالاواں



ہورہیاں سن۔ جس پنجاب نے آزادی دے حصول لئی باقی سارے دیش نالوں  
کئی گنا زیادہ حصہ پایا سی اوس دا کسے نوں چت چیتا ہی نہیں سی۔

نویں بنے بھارت کول اوس ویلے اپنی فوج سی، ایسے ٹرک سن، اینیاں  
ٹریناں سن کہ جے ساڈی نویں بنی سرکار نوں پنجاب دا کجھ فکر ہوندا تاں اوہ  
پاکستانی پنجاب دی ہر نکر وچ وسدے ہندو سکھاں نوں دساں دتاں وچ کڈھ کے  
لیاسکدے سن۔ پر انج جا پدا ہے کہ پنجاب دا کسے نوں دھیان ہی نہیں سی، چیتا ہی  
نہیں سی۔

کجھ چر پچھوں مسٹر جناح نے بیان دتا سی کہ بھارتی پنجاب وچ تن لکھ  
مسلمان مارے گئے سن۔ ماسٹر تارا سنگھ نے جواب دتا سی کہ مسٹر جناح دا اندازہ  
ٹھیک ہو سکدا اے پر پاکستان وچ مارے گئے ہندو سکھاں دی گنتی تن لکھ توں  
زیادہ ہے۔ جے ماسٹر جی دے اندازے نوں کجھ گھٹ کر کے مارے گئے ہندو  
سکھاں دی گنتی ڈھائی لکھ من لئیے تاں وی کیہ اپنے لیڈراں توں پچھیا جاسکدا ہے  
کہ جدوں پنجاب (تے بنگال) وچ انج خون دیاں ندیاں وگ رہیاں سن دلی وچ  
کس خوشی اُتے جشن منائے جا رہے سن؟ جلیانوالہ باغ وچ انگریزاں ہتھوں  
مارے گئے ڈھائی سولوکاں دا اج تک سرکاری پدھر اُتے سوگ منایا جاندا ہے۔  
اوہناں دی یادگار وی بنائی گئی ہے۔ پر ساڈی اپنی سرکار دی ان گہلی تے لا پرواہی  
والے وطرے کارن مارے گئے ڈھائی لکھ دیش واسیاں نوں ساڈے لیڈراں نے  
کدے یاد تک نہیں کیتا۔ کیہ پنجاب وچ مرن والے انسان نہیں سن؟

خیر قافلہ ٹر پیا۔ ایہہ قافلہ منگمری۔ لاہور والے پاسیوں دی نہیں سی جانا  
کیونکہ اوہ لما سی تے ودھیرے خطرناک وی سی۔ ہن وہاڑی۔ بورے والا۔  
پاکپن وچوں دی لنگھ کے سلیمانکی راہیں فاضلکا پہنچنا سی۔ گڈے ساریاں

زمینداراں کول وی نہیں سن پر کیاں، راہکاں ہندو دوکانداراں دی حالت خاص کر ترس یوگ سی۔ ایہناں دے ایانیاں تے بڈھیاں زنانیاں نوں تاں لوکاں نے کسے نہ کسے طرح گڈیاں اُتے بٹھالیاں سی۔ پر کجھ گنتی دے گڈے پنج ہزار دے ہجوم نوں کیوں چک سکدے سن؟ گنجی بار دے وسنیک پیدل چلنوں وی نہیں سن ڈردے۔ اوہ لمیاں لمیاں منزلاں الا نکھن دے عادی سن۔ پر اجیہے لمے پینڈے اودوں کیجے گئے سن جدوں سریر ہی نہیں دل وی جیوند اسی۔ ایس ویلے سریر ہی ہل جل کر رہیا سی۔ دل ساہ ست گوا چکا سی۔ ایسے کر کے میں ایہناں نوں جیوندیاں لاشاں کہا ہے۔ ایہہ مردے ہان۔ ایہہ قبراں وچوں اُگی زندگی رڑھدی جا رہی سی جویں موت ایہناں مسافراں نوں جھنجھوڑ جھنجھوڑ کے آکھ رہی ہووے ”جاؤ اوجے مینوں تہاڈی لوڑ نہیں، جاؤ کجھ چر ہو ر ایس زندگی داسیا پا کر لوؤ“ ستر چکھتر سالوں دے بڈھے، ہتھاں وچ ڈگوریاں پھڑی ڈگدے ڈولدے جا رہے سن۔ ادھکھوڑ تیویاں، بچے کدھاڑے ماری تے سراں تے پٹولیاں چکی لتاں دھونڈیاں جا رہیاں سن۔ دس دس گیاراں ورہیاں دے بچیاں نوں اج کوئی انگلی وی پھرن لئی نہیں سی لبھدی۔

پسوواں دے کھراں نال، گڈیاں دے پہیاں نال تے پیدل چلن والیاں دے پیراں نال کچی سڑک اُتے دھوڑ دے بدل اُٹھ رہے سن۔ چھیتی ہی ساریاں دا مونہہ سر گھٹے نال لنبیاں گیا۔ چہرے پچھاننے اوکھے ہو رہے سن۔ فوجیاں دی جیپ اگے پچھے چکر کٹ کے چلن دی تاکید کر رہی سی کیونکہ اج نکالاں تک وہاڑی پجنا سی تقریبن ویہہ میل پینڈا مار کے۔ لوک ہو کے بھر دے، ہنجوسٹ دے، ڈھگدے ڈھیندے بڈھیاں، بچیاں نوں سہارا دیندے واہو واہی چلے جا رہے سن۔

اتھے اک واقعہ ہویا جو ساڈے ٹبر لئی ایس منزل دا سبھ توں بھیانک واقعہ ہے۔ میں کچھ دس آیا ہاں کہ ساڈے نال چاچا دلپ سنگھ تے میرا بھرا جسونت سنگھ سن اتے وچ لٹائی ہوئی سی ایس قافلے دی سبھ توں بزرگ مائی ماتا اندو۔ میری بھین بی بی ونٹی نے دسیا کہ وہاڑی تک ساڈے ماں جی وی ایسے گڈے وچ سن۔ باقی ساریاں وانگ ساڈے ٹبر دے جی وی ہو کے بھر دے جا رہے سن۔ کسے نوں کسے دوجے دا تاں کیہ اپنے آپ دی سدھ وی نہیں سی۔ اچانک کسے نوں بڈھی ماں جی دا خیال آیا۔ جدوں اوہناں نوں ٹوہیا توں اوہناں دا صرف سریر ہی گڈے وچ پیاسی روح اڈاری مار چکی سی۔ ماں جی دی آتما گنجی بار دی جوہ وچ ہی سریر نوں الوداع کہہ گئی۔ ہن کیہ کیتا جاوے؟ اتھے آپو دھاپی پئی ہوئی سی۔ کس نوں ویہل سی ماں جی دی دیہہ نوں آخری غسل دین دی، سوا تیار کرن دا، دُعا منگن دا، دویتاں ہور پرواراں نال گل کر کے انت ماں جی دی دیہہ نوں گل والے کپڑیاں وچ ہی ولیہٹیا گیا۔ بنا اردا سا سو دے، بنا کسے رسم و رواج دے چاچے دلپ سنگھ، جسونت سنگھ تے حوالدار کھر سنگھ نے ماں جی دی دیہہ نوں گڈے توں چکھیا تے وہاڑی دی نہر وچ ”جل پرواہ“ کر دتا۔ ایہہ حشر ہویا چک نمبر 79 دی ساجھی ماتا دا۔ جس ماتا نے چک 79 دے پہلے چلے وچ اگ بالی، جس نے پنڈ وچ آون والے کئی نویں ٹبر دھرواس دے دے کسے، گھروں آنا، گڑ، شکر، دُدھ، گھیو دے دے کسے سائے سن۔ اج اوس نوں خفن وی نصیب نہ ہویا۔ جس ماتا دے ہتھاں دیاں پکیاں ادھے پنڈ نے کھا دیاں سن اج اوس دی دیہہ نوں سہارا دین والا چوتھا بندہ وی کوئی نہ لبھا۔ ہن جدوں ماتا اندو دے پوترے، پڑ پوترے سارے ہی سارے سوکھے وں رہے ہن۔ ابجے تک ساڈے پروار نوں پروان چڑھاؤن والی ماتا دے نام دا پاٹھ وی نہیں کروایا گیا۔

ایہہ ساڈے ٹبر دے ناں تے اک کلنگ ہے۔ ایہہ لیکھ پنجابی ٹریبون وچ چھپن  
چھوں مینوں کئی چھٹیاں آئیاں کہ پاٹھ ہن وی کرواؤ۔ ایسں شامل ہواں گے اتے  
ایسں پاٹھ دا بھوگ اکتوبر 1993 نوں اربن اسٹیٹ۔ فیز I پٹیا لہ دے گور دوارے  
وچ پایا گیا تے کئی پاٹھک کافی دور توں آ کے شامل ہوئے۔

ٹکالاں نوں ایہہ قافلہ وھاڑی پہنچ گیا۔ پہلی منزل وچ ہی دو گڈے ٹٹ  
گئے کیونکہ بنا مناسب تیاری توں، بنا ضروری مرمت توں اچانک ٹرنا پیا سی۔  
لہناں دو گڈیاں والیاں نے ہن گھر دا بہت ہی ضروری سامان دو جیاں گڈیاں  
تے رکھیا۔ باقی سبھ کجھ راہ وچ ہی سٹ دتا۔ اک گھر نے اپنے کپڑے سیون والی  
مشین وی اتھے سٹ دتی۔ ایہہ مشین اونٹنیں دینیں بڑی نایاب چیز سی۔

دوسرے دن سویرے ایہہ قافلہ پورے والا پہنچن لئی روانہ ہویا۔ ہن سفر  
پکی سڑک داسی پر اتھے قافلے دی گنتی ہوو ودھ گئی سی۔ فوجیاں دی ایسں چھوٹی  
جیسی کھڑی لئی اجڑے بچڑے تے ساہ ستہین لوکاں نوں اینا لہما فاصلہ بچا کے لے  
جانا کافی کٹھن مسئلہ سی۔ پورے والا تک پہنچدیاں اک یا دو گڈے ہووٹے۔  
پیدل ٹرن والیاں وچوں کھیاں دے پیر سچ گئے، کئی بڈھے سریر بالکل ہمت ہار  
گئے۔ اتھے سچ کے ایہہ وی پتہ لگ گیا کہ اگلا سفر خطرے توں خالی نہیں کیونکہ  
اگلے علاقے وچ بھارتی پنجاب وچوں مارکھا کے آئے ہوئے مسلمان پہنچے ہوئے  
سن۔ پورے والا سٹیشن تے ایسے دن سویرے مہاجرین دی اک ٹرین فیروز پور  
ولوں آئی سی۔ ایہہ ٹرین اے سٹیشن تے ہی کھڑی سی پر لوک وچوں اتر کے لاگ  
چاگ دے پنڈاں وچ جاوڑے سن۔ ایہہ گڈی ایہتھوں واپس جانی سی۔ اتھے  
ایہہ بارہا قافلہ اپنے گڈے چھڈ کے ایسں گڈی وچ بیٹھ گیا۔ ایہہ چھوٹی جیہی گڈی  
سی جس دے ڈبے تھوڑے سن تے قافلے دی گنتی بہت زیادہ سی۔ لوکاں نے ہن

بڑے ضروری بسترے تے دو۔ دو چار بھانڈے ہی چکے باقی سبھ کجھ گڈیاں اُتے ہی چھڈ دتا۔ زنانیاں، بچے تے بڈھے گڈی دے ڈیاں دے اندر ڈک دتے تے تقریباً سارے ہی مرد گڈی دی چھت اُتے بیٹھے۔

میں ایس سبب دھ وچ تسلی بخش جانکاری نہیں حاصل کر سکیا کہ گڈی وچ بیٹھن دی رائے کیپٹن برکت سنگھ نے دتی یاں لوکاں نے خود اپنا سبھ کجھ چھڈ کے گڈی اُتے بیٹھن دا فیصلہ کیتا۔ گڈی دی گارڈ گورکھیاں دی سی۔ اک صوبیدار تے صرف پنج جوان۔ ایس بارے وی ٹھیک اطلاع نہیں مل سکی کہ پاکستانی افسراں نے ساڈے قافلے نوں ایس گڈی وچ بیٹھن دی اجازت کیوں دتی۔

گڈی 6 ستمبر نوں سویرے پورے والا توں چلی اتے اگلے سٹیشن پاکپٹن تے جا کے رُکی۔ اتھے پاکستانی پلس نے گڈی تے سوار لوکاں توں سارے ہتھیار لے لئے۔ کرپاناں، لاٹھیاں، ایتھوں تک کہ کسے بڈھے کول سہارے لئی پھرن والی کھونڈی وی نہ رہن دتی۔ گڈی دے دوہیں پاسیں مسلمان ہجوم وی جمع ہو رہیا سی۔ ہُن ایس قافلے والیاں نوں جا پن لگ پیا کہ اتھے بچاؤن والا صرف پر ماتا ہی ہے۔ اپنے فوجی کیپٹن برکت سنگھ تے اوہناں دے جوان تاں قافلے نوں گڈی تے بٹھا کے سدھے لاہور نوں چلے گئے سن۔ ایہہ قافلہ ہُن گڈی والی گارد دے حوالے سی تے گارد نے اپنا فرض بڑی ایمانداری تے بہادری نال نبھایا۔ ہجوم ول نوں ہوائی فائر وی کیجے۔ اک آدمی ٹینکی وچوں آوند اپنی بند کرن لئی ٹینکی تے چڑھ رہیا سی اوس اُتے وی فائر کیتا۔ گڈی دا ڈرائیور گڈی نہ چلاوے اوس نوں بندوق دی نوک تے گڈی چلاؤن تے مجبور کیتا۔ گڈی چلی پرٹری ہولی ہولی۔ راہ وچ چھوٹے چھوٹے سٹیناں تے بلا لوڑ ہی رُکدی رہی۔ گارنوں اک دو تھائیں بھڑکے ہوئے مسلم ہجوم اُتے ہوائی فائر کرنے پئے۔ انت تن گھنٹیاں دا سفر

باراں تیراں گھنٹیاں وچ مُکا کے ایہہ ٹرین رات دے دس وچ دے قریب قصور پہنچی۔ قصور پہنچ کے ایہہ قافلہ گڈی اتوں لہا دتا گیا تے باقی رات ایہناں سہے ہوئے ادھ موئے لوکاں نے سٹیشن تے کٹی، ماحول بڑا خوفناک سی۔ ایسے دن سویرے بھارت وچوں مسلماناں دی اک کٹی وڈھی گڈی آئی سی۔ جس کارن ایڈھر لے لوک بڑے بھڑکے ہوئے سن۔ پاکستانی پلس ایس سکھاں ہندواں دے قافلے اُتے گولی چلاؤن دا کوئی بہانہ لہ رہی سی۔ لوک نیڑے پیندے اک نکلے نوں مسان بکھ گئے کرن جوگا پانی لیندے رہے۔ کسے دور وگدے تلکیاں تک پانی لین جان دا حوصلہ نہیں سی پیندا۔

قصور دے سٹیشن ماسٹر نے اپنی مہربانی کیتی کہ دو بجے پاسے فیروز پور دے ریلوے ملازماں نوں ٹیلیفون کر دتا کہ تہاڈا اک بہت وڈا قافلہ اتھے بیٹھا ہے سویرے اپنی ٹرین بھیج کے اوہناں نوں لے جاؤ۔ اگلی سویرے بڑی لمی ٹرین پہنچ گئی جس نال دو انجن لگے ہوئے سن۔ پورا قافلہ سکھالا ہی ایس وچ سما گیا۔ جدوں سٹیج دریا پار کر کے ایہہ ٹرین نویں بنے بھارت دی حد وچ داخل ہوئی تاں ایڈھر کھڑے لوکاں نے بے کاریاں نال ایہناں دا سواگت کیتا۔ اگوں گڈی وچ بیٹھے لوکاں نے وی جیکارے چھڈے۔ پر ایہناں جیکاریاں وچ جوش تاں کیہ ہونا سی جان وی نہیں سی۔ ایہہ جیکارے نہیں سن سیاستداناں دی عقل نوں روندے لوکاں دے ہو کے سن۔ اوہناں لوکاں دے ہو کے جو اپنا گھر بار ہی نہیں سگوں اپنی انکھ وی گوا کے آئے سن۔ ایس علاقے دے لوکاں نے اپنے وت مطابق قافلے دی چنگی سیوا کیتی۔ گڈی اک تھاں روک کے (شاید حسینی والا ریلوے سٹیشن اُتے) گڈی وچ بیٹھے لوکاں نوں روٹی، پانی تے بچیاں لئی دودھ تک پہنچایا۔ فیروز پور سٹیشن توں لوکاں نوں کیمپ وچ لیجایا گیا۔ کیمپ دا حال مندا سی۔

سرکاری مشینری اچھے حالات نوں سنبھالن لئی تیار ہی نہیں سی۔ نہ ہی اوہناں کول  
 اپنے ذریعے سن۔ بعد وچ پنجاب وچ تاں اے کوئی سرکار ہی نہیں سی تے مرکزی  
 سرکار دا ایدھر دھیان ہی نہیں سی۔ سبھ توں چنگا حل تاں ایہہ سی کہ پنجاب نوں فوج  
 دے حوالے کر دتا جاندا۔ فوج پنجاب دی پوری صورت حال سول ملازماں دے  
 مقابلے بہت چنگی طرح سنبھال سکدی سی۔ کیمپ وی جے فوج دے ماتحت  
 ہوندے تاں ایہناں دی اپنی بھٹری حالت نہ ہندی۔

فیروز پور کیمپ وچ ہیضہ پھیلایا ہویا سی۔ نمونے نال وی موتاں ہو رہیاں  
 سن۔ ڈاکٹری سہولتاں نہ ہون دے برابر سن۔ دوائیاں تاں مل ہی نہیں رہیاں  
 سن۔ اتھے سرکاوٹن لئی وی تھاں نہیں سی۔ ساڈے قافلے وچوں گھٹو گھٹ اک بی  
 بی ہیضے نال مری (میری گھر والی دی تائے دی دھی بی بی مہندر کور) تے دو بچے  
 نمونے دا شکار ہوئے۔

اتھے ملازماں نے جیہڑے پنڈ ساڈے قافلے دے لوکاں نوں الاٹ  
 کیتے کجھ بندے اوہناں نوں دیکھن گئے۔ اتھے نری دبھ اُگی ہوئی سی۔ فصل  
 شاید کسے نے بیجی ہی نہیں سی۔ لوکاں نے صلاح کیتی کہ اچھے بنجر علاقے وچ  
 پیٹھن نالوں چنگا ہے کہ اپنے پرانے پنڈاں نوں چلے۔ اگلے دن لوکی اپنیاں 26  
 سال پہلے چھڈے پنڈاں نوں تڑپے۔ صرف اوہ لوک کیمپ وچ رہ گئے جیہناں دا  
 پچھلا علاقہ وی پاکستان وچ آ گیا سی۔ ایہہ وی جتھے کسے نوں تھاں ملی پیٹھدے  
 گئے۔ میرے سوہریاں دا پچھلا ہور داسی، اوہ تحصیل زیرہ دے پنڈ ڈھنڈیاں وچ  
 بیٹھے۔ میری چھوٹی بھین دے سوہرے کچھے گوجرانوالہ دے سن اوہ ڈھنڈیاں توں  
 کوئی تن میل دور پنڈ کلی بودلا وچ بیٹھے۔ میں اگلی جنوری وچ ایہنیں دوہیں  
 تھائیں گیا۔ ساڈے بار دے مقابلے ایہہ علاقہ نرانرک سی پر پکی الاٹ منٹ

ہوں تک لوکاں نوں اتھے ہی جُون گزارا کرنا پیا۔ دسدے ہن کہ ہن تک ایہہ علاقہ وی کافی ترقی کر چکا ہے۔

ایہناں پاکستان بنیاں علاقیاں وچوں آئے شرنارتھیاں نے پہلے تن چار سال کس طرح بتائے ایہہ اک وکھری کہانی ہے۔ افسوس ہے کہ ایس سمیں دے حالات بارے کسے لکھاری نے کجھ لکھن دا جتن نہیں کیتا۔ میں مربھیاں دے مالکاں نوں ٹوکری ڈھوندے دیکھیا۔ سرداراں دے پتاں نوں سرتے بالن والیاں لکڑیاں چکی شہراں دے بازاراں وچ ہوکا دیندے دیکھیا۔ اک ادھکھڑ سوانی نوں اک قصبے دیاں گلیاں وچ سرتے پاتھیاں دی ٹوکری چکی بوہے بوہے وچدیاں دیکھیا۔ ایہہ اک رجبے چکے گھرانے دی بی بی سی۔ ایس دا پتی پاکستان وچ ماریا گیا سی تے چونہہ بچیاں نوں پالن دی ذمے داری ہن ایس بی بی دے سرے۔ پوٹھوہارتوں آیا اک دھناڈ ہندو ہن جبل پور وچ سڑک دے کنڈھے بیٹھ لاری دا کم کر کے ٹبر پال رہیا سی۔ پنجابوں باہر دے اک شہر وچ (یاد نہیں آرہیا کہ کیہڑا شہر سی) اک بزرگ ہندو جوڑا پھلاں دی رہڑی دھکی جا رہیا سی۔ مائی دی سلوار دیکھ کے میں سمجھ گیا کہ پنجابی ہن۔ حال چال کچھن تے بزرگ نے دسیا لائل پور وچ ساڈا چنگا کاروباری۔ اک پتر تے تن دھیاں سن۔ پتر اودھرا ای ماریا گیا۔ دھیاں وچوں دو ایسے شہر وچ نیں۔ سانوں اپنے کول لے جانا چاہوندیاں نیں پر ایس دھیاں دے بوہے نہیں جانا چاہوندے۔ جتاں چرنین پران چلدے نیں اپنی روٹی آپ کماواں گے۔ جدوں بزرگ ایہہ سبھ کجھ سنا رہیا سی مائی دے اتھرو ڈگ رہے سن۔ میں وی اپنے ہنجونہ ڈک سکیا۔ بزرگ نے اُلٹا مینوں دھیرج دیندیاں کیتا۔ ”سردار جی انج دل ڈھائیاں کیوں گزارا ہووے گا۔ ایس اکیلے نہیں کئی ہو رساڈے نالوں وی ماڑی حالت وچ نیں۔ چنگے دن بیت گئے ماڑے



وی بیت جان گے۔

ایہو جیہے انیکاں لوک میں اکھیں دیکھے پر آفرین ہے پنجابیاں دے کے  
 نے کے اگے ہتھ نہیں اڈیا۔ جیہڑے بزرگ اکیلے اکیلے ریڑھی وی نہیں سن دھک  
 سکدے اوہناں دی انکھ وی دھیاں دے بوہے تک جانا گوارا نہیں سی کردی۔ کے  
 پرانے اگے سوالی ہونا تاں بہت وڈی گل ہے۔ میں پھیرا پیل کردا ہاں اپنے ہانی  
 لکھاریاں نوں کہ کوئی ایہو جیہے اکھیں ڈٹھے حالات قلم بند کر جاوے نہیں تاں ہور  
 پنجہ سالوں نوں کے نے اجیہاں کہانیاں اُتے وشواس ہی نہیں کرنا۔

میں کہانی دسی سی گنجی بار دی۔ پڑھن والیاں نے دیکھ لیا۔ گنجی بار کنج  
 وسدی رہی تے کنج اُجڑی۔ میں احسان مند ہاں اپنے مہربان مٹر پنجابی ٹریبون  
 دے ایڈیٹر سردار ہر بھجن سنگھ ہلوار وی دا جیہناں دی کرپا صدقہ میں گنجی بار سنبدھی  
 ایہہ ویروا پڑھن والیاں تک پہنچا سکیا ہاں۔ میں دھنوادے ہاں اوہناں پیاریاں دا  
 جیہناں نے چٹھیاں راہیں یاں زبانی میری حوصلہ افزائی کیتی یاں رتجھ نال گنجی بار  
 دے حالات پڑھے۔ انت وچ گنجی بار دے وسنیکو تے عزت مند پڑھن والیو۔

الوداع

